


# Tũpa Ñehengagüer



New Testament in Guarayu (BL:gyr:Guarayu)

# Tũpa Ñehengagüer

## New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source files dated 29 Jan 2022  
c27c2d97-c359-59f5-b367-83efb2e33739

## Contents

SAN MATEO . . . . .	1
SAN MARCOS . . . . .	59
SAN LUCAS . . . . .	94
SAN JUAN . . . . .	156
LOS HECHOS . . . . .	200
ROMANOS . . . . .	255
1 CORINTIOS . . . . .	279
2 CORINTIOS . . . . .	304
GALATAS . . . . .	319
EFESIOS . . . . .	328
FILIPENSES . . . . .	336
COLOSENSES . . . . .	342
1 TESALONICENSES . . . . .	347
2 TESALONICENSES . . . . .	352
1 TIMOTEO . . . . .	355
2 TIMOTEO . . . . .	362
TITO . . . . .	367
FILEMÓN . . . . .	370
HEBREOS . . . . .	372
SANTIAGO . . . . .	390
1 SAN PEDRO . . . . .	396
2 SAN PEDRO . . . . .	403
1 SAN JUAN . . . . .	407
2 SAN JUAN . . . . .	413
3 SAN JUAN . . . . .	414
SAN JUDAS . . . . .	415
APOCALIPSIS . . . . .	417

## MATEO REMBICUACHIA JESUS RECOCUER RESENDAR SAN MATEO

*Ava eta oyesu vahe Jesucristo yesu renondeve*

<sup>1</sup> Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

<sup>2</sup> Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. <sup>3</sup> Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. <sup>4</sup> Aram rahir Aminadab, Aminadab rahir Naasón, Naasón rahir evocoyase Salmón, <sup>5</sup> Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, <sup>6</sup> Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

<sup>7</sup> Salomón rahir Roboam, Roboam rahir Abías, Abías rahir Asa. <sup>8</sup> Asa rahir Josafat, Josafat rahir Joram, Joram rahir evocoyase Uzías. <sup>9</sup> Uzías rahir Jotam, Jotam rahir Acaz, Acaz rahir ahe Ezequías. <sup>10</sup> Ezequías rahir Manasés, Manasés rahir Amón, Amón rahir evocoyase Josías. <sup>11</sup> Josías rahir Jeconías tivireta reseve, Babilonia ve mbiguai yuvirecoi vahecuer.

<sup>12</sup> Mbiguai yuvirecoire Jeconías omboyesu Salatiel, Salatiel rahir ahe Zorobabel. <sup>13</sup> Zorobabel rahir Abiud, Abiud rahir ahe Eliaquim, Eliaquim rahir evocoyase Azor. <sup>14</sup> Azor rahir Sadoc, Sadoc rahir ahe Aquim, Aquim rahir evocoyase Eliud. <sup>15</sup> Eliud rahir Eleazar, Eleazar rahir ahe Matán, Matán rahir evocoyase Jacob. <sup>16</sup> Jacob rahir José, María mer, María evocoyase Jesús si secoi. Ahe imembri Tüpa Rembiporavo Poropísirosar.

<sup>17</sup> Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropísirosar haragüer rupi, ahe omomba iri avei ambuae catorce yesu yoapi agüer.

*Jesucristo yesu agüer*

<sup>18</sup> Na ehi Jesucristo oyesu aracahe. María, ichi, ahe omenda pota vahe José rese. Oyesu yuvirecoiêhi viteseve rumo, Espíritu Santo pīratasa pipe imembi. <sup>19</sup> Evocoyase José, imevi, ahe ava seco catupri vahe, “Tapoño ayase ava icuaêhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe. <sup>20</sup> Aipo opihañemoñeta reseve oque. Iquerve rumo, Tüpa rembiguai oyemboyecua chupe aipo ehi: “José, David suindar, eresiquiyei rene María rese nde menda água. Esepia, Espíritu Santo sui ou imembirã. <sup>21</sup> María virecose omembri, pemondora sererguã Jesús. Esepia, ahe oipísirora omu judío eta yangaipa sui” ehi.

<sup>22</sup> Co rupi opa yaviye yande Yar remimombehugüer aipo ehi vahecuer iñehe mombehusar aracahe:

<sup>23</sup> “Cuña ndaseco marai vahe imembira. Ahe imembri rer-ra Emanuel” ehi

(‘Tūpa yande rese ité secói’ oya aipo ehi).

<sup>24</sup> Omahese José, Tūpa rembiguai oyeupe ñehe agüer omboyeroya ité. Ichui omenda María rese cute. <sup>25</sup> Ndoyapo vitei eté rumo mbahe oyese yuvireco. Yipindar imembira rane ité, ahese José omondo Jesús sererguã.

## 2

*Ava yasitata rese oyembohe vahe ari sêsa cotindar yuviraso pītani repia*

<sup>1</sup> Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sêsa coti sui Jerusalén ve. <sup>2</sup> Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sêsa coti sui imboetei ãgua —ehi yuvireco chupe.

<sup>3</sup> Aipo ihese, mborerecuar Herodes oyembosiquiye tēi, ava Jerusalén pendar avei egüe ehi pãve yuvireco. <sup>4</sup> Iyavei cūrteimi opa omonuha uca pahí rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Poropširosar? —ehi.

<sup>5</sup> Ahe omboyevi yuvireco chupe:

—Ahe ohara Judea rupi Belén ve —ehi—. Esepia, Tūpa ñehe mombehusar Miqueas rembicuachiagüer pipe aipo ehi:

<sup>6</sup> ‘Pe, tecua mini Belén pipendar, ndahei ivi coti tēi vahe ambuae tecua Judá pipendar sui peico.

Esepia, pe sui osēra mborerecuar che recua iguar Israel yocuai ãgua’ ehi —ehi yuvireco Herodes upe.

<sup>7</sup> Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pipe ité vo pesepia ramo aipo yasitata?” ehi. <sup>8</sup> Oyeupe mombehu pare, omondopa Belén ve aipo ehi chupe:

—Peso evocoyase, peseca pītani. Acoi peyosuse, co rupi avei peyevi cheu icua uca ãgua. Che avei evocoyase tasomi imboetei —ehi angahu chupe.

<sup>9</sup> Aipo oyeupe he pare, yasitata rese oyembohe vahe osiriño voi yuviraso. Ahe pipeve yasitata oyemboyecua iri senonera. Ichui pītani recosa rese tupri tecua Belén ve opita yasitata. <sup>10</sup> Sepiase, ovihareté yuvireco. <sup>11</sup> Ipare yuviroique oi pipe, osepia pītani ichi María reseve yuvireco. Ichui oñenopiha soval imboeteisa pipe. Ipare opöhe ombahe riru pipe yuvireco oicuvêhe vaherã oporerrecosa sepirusu vahe oro, itaisi, ambuae mbahe sñacua vahe mirra serer vahe avei. <sup>12</sup> Yuviroyevise güecuave yuviraso, ndoyuviroyevi iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae peri rupi iyevi ãgua.

*Jesús pītani seroñemisa Egipto ve*

<sup>13</sup> Aipo ava yepipi pare, José upe oyemboyecua Tūpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepitara acoi che amombehuse voi nde yevi ãgua. Esepia, mborerecuar Herodes osecara pītani yuca ãgua oico” ehi chupe.

<sup>14</sup> Ahe p̄itu p̄ipeve voi José v̄iraso p̄itani ichi reseve Egipto ve. <sup>15</sup> Aheve yuv̄irecoi co mborerecuar Herodes mano r̄aro. Co rupi imboav̄iyesa T̄upa ñehe mombehugar remimombehuḡuer: “Egipto sui anose che Rah̄ir” ehi vahe.

*Herodes oyuca uca ch̄ihivahe eta*

<sup>16</sup> Mborerecuar Herodes rumo oñemoiró iteanga yasitata rese oyembohe vahe ombopa t̄eisa rese. Sese, “Toyuv̄iraso sundao tecua Belén ve, toyucapa ch̄ihivahe cuimbahemi yuv̄ireco opacatu ñuv̄irío arav̄iter ov̄ireco vahe, ch̄ihivahemi catu vahe avei, ahe tecua iv̄irindar p̄ipe avei no” ehi. Esepia, omoñetase yasitata rese oyembohe vahe yuv̄ireco, oicua ahe arav̄iter opa c̄uritei. <sup>17</sup> Ëḡüe ehi yaviye T̄upa ñehe mombehugar Jeremías remimombehuḡuer aipo ehi vahe:

<sup>18</sup> “Oyeendu ava Ramá ve.

Ahe Raquel oyaseho ité omembireta manose; ndoyembov̄iha catui eté ip̄ipe” ehi.

<sup>19</sup> Mborerecuar Herodes manore, Egipto ve José upe oñehe iri T̄upa rembiguai iquerve aipo ehi: <sup>20</sup> “Eñarapuha, eroyev̄i p̄itani ichi reseve Israel recuave. Esepia, opa omano p̄itani yuca potasar yuv̄ireco” ehi.

<sup>21</sup> Aipo oyeupe hese, oñarapuha, viroyev̄i p̄itani ichi reseve Israel recuave. <sup>22-23</sup> Peri rupi oyanduse rumo Arquelao vu recoyar mborerecuar chinise, ahese oyembosiqūiye aheve oso ãgua. Coiyemi t̄ei iquerve T̄upa, “Peso Galilea iv̄i rese” ehi chupe. Ichui yuv̄iraso tecua Nazaret ve. Aheve opita yuv̄ireco cute. Ëḡüe ehi yaviye T̄upa ñehe mombehugar remimombehuḡuer: “‘Nazaret pendar’ ehira serecosa” ehi vahe.

### 3

*Juan Oporoãpiramo vahe iv̄i iporup̄ir̄ehisa rupi secoi*

<sup>1</sup> Ipare Juan Oporoãpiramo vahe T̄upa recocuer rese oñehe oico Judea iv̄i rupi ava yemboerecuat̄ehisave <sup>2</sup> aipo ehi: “¡Pemboasi pe angaipa; peyev̄i T̄upa upe! Esepia, co T̄upa mborerecuasa c̄oimi secoi yandeu” ehi.

<sup>3</sup> Co Juan rese niha oñehe ȳip̄ive T̄upa ñehe mombehugar Isaías aipo ehi güembicuachiaḡuer p̄ipe:

“Oyeendu ñehesa ava yemboerecuat̄ehisave:

‘Pemoingatu yande Yar raperã; pemoh̄ivi tupri avei’ ehi” ehi aracahe.

<sup>4</sup> Juan turucuar ahese camello raḡuer apopri, sumbicuasa mbahe p̄irer, sembihu evocoyase tucru, eiri caha p̄ipendar avei. <sup>5</sup> Opacatu ava Jerusalén pendar, Judea rupindar tecua, iai Jordán rerov̄ica pendar avei yuv̄iraso iñehe rendu <sup>6</sup> oangaipaḡuer mombehu ãgua. Ahese Juan oñapiramo iai Jordán p̄ipe.

<sup>7</sup> Yuḡueru atise rumo fariseo iyavei saduceo oñeapiramo uca ãgua, Juan aipo ehi ahe ava upe: “¡Pe mboi mboetasa t̄ei peico! ¿Ava vo, ‘Pesera T̄upa ñemoirosa ou vaherã sui’ ehi tupri t̄ei p̄eu? <sup>8</sup> Ȳipindar toyecua tupri rane T̄upa upe pe yev̄isa pe angaipa mboasisa p̄ipe. <sup>9</sup> Iyavei ndapeyeroyai chira ‘ore Abraham suindar oroico’ pe hesa rese t̄ei pe ñep̄isiro ãgua. Esepia, T̄upa oicatuño ité co ita sui Abraham suindar nungar tupri apo ãgua oyeupe nara yepi. <sup>10</sup> Hacha niha imoingatusa voi eté opacatu iv̄ira ndihai vahe sapo rupi yasia ãgua. Ichui yasia pare imondosa tatave. <sup>11</sup> Che i p̄ipe t̄ei opoãpiramo T̄upa upe pe yevi ãgua. Oura rumo ambuae che raquicuei, ahe pe ãpiramora Esp̄iritu Santo tata nungar p̄ipe. Ahe seco

pĩrata catu vahe secoi che sui. Sese cheu ndiyai eté ahe ipĩtaquisã yora ãgua ichui. <sup>12</sup> Ahe oipehara mbahe rãhi ihĩgüer sui. Sãhi evocoyase oyapocatura, ihĩgüer rumo omondora tata apirẽhi vahesave” ehi.

*Jesús ãpiramosa*

<sup>13</sup> Ipare Jesús oso Galilea sui iai Jordán ve Juan recosave ‘tache ãpiramo’ oya. <sup>14</sup> Yipĩndar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo ãgua? —ehi.

<sup>15</sup> —Ëgüe tehiño aipo. Iyacatu yayapora Tũpa porocuita —ehi Juan upe.

Evocoyase Juan, “Aviye” ehi chupe. <sup>16</sup> Oãpiramo pare, osẽ ive sui. Ahe pipeve voi iva oyemboi tupri, aheseve avei osepia Tũpa Espĩritu ogüeyise ou iharive apĩcasu nungar. <sup>17</sup> Iyavei oyeendu ñehesa iva suindar aipo ehi vahe: “Co che Rahĩr, che rembiaisu. Sese aviharete vichico” ehi.

## 4

*Jesús recoãhasa*

<sup>1</sup> Ipare Tũpa Espĩritu viraso Jesús ava yemboerecuaẽhisave ‘tosecoãha Carugar’ ohesa pipe.

<sup>2</sup> Aheve cuarenta ari, cuarenta pĩtu ndocarui. Sese ndasĩepoi eté oico.

<sup>3</sup> Evocoyase oyemboya Carugar sese secoãha ãgua, aipo ehi chupe:

—Tũpa Rahĩr ité nde recose, co ita sui eyapo pan cĩritei —ehi.

<sup>4</sup> Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tũpa Ñehengagüer reroya pipe ava yuvirecovera yepi’ ehi —ehiño chupe.

<sup>5</sup> Ichui Carugar viraso Jesús Jerusalén maranehi pipendar tũparo torre apiterve. <sup>6</sup> Aheve aipo ehi chupe:

—Tũpa Rahĩr ité nde recose, eviapi cohava sui. Esepia niha, icuachiapri pipe:

‘Tũpa oyocuaire güembigui eta nde rãro ãgua.

Ahe nde mopuhara yuvireco que ñepeĩ ita nde momara rãgüer sui’ ehi —ehi Carugar chupe.

<sup>7</sup> Evocoyase omboyevi Carugar upe:

—Icuachiapri pipe rumo aipo ehi avei no: ‘Nderesecoãhai chira nde Yar Tũpa’ ehi —ehi chupe.

<sup>8</sup> Ipare Carugar viraso iri ivĩtri ivate vahe apiterve secoãha ãgua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, <sup>9</sup> aipo ehi:

—Che rovai ereñenopĩhase che mboeteisave, co opacatu mbahe nde rembiepia amondora nde mahera —ehi Carugar chupe.

<sup>10</sup> Aipo oyeupe hese:

—Eyepepi che sui cĩritei, Carugar —ehi—. Esepia, icuachiapri: ‘Emboetei nde Yar Tũpa, ahe güeraño tupri avei eremboyeroyara’ ehi —ehi Carugar upe.

<sup>11</sup> Ahese Carugar oyepepi ichui. Ipare Tũpa rembiguai yuvirogüeyi Jesús rese hañeco ãgua yuvireco.

*Jesús omboipi oporombohe Galilea rupi*

<sup>12</sup> Jesús oyanduse Juan roquendasa, oso Galilea ivi rese Nazaret ve. <sup>13</sup> Ndopítai rumo aheve. Osoño Capernaum ve, aheve opita. Ahe tecua ipa Galilea ivi, ivi Zabolón iyavei Neftalí rupi avei. <sup>14</sup> Na ehi yaviye Tūpa ñehe mombehúsar Isaías rembicuachiagüer aipo ehi vahe aracahe:

<sup>15</sup> “Co ava ivi Zabolón pendar, Neftalí pendar, para guasu ivirindar, iai Jordán rovaindar iyavei Galilea pipendar ndahei vahe judío,

<sup>16</sup> ahe aviye pítumimbisave yuvirecoi vahe, osepia ramo vahe tesapesa yuvireco; iyavei mano rãgüer pipe yuvirecoi vahe upe avei aviye oyecua ramo vahe tesapesa” ehi.

<sup>17</sup> Ahe ari suive Jesús omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cõimi eté Tūpa mborerecuasa secoi” ehi.

*Jesús, “Perio che rupi” ehi irungatu pira mbohasar upe*

<sup>18</sup> Coiye ipa Galilea ivi oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco. <sup>19</sup> Evocoiyase:

—Pe pira recasar peico. Perio che rupi. Na peye aveira ava reca água cheu nara —ehi chupe.

<sup>20</sup> Aipo he ramoseve, opoi opira mbohasa sui yuvireco, yuviraso supi.

<sup>21</sup> Coi coti catu aipo Jesús osepia ambuae mbia Santiago tivri Juan reseve, ahe uguapi yuvinoi carite pipe oyesupa Zebedeo piri; omoingatu opira mbohasa yuvinoi. <sup>22</sup> “Perio che rupi” he ramoseve, opaño oporaviquisa sui opoi yuvireco, oseyañõ oyesupa, yuviraso supi.

*Jesús ombohe ava rehii*

<sup>23</sup> Jesús evocoiyase oguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa resendar. Oporombogüera avei opacatu-catu tēi mbaherasisa ava vireco vahe sui. <sup>24</sup> Oyepotase rumo serãcua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, carugar vireco vahe, que nañaca pōrai vahe iyavei ndoguatai vahe. Ahe opa tupri ombogüera.

<sup>25</sup> Ëgüe ehi ava rehii oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

## 5

*Jesús oporombohe ivitri ve*

<sup>1</sup> Ñepe ari pipe, ava rehii repiase, Jesús oyeupi ivitri rese. Aheve uguapi oĩ. Ahese semimbohe oyemboya yuvireco sese. <sup>2</sup> Ichui omboipi imbohe aipo ehi:

<sup>3</sup> “Sorivete catura acoi ava oicuae mbahe ipane vahe Tūpa rese ité güeco tupri água. Esepia niha, chupe nara ité Tūpa mborerecuasa.

<sup>4</sup> “Sorivete catura acoi ava oyaseho vahe oviharēhisa pipe. Esepia niha, Tūpa omboura viharetesa chupe coiye.

<sup>5</sup> “Sorivete catura ndaseco asimi vahe. Esepia, ahe chupe imondosara co ivi imahera curi.

<sup>6</sup> “Sorivete catura ava oipota vahe teco catupriisa Tūpa suindar. Esepia, chupe ité ahe imondosara.



<sup>7</sup> “Sorivete catura acoi ava oporoparaisuereco vahe. Esepia, ahe Tūpa oiparaisuerecora.

<sup>8</sup> “Sorivete catura acoi ava ipihañemoñeta tupri vahe. Esepia niha, ahe osepiara Tūpa yuvireco curi.

<sup>9</sup> “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

<sup>10</sup> “Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

<sup>11</sup> “Perorivete catura pe acoi ava iñehe-ñehe tēise pēu, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco. <sup>12</sup> Pe rumo peyembovihanora. Esepia, ivave tuvichá vahe porerecosa peipisira curi. Ēgüe ehi avei niha yipindar evocoi ava ramoi Tūpa ñehe mombehusareta mombaraisu yuvireco aracahe” ehi.

*Jesús reroyasar aviye yucrí iyavei tesapesa yuvirecoi ava upe*

<sup>13</sup> “Co ivi pipe pe aviye yucrí peico opacatu ava upe. Yucrí rumo nasehe irise, ndayaicatui imoehe iri āgua, ndiporusai chietera; imombopasara ava pirunga āgua yuvireco.

<sup>14</sup> “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi āgua. <sup>15</sup> Iyavei ndayamoendii chira tataendi mbahevri ve tēi. Iyacatu rumo yasupi ivate sendave opacatu oi pipendar ava resape āgua. <sup>16</sup> Pe ēgüe peye aveira pemboyecua ava eta upe pe recocuer aviye vahe. Ipipe sui toamboeti yande Ru Tūpa iva pendar yuvireco” ehi ava rehi upe.

*Jesús oporombohe Moisés porocuaíta rese*

<sup>17</sup> “Aní chira, ‘Co mbia revo oporombohe Tūpa ñehe mombehusar rembicuachía mboyeroyaēhi āgua iyavei Moisés porocuaíta cuachiapri mboyeroyaēhi āgua avei no’ peye tēi cheu. Ēgüe ehi rumo che ayu imboaviye āgua. <sup>18</sup> Supi eté co iva, ivi avei yandeu oime vitemiseve, ndipoi chietera que ñepeí yepé Moisés porocuaíta, que ambuae Tūpa ñehe mombehusar rembicuachiagüer ocañi tēi vahe; ñepeí-peí porocuaíta imombehupri imboavíyesaño itera. <sup>19</sup> Sese acoi ava ndoviroyai vahe que ñepeí mborocuaítamira viña, ombohe avei ava seroyaēhi āgua, ahe evocoiyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuaíta yuvireco iyavei oporombohe vahe yuvireco sese, ahe evocoiyase Tūpa osecomboivate catura omborerecuasave curi. <sup>20</sup> Iyavei amombehu pēu: acoi pe reco ivi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuaíta rese oporombohe vahe recocuer sui avei, ahes ndapeiquei chietera Tūpa mborerecuasave” ehi.

*Jesús oporombohe ñemoiroēhi āgua rese*

<sup>21</sup> “Pe peicua acoi pe ramoi aracadendar upe aipo ehi vahe: ‘Peroroyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirá’ ehi. <sup>22</sup> Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ēgüe ere tēi vahe eico’ ehi vahe ambuae ava upe, ahe serasosara porandu āgua mborerecuar ivate catu vahe rovai. Acoi ava rumo oñehe marase seroírosave ambuae ava upe, ahe iyacatu imondosa ité tata guasuve.

23 “Sese Tūpa upe pe porerecosa reropovēhesave tūparo pipe pemahen-duhase ava pe amotarēhimbar rese, <sup>24</sup> peseya rane pe porerecosa aheve; peyevi rane pe amotarēhimbar upe pēu iñero āgua rese. Acoi peñerose oyeupe, ahesave voi peyevi, tapeicuavēhe pe porerecosa Tūpa upe.

25 “Iyavei peyeamotarēhise, peñero voi oyeupe peyoepiase. Anise, aviyeteramo coiyecatu tēise pe mombehu tēira pe amotarēhimbar mborerercuar upe pe reraso āgua. Ichui aviyeteramo ahe pe roquenda ucara. <sup>26</sup> Supi eté aipo ahe pēu: Ndapesēi chietera acoi peyemboepipase voi eté pesēra ichui” ehi.

*Jesús oporombohe yemboaguasaēhi āgua rese*

27 “Peicua niha Moisés porocuaita yipindar: ‘Peaguasai rene ambuae ava rembireco rese’ ehi vahe. <sup>28</sup> Che rumo aipo ahe pēu: Acoi ava omahese cuña rese ipotasa pipe, ahe inungar oyapo vahe ité mbahe sese oipha pipe yepi.

29 “Iyavei inungar que pe resa pe acato cotindar oipota rai ucasa mbahe pēu pe mboangaipa āgua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve. <sup>30</sup> Iyavei inungar que pe po pe acato cotindar pe mboangaipa ucasa, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

*Jesús oporombohe ava mendasa sui poiēhi āgua rese*

31 “Iyavei aipo ehi Moisés aracahe: ‘Opoi potasa que omenda vahe oyesui, iyacatu cuachiar imondosa poisa resendar mborerercuar rovai yuvireco chupe’ ehi. <sup>32</sup> Che rumo aipo ahe pēu: ava opoise güembireco sui, cuña ndoyaviise mbahe, ahesave ombopihañemoñeta tiētera güembireco mboaguasa uca āgua. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

*Jesús oporombohe Vu Tūpa rer poru tēiēhi āgua rese*

33 “Iyavei peicua acoi aipo ehi vahe pe ramo upe aracahe: ‘Pemboaviye itera pemoiingatutu tuprise Tūpa rer pipe mbahe pemombehu vahe yepi’ ehi. <sup>34</sup> Che rumo, ‘Ndapeñehei chira que mbahe rer pipe, iva rer pipe tēi avei’ ahe pēu. Esepia, ahe niha Tūpa renda; <sup>35</sup> ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerercuar ivate catu vahe recua. <sup>36</sup> Pe āca rer pipe avei ndapeñehei chira. Esepia, ndapeicatui chira que ñepepe pe ha momorochi āgua, imou āgua avei. <sup>37</sup> Sese niha peñehese, ñepepe reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

*Jesús oporombohe yande amotarēhisar upe mbahe tēi mboyeviēhi āgua*

38 “Peicua acoi Moisés porocuaita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sãi ichui, sãi avei senosesara’ ehi vahe. <sup>39</sup> Che rumo aipo ahe pēu: Aní chira pemboyevi pēu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. <sup>40</sup> Porandusave pe rerasose pe camisa rerocua āgua yuvireco pe sui, pe sacco avei pemondoñora chupe. <sup>41</sup> Ñepepe legua rupi evosii co mbahe rese cheu’ ehise que ava pēu, pe rumo perasoñora

ñuvirío legua rupi chupe. <sup>42</sup> Iyavei oporanduse que pe mbahe rese yuvireco pëu, pemondoño avei chupe. Aní chira perecatêhi sese” ehi.

*Pesaisu pe amotarêhimbar*

<sup>43</sup> “Iyavei pesendu ñehesa yipindar: ‘Pesepia potai rene pe amotarêhimbar, pe mboripar güeraño pesaisu’ ehi vahe. <sup>44</sup> Che rumo aipo ahe pëu: Pesaisu catu pe amotarêhimbar iyavei peyeroqui pe momara potasar rese. <sup>45</sup> Evocoi nungar apo pipe pe Ru Tüpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. <sup>46</sup> Pe raisupar güeraño pesaisu catu tēise, ndapeipisii chietera porerecosa evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi. <sup>47</sup> Ndahei yande mboripar upe güeraño yayapora ‘avirave’. Esepia, ava ndoicuai vahe avei Tüpa oyapo ‘avirave’ omboripar upe yuvireco yepi. <sup>48</sup> Sese pe recocuer perecora pe Ru Tüpa iva pendar seco catupri vahe nungar” ehi.

## 6

*Jesús oporombohe mbahe aviye vahe apo ãgua rese*

<sup>1</sup> “Tüpa upe mbahe peyapo potase, ‘Tache repia ava yuvireco’ ndapeyei chira. Esepia, ãgüe peyese, ndapeipisii chietera pe Ru Tüpa iva pendar porerecosa. <sup>2</sup> Evocoiyase iparaisu vahe rese peporerecose, ‘Tamombe-hupa ava upe vichico’ ndapeyei chira inungar ava Tüpa reroyasar angahu tēi yuvireco yepi. Tüparove iyavei ocar rupi mimbí omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pëu: Ëgüe ehi vahe rumo opa voi oipisi porerecosa co ivi pipe tēi yuvireco. <sup>3</sup> Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. <sup>4</sup> Peporereco catu ava pe repiaêhisa pipe; pe Ru Tüpa niha mbahe ndoyecuai vahe osepia. Ahe omboura porerecosa pëu opacatu ava rembiepiave curi” ehi.

*Jesús oporombohe yerure ãgua rese*

<sup>5</sup> “Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opüha-püha catu tüparo pipe oyeroqui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pëu: Ëgüe ehi vahe opa voi eté co ivi pipeve tēi oipisi porerecosa yuvireco. <sup>6</sup> Iyacatu rumo pe, peyeroqui potase, peiquera pe rêta pipe peyeoquendara pe ae pe yeroqui ãgua pe Ru Tüpa upe. Evocoiyase pe Ru Tüpa oicua vahe mbahe pe rembiapo, iporeredora pe rese.

<sup>7</sup> “Iyavei peyeroquise, ndapemboyevi-yevii chira pe ñehe pe poranduse mbahe rese Tüpa upe inungar ava Tüpa ndoicuai vahe. Ahe omboyevi-yevi oyeruresa ‘Tüpa revo co rupi yande mboyeroya vaira’ ohesave yuvireco viña. <sup>8</sup> Aní chira inungar tēi peico. Esepia, pe Ru Tüpa oicua pe porandu renondeve mbahe ipane vahe pëu. <sup>9</sup> Sese aipo peyera peyeroqui:

‘Ore Ru Tüpa, ivave ereico vahe, imboeteipri nde rer tasecoi.

<sup>10</sup> Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

<sup>11</sup> Embou ore rembihu ari yacatundar oreu co ari pipe.

12 Iyavei ndeñero ore angaipa rese oreu inungar ore oreñero ore amotarēhimbar upe.

13 Ore mboangaipa ucai rene eve; eipeha mbahe naporai vahe ore sui' peyera.

14 “Esepia, pe amotarēhimbar upe peñerose, pe Ru iva pendar avei iñerora pēu; 15 ndapeñeroise rumo, ahe avei niñeroi chietera pēu” ehi.

*Jesús oporombohe yecuacusa rese*

16 “Acoi peyecuacuse, ndapemboyecuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyeacu vahe, tehí ava yande repiasar yuvireco yandeu’ ohesa pipe tēi. Supi eté aipo ahe pēu: Ēgüe ehi vahe opa voi oipisi porerocosa ava güepia pipe tēi yuvireco. 17 Pe rumo peyecuacuse, peñeaca monodoro tupri, peyovai tupri aveira. 18 Evocoyase, ‘Co oyeacu vahe’ ndehi chira ava yuvireco pēu. Pe Ru Tūpa, ndayasepiai vahe, güeraño oicuar pe yecuacusa. Ahe evocoyase iporerocora pe rese curi” ehi.

*Mbahe porañeté vahe oime ivave*

19 “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoí omboaso ati-ati imocañipa, iyavei sáve-sáve tēi opochi ati-ati oapocatusave, imonda vahe avei evocoyase imondaño sese pēu. 20 Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi água. 21 Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei” ehi.

*Yande resa inungar tataendi yande recocuer uve*

22 “Iyavei yande resa inungar tataendi yande retecuer upe. Evocoyase yande resa aviyesa, opacatu yande retecuer upe osesape; 23 acoi imarase rumo, opacatu yande retecuer pītumimbisave tēi secoi. Tesapesa oime vahe yande rese, ahe ogüese rumo yande sui, mbahe tēi eté, pītumimbi nungar opacatu yande recocuer upe” ehi.

*Guarepochi pota raisa; Tūpa mboyeroyaēhisa*

24 “Iyavei ndipoi chietera que ava ñuvirío güerecuar omboyeroya vahe. Esepia, ñepeí oyamotarēhira imboyeroya potaēhisa pipe, ambuae evocoyase osaisu catura imboyeroysa pipe. Ēgüe peye avei, ndapeicatu Tūpa mboyeroya guarepochi pota raisa pipe” ehi.

*Tūpa osáro guahireta*

25 “Iyavei ndapeyemomahenduha guasu ai chira mbahe pe remihura rese pe recove água, pe ihu água rese, pe turucuarã rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no. 26 Pesepia vírai eta oveve vahe: nomahetii vahe, nomonuhai avei, ndoyapocatu avei mbahe yuvireco. Pe Ru Tūpa iva pendar ité niha omoime mbahe itohu. ¡Pe rumo ivate catu vahe ité peico vírai sui! 27 Ndipoi que ñepeí pe pāhu pendar oicatu vahe opihañemoñetas pipe tēi güecocuer mopucu iri água.

28 “Ndahei chira pe turucuarã rese tēi peyemomahenduha guasu ai. Pemahecu ru mbahe potri caha pipendar rese: ndoporaviquií eté iyavei ndoipiai oturucuarã. 29 Iyavei yepe mborerecuar guasu Salomón víreco

setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. <sup>30</sup> Tüpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe! <sup>31</sup> Sese, ‘¿Mbahe pīha yahura, yaihura?’ Iyavei, ¿mbahe pīha yamondera?’ ndapeyei chira pe yemomahenduha guasu aisa pipe. <sup>32</sup> Ava Tüpa reroyasarēhi aipo nungar reseño tēi ipihañemoñeta yuvireco yepi. Pe Ru Tüpa iva pendar rumo oicua ité pēu mbahe ipane vahe. <sup>33</sup> Pemahenduha rane Tüpa rese pe recocuer tupri pipe ipovrive mbahe pe yapo āgua semimbotar rupi, ahese omboura opacatu co mbahe ipane vahe pēu. <sup>34</sup> Peyemomahenduha guasa ai eme mbahe peyapo vaherā rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vaherā yepi.

## 7

*Aní, “Oyavi mbahe” peye voi ambuae upe*

<sup>1</sup> “Ndiyai, ‘Oyavi ité mbahe’ peye voñño tēi ambuae ava upe; evocoyase Tüpa, ‘Oyavi mbahe’ ndehi chira pēu. <sup>2</sup> Esepia, inungar pe ambuae ava upe peico, ēgüe ehi aveira niha Tüpa pēu. <sup>3</sup> ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia! <sup>4</sup> Ndiyai pēu, ‘Che toropitivi mbahe nde rembiavi rese’ peye vaherā chupe. Esepia, ¡pe peyavi guasu catu mbahe ichui! <sup>5</sup> ¡Pe Tüpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

<sup>6</sup> “Pemondo eme mbahe maranehi ava cave nungar tēi upe, iyavei ndapemondo chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

*Peporandu Tüpa upe pēu mbahe ipane vahe rese*

<sup>7</sup> “Peporandu mbahe rese Tüpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa pipe Tüpa upe, ahese imbousara pe porandusa pēu. <sup>8</sup> Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeriquisa pipe omota vahe oquenda Tüpa upe, chupe imboisara.

<sup>9</sup> “Ndi poi eté revo que ñepei pe pāhu pendar omondo vaherā ita tēi guahir upe pan rese oyeupe poranduse. <sup>10</sup> Que pira rese oyeupe poranduse revo, ndomondo chiaveira mboi tēi chupe. <sup>11</sup> Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

<sup>12</sup> “Acoi mbahe peipota vahe ambuae ava oyapo vaherā pēu, ahe tupri avei peyapora chupe. Ahe niha Moisés porocuita iyavei Tüpa ñehe mombehusareta porombohesa” ehi.

*Oime peri icāhimi vahe ava recocuer upe nara*

<sup>13</sup> “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso; <sup>14</sup> teco

apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

*Ivira aviye vahe icuasa iha rese*

<sup>15</sup> “Coiye yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui. <sup>16</sup> Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sāchi ati vahe sui. <sup>17</sup> Evocoiyase ivira aviye vahe, iha aviye avei; ivira naporai vahe, iha naporai avei no. <sup>18</sup> Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. <sup>19</sup> Sese opacatu ivira iha naporai vahe yasiasa yepi. Ichui imondosapa tatave. <sup>20</sup> Na peyera ava recocuer cua sembiapo rese” ehi.

*Ndahei chira opacatu ava yuviroique Tūpa mborerecuasave*

<sup>21</sup> “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iya pendar remimbotar aposar año tupri rumo yuviroiquera aheve. <sup>22</sup> Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu. <sup>23</sup> Che rumo, ‘¡Aní, ndopocuai! ¡Pe mbahe tēi peico vahe, peyepipi che sui!’ aheñora aipo nungar upe” ehi.

*Ñuvirío oi apopri*

<sup>24</sup> “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã. <sup>25</sup> Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. <sup>26</sup> Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriēhisa pipe omopuha vahe ivi cuhi harive tēi güetarã. <sup>27</sup> Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehi upe.

<sup>28</sup> Ñehe renduse ava rehi, “¿Mara ehi rutei?” ehi tēi yuvireco chupe. <sup>29</sup> Esepia, ndahei Moisés porocuita rese oporombohe vahe nungar; ahe rumo oporombohe güeco pīratasa pipe.

## 8

*Jesús ombogüera ava lepra vireco vahe*

<sup>1</sup> Ivitri sui ogüeyise Jesús, ava rehi avei yuvirecoi supi. <sup>2</sup> Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

<sup>3</sup> Aipo ihese, Jesús opoco sese aipo ehi:

—Taa, aipota. ¡Ecuera cūrítei! —ehi.

Aipo ihe ramoseve, ocuera voi eté.

<sup>4</sup>—Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavēhe nde porerecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

*Jesús ombogüera sundao rerecuar remimboacua*

<sup>5</sup> Ipape Jesús oguataño, ěgüe ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe <sup>6</sup> aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

<sup>7</sup>—Aviye, cūrīte evocoiyase asora imbogüera —ehi.

<sup>8</sup>—Aní, che Yar, ndiyai eté che rēta pipe nde reique āgua; iyacatu niha cohapeve ereñeheño tēi icuera āgua. Evocoiyase nde ñehe pipe tēi che remimboacua ocuerara. <sup>9</sup> Esepia, che niha serecuva vahe avei no, areco avei sundao che voya. Ahe chupe, “Eso peve” ahese, cūrītei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

<sup>10</sup> “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar. <sup>11</sup> Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiye. <sup>12</sup> Judío eta rumo, oyeupe ñehesa reroyaēhi pipe setá pītumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

<sup>13</sup> Evocoiyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

### *Jesús ombogüera Pedro rembireco si*

<sup>14</sup> Ipape Jesús oso Pedro rēta ve. Aheve osepia Pedro rembireco si sohí iteangase vupave ou. <sup>15</sup> Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco āgua.

### *Jesús ombogüera setá ava imbaheasi vahe*

<sup>16</sup> Ipape pītu ramose setá caruguar vireco vahe ogüeru yuvireco chupe. Jesús rumo ñepe reseve oñehe pipe tēi omombopa caruguar ava rehii sui, iyavei opacatu imbaheasi vahe ombogüera avei no. <sup>17</sup> ěgüe ehi omboaviye Tūpa ñehe mombehusar Isaías rembicuachigüer aipo ehi vahe aracahe: “Ahe ae virocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

### *Oguata pota tēi vahe ava Jesús rupi yuvireco*

<sup>18</sup> Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so āgua” ehi. <sup>19</sup> Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

<sup>20</sup> Jesús rumo aipo ehi imboyevi chupe:

—Yavaira rumo ndeu. Esepia, vīrai vireco guaiti, iyavei aguara vireco oquesa; che rumo, Ava Riquehīr, ndarecoi que che rēta ité che pituhu āgua yepi —ehi.

<sup>21</sup> Ipape ñepe ivoya aipo ehi chupe:

—Che Yar, che ru manore voi che nde rupiño ité aicora —ehi.

22 —Aní, cūrítei voi eyu che rupi —ehi—. Ēgüe tehiño ava secocuer omano vahe nungar, ahe ae toñeñeti yuvireco —ehi chupe.

*Jesús omombituhu ivitu ai, ohitu vahe avei*

23 Ipare Jesús yuviroha güemimbohe reseve yuviraso carite pipe. 24 Ipa pipe yuviraso pucu ramoseve Jesús oque ou. Ahese aviyeteramo tēi ivitu ai opūha ipa pipe; i ohitu vahe ndiguayii eté, seni-seni carite oyopi. 25 Evocoyase semimbohe yuviraso voi imomahe:

—¡Ore Yar, yande rerasora mo co carite ipive! ¡Yande písiro eve! —ehi yuvireco chupe.

26 Evocoyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe. Ahese oñarapuha aipo ehi itu guasu upe, ivitu ai upe avei no: “Pepituhupa” ehi. Aheseve voi opa tupri opituhu yuvireco.

27 —¿Mara ehi rutei pīha co? —ehi tēi semimbohe yuvireco chupe—. ¿Mara ehi vahe pīha co ava secoi?

Esepia niha, ivitu, para guasu avei omboyeroa yuvireco no —ehi.

*Jesús omboyepēipa carugar Gadara pendar sui*

28 Jesús oguataño güemimbohe eta reseve oyepota ipa rovai Gadara ivi rese yuviraso. Aheve ñuvirío ava carugar vireco vahe yugüeru sovaichi. Ahe ava tehögüer ruvipa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe peri rupi yuvireco yepi. 29 Jesús repia ramoseve rumo, oñhe pīrata yuvireco chupe aipo ehi:

—¡Jesús, Tūpa Rahir, eyepēpi ore sui! Esepia niha, ndoyepota vitei ari nde ore mombaraisu āgua oreu —ehi tēi yuvireco.

30 Namombriimi cuchi rehi yuvirecoi ichui. 31 Carugar evocoyase aipo ehi yuvireco chupe:

—Ore mombopaño tēi eve evocoi cuchi rese —ehi.

32 —Aviye, peso —ehi carugareta upe.

Aipo hese, carugar opa yuvinose ava sui, yuviroique cuchi rehi aviterve. Ipare rumo cuchi ndayaracua iri yuvireco; iivi socuer rupi yuvinoña yuviraso, opa ipa pipe ocañi tēi yuvireco.

33 Yuvinoña evocoyase cuchi rārosar tecuave yuviraso opacatu mbahe güembiepia mombehu ava upe yuvireco. 34 Ichui opacatu ava tecua pendar yuvinose ati Jesús upe, “¡Eso cohava sui!” ehi yuvireco chupe.

## 9

*Jesús ombogüera ava ndoguatai vahe*

1 Ipare Jesús oha carite pipe osasa iri ipa rovai oso güecua Capernaum ve. 2 Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuase co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopose, che ñero nde angaipa rese ndeu —ehi.

3 “¡Co mbia oyemboivate ai tēi vahe, Tūpa ñehe nungar pipe tēi oñhe!” ehi Moisés porocuaite rese oporombohe vahe yuvireco chupe. 4 Jesús rumo oicua ipihañemoñetasa, sese aipo ehi chupe:

—¡Mahera pepihañemoñeta rai pe yapisacasa rereco! 5 ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha,



anise, ‘Epūha, eguata’ hesa tie? <sup>6</sup> Tapeicua ru che, Ava Riquehir, areco mborerecuasa co ivi pipe ava angaipa upe che ñero āgua —ehi.

Evocoyase aipo ehi imbaheasi vahe upe:

—Epūha, esupi nde rupa seraso nde rētave —ehi.

<sup>7</sup> Ahese opūha voi, oso güētave. <sup>8</sup> “¡Too! ¿Mara ehi rutei vo?” ehi ava rehi yuvireco imboeteisave. “Esepia, ahe niha ombou opīratasa ava upe” ehi yuvireco chupe.

*Jesús, “Erio che rupi” ehi Mateo upe*

<sup>9</sup> Ichui osose Jesús, che repia, che Roma pendar mborerecuar guasu upe guarepochi roerocuasa mesave che rēise. Ipare aipo ehi cheu:

—Erio che rupi —ehi.

Evocoyase apūha, aso voi supi.

<sup>10</sup> Ahe ari pipeve Jesús güemimbohe reseve yuviroique che rētave. Ambocarú setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei.

<sup>11</sup> Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pāhuve tēi? —ehi seroīrosa pipe yuvireco chupe.

<sup>12</sup> Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo oseca yuvireco. <sup>13</sup> Peyapīsaca icuachiapri aracahendar aipo ehi vahe rese: ‘Poroparaisuerecosa aipota; ndaipotai mbahe cheu serocuavēhepri tēi’ ehi. Esepia, ndayui ava seco catupri vahe reca, ěgüe ehi rumo ayu ava angaipa viyar reca —ehi Jesús ava eta upe.

*Yecuacu rese ñehesa*

<sup>14</sup> Ipare Juan Oporoāpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

<sup>15</sup> Ahe rumo omboyevi ahe ava upe:

—¡Ndiyai eté ichohopri mendasave ndoyembovihai yuvireco imer oicovese ipāhuve! Oimera rumo ari imer reraso āgua ichui curi. Ahese ramo oyecuacura yuvireco cute —ehi.

<sup>16</sup> “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoyase tuvicha catu-catuño ité. <sup>17</sup> Iyavei ndiyai ava uva ricuer piasu oyapocatu siru mbahe pিরer cuacua vahe pipe. ěgüe ehise, mbahe pিরer opura viña, ocañi tēira, uva ricuer avei evocoyase ocañi tēi aveira viña no. Acoi uva ricuer ipiasu vahe mbahe pিরer ipiasu vahe pipe yapocatupri rumo oyoya ndoyemomarai yuvireco” ehi.

*Jairo rayri iyavei cuña Jesús turucuar rese opoco vahe*

<sup>18</sup> Jesús oporombohe viteseve, ou mborerecuar oñenopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

<sup>19</sup> “Aviye” ehi. Evocoyase opūha yuviraso güemimbohe reseve supi.

<sup>20</sup> Ahe pipeve cuña doce araviter rupi suvi ndopai vahe opoco saquicuei coti iturucuar popi rese. <sup>21</sup> Esepia, ahe aipo ehi opiha pipe: “Yepe

que iturucuar popi resemitēi apocora, acuerara rumo” ehi. <sup>22</sup> Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cūrīteitēi nde yeroyasa pipe —ehi.

Aipo ihe ramoseve, cuña ocuera voi eté.

<sup>23</sup> Oyepotase Jesús mborerecuar rētave, osepia omimbi vahe iyemoin-gatupase omano vahe tī āgua, ava yaseho atise avei no. <sup>24</sup> Ahese aipo ehi ava oyaseho vahe upe:

—Pesēpa cohavē sui. Co cuñatai nomanoi; oque tēi ou —ehi.

Ahe ava rumo opucaeate atīño seroyaēhisave yuvireco. <sup>25</sup> Ichui opa ava omose, ahese oique oi pipe oipopisi cuñatai. Evocoyase ahe oñarapuha voi. <sup>26</sup> Co sembiapo evocoyase oyandupa voi opacatu tecua rupi yuvireco.

*Jesús ombogüera ñuvirío ava ndasesapisoi vahe*

<sup>27</sup> Acoi osēse evocoi oi sui Jesús, ahese ñuvirío ndasesapisoi vahe osaquicue moña, osapucaí yuvireco chupe aipo ehi:

—¡Jesús, David suindar, ore paraísuerecomi tēi eve! —ehi pucu-pucu yuvireco chupe.

<sup>28</sup> Oi pipe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera āgua rese peye? —ehi.

—Nde reroyasa ité, ore Yar —ehi yuvireco.

<sup>29</sup> Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

<sup>30</sup> Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

<sup>31</sup> Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

*Jesús ombogüera niñehengatui vahe*

<sup>32</sup> Ichiri ramoseve rumo, ambuae ava viroyepota ava niñehengatui vahe carugar rerecosar Jesús upe yuvireco. <sup>33</sup> Ichui omosese carugar, iñehengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

<sup>34</sup> Fariseo eta rumo aipo ehiño yuvireco:

—Carugar rerecuar pīratasa pipe co mbia omose carugar ava sui —ehi tupri tēi yuvireco chupe viña.

*Jesús oiparaisuereco ava*

<sup>35</sup> Ichui opacatu tecua rupi Jesús uguata oporombohe tūparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no. <sup>36</sup> Osepiaase ava rehii, oiparaisuereco yuvireco. Esepia, ahe oñemosañō tēi mbahe rasicuer pāhūve inungar ovesa ndovirecoi vahe guārosar yuvireco <sup>37</sup> Evocoyase aipo ehi güemimbohe upe:

—Supi eté mbahe miti imonuhapirā setá iteanga; sese oporaviqui vahe rumo moviromi tēi. <sup>38</sup> Sese peporandu mbahe miti Yar upe, ahe tomondo ava imonuha āgua —ehi güemimbohe eta upe.

## 10

*Jesús oiporavo doce tupri apóstol*

<sup>1</sup> Evocoiyase, “Perio” ehi Jesús doce güemimbohe upe. Chupe omondo güeco pīratasa carugar ava sui imboyepepi āgua iyavei iporombogüera āgua opacatu tēi mbahehasisa sui.

<sup>2</sup> Ahe ava doce tupri apóstol yuvirecoi vahe: yipīndar Simón Pedro, ahe tivri Andrés; ambuae Santiago, Zebedeo rahir, ahe tivri Juan; <sup>3</sup> Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; <sup>4</sup> iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

*Jesús oyocuai güemimbohe Vu mborerecuasa mombehu āgua*

<sup>5-6</sup> Ipare oyocuai güemimbohe imondo aipo ehi chupe: “Pesora yipīndar judío recua rupi. Esepia, inungar ovesa ocañi vahe, ěgüe ehi tēi secocuer yuvireco. Evocoiyase pesoi rene ndahei vahe judío recua rupi iyavei ndapeiquei chira tecua Samaria ve” ehi. <sup>7</sup> “Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu. <sup>8</sup> Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepepi serecosar sui. Esepia niha, peipisi pīratasa ndasepii vahe. Sese peyapoño evocoi mbahe guarepochi pisiēhisa pipe.

<sup>9-10</sup> “Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiveira pe mbahe riru, iyavei ambuae pe turucur, pe pitaqui; peyesendar güeraño tupri perasora. Pe pococa avei ndaperasoi chira” ehi.

<sup>11</sup> “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi. <sup>12</sup> “Evocoiyase peique ramoseve oi pipe, peyapora, ‘Avirave, Tūpa tape rovasa’ peyera chupe. <sup>13</sup> Acoi aviyeve oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisii chira Tūpa porovasasa yuvireco. <sup>14</sup> Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave. <sup>15</sup> Evocoiyase supi eté ari cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

*Yamotarēhiprira Jesús reroyasar*

<sup>16</sup> “¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora. <sup>17</sup> Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco, <sup>18</sup> ichui pe reraso aveira mborerecuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei. <sup>19</sup> Acoi pe rerasose mborerecuar upe yuvireco, ‘¿Mbahe pīha amombehura chupe?’ ndapeyei chira; acoi peñehe potase rumo, Tūpa omondora pe ñehe āgua pēu. <sup>20</sup> Esepia, ndahei chira peyesui tēi peñehe, pe Ru Tūpa Espiritu pemoñehe ucara.

<sup>21</sup> “Ipare rumo ava vivri omondora oamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhira oyesupa yuca uca āgua yuvireco che recocuer rese. <sup>22</sup> Iyavei opacatu ava

ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipĩsĩropri yuvirecoira curi. <sup>23</sup> Iyavei acoi pe mañeco tēise ñepeu tecuave yuvireco, ahese peyepipiñora ichui ambuae tecua pipendar upe che recocuer mombehu ãgua. Supi eté Ava Riquehir oura ndapemboaviye viteiseve pe guatasa judío recua rupi.

<sup>24</sup> “Ñepeu yepe niha ava oyembohe vahe ndahei eté ivate catu ombosesar sui; que ava rembiguai ndahei avei ivate catu vahe güerecuar sui. <sup>25</sup> Iyavei semimbohe, ‘Aviye ité’ ehiñora ombosesar osecoupitise. Ēgüe ehi aveira rembiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

*¿Uma sui pĩha siquiyesara?*

<sup>26</sup> “Sese ndapesiquiyei chira ava pe amotarēhimbar sui. Esepia, yaposa vahe imombehupirēhi cūrteu, icuasaño itera curi; iyavei mbahe ñomipri, icuasaño aveira no. <sup>27</sup> Acoi che amombehu vahe pitumimbisave pēu, pemombehu ari pipe coiyé, iyavei acoi amombehu vahe pēuñomi, perosapucau pe rēta harive imombehu opacatu ava upe. <sup>28</sup> Iyavei ndapesiquiyei chira acoi ava peyuca potasar sui. Esepia, ndoicatu niha ava hã mocañi ãgua yuvireco. Tũpa sui rumo pesiquiye catura. Esepia, ahe oicatu yande retocuer, yande hã reseve imocañi ãgua tata guasu pipe” ehi.

<sup>29</sup> “Yamondo niha ñuvirío vĩraimi repirã ñepeimi guarepochi yepi. Yande Ru Tũpa ndoipotaise rumo, ndoviapi chietera que ñepeu vĩraimi” ehi. <sup>30-31</sup> “Sese pesiquiye eme. Esepia, pe niha ivate catu vahe ité peico opacatu vĩrai sui. Supi eté Tũpa niha oicua opacatu ñepeu-peu pe ha retacuer” ehi.

*“Che aicua Jesucristo” ehi vahe opacatu ava rovaque*

<sup>32</sup> “Acoi ava ‘che aicua Jesucristo’ ehi vahe opacatu ava rovaque, che avei evocoyase: ‘Co ava che rupindar secoi’ ahera che Ru iva pendar upe. <sup>33</sup> Acoi ava ‘che ndahei Cristo rese aico’ ehi vahe rumo cheu ava rovaque, che avei evocoyase, ‘Ndahei co che rupindar secoi’ ahera che Ru iva pendar upe.

*Jesús royasa pipe sui oimera yeamotarēhisa*

<sup>34</sup> “Mbahe tupri ai revo güeru co ivi pipe’ ndapeyei chira cheu. Ēgüe ehi rumo che yusa omoime ucara yeamotarēhisa. <sup>35-36</sup> Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

<sup>37</sup> “Iyavei acoi oyesupa tēi osaisu catu vahe che sui, ahe ndiyai eté secoi che voyarã; inungar avei osaisu catu vahe guahir, anise guayri che sui. <sup>38</sup> Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco ãgua. <sup>39</sup> Acoi ava oipisiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisiroira” ehi Jesús güemimbohe eta upe.

*Porrecosa resendar ñehesa*

<sup>40</sup> “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. <sup>41</sup> Acoi ava oipisi tupri vahe ambuae ava Tũpa ñeha mombehusar secosa rese, ahe oipisi aveira porrecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porrecosa inungar tupri. <sup>42</sup> Iyavei acoi

omondo vahe que chĩhi i sōhisa vahe que ñepeí seco mbegüemi catu vahe toĩhu che reroyasar seco rese, ahe oĩpisi aveira Tũpa suindar porrecosa” ehi.

## 11

*Juan Oporoãpiramo vahe ovoya omondo Jesús recocuer cua uca ãgua*

<sup>1</sup> Opase Jesús oyocuai doce güemimbohe, ahese yuvĩraso oporombohe Tũpa Ñehengagüer rese judío recua rupi yuvĩreco.

<sup>2</sup> Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese <sup>3</sup> imboporandu ãgua: “¿Nde ité vo Tũpa Rembiporavo aipo sãrombri ereico? anise, ¿oime tie ambuae orosãro vaheã?” ehi yuvĩreco chupe.

<sup>4</sup> Ipape omboyevĩ chupe aipo ehi: “Peso, pemombehupa Juan upe mbahe pe rembiepia iyavei pesendu vahe. <sup>5</sup> ‘Ndasesapĩsoi vahe osareco tupri cūrítei yuvireco, ipãri-pãri vahe uguata tupri, iyavei lepra rerecosar ocuerapa tupri, ndayapĩsai vahe avei yapĩsapa, omano vahe opa ocuerayevĩ yuvireco iyavei ava iparaisu vahe upe imombehupa pĩsirosa resendar ñehesa’ peyera chupe. <sup>6</sup> ¡Oviharetera acoi ava oyeroyaño vahe che rese!” ehi Juan rupindar upe.

<sup>7</sup> Juan rupindar yuvĩraso pare, Jesús omboĩpi imombehu ava upe Juan recocuer: “¿Pesepiase Juan recocuer ava porēhisave capihiaata ivĩtu ombova-mbova vahe nungar pĩha? <sup>8</sup> Anise, ¿pesepia tie iturucuar porañete ai vahe iyemboeteise? ¡Aní! Ēgüe ehi vahe rumo secoi mborerecuar guasu rētave yepi. <sup>9</sup> Evocoiyase pesepiase, ¿‘Ava’ peye vo pe chupe? ¿Tũpa ñehe mombehusar ité pĩha? Taa, ahe ité. Evocoi niha ivate catu vahe Tũpa ñehe mombehusar sui. <sup>10</sup> Ahe chupe ité Tũpa icuachiapri aracahendar pipe aipo ehi:

‘Che amondora nde renondeve che ñehe mombehusar nde raperã moin-gatu ãgua’ ehi.

<sup>11</sup> Supi eté ndĩpoi que ñepeí ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tũpa mborerecuasave rumo ava seco mbegüemi catu vahe ivate catu ichui.

<sup>12</sup> “Juan yusa suive tupri Tũpa povri pendar oiporara mbahe tēi yuvireco. Osãha-sãha ava opĩratasa pipe imocañi ãgua. <sup>13</sup> Opacatu Tũpa ñehe mombehusar rembicuachía pipe, Moisés porocuita icuachiapri pipe avei imombehupa Juan yusa rupive co Tũpa mborerecuasa resendar. <sup>14</sup> Yepe yavaira seroya ãgua pēu viña, Juan rumo, Tũpa ñehe mombehusar Elías. Ahe imombehupri ou vahe. <sup>15</sup> Acoi ava osendu pota vahe che ñehe, toyapĩsacaño sese” ehi.

<sup>16</sup> “¿Mbahe rese pĩha amboyoyara ava recocuer cūríteindar? Esepia, co ava inungar acoi chĩhivahe iguayĩ tēi vahe ocar rupi. Ipape oñehe pucu-pucu omboripar upe yuvireco aipo ehi: <sup>17</sup> ‘Oromoñehe tēi mimbĩ pēu, ndapepivoi eté rumo iyavei orosapucái tēi sapucaisa viharēhisa resendar pēu, pe rumo ndapeyasehoi eté’ ehi. <sup>18</sup> Esepia, ouse Juan Oporoãpiramo vahe, ahe ndohui tembihu sepĩrusu ai vahe iyavei ndoĩhui uva ricuer ipĩrata vahe, sese, ‘Co mbia carugar vireco vahe oyese’ peye tupri tēi chupe. <sup>19</sup> Coiye che ayu, Ava Riquehĩr, acarú, aĩhu tupri avei. Ipape, ‘Co icaru guasu ai vahe secoi, iĩhu guasu ai vahe avei’ peye cheu; ‘Ava angaipa viyar mboripar tēi iyavei guarepochi rerocuasar mboripar

tēi' peye avei cheu. Acoi ava supi eté vireco vahe Tūpa mbahecuasa, ahe icuasara sembiapo rese yepi" ehi.

*Tecua ndiporeroyai vahe*

<sup>20</sup> Ahese Jesús oñehe pīrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocueraí Tūpa upe nara yuvireco. Evocoyase aipo ehi chupe: <sup>21</sup> "¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pāhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharēhisa resendar, tanimbu avei omondora oāca rese oangaipa mboasisa pipe yuvireco viña no. <sup>22</sup> Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. <sup>23</sup> Pe avei no, tecua Capernaum pendar pemoha co ivave pe reco āgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pāhuve yaposara viña, cūrítei oime vitera ahe tecua viña. <sup>24</sup> Sese, pe peipisira ivate catu Tūpa ñemoirosa ava Sodoma iguar sui ari cañi pipe coiye" ehi.

*Peyu cheu mbituhusa reca*

<sup>25</sup> Iyavei ahe ari pipe Jesús oyerure: "Che Ru, aviye ndeu. Nde niha i va pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecu va vahe sui; eremboyecua rumo ava seco mbegüemi vahe upe. <sup>26</sup> Ēgüe ere niha mbahe nde remimbotar apo, che Ru" ehi.

<sup>27</sup> "Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tupri. <sup>28</sup> Peyu cheu opacatu icueraí vahe. Che amondora pe pituhu āgua. <sup>29-30</sup> Peico che povrive, peyembohe avei che sui. Esepia, che ndache reco asii, iyavei che povrive pe recosa ndayavaimi eté. Ahese ramo oimera mbituhusa pēu" ehi.

## 12

*Mbituhusa ari pipe Jesús remimbohe oipoho trigo yuvireco*

<sup>1</sup> Mbituhusa ari pipe Jesús yuviraso güemimbohe rese, oguata mbahe miti pāhu rupi. Ahese semimbohe ndasiepoi. Evocoyase trigo rāhii oipoho-pohomi güemihura yuvireco. <sup>2</sup> Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

<sup>3</sup> Ahe rumo omboyevi ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco.

<sup>4</sup> Ahe niha yuviroique ité tūparo pipe pan imboeteipri Tūpa upendar hu āgua ondugüer reseve. Ahe chupe acoi ndipotasai ihu āgua yuvireco viña. Judío pahi yuvirecoi vahe upeño ité niha ipotasa ihu āgua yepi.

<sup>5</sup> ¿Ndapeyeroquií vo Moisés porocuaíta resendar pipe? Esepia, judío pahi tūparo rese hañecosar ndopituhui eté tūparo pipe yuvireco mbituhusa ari

pipe yepi. Ndahei rumo oyemboangaipa ipipe yuvireco. <sup>6</sup> Cūritei cohave oime ava ivate catu vahe tūparo sui. <sup>7</sup> Evocoiyase pe ndapesenducuai eté Tūpa Ñehengagüer aipo ehi vahe: ‘Che aipota peporoparisuereco, aní chira peropovēhepa porerecosa mbahe mimba tēi cheu’ ehi vahe. Pesenducuaese viña, ahese, “Oyavi mbahe” ndapeye voi chira che remimbohe mbahe ndoyavi vahe upe viña. <sup>8</sup> Esepia, Ava Riquehir mbituhusa ari rerecuar ité secoi —ehi fariseo eta upe.

*Mbia ipo nomii vahe Jesús ombogüera*

<sup>9</sup> Ichui olose Jesús, oique judío tūparove. <sup>10</sup> Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pñha mbituhusa ari pipe ava imbogüerasa yepi’ —ehi yuvireco chupe.

<sup>11</sup> Evocoiyase Jesús aipo ehi imboyevi:

—¿Ava vo pe pñhu pendar acoi mbituhusa ari pipe oviapise seimba ovesa ivicuarve ndosoi chira senose viña? <sup>12</sup> ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

<sup>13</sup> Ahese aipo ehi aipo mbia upe:

—Eichoho nde yiva —ehi.

Evocoiyase oichohose oyiva, ocuera tupri voi inungar ambuae iyiva. <sup>14</sup> Evocoiyase fariseo opa yuvinose yuviraso oyemoingatu Jesús yuca āgua yuvireco.

*Yaviye aracahendar imombehupri Jesús recocuier resendar*

<sup>15</sup> Evocoiyase Jesús oicuase fariseo pñhañemoñetasa, osē oso, ava rehi avei yuviraso supi. Setá avei imbaheasi vahe ombogüera, <sup>16</sup> iyavei, “Che mombehui rene ava upe peyé” ehi. <sup>17</sup> Ēgüe ehi yaviyepa Tūpa ñehe mombehugar Isaías remimombehugüer:

<sup>18</sup> “Co ité che mboyeroyasar che rembiporavo.

Ahe asaísu etepri.

Sese ité ayembovñha.

Amondora che Espíritu chupe.

Ahe omombehu aveira mbahe ihívi vahe opacatu ava ivi pipendar upe.

<sup>19</sup> Noiñehopepi-epi chira ava, nasase-sasei tēi chiveira; iyavei ndosendui chietera ava iñehe ocar rupi.

<sup>20</sup> Iyavei nomopei chietera que ñepeí pataviimi oyeapa vahe; nombogüei chiveira tataendi sātachiñomi tēi vahe.

Ēgüe ehira mbahe ihívi vahe pipe opacatu secopipa.

<sup>21</sup> Evocoiyase opacatu tecua pendar ava ndahei vahe judío oyeroyara yuvireco sese’ ehi

Isaías aracahe.

*“Jesús vireco carugar pñratasa oyese” ehi tēi ava yuvireco*

<sup>22</sup> Ichui ava ndasesapisoi vahe, noñehei vahe carugar rerecosar viraso Jesús upe yuvireco. Evocoiyase Jesús ombogüera. Ahese osareco, oñehe avei. <sup>23</sup> Evocoiyase opacatu ava oyepihamondiisave aipo ehi yuvireco: “¿Tūpa Rembiporavo David suindar pñha co?” ehi yuvireco chupe.

<sup>24</sup> Osenduse rumo fariseo, “Co mbia carugar rerecuar Beelzebú pñratasa pipe tēi omboyepepi carugar ava sui” ehi yuvireco.

<sup>25</sup> Oicuaño rumo ipihañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarêhisave yuvireco, ahese evocoi mborerecuar pîratasa ocañi tẽira. Iyavei que tecua pendar, anise, que ava omu rese ovavase oyeupe, oyoya oyemocañi tẽira yuvireco. <sup>26</sup> Ëgüe ehi avei carugar. Esepia, serecuar omboyepese opovri pendar, ovavara oyeupe yuvireco viña. Evocoyase ahe oymocañi tẽira yuvireco. <sup>27</sup> Iyavei pe, ‘Beelzebú pîratasa pipe sui tẽi omboyepi carugar ava sui’ peye tẽi cheu. Evocoyase, ¿ava pîratasa pipe vo pe voya eta omboyepi carugar ava sui yuvireco? Tûpa pîratasa pipese, che avei evocoyase ayapo evocoi nungar ipîratasa pipe. Pe voya ae omboyecua pe ñehe pe rembiavi yuvireco pẽu. <sup>28</sup> Che rumo Tûpa Espiritu pîratasa pipe amboyepi carugar ava sui. Sese cûritei pesepia itẽ Tûpa mborerecuasa.

<sup>29</sup> “Iyavei no, que ava oique potase ambuae ava ipîrata etepri vahe rêtave imbahe rerocua âgua ichui viña, yipindar opa rane itera oñapichi-pichi. Ipare voi opara vîrocua imbahe ichui.

<sup>30</sup> “Iyavei acoi ava ndache mboyoyai vahe, ahe che amotarêhimbar yuvireco; acoi ava ndosecai vahe ava cheu nara, ahe omosai tẽi yuvireco che sui.

<sup>31</sup> “Sese ava upe oimera ñeroisa opacatu angaipa rese iyavei iñehe mara-mara tẽi vahe upe avei. Co catu acoi iñehe-ñehe tẽi vahe Tûpa Espiritu upe, ahe chupe ndipoi chietera ñeroisa. <sup>32</sup> Iyavei acoi ava oñehe-ñehe tẽi vahe che, Ava Riquehir rese, ahe chupe oimeño ñeroisa; acoi oñehe-ñehe tẽi vahe rumo Espiritu amotarêhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

#### *Ava recocuer icuasa sembiapo rese*

<sup>33</sup> “Emoatiro tupri ivira, ahe iha aviyera; nderemoatiro tupriise ivira, ahe evocoyase vîrecora oha naporai vahe. Esepia, ivira icuasa iha rese. <sup>34</sup> ¡Evocoyase pe, mboi nungar tẽi peico vahe, pe recocuer naporaise, ndapeicatui chira mbahe aviye vahe rese pe ñehe âgua! Esepia, pe piha pipe sui tẽi osẽ pe ñehe âgua. <sup>35</sup> Iyavei acoi ava aviye vahe oñehe tupri opihañemoñeta catuprisa pipe; acoi ava recocuer naporai vahe rumo, opihañemoñeta raisa pipe tẽi oñehe. <sup>36</sup> Sese ari cañi pipe opacatu ava opara omombehu oñehe-ñehe tẽisa Tûpa rovai yuvireco. <sup>37</sup> Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

#### *Ava eta ndaseco pôrai vahe oporandu poromondiisa rese yuvireco*

<sup>38</sup> Evocoyase fariseo iyavei Moisés porocuaita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua âgua —ehi yuvireco.

<sup>39</sup> Jesús rumo omboyevi iñehe:

—Pe ava ndaseco pôrai vahe, ndiporeroyai vahe, peporandu tẽi poromondiisa tecocuer cua âgua rese. Che rumo namboyecuai chira ambuae poromondiisa; Jonás recocuer rese gũeraño opomomahenduhara. <sup>40</sup> Esepia, inungar Jonás seci mbosapi ari pira guasu aviterve aracahe, ãgüe ehi aveira Ava Riquehir mbosapi ari ivivrive tuiira omano vahe pâhuve. <sup>41</sup> Evocoyase ari cañi pipe ava tecua Nínive pendar porandusave omombehura ava cûriteindar cañipa âgua. Esepia, Nínive pendar niha



omboasise oangaipa, oyeve Tūpa upe yuvireco Jonás omombehuse Tūpa Ñehengagüer chupe. Cūrítei rumo oime Jonás sui aviye catu vahe pe pāhuve. <sup>42</sup> Iyavei ari cañi pipe cuña mborerecuar guasu irohi coti secua vahe porandusave, omombehura cūríteindar ava cañipa āgua. Esepia, ahe ou amombri sui Salomón mbahecuasa rendu āgua. Cūrítei rumo oime ivate catu vahe Salomón sui —ehi fariseo eta upe.

*Carugar oyeve iri ava güeco agüerve*

<sup>43</sup> “Iyavei carugar osēse ava sui, oguata tēi ivi ipiru vahe rupi opituhu āgua reca. Ipare rumo ndoyosuisse, ipihañemoñeta, <sup>44</sup> ‘Ayeve irira che reco agüerve vicho’ ehi. Aheve oyeveise, osepia iri secocuer inungar oi ndiporusai vahe, sahuvapri tupri. <sup>45</sup> Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. Ēgüe ehi aveira ava cūríteindar ndaseco pōrai vahe upe” ehi.

*Jesús si, tivireta avei*

<sup>46</sup> Jesús oñehe viteseve ava upe, ahese ichi, tivireta reseve ocarve yuvino hai. Ahe oñehe pota yuvireco chupe. <sup>47</sup> Evocoyase mbia omombehu Jesús upe:

—Nde si, nde rivireta reseve co ocarve yuvino hai. Ahe oñehe pota yuvireco ndeu —ehi.

<sup>48</sup> Ahe rumo,

—¿Ava piha che si; ava piha che rivri? —ehi ahe mbia upe.

<sup>49</sup> Evocoyase omboyecua opo pipe güemimbohe eta aipo ehi:

—Co che si eta, co che rivireta. <sup>50</sup> Esepia, acoi che Ru iba pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

## 13

*Mbahe miti sui yembohesa*

<sup>1</sup> Ahe ari pipe Jesús osē oi sui oso, oguapi ipa popive oi. <sup>2</sup> Aheve ava oñemonuha atise yuvireco, oha carite pipe oguapi oi, evocoyase opacatu ava opita ipa popi rupi yuvireco. <sup>3</sup> Ahese omboyoya-yoya oporombohesa setá mbahe rese aipo ehi:

“Ñepe mbia osē omaheti oico. <sup>4</sup> Ahe otiapi-apiise mbahe rāhii oso, moviro oiti peri rupi. Vīrai ogüeyise rumo sese, opaño yuvirohu. <sup>5</sup> Iyavei moviro oiti ivi nayanai vahesave ita pāhuve. Sese cūríteimi sorí; <sup>6</sup> ari tasise rumo, opaño ipiru. Esepia, ndasapoi niha. <sup>7</sup> Iyavei ambuae mbahe rāhii oiti yu pāhuve. Ahe yu rumo sorí poyava catu yuvireco ichui. Sese opaño oyopi. <sup>8</sup> Ambuae rumo oiti ivi aviye vahesave, ahe setá iha imonuhasa; ñepe ihi sui osē cién iha, ambuae sui osē sesenta, ambuae sui treinta. <sup>9</sup> Acoi ava osenducua pota vahe che ñehe, toyapisacaño sese” ehi Jesús ava eta upe.

*¿Mahera piha co yembohesa imboyoyasa ambuae mbahe rese?*

<sup>10</sup> Ichui semimbohe eta oyemboya Jesús rese yuvireco mbahe rese oporandu āgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi. <sup>11</sup> Jesús aipo ehi: “Pēu rumo Tūpa oicua uca ité mbahe ndicuasai vahe omborecuasa resendar; ambuae ava upe rumo ndoicua ucai eté. <sup>12</sup> Esepia, acoi vireco vahe

upe, imondosa catura; acoi ndovirecoi vahe evocoi osenducua raimi vahe serocuasãñora ichui. <sup>13</sup> Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no. <sup>14</sup> Na ehi yaviye Tūpa Ñehengagüer Isaías remimombehu: ‘Pe niha pesendu tēira, ndapeicuai chira rumo; iyavei pesepia tēira, ndapesepiacuai chira rumo.

<sup>15</sup> Esepia, evocoi ava eta upe yavai eté ipiha pipe imbahe reroya ãgua, ndayapisai eté sendu potaēhisave; ndoyemboesapisoi avei sepia potaēhisave.

Esepia, ndosenducua potai opiha pipe yuvireco cheu oyeve potaēhisave ombogüera ãgua’ ehi

Isaías aracahe.

<sup>16</sup> “Pe rumo perorivete ité sepiacuase, pesenducua avei no. <sup>17</sup> Supi eté setá Tūpa ñehe mombehusar iyavei ava seco catupri vahe araca-hendar osepia pota tēi mbahe pe rembiepia, ahe rumo ndosepiyai eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

### *Jesús omombehu yembohesa mbahe miti resendar*

<sup>18</sup> Ipare aipo ehi: “Peyapisaca omaheti vahe recocuer rese. <sup>19</sup> Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe rãhii oviapi vahe peri rupi. Ipare rumo caruguar ou chupe. Ahe ipiha pipe osendu vahe Tūpa Ñehengagüer opa tupriño omocañi ichui. <sup>20</sup> Iyavei acoi mbahe rãhii seitipri ita pãhuve, ahe inungar ava recocuer yipriño osendu vahe, oipisi vahe avei vorivetesa pipe Tūpa Ñehengagüer. <sup>21</sup> Ipare rumo inungar co mbahe miti ndovirecoi vahe guapo oviracua ãgua, ãgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūrteimi seroyaēhisave oyepepi ichui. <sup>22</sup> Acoi mbahe rãhii seitipri yu pãhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe. <sup>23</sup> Acoi itisa vahe mbahe rãhii ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ãgüe ehi avei ava secocuer aviye vahe inungar ñepeipei sãhii sui osé que cien iha, sesenta iha, anise que treinta” ehi Jesús güemimbohe eta upe.

### *Trigo pãhuve caha naporai vahe sui yembohesa*

<sup>24</sup> Jesús omombehu iri co ambuae mbahe rese yembohesa oyoya vahe: “Tūpa mborerecuasa oyoya tupri ava oivi pipe mbahe rãhii oñoti vahe rese. <sup>25</sup> Opacatu ava queseve rumo oyepota yamotarēhisar, caha tēi rãhii oñoti trigo pãhuve oso. <sup>26</sup> Acoi trigo iha potase, supive avei sorí caha. <sup>27</sup> Evocoiyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rãhii aviye vahe ereñoti nde ivi pipe? ¿Que sui ru caha sorí ipãhuve?’ ehi yuvireco chupe. <sup>28</sup> Iyar rumo aipo ehi chupe: ‘Oime revo que che amotarēhisar’ ehi. Evocoiyase oporaviqui vahe oporandu yuvireco chupe: ‘¿Ndiyai piha caha tēi orosapohopara ichui viña?’ ehi. <sup>29</sup> Ahe rumo aipo ehi chupe:

‘Aní, aviyeteramo caha rupive pesapoho tiêtera trigo’ ehi. <sup>30</sup> ‘Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaira oporaviqui vahe caha têi rane rerocua âgua imboapuha uca sapi. Ipare oyapocatura trigo rãhii che mbahe apocatusave yuvireco’ ehi ivi yar” ehi Jesús.

*Yembohesa mostaza rãhii suindar*

<sup>31</sup> Jesús omombehu iri co ambuae mbahe rese yembohesa oyoya vahe: “Tüpa povri pendar oyoya tupri mostaza rãhii rese. Ahe mbia oñoti vahe oivi pipe. <sup>32</sup> Supi eté co mostaza rãhii tahimi catu opacatu ambuae mbahe rãhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sãca rese vïrai rehii oyapo guaitirã” ehi oporombohe.

*Yembohesa pan mboapeposa sui*

<sup>33</sup> Ipare Jesús oporombohe iri ambuae mbahe rese aipo ehi: “Tüpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo âgua yepi” ehi oporombohe.

*Jesús oiporu oporombohe âgua mbahe rese mboyoyasa yepi*

<sup>34</sup> Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe. <sup>35</sup> Co rumo na ehi Tüpa ñehe mombehusar rembicuachiagüer aviye âgua: “Che añehese, amboyoyara che porombohesa ambuae mbahe rese. Iyavei amombehura Tüpa ivi apo suive mbahe niporêhii vahe” ehi.

*Jesús omombehu tupri oporombohesa caha têi resendar*

<sup>36</sup> Ahese Jesús, “Aviye” ehi ava upe. Ipare oique oi pipe. Aheve semimbohe oyemboyapa yuvireco sese ‘tomombehu trigo pâhuve caha oime vahe resendar yandeu’ oya. <sup>37</sup> Evocoyase omboyevi chupe: “Acoi ava mbahe rãhii aviye vahe oñoti vahe, ahe che, Ava Riquehîr. <sup>38</sup> Ivi mbahe miti rupa, ahe ava co ivi pipendar. Iyavei mbahe rãhii aviye vahe, ahe ava Tüpa povri pendar; caha naporai vahe, ahe ava carugar suindar yuvirecoi vahe. <sup>39</sup> Acoi yamotarêhimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tüpa rembiguai ìva pendar yuvireco. <sup>40</sup> Iyavei inungar acoi caha têi imonuhapri sapi âgua, êgüe ehi aveira ari cañi pipe coiye. <sup>41</sup> Evocoyase che, Ava Riquehîr, che rembiguai ìva pendar amondora opacatu ava ambuae omboangaipa uca vahe, mbahe-mbahe têi aposar avei rerocua âgua che povrive yuvirecoi vahe pâhu sui. <sup>42</sup> Ichui omondopara tata guasuve. Aheve oyaseho têira iyavei ombotere-tere têira guai yuvireco. <sup>43</sup> Aheseve voi ava Tüpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

*Mbahe repirusu ñomimbri sui yembohesa*

<sup>44</sup> “Evocoyase Tüpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo têi oyosura viña. Ahe rumo aheve avei oñomi. Ipare vorivetesa pipe opacatu ombahe omondopa co ivi rerocua âgua mbahe sepirusu vahe pota raisa pipe” ehi.

*Mbohîr sepirusu catu vahe sui yembohesa*

<sup>45</sup> “Iyavei Tūpa mborerecuasa inungar ava mbahe rerocuasar oseca vahe mboh̄ir icatupr̄i vahe yepi. <sup>46</sup> Ahe oyosuse mboh̄ir sepi catu vahe, oso opacatu ombahe mondo co sepi catu vahe rerocua āgua.

*Pira mbohasa sui yembohesa*

<sup>47</sup> “Iyavei Tūpa mborerecuasa inungar pira mbohasa. Imondopri ipive. Ipare omboha opacatu-catu tēi pira. <sup>48</sup> Acoi savapipose pira mbohasa, vinose ivi ātasave yuvireco. Aheve oiporavo pira aviye vahe oññaapa ombahe riruve yuvinoi, naporai vahe rumo opaño omombo yuvireco. <sup>49</sup> Ēgüe ehi aveira ari cañi pipe: ahese Tūpa rembiguai iba pendar yuvinosera opacatu ava ndaseco pōrai vahe mboyepepi āgua ava seco catupri vahe sui. <sup>50</sup> Evocoyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guāi yuvireco” ehi.

*Mbahe ipiasu vahe iyavei ocuacua vahe sui yembohesa*

<sup>51</sup> Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

<sup>52</sup> Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

*Jesús Nazaret ve secoi*

<sup>53</sup> Oñhe pare, Jesús osē ichui <sup>54</sup> oyepota güecuave oso. Aheve ombohe ava judío tūparo pipe oico. Evocoyase ahe pendar ava oyepihamondii tēi: —¿Que pīha co ava oyembohe catu ombahecua āgua? iyavei, ¿mara ehi pīha co mbahe poromondiisa apo? —ehi yuvireco—. <sup>55</sup> ¿Ndahei vo acoi carpintero rahir tēi? Ichi niha acoi María, iyavei yuvirecove tivri, ahe Santiago, José, Simón, Judas. <sup>56</sup> Seindri avei niha yuvirecove yande pāhuve. Evocoyase, ¿que pīha oyembohera viña? —ehi tēi yuvireco chupe.

<sup>57</sup> Ipīpe sui ndoviroyai yuvireco. Ahe rumo aipo ehi chupe:

—Tūpa ñehe mombehusar niha omboetei opacatu rupi yuvireco yepi. Secua pipendar, sēta pipendar ae rumo nomboetei yuvireco —ehi.

<sup>58</sup> Evocoyase, ahe ava viroyaēhisa rese, moviro tēi oyapo mbahe poromondiisa ipāhuve.

## 14

*Juan Oporoāpiramo vahe mano agüer*

<sup>1</sup> Ahe ari rupi Herodes, mborerecuar guasu Galilea pendar, oyandu Jesús rerācua. <sup>2</sup> Evocoyase aipo ehi opitiviisar upe: “Juan Oporoāpiramo vahe revo ocuerayevi. Sese oyapo poromondiisa ipirata vahe” ehi.

<sup>3</sup> Esepia niha, yipindar Herodes Juan oipisi, oñapichi carena pipe soquenda āgua vivri Felipe rembireco Herodías sui tēi, <sup>4</sup> “Ndiyai eté nde rembireco nungar ererecora” oyeupe hese.

<sup>5</sup> Herodes oyuca pota Juan viña, osiquiyeño rumo ava eta sui. Esepia, ahe, “Tūpa ñehe mombehusar secoi” ehi yuvireco chupe. <sup>6</sup> Acoi Herodes haragüer mboeteisa pipe rumo aipo cuña Herodías membri osē opivoi ava rehii rembiepiave. Herodes upe evocoyase aviye ai eté. <sup>7</sup> Sese ahe oyemoingatu ñepeí reseve que mbahe oyeupe oporanduse imondo āgua

chupe. <sup>8</sup> Evocoyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoãpiramo vahe ãca poratu pipe cheu —ehi.

<sup>9</sup> Aipo ñehesa nombovihai eté Herodes; ndiya iri rumo, “Aní” ohe ãgua. Esepia, opacatu ava güemimbori eta rovaque aipo ehi. Sese, “Taperu chupe” ehiño. <sup>10</sup> Ahese oporocuai Juan ãca hasia ãgua soquendasave. <sup>11</sup> Ipare viraso poratu pipe cuñatai upe yuvireco. Evocoyase ahe omondo osi upe.

<sup>12</sup> Ahese Juan remimbohe oyepota yugüeru, viraso sete ñoti yuvireco. Ipare yuviraso Jesús upe imombehu.

### *Jesús oyopoi cinco mil cuimbahe*

<sup>13</sup> Jesús oyanduse Juan manosa, ahese ahe ae oso ava porëhisave carite pipe. Ava rehi rumo oyanduse, yuvinose voi güecua sui, ivi rupi yuviraso osupiti secosave yuvireco. <sup>14</sup> Evocoyase osése carite pipe sui, osepia ava rehi. Ahese oiparaisuereco ava eta. Sese opa ombogüera imbaheasi vahe serasopri. <sup>15</sup> Evocoyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

<sup>16</sup> —Aní, ndiyai yuviraso. Pe pemondora mbahe semihura yuvireco —ehiño chupe.

<sup>17</sup> —Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

<sup>18</sup> —Peruño ave cheu —ehi güemimbohe upe.

<sup>19</sup> Ipare aipo ehi ava rehi upe: “Peguapi capihi harive” ehi. Evocoyase oipisi poyandepomi vahe pan, ñuviriomi vahe pira. Ichui omahese iba rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvireco. <sup>20</sup> Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco. <sup>21</sup> Ahe cuimbahe ocaru vahe retacuer cinco mil. Cuña rumo iyavei chihivahe ndipapasai yuvireco.

### *Jesús oguata i hari rupi*

<sup>22</sup> Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. <sup>23</sup> “Aviye” ohe pare ava upe, oyeupi oso ahe ae ivitri rese oyerogui ãgua. Pītuse chupe, opitaño aheve. <sup>24</sup> Aheseve carite oso pucuse ipa popi sui, ivitu ipirata vahe osovaichi yuvireco. Sese ohitu vahe nambegüe-mbegüei ocua sese. <sup>25</sup> Cōhe potase, oguata i hari rupi oso güemimbohe coti. <sup>26</sup> Semimbohe i hari rupi iguatase, oyembosiquiye yuvireco ichui. Sese,

—iNdahei vo evocoi hãgüer secoi! —ehi yuvireco chupe.

<sup>27</sup> Güemimbohe upe rumo aipo ehi:

—iPeyemoviracuaño, che tēi! ¡Pesiquireme che sui! —ehi.

<sup>28</sup> —Che Yar —ehi Pedro—. Nde ité ereicose, taguata i hari rupi vicho nde piri —ehi.

<sup>29</sup> —Erio ru —ehi chupe.

Evocoyase Pedro ogüeyi carite pipe sui, oguata i hari rupi. Osora ipiri viña. <sup>30</sup> Ivitu pīrata repiase rumo, osiquiye ichui. Oso senise rumo ipive,

—¡Che Yar! ¡Che pĩsiromi eve! —ehi.

<sup>31</sup> Ahese cūrteimi voi oipisi Pedro po rese, aipo ehi chupe:

—¡Chĩhi tēi ereyeroya che rese! ¡Mahera ndereyeroya tuprii che rese!  
—ehi.

<sup>32</sup> Oyuvirohase rumo carite pipe, opituhu voi ivitu. <sup>33</sup> Evocoyase carite pipe yuvirecoi vahe oñenopiha sovai,

—¡Supi eté catu nde Tūpa Rahir ereico! —ehi yuvireco chupe.

*Jesús ombogüera imbaheasi vahe Genesaret pendar*

<sup>34</sup> Osasase ipa, oyepota Genesaret ivi rese yuviraso. <sup>35</sup> Opacatu ahe pendar ava oicuase Jesús yepota, ahese opacatu tecuami rupi omombehu-mbehu ava upe yuvireco. Evocoyase viraso imbaheasi vahe chupe, <sup>36</sup> aipo ehi yuvireco: “Topocomi tēi nde turucuar popi rese yuvireco” ehi; evocoyase opacatu sese opoco vahe, ocuerapa voi eté yuvireco.

## 15

*Porombohesa yande mboangaipa vahe resendar*

<sup>1</sup> Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

<sup>2</sup> —¿Mahera vo nde remimbohe ndoguatai yande ramoi aracadendar aracuasa rupi yuvireco? ¿Mahera vo yande porocuita mboaviyeēhisa pipe ndoyepoi ocaru āgua yuvireco yepi? —ehi.

<sup>3</sup> Jesús omboyevi aipo ehi chupe:

—Pe no, ¡mahera ndapemboyeroyai Tūpa porocuita pe ramoi aracadendar aracuasa rupi tēi pe guata āgua! <sup>4</sup> Esepia, Tūpa aipo ehi: “Pemboyeroyara iyavei peipitiviira pe ru, pe si avei no. Acoi ñehe mara vahe oyesupa upe, ahe tomanoño” ehi aracahe. <sup>5</sup> Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo āgua pēu. Esepia, che opacatu mbahe areco vahe imondopri Tūpa upe’ ehise, <sup>6</sup> ahese ndiyai eté ipitivi āgua chupe” peye. Ēgüe peye pe aracua raisa pipe pemocañi Tūpa porocuita peyesui. <sup>7</sup> ¡Pe Tūpa reroyasar angahu tēi peico vahe! Supi tupri ité Tūpa ñehe mombehusar Isaías rembicuachia aracadendar omombehu pe recocer:

<sup>8</sup> ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

<sup>9</sup> Oyerure tupri tēi yuvireco cheu.

Esepia, iporombohesa ava porocuita tēi’

ehi Isaías rembicuachiagüer pipe aracahe —ehi Jesús imombehu.

<sup>10</sup> Ipare,

—Perio —ehi ava rehii upe—. Peyapisaca, pesenducua tupri che ñehe: <sup>11</sup> mbahe oi que vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

<sup>12</sup> Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

<sup>13</sup> Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—. <sup>14</sup> Ēgüe tehiño yuvireco. Esepia, evocoi inungar ndasesapiso vahe viroguata ambuae ava ndasesapiso vahe yuvireco. Ahe evocoyase oyoya voira oviapi ivicuar pipe yuviraso —ehi.

<sup>15</sup> Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

<sup>16</sup> —¿Ndapesenducua vîtei avei catu pe co ñehesa? <sup>17</sup> ¿Ndapeicuai vo opacatu mbahe acoi ava yuru rupi oique vahe oso yaviterve, ipare osê setecuer sui? <sup>18</sup> Ava pihañemoñetasa sui osê vahe rumo iyuru rupi, ahe ava omboangaipa. <sup>19</sup> Esepia, ava pihañemoñetasa sui osê pihañemoñeta raisa, porapichisa, mendasa sui yemboaguasasa, nomendai vahe yemboaguasa têisa, mondasa, temira iyavei ava rese ñemoñeta têisa. <sup>20</sup> Evocoi nungar mbahe rumo omboangaipa ava; ndahei angaipa acoi yande caru renonde yande yepoiêhisa nungar —ehi.

*Cuña ndahei vahe judía viroya Jesús*

<sup>21</sup> Ichui osê Jesús oso, oguata Tiro ivi rupi, Sidón ivi rupi avei. <sup>22</sup> Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membri vireco carugar oyese! —ehi pucu-pucu ou chupe.

<sup>23</sup> Ahe rumo nomboyevii eté chupe. Evocoyase semimbohe oyemboya yuvireco sese aipo ehi:

—Emboyepipi co cuña yande sui. Esepia, sãse pucu-pucu ou yande raquicuei —ehi yuvireco chupe.

<sup>24</sup> Evocoyase aipo ehi güemimbohe upe:

—Che Ru Tüpa rumo che mbou Israel recua pendar upeño. Esepia, ahe ovesa ocañi tēi vahe nungar yuvireco —ehi.

<sup>25</sup> Ahe cuña rumo oñenopiha sovai, aipo ehi chupe:

—¡Che Yar, che pītiviimi eve! —ehi.

<sup>26</sup> Ahe rumo aipo ehi chupe:

—Naporai rumo yarocua pan tahir sui cave tohu yamondo vaherã —ehi.

<sup>27</sup> —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

<sup>28</sup> —¡Cuña, tuvichá nde yeroyasa! Aviye, ãgüe tehi eté nde remimbotar rupi —ehi.

Aipo ihe ramoseve, ocuera voi eté imembri.

*Jesús setá ombogüera ava imbaheasi vahe*

<sup>29</sup> Ichui Jesús osê oso ipa Galilea ivii. Ipare oyeupi ivitri rese oguapi oĩ. <sup>30</sup> Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapisoí vahe, ipãri-pãri vahe, niñhengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. <sup>31</sup> Ichui ava niñhengatui vahe oñehe; ipãri-pãri vahe ocuera tupri; ndoguatai vahe oguata avei iyavei ndasesapisoí vahe osareco yuvireco. Sepiase ava rehii oyepihamondii aipo ehi: “Imboeteipri Israel Tüpa tasecoi” ehi yuvireco.

*Jesús oyopoi cuatro mil cuimbahe*

<sup>32</sup> Evocoyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sêtave sie porêhi reseve amondo. Aviyeteramo oviroviapi-api tiêtera tieporêhi peri rupi yuvireco viña —ehi.

<sup>33</sup> Evocoyase semimbohe aipo ehi yuvireco chupe:

—¿Que sui pīha orosecara tembihu ava rehi upe nara cohave ava porēhisave viña? —ehi yuvireco.

<sup>34</sup>—¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

<sup>35</sup> Evocoyase, “Peguapi ivi harive” ehi ava rehi upe. <sup>36</sup> Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoyase omondopa ava rehi upe yuvireco. <sup>37</sup> Opacatu ava ocaru vahe ihitaro yuvireco. Ipape semimbohe omboapipo iri rane sumbirer siete iruova yuvireco. <sup>38</sup> Cuimbahe ocaru vahe retacuer cuatro mil. Cuña, chihivahe retacuer rumo ndicuasai. <sup>39</sup> Ipape Jesús, “Aviye” ehi ava upe, ahese oha carite pipe oso ivi Magadán rupi.

## 16

*Fariseo iyavei saduceo oporandu poromondiisa rese yuvireco*

<sup>1</sup> Fariseo iyavei saduceo yuviraso Jesús repia secoña ñgua yuvireco viña. “Emoporēhi Tūpa suindar nde recosa poromondiisa pipe oreu” ehi yuvireco chupe.

<sup>2</sup> Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pīra iteanga’; <sup>3</sup> iyavei añihivei: ‘Co pipe ari naporai chira. Esepia, iva rese pīra vai anga, pītu guasu-guas avei’ peye. Pe niha peicua mbahe iva resendar tēi oye-cua vahe mombehu; ndapeicuai rumo mara oyapave co poromondiisa cūrteindar ava upe imombehu. <sup>4</sup> Co ava ndaseco pōrai vahe oyepepi vahe Tūpa sui oporandu poromondiisa rese ‘¿Tūpa suindar ité pīha?’ oyapave. Che rumo namboyecuai chira ambuae poromondiisa chupe; acoi poromondiisa Tūpa oyapo Jonás upe güeraño tupri aseyara chupe” ehi.

Ichui oseyapaño ava rehi oso.

*Fariseo iyavei saduceo porombohesa inungar pan mboapeposa*

<sup>5</sup> Evocoyase semimbohe oyepota ipa rovai yuviraso. Pan sui rumo sesarai eté yuvireco. <sup>6</sup> Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

<sup>7</sup> Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tēi oyeupe yuvireco.

<sup>8</sup> Ahe rumo oicua güemimbohe pīhañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tupri che rese!

<sup>9</sup> ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase?

<sup>10</sup> ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer? <sup>11</sup> ¡Too, mara peye rutei pe aipo senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

<sup>12</sup> Ahese ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

*Pedro oicua uca Jesús Tūpa Rembiporavo secose*



<sup>13</sup> Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

<sup>14</sup> Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tüpa ñehe mombehusar mboetasa” ehi yuvireco ndeu —ehi.

<sup>15</sup> —Pe no, ¿‘Ava co secoi’ peye ru pe cheu no? —ehi güemimbohe upe.

<sup>16</sup> —Nde niha Tüpa supi eté vahe Rembiporavo imombehupri; Tahir ité ereico —ehi Simón Pedro.

<sup>17</sup> —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—. <sup>18</sup> Nde Pedro ereico, co ita guasu harive amopuhara che tüparoguã. Ñepeí yepe manosa ndosecoreroyii chietera opíratasa pipe. <sup>19</sup> Evocoyase che amondo Tüpa mborerecuasa resendar mboisa ndeu; acói, “Aviye” erese que mbahe uve co ivi pipe, êgüe ehi aveira ivave; iyavei, “Aní” erese que mbahe uve co ivi pipe, êgüe ehi aveira ivave —ehi.

<sup>20</sup> Ipare Jesús aipo ehi güemimbohe upe: “ ‘Co Tüpa Rembiporavo Poropísirosar’ peye eme ava upe cheu” ehi.

### *Jesús omombehu omano ãgua*

<sup>21</sup> Ichuive tupri Jesús omboipi imombehu güemimbohe upe oico: “Iya niha cheu che so ãgua tecua guasu Jerusalén ve. Aheve judío rerecuar, pahí rerecuar ivate catu vahe iyavei Moisés porocuaíta rese oporombebohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi. <sup>22</sup> Pedro rumo viraso co cotimi chupe oñehengata ãgua:

—¿Tüpa ndoipotai eté evocoi nungar nde reco ãgua, che Yar! ¡Ndipoi chietera mbahe ndeu! —ehi Pedro chupe viña.

<sup>23</sup> —¿Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tüpa upendar rese, ava nungar tēi nde pihañemoñeta eico —ehi.

<sup>24</sup> Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosiira viña, toyemoingatu voi che recocuer rese oparaisu ãgua iyavei toguata tupri che rupi. <sup>25</sup> Esepia, acói ava güetecuer tēi raisupar, ocañi tēi etera; acói ava omocañi tēi vahe rumo güetecuer che recocuer rese, ahe oñepisírorra. <sup>26</sup> Esepia, ¿aviye ai angahu pñha ava upe opacatu mbahe co ivi pipendar pñsi ãgua, ahe ae tēi omocañise güecocuer yuvireco viña? ¿Mbovi pñha omondora ava güecocuer repirã viña? <sup>27</sup> Esepia che, Ava Riquehir, ayevira che Ru reco píratasa pipe che rembiguai iva pendar reseve curi. Che evocoyase aicuara ñepeí-peí ava rembiapo agüer rupi chupe. <sup>28</sup> Supi eté oimera amove cohava ava nomano vítei chivaherã, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

<sup>1</sup> Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. <sup>2</sup> Aheve, aviyeteramo tēi oñecuñaro güemimbohe rovai. Evocoyase sendi sova inungar ari, iturucuar morochí, sendi avei. <sup>3</sup> Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. <sup>4</sup> Ahese Pedro aipo ehi chupe:

—Che Yar, javiye ai eté cohave yaico! Ereipotase, ayapora mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

<sup>5</sup> Aviyeteramo tēi iva quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu ñehe rese” ehi vahe.

<sup>6</sup> Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. <sup>7</sup> Ahese oyemboya oso güemimbohe rese, oñatoi aipo ehi chupe:

—Pepũha; pesiquiyeyi rene —ehi.

<sup>8</sup> Evocoyase omahe yuvireco sese, ahese ahe güeraño osepia imoha yuvireco.

<sup>9</sup> Ipare yuvirogüeyi ivitri sui aipo ehi evocoi mbosapi güemimbohe upe: —Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

<sup>10</sup> Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

<sup>11</sup> Evocoyase omboyevi güemimbohe upe aipo ehi:

—Elías rane ité niha oura opacatu mbahe moingatu ñgua curi. <sup>12</sup> Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaisura ahe ava povrive vichico —ehi.

<sup>13</sup> Evocoyase semimbohe osenducua ramo ñehe yuvireco. Ëgüe ehi Jesús oñehe Juan Oporoãpiramo vahe rese.

*Jesús ombogüera chihivahe carugar rerecosar*

<sup>14</sup> Viroyepota Jesús güemimbohe ava rehiasave seraso. Aheve mbia oyemboya oso sese, oñenopiha sovai aipo ehi chupe:

<sup>15</sup> —Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no. <sup>16</sup> Sese aru tēi nde remimbohe upe. Nombogüera catui rumo yuvireco —ehi.

<sup>17</sup> —¡Too, ndapeyeroya tupri viteí eté che rese! ¡Co coti tēi vite pe pihañemoñetasa! ¡Mbovi rupi rutei vo aico vitera pe pãhuve che ñemosasa pipe! Peru evocoi chihivahe cheu —ehi.

<sup>18</sup> Ahese oñehe pírata carugar upe chihivahe sui imose. Aheseve ocuera tupri voi eté.

<sup>19</sup> Ipare semimbohe oporandu co cotimi yuvireco chupe:

—¿Mahera piha ndoromose catui eté carugar ichui? —ehi yuvireco.

<sup>20</sup> —Esepia, ndapeyeroya tuprii Tüpa rese. Supi eté sese pe yeroyasa, yepe ndoyavi chira mostaza rãhi tahimi vahe viña, aipo peyera co ivitri upe: ‘Esiri, eso coi coti’ peyera. Evocoyase ivitri osiriño itera. Ahese ndapemboavaimi chira mbahe. <sup>21</sup> Evocoi nungar carugar imosesa yayerurese yande yecuacusa pipe —ehi.

*Jesús omombehu iri omano āgua*

<sup>22</sup> Jesús oguata viteseva Galilea ivi rupi, aipo ehi güemimbohe upe oico: —Che, Ava Riquehir, imondopri aicora che amotarēhimbar povrive. <sup>23</sup> Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.

*Jesús omondo guarepochi tūparo uve nara oyeupe oporandu vahe upe*

<sup>24</sup> Oyepotase Jesús güemimbohe reseve tecua Capernaum ve, aheve guarepochi rerocuasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondo guarepochi tūparo upe nara? —ehi.

<sup>25</sup> —Omboepi niha —ehi Pedro chupe.

Evocoyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborerecuar guasu co ivi pipe yepi? ¿Omu sui pñha, ambuae ava sui tie? —ehi.

<sup>26</sup> Pedro evocoyase omboeyevi chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nomboepii chira yuvireco —ehi—. <sup>27</sup> Guarepochi rerocuasar moñemoiroēhi āgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepi guarepochi. Ahe eraso chupe. Ipipe iyacatura imboepi āgua yandeu —ehi Jesús Pedro upe.

## 18

*¿Ava vo seco ivate catu vahe?*

<sup>1</sup> Ahe ari pipeve semimbohe oyemboya Jesús rese yuvireco mbahe rese oporandu āgua chupe:

—¿Uma vo seco ivate catu vahe Tūpa mborerecuasa pipendar? —ehi.

<sup>2</sup> Evocoyase Jesús: “Erio” ehi ñepi chñhivahemi upe, omondo güemimbohe pñhuve imoha, <sup>3</sup> aipo ehi:

—Supi eté, acoi ndapeñecuñaroise iyavei ndapeicoise chñhivahemi nungar, ahese ndapeiquei chira Tūpa mborerecuasa pipe. <sup>4</sup> Acoi oñemomini vahe rumo inungar co chñhivahemi, evocoi nungar seco ivate catura Tūpa mborerecuasave. <sup>5</sup> Acoi ava oipisi vahe co chñhivahemi nungar che rer pipe sereco, che ité che pisi yuvireco —ehi.

*Iparaisu itera ava oporomboangaipa uca vahe*

<sup>6</sup> “Acoi que ava rumo omboangaipa uca vahe co chñhivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo āgua. <sup>7</sup> Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroatoisa yepi, jahe imboangaipa ucasar rumo iparaisu itera!

<sup>8</sup> “Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apirēhisave ñepi pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve. <sup>9</sup> Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

*Porombohesa ovesa ocañi tēi vahe resendar*

<sup>10</sup> “Peroñroi rene que ñepei chíhivahemi che reroyasar. Esepia, ivave sembiguai che Ru pírindar ité yuvirecoi yepi” ehi. <sup>11</sup> “Che niha, Ava Riquehir, ayu ava ocañi tēi vahe pĩsiro ãgua.

<sup>12</sup> “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepei ichui viña, evocoyase oseya ranera noventa y nueve tēi vahe ovesa ivitri rese. Oyevira ocañi vahe reca oso. <sup>13</sup> Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. <sup>14</sup> Ëgüe ehi avei che Ru ivave secoi vahe, ndoipotai eté que ñepei ava che reroyasar chíhivahemi nungar cañi ãgua” ehi.

*Porombohesa yande ñero ãgua rese*

<sup>15</sup> “Acoi nde mboetasa Tũpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. <sup>16</sup> Nande reroyaise rumo, ahese ereñehera ñepei, anise ñuvirío ava upe nde pítiviã ãgua rese. Ahe avei tosendu pe ñehe. Ahese oimera que ñuvirío, anise mbosapi sendusar. <sup>17</sup> Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tũpa ndoicuai vahe nungar pereco iyavei inungar mbahe-mbahe tēi aposar, ãgüe peye sereco” ehi.

<sup>18</sup> “Supi eté acoi, ‘Aviye’ peyese que mbahe upe co ivi pipe; ãgüe ehi aveira ivave. Iyavei co ivi pipe, ‘Aní’ peyese que mbahe upe, ãgüe ehi aveira ivave.

<sup>19</sup> “Iyavei co amombehu potami avei pēu: Acoi ñuvirío co ivi pipe pe pihañemoñetasa oyoya tuprise que mbahe rese peporandu ãgua pe yeruresa pipe, evocoyase che Ru iva pendar omondora pe porandusa pēu. <sup>20</sup> Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipãhuvé” ehi.

<sup>21</sup> Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi cheu oyapose? ¿Siete yupagüer rupi pñha? —ehi.

<sup>22</sup> —¡Aní! —ehi—. ¡Setenta rupi siete oyupagüer! —ehi Pedro upe.

*Yembohesa ava niñero potai vahe resendar*

<sup>23</sup> “Tũpa mborerecuasa inungar mborerecuar guasu omoingatu pota vahe güembiguai revesa chupe. <sup>24</sup> Evocoyase omboipi imoingatu ãgua, ahese ipítiviãsar güeru ireve ati catu vahe guarepochi rese chupe. <sup>25</sup> Ahe rumo ndovirecoi imboepi ãgua. Sese co mborerecuar oyocuai opítiviãsar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa ãgua cheu’ ehi. <sup>26</sup> Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe. <sup>27</sup> Ahese oiparaisuereco, opoi irevesa sui.

<sup>28</sup> “Aheseve voi rumo sembiguai osēse, osepia ambuae ondugüer oyeupe ndaseta tuprii vahe ireve. Ahe chupe aipo ehi iyesiho pisi: ‘¡Emboepipa acoi nde revesa cheu!’ ehi. <sup>29</sup> ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. <sup>30</sup> Niñero potai eté rumo. ‘Tomboepipa rane ité orevesa cheu’ ehi soquenda uca. <sup>31</sup> Osepiase rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuere

yuvireco. <sup>32</sup> Evocoiyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu. <sup>33</sup> ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi. <sup>34</sup> Ichui serecuar oñemoirosave oyocuai imombaraisu āgua ‘tomboepipa rane ité orevesa cheu’ oyapave.

<sup>35</sup> “Indó, evocoiyase ěgüe ehi aveira che Ru iva pendar pēu ndapeñeroise ité peyeupe” ehi Jesús güemimbohe upe.

## 19

*Jesús oporombohe mendasa sui poiēhi āgua*

<sup>1</sup> Ipare Jesús osē Galilea sui, oso Judea ivi rupi ari sēsa coti iai Jordán rovai. <sup>2</sup> Ava rehii yuviraso saquicuei. Aheve setá imbaheasi vahe ombogüera.

<sup>3</sup> Evocoiyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye piha opoi cuimbahe güembireco sui que mbahe tēi oyapose? — aipo ehi yuvireco chupe.

<sup>4</sup> Ahe rumo omboyevi fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? <sup>5</sup> Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi āgua. Evocoiyase ñuvirío yuvirecoira ñepeí ava nungar’ ehi. <sup>6</sup> Sese ndahe iri ñuvirío, ñepeí vahe ité yuvirecoira. Evocoiyase ava Tüpa omomenda vahe oyese, ndiyai ava tēi omboyepipi yuvireco oyesui—ehi.

<sup>7</sup> Evocoiyase fariseo oporandu yuvireco chupe:

—¿Mahera ru oyocuai Moisés cuimbahe omondo vaheerã güembireco upe cuachiar poisa resendar opoi āgua ichui? —ehi.

<sup>8</sup> —Pe poreroyaēhisa pipe niha Moisés ěgüe ehi pēu. Yipisuive ité rumo Tüpa ndoipotai oyesui opoi āgua yuvireco. <sup>9</sup> Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tēi vahe —ehi fariseo upe.

<sup>10</sup> Ipare semimbohe aipo ehi yuvireco chupe:

—Ěgüe ehise cuimbahe güembireco rese, evocoiyase aviye catu ndayamendai chira —ehi.

<sup>11</sup> —Ndahei chira rumo opacatu osenducua che aipo ahe vahe yuvireco. Tüpa ombou vahe sembiaporã, ahe güeraño osenducua yuvireco —ehi güemimbohe upe—. <sup>12</sup> Esepia, oime pihañemoñetasa ava mendaēhi āgua: amove ohasa suive ndatahii vahe, ambuae nomboahi ucai ava yuvireco, ambuae evocoiyase nimendasei. Esepia, ahe oporaviqui pota Tüpa mborerecuasa reseño ité. Acoi oicatu vahe co ñehesa reroya āgua, tovirioyaño —ehi.

*Jesús osovasa chihivahe*

<sup>13</sup> Ipare ahe pendar güeru moviro chíhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tēi chíhivahe?” ehiño serusar upe yuvireco. <sup>14</sup> Jesús rumo aipo ehi:

—¡Mahera ndapeipotai iyu āgua! Toyugüeruño chíhivahe cheu. Esepia, co chíhivahe nungar ava yuviroiquera che Ru povrive —ehi.

15 Ipare omondo opo chihivahe harive osovasa. Ichui osẽ oso.

*Mbia chihivahe imbahe eta vahe omoñeta Jesús*

16 Mbia chihivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirẽhi vahe rereco ãgua? —ehi.

17 —¿Mahera ereporandu cheu mbahe aviye vahe rese! —ehi—. Ñepeñño itẽ aviye vahe oime. Erereco potase rumo tecovesa apirẽhi vahe, emboyeroya mborocuita —ehi.

18 —¿Uma vo aipo mborocuita? —ehi.

Ahese omboyevı chupe:

—Ndereporoyucai chira, nandeaguasai chira, nandemondai chira, nanderemirai chiaveira ambuae ava rese, <sup>19</sup> eremboyero yara nde ru, nde si avei, eresaısura ambuae ava nde yeaisu nungar eico' ehi icuachi-aprı pipe —ehi mbahe yar upe.

20 —Co rumo mborocuita opacatu amboaviye itẽ yepi. ¿Mbahe vo evocoyase ipane vite che ayapo vaheã? —ehi.

21 —Ereipotase mbahe tuprı pıpe nde reco ãgua, emondopa rane nde mbahe; ahe seprı evocoyase eremondora ava iparaisu vahe upe. Ichui ererectora mbahe aviye vahe ivave. Ipare ereguatara che rupi —ehi chupe.

22 Aipo oyeupe hese rumo, ahe mbia oyepepiñño ichui oviharẽhisave oso. Esepia, mbahe yar itẽ secıi.

23 Evocoyase aipo ehi güemimbohe upe:

—Supi etẽ yavai eteanga imbahe eta vahe upe oique vaheã che Ru mborerecuasave. <sup>24</sup> Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

25 Aipo iñehesa renduse, semimbohe oyepıhamondıi aipo ehi:

—¿Ava angahu pıha evocoyase oñepısırora yuvireco viña! —ehi yuvireco.

26 Omahe güemimbohe rese, aipo ehi:

—Ava tẽi upe yavai aipo nungar mbahe apo. Tũpa upe rumo mbahe opacatú ndayavaimi etẽ —ehi.

27 Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoyase oimera oreu? —ehi.

28 —Oime itera niha mbahe pẽu. Esepia, acoi arı oyepotase opacatu mbahe recuñaro ãgua, ahese che, Ava Riquehir, aguapıra che rendave che mborerecuasave. Pe avei, che rupındar, peguapıra doce tenda harıve. Ahese opacatu judıo acoi doce imar Israel suındar recocer rese peporandura curi. <sup>29</sup> Acoi opacatu ava oseya vahe güẽta, anise que vıquehir, anise vıvrı, güeındrı, que vu, anise osı, guahir, que oıvı avei che raisusa pıpe, ahe oıpısıra omahera cien yupagüer rupi mbahe oseya vahe iyavei vırecora tecovesa apirẽhi vahe. <sup>30</sup> Seta vai rumo cürıtei yıpındar vahe, ipa tẽira yuvirecoi; setá aveira cürıtei ipa tẽi vahe, yıpındar yuvırecoira curi —ehi.

## 20

*Yembohesa oporavıqui vahe resendar*

<sup>1</sup> “Tūpa mborerecuasa inungar acoi ava ivi yar osē añihiveive oyeupe nara oporaviqui vahe reca ‘toporaviqui che uva tive yuvireco’ oyapave. <sup>2</sup> Oyosuse ava, ahese omoingatu oyeupe oporaviqui vaherã upe ñepeí ari mboraviqui repi imboepi ãgua. Ahese opa omodo ocove imboporaviqui. <sup>3</sup> Ipare osē, oso añihivei, arivate catumi osepia ocarusu pipe ambuae ava oporaviquisa ndovirecoi vahe, <sup>4</sup> aipo ehi chupe: ‘Peso, tapeporaviqui che uva tive. Amboepi tuprira niha pëu’ ehi. Ahe evocoyase yuviraso oporaviqui ãgua icove. <sup>5</sup> Ipare oso iri mbitar ari rupi oyeupe oporaviqui vahe reca, ãgüe ehi tupri avei caharuse, las tres rupi. <sup>6</sup> Ipa osē iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohí tēi ari momba cohava pehã?’ <sup>7</sup> ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi. <sup>8</sup> “Pitu ramose, cove yar aipo ehi oporaviqui vahe rese yangarecuar upe: ‘Eñehépa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenondenar uve’ ehi. <sup>9</sup> Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepeí-peí ñepeí ari rupindar oipisi guarepochi yuvireco. <sup>10</sup> Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepeí ari rupindar yuvireco. <sup>11</sup> Guarepochi pisire rumo oñemoiro cove yar upe yuvireco, <sup>12</sup> aipo ehi: ‘Co ava yugüeru ipa tēi vahe, ñepeí horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañi tēi oroporaviqui ari momba sacucuer upe oroico’ ehi. <sup>13</sup> Cove yar rumo aipo ehi ñepeí ipãhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepeí ari resendar ndeu acoi, Aviye, peye vahecuer rese cheu’ ehi. <sup>14</sup> Evocoyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tupri ndeu amboepi. <sup>15</sup> Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

<sup>16</sup> “Indó, ãgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaherã yuvireco curi” ehi güemimbohe upe.

*Jesús omombehu iri omano ãgua*

<sup>17</sup> Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

<sup>18</sup> —Peyapisaca tupri che ñehé rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, “Tomano” ehira yuvireco cheu. <sup>19</sup> Ipare che mondora ava ndahei vahe yande mu upe mara-mara tēi che rereco ãgua che reroirosa pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

*Santiago, Juan si oporandu Jesús upe mbahe rese omembrí upe nara*

<sup>20</sup> Ipare Zebedeo rembireco ñuvirío omembrí reseve, oyemboya Jesús rese yuvireco. Ahese oñenopiha sovai oporandu ãgua mbahe rese. <sup>21</sup> Evocoyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepeí nde mbahe rese pocosa coti, ambuae nde mbahe rese pocoẽhisa coti nde mborerecuasave —ehi chupe.

<sup>22</sup> —Pe ndapeicuai mbahe rese peporandu. ¿Peiporara catura pĩha co mbahe-mbahe tẽi aiporara vaherã, inungar-ra que igua iro vahe aihu vaherã viña? —ehi.

—Taa, oroicatuño itera —ehi yuvireco.

<sup>23</sup> —Supi eté peiporarara mbahe-mbahe tẽi. Co rumo ndiyai cheu, che piri opomboguapĩ ãgua che mbahe rese pocosa coti, ambuae che mbahe rese pocoẽhisa coti avei. Che Ru rumo omoingatu güembiporavo upe nara oguapĩ vaherã che ipive —ehi.

<sup>24</sup> Aipo iñehesa renduse ore ambuae diez semimbohe, oroñemoiro Santiago, Juan upe avei. <sup>25</sup> Evocoyase, “Perio” ehi oreu.

—Peicua niha acoi mborerecuar guasu yuvirecoi vahe Tũpa cuaparẽhi oporocuai oporoyuca ai tẽisa pipe, iyavei acoi ivate catu vahe oyeecoapirasã omborerecuasa pipe yepi. <sup>26</sup> Pe rumo ãgüe ndapeyei chira peico. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese. <sup>27</sup> Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese. <sup>28</sup> Esepia, che, Ava Riquehi, ayu ndahei ava che rese ihañeco ãgua, che rumo ayu ava rese che hañeco ãgua iyavei amano vaherã ava eta repirã Carugar povri sui senose ãgua —ehi.

### *Jesús ombogüera ñuvirío ndasesapisoi vahe*

<sup>29</sup> Ipare Jesús, güemimbohe reseve oñocuase tecua Jericó yuvireco, ahese ava rehii yuviraso saquicuei. <sup>30</sup> Aheve peri popive ñuvirío ava ndasesapisoi vahe oguapĩ yuvinoi. Evocoyase osenduse Jesús ocuase supi, osapucái pĩrata yuvireco chupe aipo ehi:

—¡Ore Yar, mborerecuar guasu David suindar, ore paraisuerecomi tẽi eve! —ehi yuvinoi.

<sup>31</sup> Ahe ava oyaca-yacaño: “Quiriri” ehi yuvireco chupe. Ahe rumo osapucái pĩrata catuño ité yuvireco aipo ehi:

—¡Ore Yar, David suindar, ore paraisuerecomi tẽira eve viña! —ehi iriño ité yuvireco.

<sup>32</sup> Evocoyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherã pẽu? —ehi.

<sup>33</sup> —¡Ore Yar, ore mbosarecomi tẽi eve! —ehi.

<sup>34</sup> Evocoyase saissusave opoco sesa rese. Ahe ramoseve ndasesapisoi vahe osareco tupri ai eté yuvireco. Ipare yuvirasoño ité supi.

## 21

### *Jesús oique Jerusalén pipe*

<sup>1</sup> Acoi orovirovise Jerusalén, oroyepota tecuami Betfagé popive, ivitri Olivo serer vahe ipiimi. Aheve omondo ñuvirío güemimbohe <sup>2</sup> aipo ehi chupe:

—Peso co tecuami yande rovindarve. Aheve pesepiara guaricu imembrĩ reseve ñapichimbrĩ imoha. Ahe peyorañora seru cheu. <sup>3</sup> Acoi que ava oporanduse yuvireco pẽu sese, “Yar oiporu pota, ipare niha omboyevi voiñora” peyera chupe —ehi güemimbohe upe.



<sup>4</sup> Co ěgũe ehi chupe aracahendar Tũpa ñehe mombehúsar ñehengagũer mboaviye āgua, aipo ehi vahe:

<sup>5</sup> “Pemombehu Sión pendar upe:

‘Pesepia, pe rereciar guasu ou oico gũeco mbegũesa pipe pũu guaricu harive imembri reseve’ peyera” ehi.

<sup>6</sup> Evocoyase evocoi semimbohe yuviraso, oyapo ité ocuaise yuvireco.

<sup>7</sup> Gũeru guaricu imembri reseve yuvireco chupe. Omondo oturucuar icupeao āgua yuvireco. Ipare Jesús oyeupi iharive. <sup>8</sup> Iyavei ava rehii oipĩpĩra oturucuar perĩ rupi imboetei guasusa pipe. Ambuae evocoyase oyasia pindo omondo perĩ rupi yuvireco saperã. <sup>9</sup> Ava rehii senonde, saquicuei avei oguata vahe osapucai yuvireco aipo ehi:

—ĩCo mborereciar guasu David suindar, imboeteipri tasecoi! —ehi— . ĩSovasapri secoi ou vahe yande Yar rer pipe! ĩhvave imboeteipri tasecoi! —ehi yuvireco.

<sup>10</sup> Oĩquese Jerusalén pipe, opacatu co tecua pipendar oyepĩhamondii yuvireco. Iyavei setá oporandu-randu yuvireco:

—ĥAva pĩha co mbia? —ehi tẽi yuvireco.

<sup>11</sup> Ava rehii oguata vahe Jesús rupi aipo ehi yuvireco chupe:

—Co niha Jesús, Tũpa ñehe mombehúsar, ivi Galilea rupindar, Nazaret pendar —ehi yuvireco chupe.

*Jesús omombopa ava mbahe mboepisar tũparo pipe sui*

<sup>12</sup> Ipare Jesús oĩque judío tũparo guasu pipe. Ipipendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. <sup>13</sup> Ipare aipo ehi chupe:

—Icuachiapri aracahendar pipe aipo ehi: ‘Che rēta yeruresa rētarã’ ehi. Pe rumo imonda rai vahe rēta nungar tẽi pereco —ehi.

<sup>14</sup> Aheve oyemboya Jesús rese yugũeru ava ndasesapĩsoi vahe, ipãri-pãri vahe avei. Ahe opa ombogũera. <sup>15</sup> Osepiase rumo pahi rereciar guasu iyavei judío porocuaita rese oporombohe vahe yuvireco mbahe ndayasepiai vahe sembiapo, iyavei tũparo pipe osenduse chĩhivahe sapucaisa: “ĩImboeteipri David suindar tasecoi!” ehise, ahese oĩnemoĩro yuvireco <sup>16</sup> aipo ehi chupe:

—ĩEresendu vo aipo ehi tẽi vahe chĩhivahe yuvireco! —ehi.

—Taa, asendu ité —ehi—. Pe no, ĥndapeyeroquii vo sesendar ñehesa icuachiapri pipe:

‘Chĩhivahemi, pĩtanimi avei osapucaira nde mboeteisa pipe yuvireco’ ehi vahe? —ehi.

<sup>17</sup> Ipare opaño oseya ava oso tecua Betania ve. Aheve ñepei pĩtu oque.

*Jesús omomara ivira higuera ndihai vahe oĩhe pipe*

<sup>18</sup> Ahere ayihive añihiveive, oyevisẽ tecua Jerusalén ve, Jesús ndasiepoi oico. <sup>19</sup> Aheve perĩ popĩve osepia ivira higuera. Ahe sese oyemboya oso ‘ĥiha pĩha?’ oya viña. So gũeraño tẽi rumo osepia. Evocoyase ahe aipo ehi chupe:

—ĩCo pipe suive nandehai chietera! —ehi.

Aheseve voi opa ipiru. <sup>20</sup> Ahe mbahe repiase, ore,

—ĩToo, mara ehi rutei pĩha co cũriteimi opa voi ipiru! —orohe tẽi chupe.

<sup>21</sup> Ahesẽ omboyevi oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera. <sup>22</sup> Indó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

*Jesús mborerecuasa*

<sup>23</sup> Ichui Jesús oi que iri judío tūparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu? —ehi.

<sup>24</sup> Evocoyase ahe aipo ehi chupe:

—Che avei aporandura mbahe rese pëu. Pemboyevisé che porandusa, ahese che avei amombehura ava porocuita rupi eté pīha ayapo co mbahe vichico. <sup>25</sup> ¿Ava vo Juan ombou ava āpiramo āgua? ¿Tūpa pīha, ava tēi tie? —ehi.

Evocoyase oñemoñeta aipo ehi oyeupe yuvireco: “ ‘Tūpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira. <sup>26</sup> Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi.

<sup>27</sup> Sese,

—Ndroicuai eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

*Ñuvirío ava rahir recocuer sui yembohesa*

<sup>28</sup> Iyavei Jesús aipo ehi judío rerecuareta upe:

—¿Mara ehi pe pīhañemoñetasa co rese? Oime mbīa vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi. <sup>29</sup> ‘¡Nachequerēhil!’ ehi voiño. Coiye rumo, ‘¿Mahera ēgüe ahe?’ ehi. Ipare osoño ité, oporaviqui. <sup>30</sup> Ipare oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté. <sup>31</sup> ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroquera Tūpa mborerecuasave pe sui. <sup>32</sup> Esepia, Juan Oporoāpiramo vahe ou co tecocuer ihivi vahe mboyecua āgua pëu pe reco tupri āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerai sui seroya āgua —ehi mborerecuar guasu yuvirecoi vahe upe.

*Ava mbahe tēi oporaviqui vahe recocuer sui yembohesa*

<sup>33</sup> “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva riaviñ āgua; oyapo avei oi ivate vahe ahe sese mahemoha āgua. Ipare oseya oivi ava oporaviqui vahe upe iporu āgua. Ichui osē oso amombri vahesa rupi. <sup>34</sup> Coiye

oyepotase ari uva pohosa, ahese omondo güembiguai oporaviqui vahe upe imboporandu água ‘taipisi uva pohopri cheundar cute’ oyapave viña. <sup>35</sup>Ipare rumo oporaviqui vahe oipisi sembiguai yuvireco: amove oinupanupa yuvireco, amove oyuca, oyapi-yapi avei amove ita pipe yuvireco. <sup>36</sup>Ipare rumo ivi yar setá catu omondo iri güembiguai. Oporaviqui vahe rumo mara-mara tẽiño avei vireco yuvireco.

<sup>37</sup>“Coie rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña. <sup>38</sup>Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco. <sup>39</sup>Evocoyase oipisi, vinose miti páhu sui, oyuca ité yuvireco” ehi.

<sup>40</sup>“Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

<sup>41</sup>Ahe evocoyase,

—Opara revo oyuca saisuẽhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu água ‘ahe tombou voimi uva ipohopirer cheundar cheu curi’ ohesa pipe —ehi yuvireco.

<sup>42</sup>Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri água.

Ègüe ehi niha Yar yapo yande mohapisi ai eté’

ehi icuachiapri pipe. <sup>43</sup>Sese che Ru Tũpa mborerecuasa serocuasara pe sui. Ambuae ava upe rumo imondosara. Ahe virasora che Ru mombahesa chupe. <sup>44</sup>Acoi que oviapi vahe evocoi ita harive, opa tẽira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

<sup>45</sup>Acoi osenduse pahí rerecuar iyavei fariseo yuvirecoi vahe, osenducua oyesendar ñehesa yuvireco. <sup>46</sup>Aheseve oipisi pota voi yuvireco viña. Osiquiyeyño rumo ava rehí sui yuvireco. Esepia, opacatu ava ipihañemoñeta: “Co ité Tũpa píratasa pipe oñehe” ehi yuvireco chupe.

## 22

### *Jesús oporombohe carusa mendasa resendar rese*

<sup>1</sup>Ipare Jesús oporombohe iri ambuae ava recocuer rese aipo ehi:

<sup>2</sup>“Tũpa omborerecuasave inungar mborerecuar guasu guahir mendase oyapo pieta. <sup>3</sup>Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niqerẽhi iri yugüeru aheve. <sup>4</sup>Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tiví iyavei ambuae mbahe mimba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguai upe. <sup>5</sup>Ichohopri rumo ndoviroyai eté yuvireco. Evocoyase ñepeí osoño ocove, ambuae oso ombahe movendesave, <sup>6</sup>ambuae rumo oipisi sembiguai mara-mara tẽi sereco água. Ahe ipipe oyuca yuvireco. <sup>7</sup>Evocoyase mborerecuar guasu oñemoiro eteprisave omondo osundao eta co ava oporapichi vahe yuca ucapa água, iyavei secua rapipa água. <sup>8</sup>Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaherã cohave. <sup>9</sup>Sese

peso opacatu ava guata catusa rupi, peñehe mendasave yugüeru vaheřa opacatu pe rovaichisar upe' ehi. <sup>10</sup> Evocoyase sembiguai eta yuvinosopa yuvirasos ocar rupi. Ahe osovaichi vahe seta omonuha yuvireco que seco tupri vahe, seco rai vahe avei; egüe ehi ava savapipo tupri oi guasu mendasave yuvireco.

<sup>11</sup> “Evocoyase acoi mborerecuar oique ava ichohopri repia. Ipare omahecua tupri ñepe i ava ipahu pendar rese. Ahe rumo ndomondei turucuar mendasa resendar. <sup>12</sup> Evocoyase aipo ehi chupe: ‘Che mboripar, imara ere eique ave co turucuar mendasa resendar porëhi?’ ehi. Ahe rumo noñehiño ite chupe. <sup>13</sup> Evocoyase, ‘Peipisi co mbia, peñapichi ipi, ipo avei, pemose ocarve pitumimbisave. Aheve oyaseho taira, saitere-tere taira mbaherasicuer rereco’ ehi ichohopri rese hañecosar upe. <sup>14</sup> Esepia, seta tei ichohopri, moviromi tei rumo iporavopri ipahu sui” ehi mborerecuařeta uve.

*Fariseo osecoaha iri tei Jesús guarepochi rese yuvireco*

<sup>15</sup> Ipare fariseo oñemonuha, ipihañemoñeta yuvireco oyeupe Jesús ñehe yavi uca agua mborerecuar rovai imomara-mara tei agua. <sup>16</sup> Ahe evocoyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi ete vahe mbahe eremombehu eico iyavei ereporombohe mbahe supi tupri vahe Tupa recocuer rese. Nde niha ndereroyai vahe ava ñehesa tei. Esepia, ava pihañemoñeta rupi ndereicoi vahe; nde pihañemoñeta rumo ñepe reseve erereco. <sup>17</sup> Imara ehi nde pihañemoñeta? Imaviyera pihayamondo guarepochi rese oporanduse Roma pendar mborerecuar ivate catu vahe upe viña, ani tie? —ehi yuvireco.

<sup>18</sup> Oicua rumo fariseo pihañemoñeta raisa. Sese aipo ehi chupe:

—Pe seco tupri angahu tei vahe peico. Imahera che moingue pota mbahe tei pipe peye! <sup>19</sup> Pemboyecua ru ñepe guarepochi mborerecuar guasu upendar cheu —ehi.

Evocoyase güeru yuvireco chupe.

<sup>20</sup> —Imava rahanga vo co guarepochi rese chini iyavei ava rer vo co chini sese no? —ehi.

<sup>21</sup> —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tupa upendar mbahe evocoyase pemondora Tupa upe —ehi fariseo upe.

<sup>22</sup> Osenduse, oyepihamondi tei yuvireco. Evocoyase yuvinoso yuvirasos ichui.

*Saduceo oporandu Jesús upe cuerayevisa rese secoahasave*

<sup>23</sup> Ahe ari pipe saduceo “ndipoi ete cuerayevisa” ehi vahe yugüeru Jesús upe, oporandu tei angahu yuvireco chupe:

<sup>24</sup> —Porombohesar, Moisés aipo ehi aracahe:

‘Que cuimbahe omanose guahiëhiseve, ahese tivri omendara sembirecocuer rese ahe viquehir omano vahecuer upe nara tahirã oico’ ehi —ehi yuvireco chupe—.

<sup>25</sup> Cohave, ore pahuve, oime siete tupri oyesuindar pave yuvirecoi vahe. Yipindar vahe omenda. Ipare omanoño guahiëhiseve. Evocoyase tivri omenda sembirecocuer rese. <sup>26</sup> Ahe omano guahiëhiseve avei no. Egüe ehi avei opacatu ambuae tivri, omano avei guahiëhiseve yuvireco.

27 Opacatu imano pare, cuña avei omano cute. 28 Evocoyase opase ocuerayevi yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

29 —Pe pīhañemoñetasa co coti tēi eté. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa —ehi—. 30 Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave —ehi—. 31 Co cuerayevisa resendar rumo amombehura pēu. Aviye ndapeyeroquii anga vahe acoi Tūpa omombehu vahecuer rese. Supi eté ahe aipo ehi aracahe: 32 ‘Che Abraham, Isaac iyavei Jacob Tūpa aico’ ehi. i Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

33 “¡Too!” ehi ava rehi. “¡Mara ehi rutei iporombohesa!” ehi tēi yuvireco.

### *Porocuita aviye catu vahe*

34 Ipare fariseo oyanduse yuvireco Jesús omonguiripañose saduceo oyesui, ahese oñemonuha yuvireco. 35 Ñepe i pāhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

36 —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

37 Evocoyase ahe aipo ehi chupe:

—‘Eresaisura nde Yar Tūpa opacatu nde pīhañemoñetasa pipe, opacatu nde recocuer pipe, nde yapisacasa pipe avei’ ehi. 38 Co porocuita aviye catu vahe ambuae porocuita sui. 39 Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. 40 Co ñuvirio porocuita rupi oguata opacatu Moisés porocuita icuachiapri, opacatu Tūpa ñehe mombehugar rembicuachía avei —ehi.

### *¿Ava suindar pīha Poropīsirosar?*

41 Fariseo ñemonuha viteseve, 42 Jesús oporandu chupe:

—¿Mara ehi pepīhañemoñeta acoi Tūpa Rembiporavo ou vahe rā ava pīsiro āgua rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

43 Ahese aipo ehi fariseo upe:

—¿Mahera pīha evocoyase David oñehese Espiritu pīratasa pipe aracahe, “Che Yar” ehi chupe? Esepia, ahe aipo ehi:

44 ‘Yar aipo ehi che Yar upe:

Eguapi che acato coti acoi che amondose voi eté nde amotarēhimbar nde povrive yuvireco’

ehi David aracahe. 45 Evocoyase, ¿mahera ru: “Poropīsirosar David suindar secoira” peye, David teieté, “Che Yar” ehise chupe? —ehi fariseo upe.

46 Evocoyase ndoicatu iri imboyevi āgua yuvireco cute. Ahe ari pipe sui ndipo iri que ñepe iquerēhi vahe iñehe avi uca āgua oñehe pipe yuvireco.

## 23

*Jesús oicua uca fariseo iyavei Moisés porocuita rese oporombohe vahe recocuerai*

<sup>1</sup> Ipare Jesús aipo ehi ava eta upe, oreu avei no: <sup>2</sup> “Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri ãgua yuvireco. <sup>3</sup> Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tēi mbahe viña, ipare rumo co coti tēi mbahe oyapo yuvireco. <sup>4</sup> Iyavei omondo porocuita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepeí oporocuita yuvireco no. <sup>5</sup> Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tēi. Osíva rese, oyíva rese avei ipe guasu vahe vireco-reco tēi oturucuar rese Tūpa Ñehengagüer cuachiapri yuvireco. Iyavei ipi catu vahe oturucuar popi moaro ãgua omondo yuvireco. <sup>6</sup> Oipota carusa rupi güenara aviye catu vahe yuvireco, oseca avei tenda porañete catu vahe güenara otūparo pipe yuvireco no. <sup>7</sup> Oipota avei ava oyeupe ‘avirave’ apo ãgua omboeteisave ocar rupi iyavei oipota, ‘Porombohesar’ oyeupe he yuvireco.

<sup>8</sup> “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar. <sup>9</sup> Iyavei, ‘Che ru’ ndapeyei chira que ava co ivi pipendar tēi upe. Esepia, ñepeño ité pe Ru pereco, ahe niha íva pendar. <sup>10</sup> Ndiyai avei, ‘Mborerecuar’ pembohe uca ava peyeupe. Esepia, Poropísirosar güeraño ité pe rerecuar secoi. <sup>11</sup> Acoi ava seco ivate catu vahe, ahe toporopítivii güeco mbegüesa pipe. <sup>12</sup> Esepia, acoi oyemboivate ai vahe opara seco roroyisa, iyavei acoi ava seco mbegüe vahe, ahe seco mboivate catusara curi.

<sup>13</sup> “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tūpa povrive seique rãgüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rãgüer sui.

<sup>14</sup> “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocua-rocuano tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tūpa ñemoirosa ipirata catu vahe curi.

<sup>15</sup> “¡Peparaisu catu itera pe Moisés porocuita rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar carugar ratave nara tēi pereco uca.

<sup>16</sup> “¡Peparaisu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye ãgua, ãgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi. <sup>17</sup> ¡Pe ndapembahecuaí vahe nungar, ndasesapisoi vahe nungar avei peico! ¿Uma vo aviye catu vahe: oro pñha, anise tūparo tie? Tūparo pipe niha oro rovasasa yepi. <sup>18</sup> Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yande ñehe mboaviye ãgua, ãgüe yahe tēi eté; co rumo mbahe yamombehuse mbahe seropovēhepri renda hari pendar rer pipe yande ñehe mboaviye

ãgua, ahese iya ité yamboaviyera yande ñehe yepi' aipo peye tēi. <sup>19</sup> ¡Pe ndasesapısoi vahe nungar peico yepi! ¿Uma vo aviye catu vahe? ¿Evocoi porerecoa seropovēhepri pıha, anise mbahe seropovēhepri renda tie? Ahe renda harive niha porerecoa sovasasa yepi. <sup>20</sup> Sese acoi mbahe omombehu vahe mbahe seropovēhepri renda rer pipe oñehe mboaviye ãgua, ndahei serer pipe güeraño, omombehu avei opacatu ihari pendar mbahe seropovēhepri rer pipe, <sup>21</sup> iyavei acoi ava omombehu vahe mbahe tūparo rer pipe oñehe mboaviye ãgua, ahe omombehu ipipendar rer pipe avei. Ahe niha Tūpa seci. <sup>22</sup> Iyavei acoi omombehu vahe mbahe que ambuae ava upe iva resendar rer pipe oñehe mboaviye ãgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité seci.

<sup>23</sup> “¡Peparaısu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeı-peı diez pe remiti menta, anis, comino pereco vahe sui ñepeı Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihıvi vahe, peporoparaısuerecora iyavei pemboaviye tuprıra pe cuaita yepi. Iyacatu rumo ahe pemboaviye aveira viña. <sup>24</sup> ¡Pe ava mbohesar ndasesapısoi vahe nungar peico! Pe pembogua rutei mbahe rahıcuer sui pe igua; mbahe tuvicha vahe rumo pemocoño ité evocoiyase. Ēgüe peye co mborocuita upe.

<sup>25</sup> “¡Peparaısu itera pe Moisés porocuita rese oporombohe vahe iyavei pe fariseo peico vahe, pe seco tuprı angahu tēi vahe! Esepia, inungar igua rıru iyavei tembıhu rıru icupe rupı tēi yoseıpri. İpipe rumo iquıha opitaño ité. Ēgüe ehi tēi pe recocuer pe monda raisave, mbahe pota-pota tēisave avei. <sup>26</sup> ¡Pe fariseo peico vahe, ndapepıhañemoñetaı vahe mbahe pe rembiapo ai rese, pemoatıro rane pe pıha pipe mbahe yavaeté vahe sui! Ahese ramo pe rembiapo icatuprıra cute.

<sup>27</sup> “¡Peparaısu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvıpa imomorochimbrı tēi. İharıve tēi icatuprı chupe. İpipe rumo tehögüer cangüer iyavei opacatu mbahe yavaeté vahe ovıreco oyese. <sup>28</sup> Ēgüe peye: ava rembiepiave aviye pe reco ihıvi vahe viña, pe pıha pipe rumo oıme pe porombopasa iyavei opacatu mbahe-mbahe tēi.

<sup>29</sup> “¡Peparaısu catu itera pe Moisés porocuita rese oporombohe vahe, pe fariseo peico vahe, pe reco tuprı angahu tēi vahe! Esepia, pemoin-gatu Tūpa ñehe mombehusar ruvıpagüer peico sese pe yemomahenduha ãgua iyavei pemoporañete ai tēi ava seco ihıvi vahe ruvıpagüer yepi viña. <sup>30</sup> İpare aipo: ‘Yande yaıcose revo aracahe yande ramoı recose, ndayaıpıtıvıı chıetera Tūpa ñehe mombehusar yuca ãgua yuvıreco viña’ peye tuprı tēi. <sup>31</sup> Aipo peyese rumo, pemboyecua Tūpa ñehe mombehusarer yucasar suıdar pe yesusa. <sup>32</sup> ¡Pemboyepı iriño evocoiyase pe ramoı rembiapocuerai!

<sup>33</sup> “¡Pe mboı vai suıdar tēi peico! Ndapesoyepı chıra rumo Tūpa ñemoırosa sui, pesora rumo tata guasuve. <sup>34</sup> Evocoiyase che amboura pēu Tūpa ñehe mombehusar ava yaracua vahe iyaveı ava pe mbohe ãgua yuvıreco viña. Amove rumo ipāhu pendar peyucara, ambuae peyaticara curusu rese sereco. Ambuae peınupara pe ñemonuhasa rupı iyaveı

ambuae peseca-secara peico tecua yacatu rupi. <sup>35</sup> Sese pëuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ivi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovëhepri renda rovai. <sup>36</sup> Supi eté opacatu co mbahe tēi oura pe recove vitesevē” ehi.

*Jesús oyaseho Jerusalén pendar rese*

<sup>37</sup> “¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive! Ëgüe ahe pota tēi pe rereco viña, pe rumo ndapeipotai eté evocoi nungar pe rereco água. <sup>38</sup> Sese seyapirã tēi peicora. <sup>39</sup> Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

## 24

*Jesús omombehu judío tūparo guasu mocañi água*

<sup>1</sup> Ipare Jesús osē judío tūparo pipe sui oso. Aheseve ore semimbohe royemboya sese aipo orohe chupe: “¡Ore Yar, esepia co tūparo!” orohe. <sup>2</sup> Ahe rumo:

—Supi eté amombehu pëu: co opacatu pesepia vahe, ndipoi chietera que ñepeí ita oyeha vite vahe. Opacatu ité imondurusara curi—ehi oreu.

*Jesús omombehu mbahe oime vaherã ari cañi renonde*

<sup>3</sup> Ipare Jesús oso ivitri Olivo ve oguapi oñ. Aheve ore güeraño tupri oroso chupe mbahe rese ore porandu água:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu água iyavei ari cañi água? —orohe chupe.

<sup>4</sup>—Peicua catu, peyembopa ucai rene ambuae ava upe peico. <sup>5</sup> Esepia, setá ava yugüerura, ‘Che aico Tūpa remimbou ava písiro água’ ehi tēira ava eta mbopa yuvireco. <sup>6</sup> Iyavei pesendura ñehesa vavasa resendar cohava iyavei que rupi. Ndapeyembosiquiyei chira rumo ichui. Esepia, Ëgüe ehi rane itera niha; ndehi vitei chira rumo ari cañisa. <sup>7</sup> Esepia, ñepeí ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi riri opacatu-catu tēi tecua rupi. <sup>8</sup> Opacatu evocoi mbahe rumo omboipi ramomi vahe mbahe tēi porarasa.

<sup>9</sup> “Ahese pe písira yuvireco mara-mara tēi pe rereco água, pe yuca água avei. Iyavei opacatu ava-ava tēi ndape ambotai chira che recocuer sui tēi yuvireco. <sup>10</sup> Ahe ari rupi evocoiyase setá ava ndache reroya iri chira yuvireco. Ahe oyeamotarëhira iyavei omondora ambuae omboetasagüer yamotarëhimbar povrive yuvireco. <sup>11</sup> Iyavei setá Tūpa ñehe mombehusar angahu tēi oimera, ahe ava ombopa-mbopa tēira yuvireco. <sup>12</sup> Ombouvicha catura mbahe-mbahe tēi naporai vahe. Ipipe sui ndoyeaisu tupri iri chira ava yuvireco. <sup>13</sup> Acoi ava oyemoviracua vaheño rumo ari ipa vahe rupi, ipísipropi yuvirecoira. <sup>14</sup> Iyavei co ñehesa icatupri vahe Tūpa mborerecuasa resendar imombehusapa ranera opacatu ivi rupi icua uca água. Ahese ramo oimera cañisa co ivi pipe” ehi oreu.



15 “Tūpa ñehe mombehugar Daniel oicuachía mbahe-mbahe tēi aposa resendar oime vaheṛā tūparo guasu maranehi vahe pipe aracahe. Ahe pesepiase oi maranehi pipe —acoi oyerocui vahe, ahe tosenduca tu pri yuvireco—, 16 evocoyase Judea ve yuvirecoi vahe toñemipa poyava ivitri rese yuvireco ichui; 17 iyavei acoi güēta harive yuvirecoi vahe ogüeyise, toique iri eme güētave ombahe reca; 18 iyavei acoi que rupi tēi yuvirecoi vahe, toyevi iri eme güētave que oyeaosa renose āgua yuvireco. 19 ¡Iparaisu itera cuña ipuruha vahe, imembi pītani vahe avei yuvireco! 20 Peporandu Tūpa upe pe recua pipe sui pe sēēhi āgua irohi pipe, mbituhusa ari pipe avei. 21 Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar. 22 Iyavei nomombituhuse Tūpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

23 “Iyavei que ava, ‘Esepia co Poropisirosar seci’; anise, ‘Peve seci’ ehise yuvireco pēu, aní chira peroya aipo ehi vahe. 24 Esepia, yugüerura ava ‘che Poropisirosar aico’ ehi tēi vahe iyavei ‘che amombehu vahe Tūpa Ñehengüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Ipipe osecoāhara Tūpa rembiporavo imbopa āgua yuvireco. 25 Opa aipo co senondeve amombehu pēu. 26 Sese que ava pēu: ‘Pesepia pe ivi iporupirēhisave seci’ ehise, pesoi rene aheve seroyasave, aní chiaveira peroya acoi ‘pesepia co seci oi pipe’ ehi vahe yuvireco. 27 Che rumo inungar overa vahe sendi añihivei sui caharu coti oca i va rese, ēgüe ahera che, Ava Riquehir, opacatu ava rembiepiave ayevi irise vitu curi. 28 Esepia, mbahe rehögüer reimesave, uruvu oñemonuha atí yuvireco yepi” ehi güemimbohe eta upe.

### *Jesús yevi āgua resendar*

29 “Ahe ari pipe mbahe-mbahe tēi pare cūrteimi ndoyecua iri chira ari, yasi avei ndosesape iri chira, yasitata avei opara oviapi i va sui iyavei i va resendar mbahe oririra yuvireco. 30 Ahese oimera i va rese iporēhi vahe che, Ava Riquehir, yu āgua resendar. Evocoyase opacatu ava-ava tēi co ivi pipendar oyaseho tēira osiquiyepave yuvireco. Che repia aveira yuvireco agüeyise i va quiha rese che pīratasa rendigüer porañetesa pipe. 31 Iyavei amboura che rembiguai eta i va pendar. Ahe evocoyase güemimbi omoñehe pīratara opacatu che rembiporavo co ivi rupindar que amombri rupi yuvirecoi vahe monuha āgua” ehi.

32 “Peyembohera ivira higuera recocuer sui: Co ivira soqui ramosa, yaicua cōimi ari sacu vahe yepota āgua yandeu yepi. 33 Na ehi aveira pēu che ñehe rupi tupri mbahe pesepiase, sese peicuara cōimi eté che yevi āgua. 34 Supi eté yuvirecove vitera ava osepia vahe co mbahe opase yaviye. 35 Iva, ivi opara ocañi, che ñehengagüer rumo imboaviyesa rane itera.

36 “Ndipoi eté rumo ava oicua vahe ari iyavei hora che yevi āgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

37 “Inungar ava Noé recose yuvirecoi aracahe, ēgüe ehi tupri aveira che, Ava Riquehir, yevi āgua renonde. 38 Yipive amarusu renonde, ahese ava ocaru, oihu; guahir; guayri avei omomendaño yuvireco. Noé arca pipe seiquese, ēgüe ehi vite yuvireco. 39 Nomohai eté rumo amarusu

viapi āgua yuvireco oyeupe viña, ēgüe ehi rumo aviyeteramo tēi amar oviapi imocañipa. Ēgüe ahe aveira che, Ava Riquehir, ayevi aviyeteramo tēi. <sup>40</sup> Evocoi ari pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opítara. <sup>41</sup> Ēgüe ehi aveira ñuvirío cuña ohicho vahe upe: ñepe serasosara, indugüer rumo opítara.

<sup>42</sup> “Sese pemahemoha yepi. Esepia, ndapeicuai mbahe ari pipe che, pe Yar, ayevíra íva sui. <sup>43</sup> Iyavei peyapisaca tupri co rese: inungar acoi oi yar oicuase revo que hora pítu pipe imonda vahe yepota āgua, ahese imahemohara sese güeta pipe seiqueēhi āgua viña. <sup>44</sup> Ēgüe peye aveira peyemoingatu che yevi āgua rese. Esepia niha, che, Ava Riquehir, aporoesapiha tēira vitu curi” ehi.

*Mbiguai omboaviye vahe ocuaita, nomboaviyei vahe avei*

<sup>45</sup> “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseyá icuaitarā güeta pipendar rese hañeco āgua ‘tembihu tomondo che rēta pipendar upe che porocuaita rupi’ ohesave. <sup>46</sup> Acoi omboaviyese ocuaita, ahese oviharetera güerecuar yevise. <sup>47</sup> Supi eté niha serecuar oyocuíra opacatu ombahe rese hañeco āgua. <sup>48</sup> Ahe mbiguai rumo ndipihaise ‘ndoyepota vitei chira revo che rerecuar’ oya, <sup>49</sup> omboetasa omboipi mara-mara tēi sereco iyavei oyemboya caguar tēi rese ipiri ocaru iyavei oihu tēi āgua. <sup>50</sup> Ipare rumo serecuar oyepotara imahemohaēhiseve. <sup>51</sup> Ahese omombaraisu catura, ‘Tinupasa, ava seco tupri ai angahu tēi vahe nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe upe.

## 25

*Diez cuñatai ndaseco marai vahe resendar ñehesa*

<sup>1</sup> “Evocoi ari pipe Tūpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi āgua yuvireco. <sup>2</sup> Ipāhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco. <sup>3</sup> Ipare ndipihañemoñetai vahe oipisi guataendirā yuvireco, ndovirasoi rumo yandi guataendi riru mboapipo iri āgua yuvireco; <sup>4</sup> evocoi ipihañemoñeta tupri vahe rumo viraso yandi siru pipe guataendi reseve yuvireco. <sup>5</sup> Acoi ndoyepota apihaise cuña mevi, ahese sopesii tēi yuvireco. Coiye opaño yuviroque yuvireco ichui. <sup>6</sup> Pítu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesē ipisi āgua cute!’ ehi. <sup>7</sup> Evocoiyase opacatu evocoi cuñatai oñarapuha voi iyavei omoingatu guataendi yuvireco. <sup>8</sup> Ahese nimahemohai vahe aipo ehi ambuae imahemoha vahe upe yuvireco: ‘Pemboumi tēi chíhi pe yandi oreu. Esepia, ogüe pota ité ore rataendi’ ehi tēi yuvireco. <sup>9</sup> ‘Aní, ndiyai chira revo oromondo vahe rā pēu. Iyacatu revo peso imboepisave serocua peyeupe nara’ ehi. <sup>10</sup> Imboepi yuvirasó viteseve, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rārosar. <sup>11</sup> Ipare oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tēi oreu!’ ehi tēi yuvinoha. <sup>12</sup> ‘Aní, ndopocuai vahe ité’ ehiñi chupe.

<sup>13</sup> “Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevíra” ehi Jesús oreu.

*Ñehesa guarepochi mondosa resendar*

<sup>14</sup> “Iyavei Tūpa omborerecuasave inungar-ra ava mbahe yar oso āgua renonde ivi amombrisave omonuha güembigui oguarepochi rāro āgua viña. <sup>15</sup> Yipindar ñepe upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepe-pe upe seco etegüer rupi-rupi. Ipare voi oso cute. <sup>16</sup> Evocoiyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coiye oipisi catu iri ambuae cinco. <sup>17</sup> Inungar avei ambuae oipisi vahe dos mil, ichui oipisi catu iri ambuae dos mil. <sup>18</sup> Ambuae oipisi vahe rumo ñepe guarepochi, ahe oyoho ivicuar. Aheve oñoti güerecuar guarepochi.

<sup>19</sup> “Ipare coiye oyevisē serecuar, ahese oñhe güembigui upe oguarepochi retacuer cua āgua. <sup>20</sup> Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. <sup>21</sup> ‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi chupe. <sup>22</sup> Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi. <sup>23</sup> ‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi avei chupe.

<sup>24</sup> “Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavaí vahe ereico. Esepia, ava remitigüer tēi eremونها iyavei imbovepërer tēi avei ereipisi ndeyeupe nara. <sup>25</sup> Sese che siquiyesa pipe añomi ivivive nde guarepochi. Ndo co nde mbahe’ ehi chupe. <sup>26</sup> ‘Nde mbiguai ndaseco pñrai vahe, yangaipa vai vahe avei ereico. Nde niha ereicua che recocuer aipisise mbahe nañoti vahe sui. <sup>27</sup> Ereyapocatumira che guarepochi guarepochi apocatusave cuese rahe viña che yevise voi senose āgua cheu imboyevi catumi āgua viña’ ehi. <sup>28</sup> Ipare aipo ehi: ‘Perocua guarepochi ichui, pemondora evocoi diez rupi guarepochi omboeta vahe upe’ ehi. <sup>29</sup> ‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. <sup>30</sup> Sese pemose co mbiguai ēgüe ehi tēi vahe ocarve pītumimbisave. Aheve toyaseho, tasãitere tēi oñ’ ehira serecuar chupe” ehi Jesús oreu.

*Jesús oura opacatu ava recocuer rese porandu āgua*

<sup>31</sup> “Che, Ava Riquehir, ayevisē, opacatu che Ru rembiguai íva pendar reseve che reco ivategüer pipe, ahese aguapira che renda porañete vahesave ava recocuer rese porandu āgua. <sup>32</sup> Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rārosar oipeha vahe ovesa cavara sui. <sup>33</sup> Che evocoiyase ovesa aipehara mbahe rese che pocosa coti, cavara mbahe rese che pocoñhisa coti. <sup>34</sup> Ahese che mborerecuar ivate catu vahe aipo ahera che acato cotindar upe: ‘Perio pe opacatu che Ru sui sovasapri

peico vahe, peique che Ru mborerecuasa pipe; ahe acoi yipive ivi apo ramo suive imoingatupri pēu nara. <sup>35</sup> Esepia, ndacheriepoise, pe evocoyase pembou mbahe che remihura; iyavei che huseise, pe evocoyase pembou taihu; che aguata tēise pe recua rupi vichico, pe avei oi pembou che que āgua. <sup>36</sup> Turucuar cheu ipanese, pe avei pembou che turucuarā; chembaheasise, peso avei che piri; che roquendasave peso avei che repia no' ehi. <sup>37</sup> Evocoyase evocoi seco catupri vahe aipo ehira yuvireco cheu: 'Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? <sup>38</sup> ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarā, ore aipo evocoyase oromondo ndeu? <sup>39</sup> Iyavei, ¿mbahese vo aipo nde repiasa nembraheasise, anise que nde roquendasave, aheve aipo oroso nde repia yepi?' ehira yuvireco cheu. <sup>40</sup> Evocoyase che, mborerecuar ivate vahe, amboyevira yuvireco chupe aipo ahera: 'Supi eté, opacatu mbahe peyapose que ñepeico seco mbegüemi vahe che reroyasar pāhu pendar upe viña, cheu rumo ēgüe peye' ahera.

<sup>41</sup> "Ahe aipo ahera cute che mbahe rese pocoēhisa cotindar upe: 'Pesiri che sui. Esepia, pe peico Tūpa ñemoirosavri pendar. Pesopa tata guasu apirēhisave, evocoi imoingatupri opacatu carugar upe nara serecuar reseve. <sup>42</sup> Esepia, ndacheriepoise, pe evocoyase: Yamondomi icaru āgua, ndapeyei eté cheu; che huseise, aheve, Yamondomi toihi, ndapeyei avei cheu; <sup>43</sup> ambuae tecua pipe aguata tēise vichico, aheve, Eique che rētave che piri, ndapeyei eté cheu. Ipanese che turucuarā, pe rumo ndapemboui cheu, chembaheasise vichico, iyavei che roquendasave, Yasomi tēi sepia, ndapeyei eté cheu' ahera. <sup>44</sup> 'Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarā ndeu no, nembraheasise, anise nde roquendasave, marase vo mbahe rese nande pītiviisai?' ehi tēira yuvireco cheu. <sup>45</sup> 'Supi eté acoi amove mbahe ndapeyapoise que seco mbegüemi vahe upe viña. Ipipe rumo cheu avei mbahe ndapeyapoi eté' ahera. <sup>46</sup> Ahe ava yuvirasora Tūpa ñemoirosa apirēhi vahesave. Seco ivi vahe rumo teco ori opaēhisave yuvirasora" ehi Jesús oreu.

## 26

*Jesús yamotarēhimbar omboguai yuca āgua yuvireco*

<sup>1</sup> Ipare Jesús aipo ehi oreu:

<sup>2</sup> —Pe peicua ñuvirío ari tēi ipane vite co Pascua pieta yepota āgua yandeu. Aheve che, Ava Riquehix, imondopri aicora che atica āgua curusu rese yuvireco —ehi.

<sup>3</sup> Ahe pipeve avei Jerusalén ve, co pahí rerecuareta, iyavei judío rerecuareta oñemonuha yuvireco pahí rerecuar ivate catu vahe Caifás rētave.

<sup>4</sup> Aheve oñemoñeta: 'Yambopa ipisi yuca āgua' ehi yuvireco oyeupe. <sup>5</sup> Ahe rumo:

—Ndiyai pieta pipe ité yaipisi ava rehí yemondii guasuēhi āgua yandeu —ehi.

*Cuñā oipiyere Jesús āca rese mbahe sīacuá vahe*

<sup>6</sup> Jesús tecua Betania ve secoi, Simón lepra vireco vahecuer rētave.

<sup>7</sup> Aheve mesave chiniseve, cuñā vireco vahe mbahe sīacuá vahe siru

reseve viroyepota chupe. Ahe oipiyere Jesús áca rese. <sup>8</sup> Orosepiase rumo oroñemoiro aipo orohe oreyeupe:

—¡Mahera vo co omocañi tēi! <sup>9</sup> Omondo vahe ité tie co setá guarepochi rupi ava iparaisu vahe pítiviñi água viña —orohe tēi chupe.

<sup>10</sup> Jesús rumo oicua ore pihañemoñetasa. Sese aipo ehi oreu:

—¡Mahera vo co cuña pemañeco tēi! Esepia, co mbahe oyapo vahe aviye ité cheu. <sup>11</sup> Ava iparaisu vahe niha yuvirecoiño itera pe pāhuve. Che rumo éguē ndahe viteñoi chira vichico pe pāhuve. <sup>12</sup> Esepia, co cuña oipiyere mbahe síacuá vahe che rese che tĩ água renondeve. <sup>13</sup> Supi eté aipo ahe pēu: co ñehesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha água —ehi.

*Judas Iscariote oyemoingatu Jesús mondo água yamotarēhimbar povrive*

<sup>14</sup> Ipare ñepeí ore pāhu pendar, Judas Iscariote, oso, oñehe pahi eta rerecuar yuvirecoi vahe upe <sup>15</sup> aipo ehi:

—¿Mbovi rupi vo pemboepira cheu amondose Jesús pēu viña? —ehi.

“Treinta guarepochi rupi” ehi yuvireco chupe. <sup>16</sup> Ahesa reseve voi oseca Jesús mondo água yamotarēhimbar upe.

*Jesús caru agüer ipa vahe güemimbohe rese*

<sup>17</sup> Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yan-deu? —orohe chupe.

<sup>18</sup> Evocoiyase,

—Peso tecua guasuve che cua vahe rētave aipo peyera chupe: ‘Ore Mbohesar aipo ehi: Cōimi che mano água, sese ayapo potami sētave Pascua pieta che remimbohe reseve, ehi ndeu’ peyera chupe —ehi.

<sup>19</sup> Evocoiyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

<sup>20</sup> Pĩtu ramomise, opacatu oroguapĩ mesave Jesús pĩri ore caru água. <sup>21</sup> Ore carusave aipo ehi oreu:

—Supi eté aipo ahe pēu: ñepeí pe pāhu pendar che mondora che amotarēhisar upe —ehi.

<sup>22</sup> —Che Yar, ¿che pĩha? —orohe-rohe tēi ñepeí-peí ore yacatu ore viharēhisa pipe chupe.

<sup>23</sup> —Omondo vahe opo che caro pipe, ahe che mondora che amotarēhisar upe —ehi—. <sup>24</sup> Imboaviyesa itera che, Ava Riquehĩr, rese ñehesa icuachiapĩ. ¡Iparaisu catura rumo acoi mbĩa che mondosar! Aviye catura ndoyesuise viña —ehi.

<sup>25</sup> Ahese Judas imondosavi oporandu:

—Ore Mbohesar, ¿che tie? —ehi.

—Taa, ¡nde ité niha éguē erera! —ehi chupe.

<sup>26</sup> Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

<sup>27</sup> Ipare oipisi igua riru, “Aviye ndeu” ehi Vu upe. Aipo ohe pare ombou oreu aipo ehi:

—Peĩhu peyacatu co sui. <sup>28</sup> Esepia, co che ruvi, ahe omoimera che Ru remimbotar ipiasu vahe pēu, ahe oyepiyerera ava rehii angaipa rese

ñero ãgua. <sup>29</sup> Ndaihu iri chira uva ricuer cheu ari oyepotase voi che Ru mborecuasave aihura pe rese ambuae uva ricuer ipiasu vahe —ehi oreu.

*Jesús, “ ‘Ndaicuai vahe ité aipo mbia’ erera cheu” ehi Pedro upe*

<sup>30</sup> Ore sapucaire, oroso ivitri Olivo ve. <sup>31</sup> Evocoyase Jesús aipo ehi oreu:

—Opara pemocañi che rese yeroyasa peyesui co pïtu pipe. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvireco’ ehi vahe. <sup>32</sup> Che cuerayevire rumo, aso voi etera pe renonera Galilea ve —ehi.

<sup>33</sup> Pedro rumo,

—Yepe ambuae opacatu nande reroya iri chira yuvireco, che rumo ndayepepii chietera nde sui —ehi chupe.

<sup>34</sup> —Che rumo supi eté aipo ahe ndeu: co pïtu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

<sup>35</sup> Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe pãve tupri tẽi chupe.

*Jesús oyeroku Getsemaní ve*

<sup>36</sup> Ipare Jesús rupi orosoño Getsemaní ve. Aheve aipo ehi oreu:

—Peguapi cohavẽ; che aso ranera peve catumi, ayeroku —ehi.

<sup>37</sup> Aheve viraso Pedro oyeupi iyavei ñuvirío Zebedeo rahir. Ahese oyandu oviharẽhisa oico. <sup>38</sup> Evocoyase ahe aipo ehi chupe:

—Ndavihai eté. Esepia, che hã oyandu ité manosa. Pepita rane cohavẽ iyavei pemahemohara pe yeroqui pipe che rese —ehi.

<sup>39</sup> Evocoyase oso tenonde catumi. Aheve oñenopiha ovapi ivi rese oyeroku Vu upe aipo ehi: “Che Ru, iyase ndeu che renose mbahe-mbahe tẽi sui eve; tayapo eme ru che remimbotar tẽi, nde remimbotar rupi catu tayapo” ehi.

<sup>40</sup> Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesii upe che rãro ãgua que ñepei hora che mondugüe ãgua peye! <sup>41</sup> Pemahemoha, peyeroku mbahe tẽi pipe pe viapiẽhi ãgua. Supi eté pequerẽhi ité viña, pe retecuer tẽi niha nipiratai pẽu —ehi.

<sup>42</sup> Ichui imoñuviriosa rupi oso iri oyeroku aipo ehi: “Che Ru, ereipotase che reique ãgua co mbahe tẽi pipe, eyapo nde remimbotar che rese” ehi.

<sup>43</sup> Ipare oyevisẽ, osesapiha iri iqueseve ou. Esepia, sopesii nom-boyeroyai eté yuvireco. <sup>44</sup> Evocoyase oseypa iri oso oyeroku ãgua imbosapisa rupi. Aipo ehi tupriño avei oyeroku Vu upe. <sup>45</sup> Ipare oyevi iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo ãgua ava yangaipa vahe povrive. <sup>46</sup> Pepũha, yaso. Esepia, cõimi eté che amotarẽhisar upe che mondo vaheã secoi —ehi.

*Jesús oipisi yuvireco*

<sup>47</sup> Jesús ñehe viteseve, Judas oyepota oso chupe. Ahe ñepei semimbohe ore pãhu pendar, iyavei setá iteanga ava yugüeru quise pucu, ivira

reseve-seve supi. Ahe pahi eta rerecuar yuvirecoi vahe judío rerecuareta porocuaita rupi oyapo yuvireco. <sup>48</sup>Yipindar rumo imondosar Judas aipo ehi: “Asovaupitese, ahese peicuara; ahe peipisira” ehi. <sup>49</sup>Ipape oyemboya voi oso sese.

—¡Avirave, Porombohesar! —ehi sovaupite.

<sup>50</sup>—Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

<sup>51</sup>Evocoyase semimbohe seci vahe supi vinose oquise pucu, oyasia pahi rerecuar ivate catu vahe rembiguai nambi.

<sup>52</sup>—¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco. <sup>53</sup>¿Ndericuai vo aporanduse che Ru uve viña, ahe evocoyase cūrítei voi omboura doce mil sui setá catu vahe güembiguai che repi ãgua viña? <sup>54</sup>Ëgüe ehise rumo Tüpa Ñehengagüer icuachiapri ndayaviyei chietera viña, ahe co cūrítei osupiti —ehi.

<sup>55</sup>Ahese aipo ehi ava rehi upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che arí yacatu rupi aguapise pe pãhuve pe mbohe ãgua tũparo pipe, ndapeyapoi eté co nungar cheu. <sup>56</sup>Co rumo opacatu Ëgüe peye Tüpa ñehe mombehusar rembicuachiagüer mboaviye ãgua cute —ehi ava rehi upe.

Ahese voi opacatu oroñemosaipe, oroseya ahe aetemi Jesús ava rehi upe imoha.

*Jesús serasosa pahi rerecuar ivate catu vahe rovai*

<sup>57</sup>Ahese Jesús pisisar viraso Caifás rêtave yuvireco, ahe pahi rerecuar ivate catu vahe seci. Aheve oñemonuha Moisés porocuaita rese oporombohe vahe, judío rerecuar yuvirecoi vahe avei no. <sup>58</sup>Pedro rumo amombri rupive tēi osaquicue moña oso. Ëgüe ehi oyepota pahi rerecuar ivate catu vahe rēta rocar ãchisave. Aheve oi que ipipe, iyavei oguapi oĩ sundao pãhuve ‘¿mara ehi etera pīha sereco yuvireco?’ oya.

<sup>59</sup>Ahese pahi eta rerecuar iyavei opacatu porandusa ivate catu vahe pendar, ahe oñehengapo-ngapo uca tēi ava Jesús amotarēhisave yuca uca ãgua yuvireco, <sup>60</sup>yepo oyemboyecua setá iteanga yamotarēhisar semiramira tēi vahe yuvireco viña, ndoyosui eté rumo mbahe sembiapo naporai vahe yuca uca ãgua yuvireco. Aheseve yugüeru ñuvirío yamotarēhisar oporombopa-mbopa tēi vahe yuvireco cute.

<sup>61</sup>—Co mbia aipo ehi: ‘Che aicatu co tũparo monduru; aicatu aveira imopuha iri mbosapi arí rupi’ ehi —ehi tēi yuvireco chupe.

<sup>62</sup>Ahese pahi rerecuar ivate catu vahe opūha, oporandu Jesús upe:

—¿Mahera vo nderemboyevii eté ñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

<sup>63</sup>Noñehei eté rumo. Ahese,

—Che orocuai Tüpa supi eté vahe rer pipe emombehu oreu: ¿Poropisirosar ité nde ereico, Tüpa Rahir? —ehi pahi rerecuar ivate catu vahe chupe.

<sup>64</sup>—Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehir, aguapise Tüpa mbahe mboavaisarēhi acato coti, ayevice avei iva quiha rese curi —ehi.

<sup>65</sup> Evocoiyase pahi rerecuar ivate catu vahe imboasipave omondoro oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūritei. <sup>66</sup> ¿Mara ehi aipo pe pihave? —ehi.

—Supi eté, oyavi mbahe. ¡Tomanofño ité! —ehiño ivoya eta yuvireco chupe.

<sup>67</sup> Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, <sup>68</sup> aipo ehi yuvireco chupe:

—Nde niha aipo ereico Tūpa remimbou Poropĩsiosar, ¿eicua ité ru, ava evocoi ocua nde rese? —ehi yoyai catu-catu yuvireco.

*Pedro, “Ndaicuai vahe evocoi mbia” ehi Jesús upe*

<sup>69</sup> Pedro evocoiyase oguapi sãro ocarve ñachimbrĩ pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

<sup>70</sup> Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

<sup>71</sup> Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

<sup>72</sup> —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

<sup>73</sup> Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

<sup>74</sup> Ahe evocoiyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe. <sup>75</sup> Ahese Pedro oyemomahenduha Jesús oyeupe, ‘Acoi tacura ñehe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osé, oyasehó iteanga oso.

## 27

*Jesús serasosa Pilato rovai*

<sup>1</sup> Cõhe ramose, ahese opacatu pahi eta rerecuar, judío rerecuar avei oñemonuha ati oyemboyoya guasu ‘Jesús tayucasa ité’ oyapave yuvireco.

<sup>2</sup> Ipare oipocua-pocua seraso mborerecuar guasu Pilato upe yuvireco.

*Judas yeyuca agüer*

<sup>3</sup> Judas, acoi Jesús omondo vahe yamotarēhisar uve oicua, “Jesús tayucasa cute” ehise, ahese tasí iteanga chupe. Evocoiyase oso voi tēi tūparo guasuve pahi eta rerecuar yuvirecoi vahe upe iyavei judío rerecuar eta upe treinta guarepochi mboyevi ãgua aipo ehi:

<sup>4</sup> —Che ayemboangaipa tiēte vichico. Esepia, amonofño tēi mbia seco catupri vahe pēu yuca uca ãgua —ehi mborerecuar eta upe.

—Mara etemo ore orovireco. ¡Nde remimbotar niha! —ehiño yuvireco chupe.



<sup>5</sup> Evocoyase opaño guarepochi omombó tũparo pĩpe. Ichui voi oso oyemboyaseco, oyeyuca.

<sup>6</sup> Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa rĩru pĩpe. Esepia, ava yucapirã repri tẽi —ehi yuvireco.

<sup>7</sup> Ipare oyoya guasu ipihañemoñeta yuvireco co guarepochi rese ñaihu rese oporavĩqui vahe ivi rerocua ãgua ‘toime ava secua ambuae vahe rehögũer tĩ ãgua’ oyapave yuvireco. <sup>8</sup> Sese cũritei co ivi upe, “Ava ruvi repri tẽi” ehi yuvireco yepi. <sup>9</sup> Ēgũe ehi co imboaviye ité Tũpa ñehe mombehugar Jeremías remimombehugũer aipo ehi vahe: “Oipĩsipa treinta guarepochi yuvireco, ahe ava Israel suindar mborerecuar remimombehugũer rupi eté evocoi mbia piĩ ãgua. <sup>10</sup> Ipipe virocua ñaihu rese oporavĩqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tũpa ñehe mombehugar aracadendar.

*Jesús serasosa mborerecuar Pilato rovai*

<sup>11</sup> Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

<sup>12</sup> Evocoyase acoi pahi eta rerecuar iyavei judío rerecuareta oñemonuha vahe eipeve oiñehengapo-ngapo tẽi yuvireco. Nomboyevii eté rumo iñehe chupe oyeepi ãgua. <sup>13</sup> Evocoyase:

—¿Nderesendui vo aipo co opacatu ndeu ñehe-ñehe tẽisa? —ehi Pilato chupe.

<sup>14</sup> Nomboyevii eté rumo que ñepei angara ñehesa chupe viña. “¡Too, mara ehi rutei vo co!” ehi-ehi tẽi mborerecuar chupe.

*“¡Tayaticasa!” ehi Jesús upe ava yuvireco*

<sup>15</sup> Mborerecuar guasu recosa ité ñepei ava soquendapri renose ãgua Pascua pieta pĩpe ava rehii remimbotar rupi yepi. <sup>16</sup> Aheve oime soquendapri mbia icuapri vahe ité Barrabás serer vahe; <sup>17</sup> evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pẽu: Barrabás pĩha, anise Jesús “Poropĩsirosar” ehi vahe yuvireco chupe tie? —ehi.

<sup>18</sup> Esepia, ahe oicuaño ité ava rese yemoecatẽhisa pĩpe sui imondopri secoise.

<sup>19</sup> Pilato güendave chini viteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tẽi eté sesendar” ehi.

<sup>20</sup> Evocoi pahi eta rerecuar iyavei judío rerecuareta rumo ava rehii omonguerẽhi, “Barrabás tosẽ; Jesús evocoyase tomano” he ãgua yuvireco. <sup>21</sup> Evocoyase Pilato oporandu iri ava rehii upe:

—¿Uma peipota catu co ñuvirio yuvirecoi vahe sui amose vaherã pẽu? —ehi.

—¡Barrabás tosẽ! —ehi yuvireco.

<sup>22</sup> —¿Mbahe vo evocoyase che ayapora Jesús rese chupe acoi ava, “Poropĩsirosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

<sup>23</sup> —¿Mbahe ité vo oyapo naporai vahe? —ehi tẽi ava rehii upe.

Ahe rumo:

—¡Yaticasa ité curusu rese! —ehi ati-ati iriño yuvireco chupe.

<sup>24</sup> Evocoyase Pilato: “Ndaicatui mbahe moingatu sepi āgua” ehi tēi oyeupe. Sese ava yaivu guasu catu-catu irise, ogüeru uca i. Ipipe oyepoi opacatu ava rehii rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

<sup>25</sup> —¡Ore rese ité, ore rahir rese avei toviapi que mbahe tēi co mbia mano sui! —ehi atiño ité yuvireco.

<sup>26</sup> Ahese Pilato omose uca Barrabás; Jesús rumo oinupá iteanga uca tucumbo tupeicha nungar pipe imondo curusu rese yatica āgua.

<sup>27</sup> Evocoyase mboreteciar sundao viroique Jesús ambuae oi pipe. Aheve opacatu omboetasa omboyere tupri uca sese yuvireco. <sup>28</sup> Ahese osequipa iturucuar ichui. Ipare omonde turucuar pīra vahe yuvireco sese <sup>29</sup> iyavei omonde ñaca rese yu piapri, omondo avei ñepeí tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rereciar tasecoi! —ehi angahu sese oguayi tēisa pipe yuvireco.

<sup>30</sup> Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco. <sup>31</sup> Ēgüe ehi yoyai catu-catu yuvireco. Ipare virocuase turucuar pīra vahe ichui, ahese omonde iturucuar ité yuvireco sese. Ichui viraso curusu rese yatica āgua yuvireco cute.

### *Jesús yaticasa curusu rese*

<sup>32</sup> Acoi yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voiño tēi yuvireco.

<sup>33</sup> Oyepotase yuviraso Gólgota serer vahesave, ahe ‘ava ācagüer’ oya aipo ehi chupe, <sup>34</sup> aheve uva ricuer imboyeshapri mbahe pihaupiar rese omondo tēi yuvireco Jesús toiñu. Osāha tēi, ndoiñu potai rumo.

<sup>35</sup> Ipare oyatica curusu rese yuvireco. Ahese sundao iguayiño oyeupe iturucuar mboyaho-yaho āgua rese. <sup>36</sup> Ipare aheve oguapi yuvinoi saro. <sup>37</sup> Iyavei omombehu ivate curusu rese ñaca harive mbahe sui oyuca yuvireco: “Co Jesús judío rereciar guasu” ehi icuachiapri oñ.

<sup>38</sup> Ñuvirío imonda rai vahe yaticasa avei curusu rese supive yuvireco, ñepeí mbahe rese ipocosa coti, ambuae evocoyase mbahe rese ipocoēhisa coti yuvireco. <sup>39</sup> Acoi ava ñocuasar iñehe-ñehe tēi, oñeaca mbovava, <sup>40</sup> aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. ¡Eñepisiro ru nde ae cute! ¡Tūpa Rahir nde recose, egüeyi curusu sui! —ehi tēi yuvireco chupe.

<sup>41</sup> Aipo ehi avei pahi eta rereciar, Moisés porocuita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

<sup>42</sup> —Oipisiro ambuae, ahe ae rumo ndoicatui oñepisiro. Israel rereciar guasu secoise, ¡togüeyi curusu sui cūritei, ahese voi seroyasara! <sup>43</sup> Ahe oyeroya Tūpa rese, Tūpa evocoyase oipotase, toipisiro cūritei. Esepia, ahe, “Che Tūpa Rahir aico” ehi yandeu cuese —ehi yuvireco.

<sup>44</sup> Imonda rai vahe avei rumo acoi yaticapri supive, ahe avei mara ehi-ehi tēi chupe.

*Jesús mano agüer*

<sup>45</sup> Ahese mbiter ari pipe, opa tupri pïtu ivi rupi. Ëgüe ehi las tres rupi.  
<sup>46</sup> Ahese tupri avei Jesús oñehe pïrata aipo ehi: “Elí, Elí, ¿lema sabactani?” ehi, (ahe ‘che Ru Tüpa, che Ru Tüpa, ¿mahera vo che reya eve?’ oyapave aipo ehi).

<sup>47</sup> Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tüpa ñehe mombehúsar Elías upe oñehe —ehi yuvireco chupe.

<sup>48</sup> Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toi’hu’ oya. <sup>49</sup> Ambuae rumo aipo ehiño yuvireco:

—Ëgüe tehiño rane, ¿oura pïha Elías ipïsiro ãgua? —ehi yuvireco.

<sup>50</sup> Ahese Jesús sãse pïrata iri, omano. <sup>51</sup> Ahe pipeve voi tüparo guasu turucuar ivate coti sui ovo tupri. Aheseve avei ivi oriri iyavei ita guasu-guasu oyeca. <sup>52</sup> Tehögüer ruvípa ita apopri avei oyemboi yuvireco iyavei setá Tüpa reroyasar omano vahecuer, ahe avei opa ocuerayevi yuvireco. <sup>53</sup> Ëgüe ehi Jesús cuerayevire, ahe opa yuvínose tehögüer ruvípa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

<sup>54</sup> Evocoiyase co sundao rerecuar iyavei Jesús rãrosareta, ahe oyanduse ivi riri yuvireco iyavei ambuae mbahe ãgüe ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Tüpa Rahir ité secoi! —ehi tēi yuvireco.

<sup>55</sup> Iyavei setá cuña aheve amombrive osepia catu yuvínoha, ahe acoi Galilea sui yugüeru vahecuer Jesús rupi iyavei setá rupi oipitivi yuvireco yepi. <sup>56</sup> Ahe ipãhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

*Jesús apocatu agüer tuvípa pipe*

<sup>57</sup> Pïtu potase, ou mbia mbahe yar José serer vahe, ahe Jesús reroyasar tecua Arimatea pendar. <sup>58</sup> Evocoiyase ahe oso Pilato upe oporandu Jesús rehögüer rese. Evocoiyase Pilato aipo ehi: “Aviye, timondosaño chupe” ehi. <sup>59</sup> José evocoiyase víraso sehögüer. Ipare oimama tupri turucuar secose vahe ndiquihai vahe pipe. <sup>60</sup> Ichui omoingue ombahe tuvípa ipiasu vahe, ita oyoho uca vahe pipe. Ipare osovapi ita guasu yapayere vahe pipe oso. <sup>61</sup> Aheve María Magdalena ambuae María rese suvípa rovai oguapi yuvínoi.

*Jesús ruvípa osãro sundao yuvireco*

<sup>62</sup> Ahere ayihive mbítuhusa ari pipe, yuvíraso pahi eta rerecuar iyavei fariseo Pilato upe mbahe rese oporandu ãgua <sup>63</sup> aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapi ari pare omano vahe pãhu sui” ehi acoi cuese oicove vítese —ehi yuvireco—. <sup>64</sup> Sese emondo sundao sehögüer ruvípa rãro tupri ãgua mbosapi ari rupi semimbohe ñomiēhi ãgua pïtu pipe yuvireco. Aviyeteramo, “Ocuerayevi omano vahe pãhu sui” aipo ehi tupri tēi tiētera ava upe yuvireco. Aipo ehise yuvireco, yipindar semira tēi vahe sui ivate catura serecosa —ehi yuvireco.

<sup>65</sup> Pilato evocoiyase aipo ehi chupe yuvireco:

—Aviye —ehi—. Amondora sundao pēu. Peraso, pemoviracua tupri ité sãro ãgua —ehi.

<sup>66</sup> Evocoyase yuviraso tehögüer ruvüpa rãro tupri água yuvireco. Ahese omondo tehögüer rovapisa ita guasu rese mbahe imomüisa cua água yuvireco. Ipare oseya aheve sundao sãro água yuvireco cute.

## 28

### *Jesús ocuerayevi*

<sup>1</sup> Cõhe ramomise, domingu pipe, María Magdalena iyavei ambuae María yuviraso tehögüer ruvüpa repia yuvireco. <sup>2</sup> Aviyeteramo tõi orirü pĩratá ivi Tüpa rembiguai íva sui igüeyise. Êgüe ehi oyepota tehögüer ruvüpave ou, ahe vírocua itape guasu sovapisa ichui. Ipare iharive oguapi oĩ. <sup>3</sup> Êgüe ehi sendí iteanga aviye acoi overa vahe. Iturucuar evocoyase morochí eté. <sup>4</sup> Osepiase sundao, orirü eteanga osiquiyepave yuvireco ichui, opa oyuca pucu-pucu tõi yuvireco. <sup>5</sup> Tüpa rembiguai rumo aipo ehi voi eté cuña upe:

—Pesiquiyei rene. Esepia, che aicua pe peseca Jesús yaticapirer. <sup>6</sup> Ndipoi eté cohave. Esepia, ahe ocuerayevi güemimombehu rupi eté. Tapesepia ru supagüer —ehi.

Ipare aipo ehi:

<sup>7</sup> —Peso poyava voi, tapemombehu semimbohe eta upe: ‘Ocuerayevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu água pëu —ehi Tüpa rembiguai cuña upe.

<sup>8</sup> Evocoyase cuña yuviraso poyava voi suvüpa sui, osiquiye pãhuve rumo ovihãño yuvireco; êgüe ehi yuvinoñá iteanga imombehu yugüeru oreu. <sup>9</sup> Ahese Jesús oyemboyecua cuña upe cute omboavirave. Ahe cuña evocoyase oyemboya sese oñenopiha ipicuhaguã imboeteisave yuvireco. <sup>10</sup> Evocoyase ahe aipo ehi chupe:

—Pesiquiyei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

### *Sundao omombehu mbahe güembiepia yuvireco*

<sup>11</sup> Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahí eta rerecuar upe opacatu mbahe osepiya vahecuer yuvireco. <sup>12</sup> Evocoyase pahí rerecuareta oñemoñeta judío rerecuar rese opihãñoñeta mboyoya água. Ichui omondo setá guarepochi sundao upe yuvireco, <sup>13</sup> aipo ehiño yuvireco chupe:

—Aipo peyera ava uve: “Oroque viteseve pĩtu pipe, ahese revo Jesús remimbohe yugüeru sehögüer ñomi água ore sui” peyera —ehi mborerecuar yuvireco chupe—. <sup>14</sup> Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahí eta rerecuar sundao upe yuvireco.

<sup>15</sup> Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Êgüe ehi vite cüritei judío Jesús cuerayevisa reroyaẽhi yuvireco yepi.

### *Jesús omondo güemimbohe ivi yacatu rupi oñehengaüer mombehu água*

<sup>16</sup> Evocoyase êgüe orohe oroso semimbohe once oroico vahe Jesús remimombehu ivi Galilea pendar ivitrive. <sup>17</sup> Acoi orosepiase rumo Jesús, ahese oromboetei oroico, yepe moviro tõi ore pãhu pendar ndoviroya

tupri vıteı yuvıreco viña. <sup>18</sup> Evocoyase ahe oyemboya ore rese aipo ehi oreu:

—Tüpa che mbou mborerecuar ivate catu vahe che reco ãgua ivave, ivıve nara avei no —ehi—. <sup>19</sup> Peso ava upe opacatú ivı rupi iyavei pembohe che recocuer rupi eté yuvırecoi vaherã; peñapiramo avei che Ru rer pipe, che rer pipe, Espıritu Santo rer pipe avei no. <sup>20</sup> Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Avıye, aipo rupive.

## MARCOS REMBICUACHIA JESUS RECOCUER RESENDAR San Marcos

*Juan Oporoãpiramo vahe ivi iporupirêhisa rupi secoi*

<sup>1</sup> Co yipindar aviye vahe ñehesa Jesucristo, Tũpa Rahir, recocuer resendar amombehu potami pẽu. <sup>2</sup> Yipiindar Tũpa aipo ehi imombehu oñehe mombehusar Isaías rembicuachía pipe aracahe:

“Amondora che ñehe mombehusar nde renonera, ndeu peri moatiro ãgua” ehi.

<sup>3</sup> “Oyeendu ñehesa ipĩrata vahe ava porêhise: ‘Pemoingatu yande Yar raperã; pemohivi tupri avei’ ehi” ehi aracahe.

<sup>4</sup> Ëgũe ehi Juan ou ava ãpiramo ivi iporupirêhisa rupi oico, aipo ehi: “Pemboasi pe angaipa, peyevi Tũpa upe, ahese opoãpiramora Tũpa pẽu ñero ãgua pe angaipa rese” ehi ava upe. <sup>5</sup> Opatatu ava oyugũeru iñehe rendu ãgua ivi Judea rupindar, iyavei tecua Jerusalén pendar oangaipagũer mombehu ãgua. Ahese Juan oñapiramo iai Jordán pipe.

<sup>6</sup> Juan turucuar camello ragũer apopri, sumbicuasa mbahe pিরer, sembihu evocoyase tucru, eiri caha pipendar avei. <sup>7</sup> Ahe aipo ehi oñehe ava upe oico: “Che raquicuei oura seco pĩrata catu vahe che sui, sese cheu ndiyai chira ayeaivi ipitaquisã yora ãgua. <sup>8</sup> Che supi eté opoãpiramo i pipe tẽi; ahe rumo pe ãpiramora Espiritu Santo pipe” ehi.

*Jesús ãpiramo agũer*

<sup>9</sup> Ipare Jesús osẽ tecua Nazaret sui oso Galilea rupi. Aheve Juan oñapiramo iai Jordán pipe. <sup>10</sup> Osẽ ramoseve i sui, Jesús osepia iva oyemboi tupri, ahese Espiritu ogũeyi iharive apicasu nungar. <sup>11</sup> Ahese oyeendu ñehesa iva sui aipo ehi: “Nde che Rahir ereico, che rembiaisu, avihã etepri nde rese” ehi vahe.

*Jesús recoãhasa*

<sup>12</sup> Ipare voi, Espiritu Santo viroguata Jesús ava porêhisa rupi. <sup>13</sup> Aheve Jesús secoi cuarenta ari mbahe mĩmba vai pãhuve. Aheve avei Carugar osecoãha; Tũpa rembiguai iva pendareta rumo ihañecoño yuvireco sese.

*Jesús omboipi oporaviqui Galilea rupi*

<sup>14</sup> Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico <sup>15</sup> aipo ehi: “Oyepota ari iyavei cõimi eté Tũpa mborerecuasa yandeu. Sese, pemboasi pe angaipa, peyevi Tũpa upe, iyavei peroya co ñehesa aviye vahe Tũpa suindar” ehi.

*Jesús, “Perio che rupi” ehi irungatu pira mbohasar upe*

<sup>16</sup> Ñepe ari Jesús oguata ipa Galilea ivi. Ahese osepia Simón, tivri Andrés avei, ahe pira omboha yuvireco. <sup>17</sup> Ahese Jesús aipo ehi chupe:

—Pe pira recasar peico, perio che rupi, na peye aveira ava reca ãgua cheu nara —ehi.

<sup>18</sup> Aipo he ramoseve voi, opoi opira mbohasa sui yuvireco, yuviraso supi.

<sup>19</sup> Ipare chíhi oguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri.

20 Ahe chupe avei: “Perio che rupi” ehi, evocoyase vu oseya carite pipe ipitiviisar reseve, yuviraso supi.

*Mbia carugar vireco vahe oyese*

21 Oyepotase tecua Capernaum ve yuvireco mbituhusa ari pipe, Jesús oique oporombohe tūparove. 22 Evocoyase ava osenduse iporombohesa, “¿Mara ehi rutei?” ehi tēi yuvireco chupe. Esepia, ahe oporombohe güeco pīratasa pipe, ndahei Moisés porocuita rese oporombohe vahe nungar. 23 Aheve mbia ahe tecua pendar vireco vahe carugar oyese, oñehe pīrata chupe aipo ehi:

24—¿Mahera vo ereyuño tēi cohave oreu, Jesús Nazaret pendar? ¿Ereyu vo ore mocañi āgua tēi? Che orocua ité, nde Tūpa suindar ndaseco marai vahe ereico —ehi chupe.

25 Oñehe pīrata rumo carugar upe aipo ehi: —¡Quiriri, esē co mbia sui! —ehi chupe.

26 Evocoyase carugar mbia rese secoi vahe omoehoha seiti ivive, sāse, osē oso ichui. 27 Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe pīha co? ¡Iporombohesa ipiasu vahe ité! ¡Co mbia vireco ité omborerecuasa! ¡Carugar avei eté omboyeroya oyeupe ifnehese! —ehi tēi ava yuvireco.

28 Cūrteimi voi yandusa serācua opacatu ivi Galilea rupi.

*Jesús ombogüera Pedro rembireco si*

29 Jesús yuvinosese tūparo sui, yuviraso Santiago, Juan rese Simón, Andrés rētave. 30 Aheve Simón rembireco si sohi iteanga vupave ou. Evocoyase omombehu Jesús upe imbaherasisa yuvireco. 31 Ahese oso chupe oipisi ipo rese imopuha, ahe ramoseve, sohi opituhu ichui. Ipare voi ahe cuña ihañeco semihura rese.

*Jesús setá ombogüera ava imbaheasi vahe*

32 Pītu ramose opacatu imbaheasi vahe iyavei carugar vireco vahe viraso yuvireco chupe imbogüera āgua. 33 Opacatu ava ahe tecua pendar oñemonuha oquendipive yuvireco. 34 Evocoyase setá ombogüera mbaherasi-rasi tēi vireco vahe, iyavei omboyepipi setá carugar ava sui. Ndoipotai rumo carugar ñehe. Esepia, ahe oicua ité evocoiya seco yuvireco.

*Jesús Vu Tūpa Ñehengagüer omombehu judío tūparo rupi*

35 Ayihiteve Jesús oñarapuha oso ava porēhisave oyerogui āgua.

36 Evocoyase Simón ondugüer reseve yuviraso seca. 37 Osepiase,

—Opacatu ava nde reca tēi yuvireco —ehi yuvireco chupe.

38 Ahe rumo,

—Yaso ambuae tecua namombrii vahesa rupi Tūpa Ñehengagüer mombehu āgua aheve; evocoi nungar apo āgua niha che ayu —ehi.

39 Ēgüe ehi oguata opacatu Galilea ivi rupi, omombehu Vu Tūpa Ñehengagüer judío tūparo yacatu rupi oico, iyavei setá omose carugar ava sui.

*Jesús ombogüera mbia lepra vireco vahe*

40 Ñepeí mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

<sup>41</sup> Iparaisuerecosave opoco sese.

—Aipota. ¡Erecuerara cūrítei! —ehi chupe.

<sup>42</sup> Aipo ihe ramoseve, ocuera voi eté. <sup>43</sup> Ahese aipo ehi iri chupe icho renondeve:

<sup>44</sup> —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa re-sendar Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

<sup>45</sup> Ahe mbia rumo oso omombehu-mbehu opacatú ava upe. Sese Jesús ndoicatu iri güeique água güecocuer mombehuse tecua rupi; secoño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

## 2

### *Jesús ombogüera ava ndoguatai vahe*

<sup>1</sup> Ñepeí ari pipe Jesús oyevi ou tecua Capernaum ve, ahese opacatu oyandu ñepeí oive secoise yuvireco. <sup>2</sup> Cūríteimi voi eté setá ava oñemonuha yuvireco secosave. Sese ndipoi eté ava reique iri água oi pipe oquendipi rupi. Ahe rumo omombehuño ité Vu Ñehengagüer. <sup>3</sup> Aheseve irungatu mbia viroyepota ndoguatai vahe yuvireco chupe. <sup>4</sup> Ahe rumo ndiyai seroique água Jesús uve ava rehíisave yuvireco. Sese viroyeupi oi harive seraso yuvireco. Aheve teca virocua oi sui yuvireco; supí viroyí supa reseve imondo Jesús rovai tuprí yuvireco. <sup>5</sup> Ahe oicuae co mbia yuvirecoi vahe oyese yeroya, aipo ehi imbaheasi vahe upe:

—Che rahír, che ñero nde angaipa rese ndeu —ehi.

<sup>6</sup> Moisés porocuita rese oporombohe vahe rumo ipihañemoñeta aheve yuvinoi: <sup>7</sup> “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi água” ehi. <sup>8</sup> Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese? <sup>9</sup> ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pīha, anise: “Eñarapuha, esupi nde rupa, eguata” hesa tie? <sup>10</sup> Tapeicua ru che, Ava Riquehír, areco mborerecuasa co ivi pipe ava angaipa upe che ñero água —ehi.

Evocoyase aipo ehi imbaheasi vahe upe:

<sup>11</sup> —Eñarapuha, esupi nde rupa, eso nde rētave —ehi.

<sup>12</sup> Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondii yuvireco, omboetei Tūpa yuvireco aipo ehi:

—Yipisuive ndayasepiái vahe ité co nungar mbahe —ehi tēi yuvireco.

### *Jesús oñehe mbia Leví serer vahe upe*

<sup>13</sup> Ipare Jesús oso iri ipa ivii. Aheve oporombohe oyese ava rehii yemboyase. <sup>14</sup> Ichui oguata vitese, osepia Leví, Alfeo rahír, guarepochi rero cuasave chinise, aipo ehi chupe:

—Erio che rupi —ehi.

Evocoyase Leví opūha, oso voi supi.

<sup>15</sup> Ipare ocaru Leví rētave güemimbohe reseve yuvireco, ava sui guarepochi rero cuasar iyavei ava yangaipa vahe pāhuve. Esepia, setá ava osaquicue moñaño ité yuvireco. <sup>16</sup> Evocoyase Jesús ocaruse ipāhuve,



fariseo eta, oporombohe vahe Moisés porocuaíta rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuasar iyavei yangaipa guasu vahe pãhuve tẽi? —ehi.

<sup>17</sup> Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

*Yecuacusa rese ñehesa*

<sup>18</sup> Ñepeí ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoiyase moviro mbia ipãhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

<sup>19</sup> Evocoiyase omboyevi ahe ava upe:

—¡Ndiyai eté ichohopri mendasave iyecuacu ãgua imer oicove vitese ipãhuve! <sup>20</sup> Oimera rumo ari imer reraso ãgua ichui curi, ahese ramo oyecuacura yuvireco cute —ehi.

<sup>21</sup> “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri ãgua, ichorosa evocoiyase tuvicha catu-catuño ité. <sup>22</sup> Iyavei uva ricuer ipiasu vahe ndiyai iñasa mbahe pírer cuacua pipe. Esepia, uva ricuer ipiasu vahe ose-ose mbahe pírer cuacua vahe pipe, ombopuñora, uva ricuer evocoiyase ocañipa tẽira, iyavei mbahe pírer ocañi tẽi aveira. Sese uva ricuer ipiasu vahe ñoñasara mbahe pírer ipiasu vahe pipe yepi” ehi.

*Jesús remimbohe oipoho trigo mbituhusa ari pipe yuvireco*

<sup>23</sup> Ñepeí mbituhusa ari pipe, Jesús oguata güemimbohe rese trigo pãhu rupi fariseo rembiepiave yuvireco. Ahese semimbohe oipoho-poho sãhii yuvireco. <sup>24</sup> Evocoiyase fariseo aipo ehi:

—¡Mahera nde remimbohe mbituhusa ari pipe oporaviquiño yuvireco! —ehi yuvireco chupe.

<sup>25</sup> Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe. <sup>26</sup> Pahi rerecuar ivate catu vahe Abiatar serer vahe recose, ahese David oi que Túpa rëta pipe pan imboeteipri Túpa upendar reca ondugüer reseve yuvirohu ãgua. Ahe chupe acoi ndiptasai ihu ãgua yuvireco viña; judío pahi yuvirecoi vahe upeño ité niha ipotasa ihu ãgua yepi. Ahe rumo ohuño, omondo avei ava oyeupindar tohu aracahe —ehi.

<sup>27</sup> Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara. <sup>28</sup> Sese Ava Riquehir mbituhusa ari rerecuar secoi —ehi Jesús fariseo upe.

### 3

*Mbia ipo nomii vahe Jesús ombogüera*

<sup>1</sup> Jesús oi que iri judío tũparove. Aheve oime mbia ipo co cotigüer nomii vahe. <sup>2</sup> Aheve avei fariseo ‘¿ombogüerara pãha mbituhusa ari

pipe?’ oya omahengatu yuvireco sese ‘yaiñhengapo angahu’ oyapave tēi.  
<sup>3</sup> Evocoyase Jesús aipo ehi co mbia ipo nomii vahe upe:

—Epūha ore mbiterve —ehi.

<sup>4</sup> Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pīha, mbahe naporai vahe tie? ¿Yaipĩsiro pīha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco. <sup>5</sup> Evocoyase omahe ava oyese oyere tupri vahe rese voriehiseve iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoyase oichoho oyiva, ocuera tupri ité. <sup>6</sup> Ahese fariseo opa yuvinose yuviraso oyemoingatu Herodes rupindar rese Jesús yuca āgua yuvireco.

*Ava rehii ipa popi rupi yuvirecoi*

<sup>7</sup> Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi. <sup>8</sup> Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia āgua. <sup>9</sup> Sese oyocuai güemimbohe vireco voi vaherā ñepeí carite yuvireco ava omboti etepriēhi āgua yuvireco. <sup>10</sup> Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco āgua.

<sup>11</sup> Iyavei ava carugar vireco vahe sepia, oñenopiha sovai, oñehe pucu-pucu yuvireco:

—¡Nde Tūpa Rahir ereico! —ehi.

<sup>12</sup> Jesús rumo oñehe pīrata chupe: “Che mombehui rene ava rovaque peye” ehiño imondo.

*Jesús oiporavo doce tupri güemimboherā*

<sup>13</sup> Ipare Jesús oyeupi ivitri rese oso. Aheve ava viroyasar upe oñehe iporavo āgua güemimbotar rupi. Ichui oyugüeru yuvireco chupe. <sup>14</sup> Ahe ipāhu pendar osenoi doce tupri güemimboherā ‘toguataño che rupi, tomombehu Tūpa Ñhengagüer opacatu ivi rupi’ oya. Ahe osero “apóstol” <sup>15</sup> ‘toipisi avei mborerecuasa carugar ava sui imboyepepi āgua yuvireco’ oyapave. <sup>16</sup> Evocoi doce yuvirecoi vahe, ahe: Simón (sererguā acoi omondo Pedro), <sup>17</sup> Santiago iyavei tivri Juan Zebedeo rahir, ahe avei omondo sererguā Boanerges (‘osunu vahe rahir’ oya aipo ehi); <sup>18</sup> iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe pāhu pendarer; <sup>19</sup> iyavei Judas Iscariote, ahe omondo vaherā Jesús yamotarēhisar upe.

*“Jesús carugar pīratasa vireco oyese” ehi tēi ava yuvireco*

<sup>20</sup> Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru āgua yuvireco. <sup>21</sup> Oyanduse imu secocuer yuvireco, oyugüeru seraso āgua ‘ndayaracua iri revo’ oya.

<sup>22</sup> Iyavei oporombohe vahe Moisés porocuaíta rese oyugüeru vahe Jerusalén sui aipo ehi: “Co mbia carugar rerecar Beelzebú oyocuai vahe, ipīratasa pipe tēi omboyepepi carugar ava sui” ehi yuvireco.

<sup>23</sup> Evocoyase Jesús omombehu carugar recocuer aipo ehi: “¿Mara ehira aipo carugar ahe ae oyee nose ava sui viña? <sup>24</sup> Acoi mborerecar

guasu povri pendar, ahe ovava-vavase oyeupe; evocoi nungar mborerecuar pīratasa ocañi tēira. <sup>25</sup> Acoi oñemu oyese ae oyeamotarēhise, oyemboyahose yuvireco viña, ahe ndipocopii chiveira yuvireco. <sup>26</sup> Acoi carugar oyemboyahose ovava āgua oyeupe ae yuvireco, ndipocopii chiveira yuvireco, ahe evocoiyase secocuer ocañi tēi vaheṛā ité yuvireco.

<sup>27</sup> “Ndipoi eté niha ava oiique vahe que ava ipīrata etepri vahe rēta pipe imbahe rerocuapa āgua ichui; oñapichi rane itera. Ipare voi opara imbahe vīrocuā ichui.

<sup>28</sup> “Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei. <sup>29</sup> Acoi iñehe-ñehe tēi vahe rumo Espiritu Santo rese, ahe chupe ndipo iri chietera ñerosa apirēhi vaheṛā ité” ehi.

<sup>30</sup> Aipo ehi Jesús imboyevi ava upe. Esepia, “Carugar tēi erereco” ehiño ava yuvireco chupe.

*Jesús si, tivireta avei*

<sup>31</sup> Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē āgua. <sup>32</sup> Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tēi yuvireco —ehi.

<sup>33</sup> Ahe rumo,

—¿Ava pīha che si; ava pīha che rivireta yuvirecoi? —ehi.

<sup>34</sup> Evocoiyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta. <sup>35</sup> Esepia, acoi Tūpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

## 4

*Mbahe miti sui yembohesa*

<sup>1</sup> Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve oguapi oñehe. Ava rumo opacatu ivi ātasa rupi opitaño yuvireco. <sup>2</sup> Evocoiyase ava mbohe āgua omboyoya tecocuer mbahe tīsa rese aipo ehi:

<sup>3</sup> “Pesendu co ñehesa: Ñepei mbia osē omaheti. <sup>4</sup> Ahe otiapi-apīise mbahe rāhii oso, moviro oviapi peri rupi. Vīrai yugūeruse rumo, opaño yuvirohu. <sup>5</sup> Iyavei moviro oiti ivi nayanai vahesave, ita pāhuve. Sese cūrteimi sori. <sup>6</sup> Ari tasise rumo, opaño ipiru. Esepia, ndasapoi niha. <sup>7</sup> Iyavei ambuae mbahe rāhii oiti yu pāhuve; ahe yu rumo sori poyava catu. Sese opaño oyopi. Evocoiyase ahe miti ndihai eté. <sup>8</sup> Ambuae mbahe rāhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

<sup>9</sup> Evocoiyase, “Acoi osendu pota vahe che ñehe, toyapisacaño sese” ehi Jesús ava rehii upe.

*¿Mahera pīha co yembohesa imboyyasa ambuae mbahe rese?*

<sup>10</sup> Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. <sup>11</sup> Ahe aipo ehi: “Pēu niha Tūpa oicua uca mbahe ndicuasai vahe omborecuasa resendar. Ndache reroya potai vahe upe rumo imboyyasa mbahe ambuae mbahe rese

yepi. <sup>12</sup> Yepe osepia tēira, ndosepiacuai chietera rumo yuvireco. Iyavei yepe osendu tēira, ahe rumo ndosenducuai chietera yuvireco, Tūpa upe oyevi potaēhisave, ipipe sui ndipoi chira ñeroisa yuvireco chupe” ehi.

*Jesús omombehu tupri yembohesa mbahe tisa resendar*

<sup>13</sup> Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri āgua? <sup>14</sup> Evocoi mbahe rāhii oñoti vahe, Tūpa Ñehengagüer mombehusar nungar. <sup>15</sup> Amove ava recocuer inungar co mbahe rāhii seitipri peri rupi: osendu angahu Tūpa Ñehengagüer. Sendu pare rumo, ou Carugar ovirocuapaño oi que vahe ipiha pipe ichui. <sup>16</sup> Ambuae ava recocuer inungar mbahe rāhii seitipri ita pāhu rupi: osendu Tūpa Ñehengagüer, oipisi tupri angahu oyeupe nara vorivetesá pipe; <sup>17</sup> ndovirecoi rumo guapo oyese opirata āgua. Evocoiyase yuvirecoise mbahe-mbahe tēi pipe Tūpa Ñehengagüer sui tēi, cūrteimi seroyaēhisave, ‘Apoira ichui’ ehi yuvireco. <sup>18</sup> Ambuae ava recocuer inungar mbahe rāhii ñotimbri yu pāhu rupi: osenduse ñehesa Tūpa suindar, <sup>19</sup> ahe rumo ipihañemoñeta catu opacatu ombahe eta co ivi pipendar rese saisusave. Oyembopa uca rumo ombahe eta upe. ‘Opacatu ité mbahe tareco’ ehi tiēte viña. Ipipe sui omocañi tēi Tūpa Ñehengagüer. Ndoypa ucai avei mbahe eta aviye vahe evocoi nungar ava upe. <sup>20</sup> Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohí rese treinta, ambuae sesenta, ambuae cien” ehi.

*Tataendi resendar porombohesa*

<sup>21</sup> Iyavei aipo ehi: “¿Serecosa vo tataendi mbahe riruvriva nara tēi iyavei yande rupavrive nara tēi no? Aní, tataendi imondosa ivate poroesape āgua. <sup>22</sup> Ndipoi chietera mbahe ñomipri ndayasepiaí vaherā curi. <sup>23</sup> Acoi osendu pota vahe che ñehe, toyapisacaño yuvireco sese” ehi.

<sup>24</sup> Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua uca che ñehe pēu. Iharive amondo iri catura pēu. <sup>25</sup> Vireco tupri vahe upe, imondosa catura. Acoi ndovireco tupri vahe sui, serocuasañora” ehi.

*Yembohesa mbahe rāhii rorisa resendar*

<sup>26</sup> Aipo ehi iri avei Jesús: “Tūpa mborerecuasa co ivi pipe inungar que ava oñoti vahe mbahe rāhii. <sup>27</sup> Omaheti pare, oso oque. Ipare coiye catu oñarapuha. Ahe oñocua pītu, ari avei, evocoiyase mbahe rāhii sorí poyava yuvireco. Itisar rumo ndoicuai mara ehi vorí. <sup>28</sup> Ivi rese niha oyesu miti: yipindar sorí, ipare iha, ipare sāhii yuvínose sese. <sup>29</sup> Evocoiyase co mbia mbahe ha yaviyese, oipoho. Esepia, oyepota ari ipoho āgua chupe” ehi.

*Yembohesa mostaza rāhii suindar*

<sup>30</sup> Iyavei aipo ehi: “¿Mara ehi vo Tūpa povri pendar co ivi pipe pēu; mbahe rese pīha iyacatu imboyoyasa icua āgua? <sup>31</sup> Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui. <sup>32</sup> Ñoti pare rumo, sorí, ocuacuase tuvichá catu ambuae mbahe miti sui. Sāca tuvichá ité, sese vīrai oyemboaiti sovri rupi yuvireco” ehi.

*Jesús omboyoya ambuae mbahe rese oporombohe yepi*

<sup>33</sup> Ëgüe ehi Jesús oporombohe Tüpa Ñehengagüer rese, omboyoya-yoya ñepe mbahe ambuae mbahe rese ava mbahecua güer rupi.  
<sup>34</sup> Nomombehui eté mbahe ambuae mbahe rese imboyoyaëhi pipe. Ahe rumo omombehu tupri güemimbohe upe ahe aemi yuvirecoise.

*Jesús omombituhu i ohitu vahe, ivitu ai reseve*

<sup>35</sup> Ahe ari pipe pïtu ramomise, aipo ehi güemimbohe upe:

—Yaso ipa rovai —ehi.

<sup>36</sup> Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supi. <sup>37</sup> Oyepotase rumo ivitu ai ipirata vahe, i ohitu vahe oha guasu-guasú carite pipe, omboapipo seni yuvireco chupe. <sup>38</sup> Jesús rumo oyeatocoño, oque ou supita coti. Evocoiyase omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese? ¡Opara moco yaso ipive! —ehi.

<sup>39</sup> Evocoiyase aipo hese, omahe, oñehe pïrata ivitu ai upe, ipa upe avei:

—¡Pepituhu! —ehi.

Aheseve voi opituhu tupri. <sup>40</sup> Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vitei vo che rese? —ehi.

<sup>41</sup> Ahe rumo osiquiyepave oporandu-randu oyeupe yuvireco:

—¿Ava pïha co mbia secoi? Esepia niha, ivitu ai, ipa avei omboyeroya —ehi tēi yuvireco chupe.

## 5

*Mbia Gerasa iguar vireco vahe carugar oyese*

<sup>1</sup> Jesús güemimbohe reseve oyepota ipa rovai Gerasa ivi rese yuviraso.  
<sup>2</sup> Yuvinose pare carite pipe sui, ahese mbia carugar rerecosar tuvipa pãhu rupi secoi vahe oso Jesús upe. <sup>3</sup> Co mbia tuvipa pãhu rupi secoi vahe yepi. Ndipoi eté ava secopisar, carena avei eté opa-opaño omondoso.  
<sup>4</sup> Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. <sup>5</sup> Ari, pïtu rupi oguata, osapucaí oico ivitri mahugüer rupi, tuvipa mahugüer rupi avei; ocua-ocua ita pipe oyese yepi. <sup>6</sup> Amombri Jesús repia ramoseve, oña senonde oñenopiha voi sovai, <sup>7</sup> oñehe pïrata chupe:

—¡Eyepepi che sui Jesús, Tüpa seco ivate catu vahe Rahir! ¡Aporandu Tüpa rer pipe che mombaraisuēhi água eve! —ehi.

<sup>8</sup> Aipo ehi, esepia, yipindar Jesús aipo ehi chupe:

—¡Carugar mbahe tēi vahe, esē co mbia sui! —ehi chupe.

<sup>9</sup> Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehi eté —ehi.

<sup>10</sup> Oporanduño chupe omondopaēhi água co ivi sui. <sup>11</sup> Ichui namombriimi setá cuchi ocaru vahe ivitri rese yuvireco. <sup>12</sup> Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

<sup>13</sup> Evocoiyase Jesús omondo carugar sē água ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

<sup>14</sup> Evocoyase cuchi rãrosar yuvinoña osiquiyepave yuviraso imombehu ãgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pãha?’ oya yuvireco. <sup>15</sup> Oyepotase Jesús recosave, aheve osepia mbia caruguar vireco vahecuer yuvireco oyemonde tuprise oñ, yaracua tuprise avei. Ahese oyembosiquiye tẽi yuvireco. <sup>16</sup> Mbahe oime vahe caruguar vireco vahe rese, cuchi rese avei, ahe sepiasar omombehupa ambuae ava upe yuvireco. <sup>17</sup> Evocoyase ava Jesús upe: “Esẽ cohave sui” ehi yuvireco.

<sup>18</sup> Oha irise Jesús carite pipe, co mbia caruguar rerecosarer oporandu chupe supi oso ãgua. <sup>19</sup> Ahe rumo,

—Esoño nde rõtave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

<sup>20</sup> Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rute!” ehi tẽi yuvireco.

*Jesús ombogüera Jairo rayri, iyavei cuña opoco vahe iturucuar rese ombogüera*

<sup>21</sup> Oyevíse Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive. <sup>22</sup> Evocoyase oyepota mbia mborerecuar tũparo pendar, ahe serer Jairo. Jesús repiase, oñenopiha sovai, <sup>23</sup> aipo ehi chupe:

—Che rayri omano pota. Yaso, teremondomi tẽi nde po iharive imbogüera ãgua —ehi.

<sup>24</sup> Evocoyase oso supi. Ava rehii avei yuviraso supi. <sup>25</sup> Ipãhuve avei oime cuña doce araviter rupi suvi yepiyere-yere vahe. <sup>26</sup> Iparaisú iteanga, setá oporoposano vahe ndoicatui imbogüera yuvireco omandavete catu iposanosa pipe yuvireco. Opa tupri tẽi omondo mbahe vireco vahe, ivate catuño rumo imbaherasisa chupe. <sup>27</sup> Co cuña osenduse Jesús rese ñehesa, uguata saquicuei oso ava rehii pãhuve, iturucuar rese opoco. <sup>28</sup> Aipo ehi oyeupe oico: “Iturucuar rese apocose rumo, acuerara” ehi. <sup>29</sup> Ahe ramosese voi ndasuvi yepiyere iri. Ipare oyandu güetecuer yemoingatu tuprisa, ocuerase ombaherasisa sui. <sup>30</sup> Jesús rumo oyandu osẽse opĩratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

<sup>31</sup> Semimbohe omboyevi yuvireco chupe:

—¿Nderemahe vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

<sup>32</sup> Ahe rumo omaheño vite ité ava oivĩndar rese ‘¿uma ité pãha opoco che turucuar rese?’ oya. <sup>33</sup> Evocoyase co cuña oicuase mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. <sup>34</sup> Evocoyase Jesús aipo ehi chupe:

—Che rayri, erecuera cõritei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

<sup>35</sup> Iñehe vitesese, oyepota moviro Jairo rẽta pendar tayri mano mombehu yuvireco:

—Omano ité nde rayri. Aní eremañeco tẽi vite Porombohesar —ehi yuvireco chupe.

<sup>36</sup> Ahe rumo Jairo upe aipo ehi:

—Aní eresiquiye. Eyeroya catuño —ehi.

<sup>37</sup> Ndoipotai rumo ambuae ava oyeupi icho ãgua; Pedro, Santiago, Juan güeraño oipota. <sup>38</sup> Oyepotase Jairo rêtave, osepia ava yemondii oyaseho vahe. <sup>39</sup> Ichui oiquese oi pîpe, aipo ehi:

—¿Mahera vo perãse guasu tõi peyaseho peyu? Co cuñatai nomanoi, oque tõi ou —ehi ava upe.

<sup>40</sup> Ava rumo opucae-tefeño seroyaëhisave yuvireco. Evocoiyase omose opacatu ava. Ipare omoingue iyesupa, ichi, oyeupindar reseve cuñatai rehögüersave. <sup>41</sup> Ipare oipopîsi aipo ehi:

—Talita, cum —ehi chupe ('cuñatai, eñarapuha, ahe ndeu' ohesave aipo ehi).

<sup>42</sup> Ahe ramoseve voi cuñatai doce aravîter vahe oñarapuha, ipare oguata. Sepiase ava, oyembosiquiye guasu yuvireco. <sup>43</sup> Jesús rumo oyocuai imombehuëhi ãgua ambuae ava upe. Ipare,

—Pembocarú co cuñatai —ehi.

## 6

### *Jesús Nazaret ve secoi*

<sup>1</sup> Jesús osë co tecua sui oso güecuave; semimbohe avei yuviraso supi. <sup>2</sup> Oyepotase mbîtuhsa ari, ahese oporombohe tûparo pîpe. Setá ava îñehe rendusar oyepîhamondîisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pîha vînose co mbahecuasa co poromondîisa apo ãgua? —ehi yuvireco oyeupe—. <sup>3</sup> Co niha carpintero, María membri; Santiago, José, Judas iyavei Simón riquêhir, seindri avei yuvirecove yande pâhuve —ehi.

Sese ndovîroyai yuvireco. <sup>4</sup> Jesús rumo aipo ehi ahe ava eta upe:

—Tûpa ñehe mombehusar avei niha ava omboetei opacatu rupi yuvireco yepi, imu sêta pîpendar ae rumo nomboetei yuvireco —ehi.

<sup>5</sup> Ndoicatuî mbahe oporomondîi vahe apo ãgua ava vîroyaëhîsa pîpe, sese movîro tõi imbaheasi vahe harîve omondo opo imbogüera ãgua.

<sup>6</sup> Ndoyembovîhai ava vîroyaëhîsa rese.

### *Jesús oyocuai güemimbohe Tûpa mborerecuasa mombehu ãgua*

Ipare Jesús oso, oguata tecua-tecuami namombrii vahe rupi oporombohe oico.

<sup>7</sup> Evocoiyase, "Perio" ehi güemimbohe doce vahe upe. Ipare oyocuai ñuvîríó-río, iyavei omondo güeco pîratasa caruguar mboyepêpi ãgua chupe.

<sup>8</sup> —Ndaperasoî chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe rîru, pan, guarepochi avei. <sup>9</sup> Iyavei pemondera pîtaqui güeraño. Ndapemondugüei chiaveira pe camisa seraso.

<sup>10</sup> —Que pesosave peiquese oi pîpe, pepîtaño ipîpe, ichuive tupriño ité pesëra pecua. <sup>11</sup> Acoi ambuae tecua pendar ndape pîsi potaise, ndosendu potaise avei pe ñehe yuvireco, peyepêpiñora ichui. Peipîpeteño aveira pe pî ivî râtachigüer sui. Êgüe pe hesa omboyecua cañisa apîrêhi yuvireco chupe —ehi.

<sup>12</sup> Evocoiyase semimbohe eta yuviraso, "Pemboasi pe angaipa, peyevî Tûpa upe" ohe ãgua yuvireco. <sup>13</sup> Iyavei setá omboyepêpi caruguar ava sui, setá avei omondo mbahe quîra ava imbaheasi vahe rese imbogüera ãgua yuvireco.

*Juan Oporoãpiramo vahe mano agüer*

<sup>14</sup> Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondisa ipirata vahe —ehi.

<sup>15</sup> Ambuae rumo,

—Tüpa ñehe mombehusar Elías mo evocoi —ehi yuvireco.

Ambuae evocoyase,

—Tüpa ñehe mombehusar aracahendar mo evocoi —ehi yuvireco.

<sup>16</sup> Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cūrítei ocuerayevi —ehi.

<sup>17</sup> Herodías recocuer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese. <sup>18</sup> Juan aipo ehi Herodes upe: “Ndiyai eté nde ererecora nde rivri rembireco” ehi.

<sup>19</sup> Herodías evocoyase oyuca pota Juan yamotarēhisave; ndoicatu rumo yuca. <sup>20</sup> Esepia, Herodes osiquiyēño ichui oicuase co mbia reco tupri aisa iyavei seco maranehise. Sese osepí ité; yepé ndoyembohe catui osenduse ñehē viña, ahe rumo osendu pota raiño ité. <sup>21</sup> Coiye rumo osupiti ari Herodías remimbotar apo água, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. <sup>22</sup> Herodías membrí cuñatai oiique carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

<sup>23</sup> Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi. <sup>24</sup> Ahe cuñatai osē oso, osi upe oporandu:

—¿Mbahe rese pīha aporandura chupe? —ehi.

Ichí aipo ehi chupe:

—Eporandu Juan Oporoãpiramo vahe ãca rese —ehi chupe.

<sup>25</sup> Ipare cuñatai oña, oiique oso mborerecuar guapisave, aipo ehi chupe:

—Che aipota co pipeve voi eremboura Juan Oporoãpiramo vahe ãca poratu pipe cheu —ehi.

<sup>26</sup> Mborerecuar rumo ndoyembovīhai tēi. Esepia, ava ichohopri rovaque ité yipindar oñehē. Sese ndoicatu, “Aní” ohe água. <sup>27</sup> Evocoyase ipare voi mborerecuar oyocuai sundao Juan ãca reru água. <sup>28</sup> Sundao oso soquendasave, oyasia Juan ãca, seru poratu pipe. Mborerecuar omondo co cuñatai upe, evocoyase cuñatai omondo osi upe.

<sup>29</sup> Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

*Jesús oyopoi cinco mil cuimbahe*

<sup>30</sup> Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe. <sup>31</sup> Ahese aipo ehi oapóstol upe:

—Perio cohava, yaso, yapituhumi rane co coti —ehi.



Esepia, oyepindecuaño ité ava yugüeru chupe, sese ndiyai icaru ägua yuvireco. <sup>32</sup> Evocoyase ahe güeraño apóstol reseve yuviraso carite pipe co coti ava sui. <sup>33</sup> Setá rumo ava osepia ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui. <sup>34</sup> Ogüeyise rumo carite pipe sui, osepia ava rehi, ahesa iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese. <sup>35</sup> Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. <sup>36</sup> ¿Ndiyai vo eremondopa ava tecua-tecuami cõi vahesa rupi? Aheve tovirocua ocaru ägua yuvireco —ehi yuvireco chupe.

<sup>37</sup> Ahe rumo omboyeve:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pãha oreu doscientos denario pan repirã ava mbocarü ägua? —ehi.

<sup>38</sup> Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

<sup>39</sup> Evocoyase omboyaho-yaho ava imboguapi capihari rupi. <sup>40</sup> Cincuenta, cien rupi-rupi oyemboyaho yuvireco. <sup>41</sup> Ichui Jesús oipisi poyandepo pan, ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehi upe imondo ägua yuvireco. Pira ñuvirío vahe avei omboyaho-yaho opacatu ava upe. <sup>42</sup> Evocoyase opacatu ava ocaru vahe ihtaropa tõi yuvireco. <sup>43</sup> Ipare semimbohe omboapipopa doce tupri iruova pan iyavei pira rumbirer yuvireco. <sup>44</sup> Cuimbahe ocaru vahe retacuer cinco mil tupri.

### *Jesús oguata i hari rupi*

<sup>45</sup> Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe. <sup>46</sup> “Aviye” ohe pare ava upe, oyeupi oso ivitri rese oyerocui ägua. <sup>47</sup> Põtuse carite ipa mbiterve ité secoi. Jesús rumo ahe ae opitaño ivive. <sup>48</sup> Ahesa omahe güemimbohe rese iyeapicui catuêhise. Esepia, ivitu ipirata vahe osovãchi yuvireco. Cõhe potase, oguata i hari rupi güemimbohe coti oso. Aviye ité acoi oñocuaño vaherã oso. <sup>49</sup> Sepiase rumo ‘hãgüer tõi revo’ oya, sãse pucu-pucu i hari rupi iguatase semimbohe yuvireco. <sup>50</sup> Esepia, opacatu osepia osequiye yuvireco ichui. Ahe rumo aipo ehi:

—¡Peyemoviracuaño, che tõi! ¡Pesiquiye eme che sui! —ehi güemimbohe upe.

<sup>51</sup> Ahe ohasa carite pipe, opituhu voi ivitu. Evocoyase, “¡Mara ehi rutei!” ehi tõi yuvireco. <sup>52</sup> Esepia, ndoicua vitei eté pan apo ati agüer yuvireco, yavai vite seroya ägua yuvireco chupe.

### *Jesús ombogüera ava imbaheasi vahe Genesaret pendar*

<sup>53</sup> Osasase ipa, oyepota Genesaret ivi rese yuviraso, ahe imbehive oñapichiño carite yuvireco. <sup>54</sup> Yuvinosesa ramomiseve, ava oicua voi Jesús yuvireco. <sup>55</sup> Ichui opacatu ahe ivi pipendar güeru imbaheasi vahe Jesús upe yuvireco. <sup>56</sup> Oyepotase que tecuamive, anise tecua guasuve, caha pipe oi-omi rupi, ahe supi imbaheasi vahe ocar rupi vinosepa voi

yuvireco. “Topocomi tēi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

## 7

### *Mbahe omonguiha vahe ava recocuer*

<sup>1</sup> Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco. <sup>2</sup> Ahese ahe osepia Jesús remimbohe ocaru āgua iyepoiēhise porocuita mboaviyeēhise yuvireco, sese oñemoiro yuvireco chupe. <sup>3</sup> (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oye-poiēhise ndocarui eté yuvireco yepi. <sup>4</sup> Mbahe rerocuasa sui oyevisē, ndocarui oyepoiēhi viteseve yuvireco. Iyavei tecocuer aracahendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tuprisa.) <sup>5</sup> Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

<sup>6</sup> Jesús rumo aipo ehi chupe:

—Pe Tūpa reroyasar angahu tēi peico vahe, supi tupri ité Tūpa ñehe mombehugar Isaías rembicuachía aracahendar aipo ehi: ‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

<sup>7</sup> Oyerure tupri tēi yuvireco cheu.

Esepia, iporombohesa ava porocuita tēi’ ehi.

<sup>8</sup> Ēgüe peye pepoipa Tūpa porocuita sui ava recocuer aracahendar rupi tēi pe guata āgua —ehi.

<sup>9</sup> Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Tūpa porocuita. <sup>10</sup> Esepia, Moisés aipo ehi: ‘Pemboyeroyara iyavei peipitiviira pe ru, pe si avei no. Acoi ñehe mara vahe oyesupa upe ahe, Tomanño, ehi’ ehi aracahe. <sup>11</sup> Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo āgua pēu. Esepia, che opacatu mbahe areco vahe Tūpa upe imondopri, ahe Corbán, ehi’ peye; <sup>12</sup> pe evocoyase, aipo ehi vahe upe, ‘Ndiyai eté oyesupa pītivii āgua’ peye. <sup>13</sup> Co nungar apo pipe Tūpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

<sup>14</sup> Ipare, “Perio” ehi iri ava rehii upe.

—Peyapisaca, pesenducua tupri che ñehe: <sup>15</sup> Ndahei ocar sui tēi ou ava recocuer monguiha āgua. Ahe rumo osē ipiha sui. <sup>16</sup> Acoi osendu pota vahe che ñehe, toyapisacaño sese —ehi.

<sup>17</sup> Ipare oseyapase ava, oi que oi pipe. Aheve semimbohe eta oporandu yuvireco co porombohesa omombehu vahe rese chupe. <sup>18</sup> Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oi que vahe ava aviterve nomboangaipai eté? <sup>19</sup> Esepia niha, ndahei ipihave oso, ahe rumo oso yaviterve. Ipare osē ichui —ehi ‘opacatu tembihu aviyefiño ité’ oyapave aipo ehi.

<sup>20</sup> Ipare aipo ehi:

—Ava piha sui osē vahe rumo mbahe, ahe omonguiha ava recocuer. <sup>21</sup> Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa, <sup>22</sup> mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe. <sup>23</sup> Co mbahe opacatu naporai vahe yuvínose ava sui imboangaipa uca āgua —ehi.

*Cuñā ndahei vahe judía viroya Jesús*

<sup>24</sup> Ichui Jesús osē oso tecua Tiro coti. Aheve oi que oi pipe, ndoyecua uca potai ava upe viña; ndoicatu rumo ava sui oñemi. <sup>25</sup> Oime cuñā vireco vahe omembri cuñatai, ahe vireco carugar oyese; ahe cuñā oicuase Jesús recosa, oso voi sovai oñenopiha. <sup>26</sup> Ahe rumo ndahei judía, sirofenicia iguar ité. Ahe aipo ehi Jesús upe: “Enose che membri sui carugar” ehi. <sup>27</sup> Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo āgua —ehi.

<sup>28</sup> Co cuñā aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

<sup>29</sup> Aipo ihese, aipo ehi:

—Aviye ité nde ñehe. Eyevi eso. Carugar osē nde membri sui —ehi chupe.

<sup>30</sup> Co cuñā oyepotase güetave, osepia omembri supave; yipive rumo osē carugar ichui.

*Jesús ombogüera mbia ndayapisai, iñehe ipiti-piti vahe*

<sup>31</sup> Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. <sup>32</sup> Aheve mbia ndayapisai, iñehe ipiti-piti vahe rerasosar: “Emondomi tēi nde po iharive” ehi yuvireco chupe. <sup>33</sup> Ichui Jesús viraso coi cotimi ava sui. Aheve ocuā omonde yapisa pipe. Ipare omondo güendi ñapecu rese. <sup>34</sup> Ipare omahe iba rese, ipituhu pucu aipo ehi: “¡Efata!” ehi (“timboisa’ ohesave aipo ehi).

<sup>35</sup> Ahe pipeve voi yapisa tupri, oñehe tupri avei. <sup>36</sup> “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco. <sup>37</sup> Evocoyase ava oyemboviha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, iñehe ipiti-piti vahe avei omoñehengatu tupri!” ehi yuvireco.

## 8

*Jesús oyopoi cuatro mil cuimbahe*

<sup>1</sup> Ñepeí ari pipe setá ava oyemboya iri Jesús rese yuvireco. Ndipoi rumo mbahe icaru āgua. Sese oñehe güemimbohe eta upe aipo ehi:

<sup>2</sup> —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoi eté mbahe semihura. <sup>3</sup> Amondopase sētave sieporēhi reseve, viroviapi-api tiētera tieporēhi peri rupi yuvireco viña. Esepia, setami ava yugüeru amombri sui —ehi.

<sup>4</sup> Semibohe aipo ehi yuvireco chupe:

—¿Mara yahera vo ava tohu mbahe mondo cohave ava porēhisave? —ehi.

<sup>5</sup> Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

<sup>6</sup> Evocoyase, “Peguapi ivi harive” ehi ava rehii upe. Ahe se oipisi siete pan, “Aviye ndeu” ehi Tüpa upe. Ichui omboyaho-yaho pan imondo güemimbohe upe, semimbohe evocoyase omondo ava rehii upe yuvireco.

<sup>7</sup> Iyavei vireco moviro pirami yuvireco, sese avei, “Aviye ndeu” ehi iri Tüpa upe. Ichui güemimbohe upe, “Pemboyaho-yaho ava upe” ehi.

<sup>8</sup> Opacatu ité ava ocaru vahe ihitaro yuvireco. Ipare rumo semimbohe omboapipo iri rane sumbirer siete iruova yuvireco. <sup>9</sup> Ava rehii ocaru vahe retacuer cuatro mil tupri. Ipare Jesús, “Aviye, peso tupri” ehi ava upe. <sup>10</sup> Ipare voi eté yuviraso güemimbohe eta reseve carite pipe Dalmanuta ivi rese.

*Fariseo eta oporandu poromondiisa rese yuvireco*

<sup>11</sup> Ipare fariseo eta oyepota Jesús ñehe poepi-epi ägua yuvireco. Jesús recoäha ägua, oporandu iva pendar poromondiisa rese ‘¿Tüpa sui eté pïha ou?’ oya yuvireco chupe. <sup>12</sup> Sese Jesús ipïtuhe pucu, aipo ehi:

—¡Mahera vo co ava oipota iva pendar poromondiisa che recocuer cua ägua yuvireco! Namboyecuai chietera rumo que ñepeï evocoi nungar mbahe pëu —ehi.

<sup>13</sup> Ipare oseyapaño ava. Ichui yuviroha iri carite pipe, osasapa ipa yuviraso sovai.

*Fariseo porombohesa inungar pan mboapeposa*

<sup>14</sup> Jesús remimbohe sesarai pan sui yuvireco, ñepeimi tēi pan viraso güemihura yuvireco. <sup>15</sup> Evocoyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

<sup>16</sup> Aipo ehise, semimbohe: “Pan ndayaruisse revo aipo ehi yandeu” ehi-ehi tēi oyeupe yuvireco.

<sup>17</sup> Ahe rumo oicua güemimbohe pihañemoñetasa, aipo ehi:

—¿Mahera, “Pan ndayarui” peye? ¿Ndapeicua vïtei vo che rembiapo? ¿Yavai vïte tie seroya ägua pëu? <sup>18</sup> Oime tēi pe resa, ndapesepiai rumo; oime tēi pe nambi, ndapesendui rumo mbahe. ¿Ndapeyemomahenduha iri vo <sup>19</sup> acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

<sup>20</sup> —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

<sup>21</sup> Ipare aipo ehi:

—¿Ndapesenducua vïtei vo? —ehi güemimbohe upe.

*Jesús ombogüera ava ndasesapisoi vahe tecua Betsaida ve*

<sup>22</sup> Oyepotase Jesús tecua Betsaida ve, ahe ramoseve voi ogüeru ndasesapisoi vahe yuvireco chupe ‘epocomi tēi sese’ oya yuvireco.

<sup>23</sup> Evocoyase oipopisi ndasesapisoi vahe seraso co cotimi tecua sui. Aheve omondo güendi sesa rese, omondo avei opo iharive. Ipare oporandu chupe: “¿Eresepia vo mbahe?” ehi. <sup>24</sup> Ndasesapisoi vahe omahese, aipo ehi:

—Asepia ava inungar ivira oguata vahe yuvireco —ehi.

<sup>25</sup> Evocoyase omondo iri opo sesa rese. Ipare co mbia omahe tupri ité cute, ocuera ité, opacatu mbahe osepia tupri. <sup>26</sup> Ichui Jesús omondo sêtave aipo ehi chupe:

—Ereyevi iri eme tecuave —ehi.

*Pedro oicua uca Jesús Tûpa Rembiporavo seco rese*

<sup>27</sup> Ipare yuviraso Jesús güemimbohe reseve ivi Galilea sui tecua Cesarea coti, Filipino ivi rese. Peri rupi oporandu güemimbohe upe:

—¿Mara ehi vo ava oñehe yuvireco che rese? —ehi.

<sup>28</sup> Semimbohe evocoyase omboyevi yuvireco chupe:

—Amove ava, “Juan Oporoâpiramo vahe” ehi yuvireco ndeu; ambuae evocoyase, “Eliás” ehi; ambuae, “Tûpa ñehe mombehúsar mboetasa” ehi yuvireco ndeu —ehi.

<sup>29</sup> Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tûpa Rembiporavo Poropĩsrosar ereico —ehi.

<sup>30</sup> Jesús rumo, “Pemombehúi rene que ñepeí ava upe” ehi.

*Jesús omombehu omano âgua*

<sup>31</sup> Evocoyase Jesús omboipi oporombohe: “Che, Ava Riquehír, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaíta rese oporombohe vahe remiamotarêhi aicora. Ahe avei che yuca ucara yuvireco. Acuerayevira rumo mbosapi ari rupi” ehi. <sup>32</sup> Ahe omboyecua tupri ité chupe. Evocoyase Pedro viraso co cotimi chupe oñehengata âgua. <sup>33</sup> Oyemboyere rumo, omahe güemimbohe eta rese, oñehengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tûpa upendar rese; ava nungar tēi nde pihañemoñeta eico —ehi.

<sup>34</sup> Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosira viña, toyemoingatu voi che recocuer rese oparaisu âgua iyavei toguata tupri che rupi. <sup>35</sup> Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisirora. <sup>36</sup> ¿Aviye ai angahu pñha ava upe opacatu mbahe ivi pipendar pisi âgua tēi, ahe ae tēi omocañi güecocuer yuvireco viña? <sup>37</sup> ¿Mbovi pñha omondora ava güecocuer repirã viña? <sup>38</sup> Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tuprii vahe rovai, che avei, Ava Riquehír, êgüe ahera acoi ayevíse che Ru reco pĩrata porañetesa pipe, sembiguai rehii íva pendar maranehi reseve curi —ehi.

## 9

<sup>1</sup> Ipare Jesús aipo ehi iri:

—Supi eté, oimera amove cohava ava nomano víteí chivaherã, osepia rane itera ouse Tûpa mborerecuasa ipĩratasa pipe yuvireco curi —ehi.

*Jesús ñecuñaro agüer*

<sup>2</sup> Seis ari pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tēi oñecuñaro güemimbohe rovai.

<sup>3</sup> Iturucuar sendí, morochí eteanga. Ndipoi eté que ava co nungar co ivi pipe turucuar oyosei vahe. <sup>4</sup> Iyavei aviyeteramo tēi oyemboyecua Elías, Moisés reseve Jesús rese oñemoñeta yuvinoha. <sup>5</sup> Ipare Pedro aipo ehi chupe:

—Ore mbohesar, javiye ai eté cohava yaico! Toroyapo mbošapi teyupami: ñepeí ndeu nara, ambuae Moisés upe, ambuae evocoiyase Elías upe nara —ehi.

<sup>6</sup> Osiquiye tēi semimbohe yuvireco. Sese Pedro ndoicuaise oñehe ãgua, aipo ehiño tēi. <sup>7</sup> Ahe ramoseve avei ogüeyi iva quiha iharive, oyopipa tupri yuvireco. Ahe ipãhuve oyeendu ñehesa aipo ehi vahe: “Co che Rahir, che rembiaisu; peyapisaca catu iñehe rese” ehi vahe. <sup>8</sup> Ahe ramoseve avei omahese oivi yuvireco, ndosepiai eté que ambuae ava, Jesús güeraño tupri ité osepia opãhuve yuvireco.

<sup>9</sup> Ipare ogüeyi ivitri sui yuvireco, aipo ehi güemimbohe upe ou: “Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi. <sup>10</sup> Oyeupeñomi tēi vireco aipo ñehesa yuvireco, ahe rumo oporandurandu oyeupe: “¿Mara oya pãha aipo, ‘Acuerayevira’ ehise?” ehi tēi yuvireco. <sup>11</sup> Evocoiyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

<sup>12</sup> Evocoiyase aipo ehi chupe:

—Elías rane ité niha oura opacatu mbahe moingatu ãgua. ¿Mahera arachendar icuachiapri pipe aipo ehi: “Ava Riquehir oiporarara mbahe, yamotarëhimbrí avei secoira” ehi? <sup>13</sup> Che niha aipo ahe pëu: Elías rumo ou ité, ava evocoiyase opacatu güemimbotar tēi oyapo yuvireco sese. Ëgüe ehi opacatu yaviye arachendar icuachiapirer sese —ehi.

### *Jesús ombogüera chñivahe carugar rerecosar*

<sup>14</sup> Ipare oyevi yuvireco güemimbohe recosave. Aheve osepia ava rehii oyere guasuse yuvireco sese, iyavei oime aheve Moisés porocuita rese oporombohe vahe oiñehepoepi-epi semimbohe yuvireco. <sup>15</sup> Ichui Jesús repiase, opacatu yuvinoña yuviraso chupe “avirave” apo. <sup>16</sup> Evocoiyase ahe oporandu ava eta upe:

—¿Mbahe rese vo peporandu-randu peyeupe? —ehi.

<sup>17</sup> Ñepeí ipãhu pendar omboyevi chupe:

—Porombohesar, co aru che rahir ndeu, vireco vahe carugar oyese, nomoñehengatu ucai vahe yepi. <sup>18</sup> Iyavei que iguatasa rupi co carugar aviyeteramo tēi opocose sese, oiti voi ivive iyavei sendiriyuiyusu, sãitere-tere avei; sese cñritei nipirata iri eté. “Penosemi carugar ichui” ahe tēi nde remimbohe eta upe. Ahe rumo ndoicatui eté yuvireco —ehi.

<sup>19</sup> Jesús omboyevi chupe:

—¡Too, ndapeyeroa tupri vitei eté che rese! ¿Mbovi rupi rutei vo aico vitera pe pãhuve che ñemosasa pipe? Peru evocoi chñivahe cheu —ehi.

<sup>20</sup> Evocoiyase ogüeru yuvireco chupe. Osepia carugar Jesús, oiti uca iri chñivahe ivive. Omboapayere-yere iyavei sendiriyui guasu-guasú.

<sup>21</sup> Sese oporandu tu upe:

—¿Mbahese vo na ehi chupe? —ehi.

Tu evocoiyase aipo ehi:

—Ichihivahemi suive ité. <sup>22</sup> Amove co carugar oiti uca tatave, ive avei yuca pota uca água yepi. Sese ereicatuse, ore p̃tíviiñomi tēi catu eve ore paraisuerecosave —ehi.

<sup>23</sup> Jesús aipo ehi chupe:

—¡Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

<sup>24</sup> Aipo hese tu,

—¡Oroviroya niha, che p̃tívii ru eve nde reroya catu água! —ehi p̃rata chupe.

<sup>25</sup> Osepiase Jesús ava rehii, oyemboyase sese, oñehe p̃rata carugar upe aipo ehi:

—Carugar noñehei vahe, ndayapisai vahe, che orocuai, epoi co chihivahe sui, ereique iri eme secocuer rese —ehi.

<sup>26</sup> Carugar sãse pucu chihivahe yuca tupri oso. “Omano ité co chihivahe” ehi ambuae ava yuvireco. <sup>27</sup> Jesús rumo oipopisi imopuha; evocoyase chihivahe opüha tupri voi eté.

<sup>28</sup> Ichui oique oi pipe. Aheve semimbohe ahe aemi oporandu yuvireco chupe:

—¿Mahera p̃iha ndoromose catui eté carugar ichui? —ehi yuvireco.

<sup>29</sup> Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar carugar yaicatu imombo —ehi.

*Jesús omombehu iri omano água*

<sup>30</sup> Ichui yuvinosepase, yuviraso ivi Galilea rupi. Jesús rumo ndoyemboyecua uca potai eté que ambuae ava upe. <sup>31</sup> Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarëhimbar povrive, che yuca aveira yuvireco, mbosapi ari rupi rumo acuerayevira —ehi.

<sup>32</sup> Semimbohe rumo ndosenducuai eté oyeupe ñehesa yuvireco iyavei osiquiye chupe porandu água yuvireco yepi.

*¿Ava vo seco ivate catu vahe?*

<sup>33</sup> Ipare oyepota tecua Capernaum ve yuvireco. Yuviroiquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

<sup>34</sup> Ahe rumo noñehei tupri yuvireco chupe. Esepia, peri rupi, “¿Ava p̃iha ivate catu vahe?” ehi asi-asi oyeupe yuvireco. <sup>35</sup> Evocoyase oguapisave, “Periopa” ehi güemimbohe upe, aipo ehi avei:

—Oimese pe p̃ahu pendar oyemboivate ai vahe, ahe rumo seco ivi coti catura opacatu sui ava eta p̃tívii água —ehi.

<sup>36</sup> Ipare oipisi chihivahe güemimbohe p̃ahuve senoha aipo ehi:

<sup>37</sup> —Acoi ava oipisi vahe co chihivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

*Acoi ndahei vahe yande amotarëhimbar, ahe yande mboyoyasar secoi*

<sup>38</sup> Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe carugar. Ahe rumo ndoguatai cūritei ore rupi; ore ité ndoroipotai chupe —ehi.

<sup>39</sup> Jesús rumo,

—Aní ěgüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaheřã oñehe rai che rese. <sup>40</sup> Sese ndayande amotarēhi vahe, ahe yande mboyoyasar seci. <sup>41</sup> Acoi que omondo vahe i vaso pipe che rupi pe recosa pipe pēu, evocoi nungar oipisi itera porerocosa oyeupe nara —ehi.

*Yaicua catura mbahe tēi apoēhi āgua*

<sup>42</sup> “Acoi que ava omboangaipa uca vahe co chīhivahemi nungar che reroyasar, iyacatu evocoi nungar ñapichisa ita mbahe mbocuhisa iyesho rese para guasu pipe imombo āgua. <sup>43</sup> Sese pe po pe mboangaipa uca vahe peyasia ité peyesui. Esepia, aviye catu peiquera tecove apirēhisave ñepi pe po rese, peso rāgüer sui que ñuvirio pe po rese tata guasu apirēhisave. <sup>44</sup> Aheve acoi uru nomanoi vahe, tata ndogüei vahe avei. <sup>45</sup> Pe pi pe mboangaipa ucuse, peyasia avei peyesui. Esepia, aviye catu ndape pindugüei peique tecovesave, que ñuvirio pe pi rese peique rāgüer sui tata guasu ndopai vahesave. <sup>46</sup> Aheve acoi uru nomanoi vahe, tata ndogüei vahe avei. <sup>47</sup> Pe resa avei pe mboangaipa ucuse, penose ité peyesui. Esepia, aviye catu peique ñepi pe resa rese Tūpa mborerecuasave que ñuvirio pe resa rese tata guasu apirēhisave pe reique rāgüer sui. <sup>48</sup> Aheve acoi uru nomanoi vahe, tata ndogüei vahe avei.

<sup>49</sup> “Esepia, opacatu ava imoehesara tata nungar pipe. <sup>50</sup> Sese yucri aviye ai eté. Nasehe irise rumo, ndayaicatui chira imoehe iri āgua. Peico catu yucri nungar mbahe tupri pipe peyeupe nara” ehi.

## 10

*Jesús oporombohe mendasa sui poiēhi āgua*

<sup>1</sup> Ipare Jesús osē tecua Capernaum sui, oso Judea ivi rupi iai Jordán rovai ari sēsa coti. Aheve ava rehii oñemonuha iri yuvireco sese. Iyavei ombohe iri ava güecocuer rupi tupri. <sup>2</sup> Evocoiyase fariseo oyemboya seco rāha āgua tēi yuvireco sese, “¿Aviye pīha cuimbahe omenda vahe opoi güembireco sui?” ehi yuvireco chupe. <sup>3</sup> Ahe rumo omboyeve chupe:

—¿Mara ehi vo acoi Moisés porocuita pipe? —ehi.

<sup>4</sup> Ahe evocoiyase omboyeve yuvireco chupe:

—Moisés remimombehu aipo ehi: “Pemondora pe rebireco upe cuachiar poisa resendar pe poi āgua pe rebireco sui” ehi —ehi fariseo yuvireco chupe.

<sup>5</sup> Evocoiyase fariseo upe aipo ehi:

—Moisés omondo co porocuita pe poreroyaēhisa pipe sui pēu. <sup>6</sup> Yipisuive ité niha, “Tūpa oyapo opacatu mbahe, oyapo avei cuimbahe, cuña reseve. <sup>7</sup> Sese niha cuimbahe omendase, oyepepira oyesupa sui güembireco rese ité yuvirecoi āgua. <sup>8</sup> Evocoiyase ñuvirio yuvirecoira ñepi ava nungar.” Sese ndahe iri ñuvirio, ñepi nungar ité yuvirecoira. <sup>9</sup> Evocoiyase ava Tūpa omomenda vahe oyese, ndiyai ava tēi omboyepepi yuvireco oyesui —ehi.

<sup>10</sup> Oive yuvirecoi vitese, semimbohe oporandu iri co mbahe rese yuvireco chupe. <sup>11</sup> Evocoiyase ahe aipo ehi:



—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui. <sup>12</sup> Acoi cuña oposito omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

*Jesús osovasa chīhivahe*

<sup>13</sup> Ipare ogüeru chīhivahe Jesús upe yuvireco sese ipoco āgua. Semimbohe rumo, “¿Mahera vo peruño tēi chīhivahe?” ehi opīha vīracuasa pīpe serusar upe yuvireco. <sup>14</sup> Evocoyase Jesús osepiase, ndasori güemimbohe upe aipo ehi:

—¡Mahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa mborerecuasave. <sup>15</sup> Supi eté, acoi ndoipisii vahe che Ru Tūpa mborerecuasa chīhivahe nungar yuvireco, ahe evocoyase ndoyuviroiquei chietera ipīpe —ehi.

<sup>16</sup> Evocoyase oipisi, omondo opo iharive osovasa.

*Ñepi mbia chīhivahe imbahe eta vahe oñehe Jesús upe*

<sup>17</sup> Oguata vītese Jesús yuvireco, aheseve mbia chīhivahe oña oso sovai, oñenopiha, oporandu chupe:

—Porombohesar aviye vahe, ¿imbahe vo ayapora tecovesa apirēhi vahe rereco āgua? —ehi.

<sup>18</sup> Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepi aviye vahe ité, ahe Tūpa seci. <sup>19</sup> Ereicua niha Tūpa porocuita: ‘Ndereporoyucaí chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde si avei’ ehi vahe —ehi.

<sup>20</sup> Ahe mbia rumo,

—Porombohesar, che aipo nungar opacatu amboaviye ité che chīhivahe suive —ehi.

<sup>21</sup> Evocoyase omahe saisusave sese, aipo ehi chupe:

—Ñepi mbahe rumo ipane vīte ndeu: eso, emondopa rane nde mbahe; ahe seprī evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

<sup>22</sup> Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité seci.

<sup>23</sup> Evocoyase omahe oiviindar güemimbohe rese, aipo ehi:

—¡Yavai eté rumo ava mbahe yar reique āgua che Ru Tūpa mborerecuasave! —ehi.

<sup>24</sup> Semimbohe evocoyase, “¡Mara ehi rutei!” ehi tēi iñehe renduse yuvireco. Ahe rumo omombehu iri:

—Che rahireta, ¡yavai eté Tūpa mborerecuasave imbahe eta vahe reique āgua ombahe eta rese tēi ipihañemoñeta vahe upe! <sup>25</sup> Yavai rai camello upe yucuar rupi seique āgua, ava imbahe eta vahe upe rumo yavai catu che Ru mborerecuasave seique āgua —ehi.

<sup>26</sup> Aipo nungar renduse oyepihamondii guasu yuvireco. Oporandurandu tēi oyeupe yuvireco: “¿Ava angahu pīha oñepisiora yuvireco viña?” ehi.

<sup>27</sup> Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo āgua; Tūpa upe rumo ndayavaimi eté. Esepia, Tūpa opacatu mbahe mboavaisarēhi seci —ehi.

<sup>28</sup> Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata ãgua —ehi chupe.

<sup>29</sup> Omboyevi rumo Pedro upe:

—Supi eté co aipo ahe pëu: acoi che raisusa pipe iyavei ñehesa ñepisirosa raisusa pipe oseyapa vahe güëta, viquehir, vivri, güeindri, vu, osi, guahir iyavei oivi, <sup>30</sup> ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi. <sup>31</sup> Setá vai rumo cūritei yipindar vahe; ipa tēira yuvirecoi. Setá aveira cūritei ipa tēi vahe, yipindar yuvirecoira curi —ehi.

*Jesús omombehu imombosapisa rupi omano ãgua*

<sup>32</sup> Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovihai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime ãgua chupe aipo ehi: <sup>33</sup> “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco. <sup>34</sup> Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

*Mbahe aviye vahe rese oporandu Santiago, Juan reseve yuvireco*

<sup>35</sup> Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

<sup>36</sup> Ahe evocoiyase,

—¿Mbahe vo peipota ayapo vaheṛā pëu? —ehi chupe.

<sup>37</sup> —Ore oroipota nde mborerecuara porañetesave ore mboguapira ndeyepiri eve, ñepepi nde mbahe rese pocosa coti, ambuae nde mbahe rese pocoēhisa coti —ehi yuvireco chupe.

<sup>38</sup> Evocoiyase omboyevi:

—Pe ndapeicuai mbahe rese pe porandu. ¿Peiporara catura pīha che co mbahe-mbahe tēi aiporara vaheṛā, inungar-ra que igua iro vahe aihu vaheṛā viña? Iyavei, ¿peicatura pīha che āpiramosa aipisi vaheṛā pisi? —ehi.

<sup>39</sup> —Taa, oroicatuño itera —ehi yuvireco.

Evocoiyase ahe aipo ehi chupe:

—Supi eté peihura co mbahe iro vahe, peipisi aveira āpiramosa che aipisi vaheṛā nungar. <sup>40</sup> Co rumo ndiyai cheu che piri pe guapi ãgua, che mbahe rese pocosa coti, ambuae che mbahe rese pocoēhisa coti. Che Ru Tūpa omoingatu güembiporavo upe nara oguapi vaheṛā che ipive —ehi.

<sup>41</sup> Evocoiyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. <sup>42</sup> Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe. Iyavei acoi ivate catu vahe oyecopirasá iteanga omborerecuasa pipe yepi. <sup>43</sup> Pe rumo ēgüe ndapeyei chira pe yeereco. Iyacatu rumo acoi ava oipota vahe ivate catu güeco

ãgua pe pãhuve, ihañeco rane itera opacatu ambuae ava rese. <sup>44</sup> Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese. <sup>45</sup> Aherã niha che, Ava Riquehir, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaheerã che recocuer manosave ava eta repirã Carugar povri sui senose ãgua —ehi.

*Jesús ombogüera Bartimeo sesapisoëhisa sui*

<sup>46</sup> Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve peri popive mbia ndasesapisoï vahe Bartimeo serer vahe, Timoteo rahir, oguapi oï. <sup>47</sup> Osenduse, “Jesús Nazaret pendar” hesa, osapucaï pïrata:

—¡Jesús, David suindar, che paraisuerecomi tēi eve! —ehi chupe.

<sup>48</sup> Ava rumo oyaca-yacaño, “¡Quiriri!” ehi yuvireco chupe. Ahe rumo, —¡David suindar, che paraisuerecomi tēi eve! —ehi pïrataño ité chupe.

<sup>49</sup> Evocoiyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerēhi, epūha. Esepia, oñehe aipo ndeu —ehi.

<sup>50</sup> Aipo oyeupe he ramoseve, omomboño oturucuar guasu, opūha yesapiha oso chupe. <sup>51</sup> Evocoiyase oporandu ndasesapisoï vahe upe:

—¿Mbahe vo ereipota ayapo vaheerã ndeu? —ehi.

Ahe evocoiyase,

—Porombohesar, che mbosarecomi tēira eve viña —ehi.

<sup>52</sup> Evocoiyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapisoï vahe osareco tupri ité. Ipare osoño ité Jesús raquicuei peri rupi.

## 11

*Jesús oique Jerusalén pipe*

<sup>1</sup> Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ipiimi. Aheve Jesús omondo ñuvirío güemimbohe, <sup>2</sup> aipo ehi chupe:

—Peso evocoi tecuami yande rovaindarve. Peyepotase aheve, pesepi-ara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. <sup>3</sup> Acoi que ava: “¿Mahera vo ëgüe peye?” ehise pēu, “Ore Yar oiporu pota, ipare niha omboyevi voiñora” peyera chupe —ehi.

<sup>4</sup> Evocoiyase ahe yuviraso peri rupi. Aheve guaricu ñapichimbri osepi- imoha yuvireco oquendipive. Ichui oyoraño seru yuvireco.

<sup>5</sup> Evocoiyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

<sup>6</sup> Ahe rumo Jesús ombohesa rupi tupri ité omboyevi yuvireco chupe. Evocoiyase, “Tovirasoño” ehi yuvireco chupe. <sup>7</sup> Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive. <sup>8</sup> Setá ava oipipira oturucuar peri rupi, ambuae ava evocoiyase oyasia pindo omondo peri rupi saperã yuvireco. <sup>9</sup> Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pĩrata yuvireco chupe—. <sup>10</sup> ¡Sovasapri yande ramoi David mborerecuasa tasecoi ou vahe oico! ¡Ivave imboeteipri tasecoi! —ehi yuvireco chupe.

<sup>11</sup> Ēgüe ehi Jesús oiquese Jerusalén ve. Ipare oique tũparo pipe. Aheve opacatu rupi mbahe osepia. Ipare yuviraso Betania ve caharuse ité doce gũemimbohe rese.

*Jesús vireco megua higuera ndihai vahe*

<sup>12</sup> Ahere ayihive, yuvinosese Jesús tecua Betania sui, ndasiẽpoi oico. <sup>13</sup> Osepia se amombri ivira higuera so ati vahe, oso chupe ‘¿iha pĩha?’ oyapave. Ahe rumo osepia so pãve tẽi sese. Esepia, ahe ivira upe ndosupiti vitei iha água. <sup>14</sup> Evocoyase aipo ehi ahe ivira upe:

—¡Co pipe suive ndipo iri chira ava nde ha yuvirohu vahe! —ehi. Semimbohe osendu iñehe yuvireco.

*Jesús omombopa ava mbahe mboepisar tũparo pipe sui*

<sup>15</sup> Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rerocuasar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo. <sup>16</sup> Ndoipotai eté que ambaue mbahe seroiqepirã tũparo pipe. <sup>17</sup> Ipare oporombohe aipo ehi:

—Icuachiapri aracahendar pipe aipo ehi: ‘Co che rẽta yeruresa rẽtarã opacatu ava ivi pipendar uve nara’ ehi. Pe rumo imonda rai vahe rẽta nungar tẽi pereco —ehi.

<sup>18</sup> Pahi eta rerecuar iyavei oporombohe vahe Moisés porocuita rese osenduse, “¿Mara yahera pĩha sereco yuca uca água?” ehi voi yuvireco chupe. Osiquiye rumo opacatu ava sui. Esepia, ahe ndoyembovihai iporombohesa rese yuvireco. <sup>19</sup> Pĩtu ramomise, Jesús yuvinosẽ gũemimbohe eta reseve yuviraso ahe tecua sui.

*Ivira higuera ndihai vahe ipiru*

<sup>20</sup> Ahere ayihive, añihiveive yuvirasose, osepia ivira higuera sapo suive ipirupa vahe yuvireco. <sup>21</sup> Evocoyase Pedro oyemomahenduha voi iñehe agũer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

<sup>22</sup> Jesús evocoyase,

—Peyeroya Tũpa rese —ehi—. <sup>23</sup> Supi eté aipo ahe pũ: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, ěgüe ehi etera chupe. <sup>24</sup> Sese aipo ahe pũ: opacatu que mbahe rese peporanduse pe yeroquisa pipe, peyeroya itera mbahe oime vahe rese pũ, ahese peipisi itera. <sup>25</sup> Acoi peyeroyise, yipindar peñero rane que pe amotarẽhimbar upe, ahese ěgüe ehi aveira pe Ru iva pendar iñero pe angaipa rese pũ. <sup>26</sup> Ēgüe ndapeyeise, pe Ru iva pendar avei niñeroi chira pe angaipa rese pũ —ehi.

*Jesús mborerecuasa*

<sup>27</sup> Ipare oyevi Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese. <sup>28</sup> Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuará ndeu co nungar apo água? —ehi yuvireco chupe.

<sup>29-30</sup> Evocoiyase omboyeví chupe:

—Che avei aporandura mbahe rese pëu: ¿Ava vo Juan ombou ava ãpiramo água; Tũpa pĩha, ava tẽi tie? Pemboyevise cheu, ahese che avei amombeura pëu ava porocuita rupi eté pĩha ayapo co mbahe vichico —ehi.

<sup>31</sup> Evocoiyase oñemoñeta aipo ehi oyeupe yuvireco: “ ‘Tũpa ombou’ yahese chupe viña, ahe evocoiyase: ‘¿Mahera ru ndaperoyai?’ ehira yandeu. <sup>32</sup> ‘Ava tẽi remimbou’ ndayahei chiaveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi. <sup>33</sup> Evocoiyase omboyeví chupe yuvireco:

—Ndroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

## 12

*Ava mbahe tẽi oporaviqui vahe recocuer sui yembohesa*

<sup>1</sup> Evocoiyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose água. Oyapo avei oi ivate vahe opacatu mbahe moha água. Ipare oseya oivi ava oporaviqui vahe upe iporu água. Ichui osẽ, oso amombri vahesa rupi. <sup>2</sup> Oyepotase ari uva pohosa, ahese omondo güembiguai oporaviqui vahe upe imborandu ‘tomboumi uva pohopri cheundar cheu cute’ oyapave viña. <sup>3</sup> Ahe rumo oipisiño, inupanupa imboyeví tupri tẽi yuvireco. <sup>4</sup> Evocoiyase ahe ivi yar omondo iri ambuae güembiguai. Ahe oyapicha-pichaño ñaca rupi, iñehe mara-mara tẽiño avei yuvireco chupe. <sup>5</sup> Ipare omondo iri ambuae. Ahe oyucaño yuvireco. Ichui omondo ati iri tẽi. Ahe ipãhu pendar rese yuvirocuarocuaño yuvireco, oyucaño avei ambuae yuvireco.

<sup>6</sup> “Iyavei ñepeí opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. <sup>7</sup> Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pãve topita co ivi’ ehi yuvireco. <sup>8</sup> Ichui oipisi, oyucaño yuvireco. Ipare ovinose sehõgüer ahe miti sui co coti yuvireco.

<sup>9</sup> “¿Mbahe vo evocoiyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

<sup>10</sup> “¿Ndapeyeroqui vo pe co icuachiapri pipe? Aipo ehi niha acoi: ‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri água.

<sup>11</sup> Ëgüe ehi niha yande Yar yapo.

¡Mara ehi rutei revol! ehi icuachiapri pipe” ehi.

<sup>12</sup> Evocoiyase oviraso pota voi Jesús soquenda água yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

*Fariseo osecoãha iri tẽi Jesús guarepochi rese yuvireco*

<sup>13</sup> Ipare mborerecuar omondo fariseo iyavei mborerecuar Herodes rupindar avei Jesús upe ‘toyaví angahu oñehe’ oya yuvireco chupe. <sup>14</sup> Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepia, “Ēgüe ehi co mbia” nderei eté ava upe iyavei ereporombohe mbahe supi tupri vahe Tūpa remimbotar apo āgua rese. ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

<sup>15</sup> Oicua ité rumo fariseo pīhaēhisa, sese aipo ehi voi chupe:

—¿Mahera che moingue pota mbahe tēi pīpe peye? Peru evocoyase ñepeí guarepochi cheu, tasepia —ehi.

<sup>16</sup> Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

<sup>17</sup> Evocoyase aipo ehi fariseo upe:

—Pemondora mborerecuar upe mbahe chupendar; Tūpa upendar mbahe evocoyase pemondora Tūpa upe —ehi.

Evocoyase oyepīhamondii tēi aipo oyeupe hese yuvireco.

*Saduceo oporandu Jesús upe cuerayevisa rese secoāhasave*

<sup>18</sup> Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

<sup>19</sup> —Porombohesar, Moisés niha oseyā güembicuachiagüer yandeu aipo ehi: “Que cuimbahe omenda vahe omanose guahīēhiseve, tivri evocoyase omendara sembirecocuer rese ahe viquehir omano vahecuer upe nara tahira oico.” <sup>20</sup> Oime siete tupri oyesuindar pāve yuvirecoi vahe. Yipindar vahe omenda. Ichui omanoño, ndatahii eté rumo. <sup>21</sup> Ipare tivri omenda viquehir rembirecocuer rese. Ahe rumo omanoño, ndatahii avei rumo. Ēgüe ehi tupri avei tivri imombosapisa. <sup>22</sup> Ēgüe ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no. <sup>23</sup> Evocoyase opase ocuerayevi yuvireco, ¿uma rembireco itera pīha? Esepia niha, siete tupri ité omenda tēi yuvireco sese —ehi yuvireco chupe.

<sup>24</sup> Evocoyase Jesús omboyeví chupe:

—Pe pīhañemoñeta pīpe peyaví. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa. <sup>25</sup> Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai íva pendar nungar yuvirecoira ivave. <sup>26</sup> Co cuerayevisa resendar rumo amombehura pēu: avīye ndapeyeroquii anga vahe Moisés rembicuachiagüer pīpe, acoi caha rese sendi guasu vahe avīterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe. <sup>27</sup> ¡Tūpa ndahei omano vahecuer Tūpa! ¡Ahe rumo oicove vahe Tūpa seci! Sese pe pīhañemoñeta pīpe peyaví —ehi saduceo yuvirecoi vahe upe.

*Porocuita avīye catu vahe*

<sup>28</sup> Ñepeí Moisés porocuaíta rese oporombohe vahe osendu iñehe pĩratase oyeupe yuvireco, oicua avei Jesús omboyeví tuprise iñehe yuvireco chupe, evocoyase oyemboya sese oporandu chupe:

—¿Uma vo porocuaíta aviye catu vahe opacatu sui? —ehi.

<sup>29</sup> Jesús omboyeví chupe:

—Yipindar mborocuaíta aviye catu vahe aipo ehi: ‘Pesendu Israel: yande Yar Tũpa aheño ité ñepeí yande Yar secoi. <sup>30</sup> Eresaisura nde Yar Tũpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pĩratasa pipe’ ehi. <sup>31</sup> Iyavei imoñuviriosa porocuaíta ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuaíta aviye catu vahe co sui —ehi.

<sup>32</sup> Evocoyase porocuaíta rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepeí Tũpa iyavei ndipoi eté ambuae. <sup>33</sup> Iyavei yasaisura Tũpa opacatu yande pihá pipe, opacatu yande yapisacasa pipe, opacatu yande pĩratasa pipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sapĩpri tēi sui —ehi.

<sup>34</sup> Evocoyase Jesús icuase co ava pihañemoñeta tupriisa, aipo ehi chupe:

—Namombriimi ereico Tũpa mborerecuasa sui —ehi.

Ipare ndipo iri oyemonguerēhi vahe oporandu vaherā mbahe rese yuvireco chupe.

*¿Ava suindar pĩha Poropĩsirosar?*

<sup>35</sup> Jesús oporombohese tũparo pipe aipo ehi:

—¿Mahera ru Moisés porocuaíta rese oporombohe vahe: “Poropĩsirosar David suindar ité” ehi yuvireco? <sup>36</sup> Esepia, David ité aipo ehi Espĩritu Santo pĩratasa pipe:

‘Yar aipo ehi che Yar upe:

Eguapĩ che acato coti, acoi che amondose voi eté nde amotarēhimbar nde povrive yuvireco’

ehi David aracahe. <sup>37</sup> ¿Mahera ru, “Poropĩsirosar David suindar secoira” peye, David teieté, “Che Yar” ehise chupe? —ehi.

Ava rehii oquerēhisave ité osendu Jesús ñehe yuvireco.

*Jesús oicua uca Moisés porocuaíta rese oporombohe vahe recocuerai*

<sup>38</sup> Jesús aipo ehi oporombohesave: “Peicua catu Moisés porocuaíta rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo āgua ocar rupi omboeteisa pipe yuvireco. <sup>39</sup> Oseca avei tenda porañete catu vahe güenara otũparo pipe yuvireco yepi, iyavei carusave tenda aviye catu vahesave uguapĩ yuvireco yepi no. <sup>40</sup> Iyavei cuña imer mano vahecuer rēta vircua-rocuā tēi ichui. Oarondaguā tēi avei oyeruqui pucu-pucu yuvireco. Ahe rumo oipisira Tũpa ñemoirosa ipĩrata catu vahe yuvireco curi” ehi.

*Cuña imer mano vahecuer porerecosa*

<sup>41</sup> Ñepeí arĩ Jesús uguapĩ oĩ porerecosa rĩru rovai ava repia āgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco. <sup>42</sup> Ahe pipeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe. <sup>43</sup> Evocoyase Jesús oñehe güemimbohe upe aipo ehi:

—Supi eté che aipo ahe pëu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi riru pipe. <sup>44</sup> Ambuae ava eta rumo oguarepochi rumbirermi tēi omondo oporeco āgua yuvireco; co cuña rumo oparaisusa pipe opa ité omondo oguarepochi —ehi güemimbohe upe.

## 13

*“Imondurusara tũparo guasu” ehi Jesús*

<sup>1</sup> Jesús osēse tũparo guasu pipe sui, ahese ñepeí semimbohe aipo ehi chupe:

—Ore mbohesar, jesepia oi ita imopuhapri, icatupri ai! —ehi.

<sup>2</sup> Jesús rumo omboyeví chupe:

—¿Pesepia co oi tuvichá vahe ité? Ndipoi chietera rumo que ñepeí ita oyeha vite vahe; opacatu ité imondurusara curi —ehi.

*Cañi renonde mbahe oime vaheñã*

<sup>3</sup> Evocoyase Jesús yuviraso ivitri Olivo ve, ahe ivitri tũparo guasu rovai tupri. Aheve Jesús oguapise oi, Pedro, Santiago, Juan iyavei Andrés oporandu co cotimi mbahe rese yuvireco chupe: <sup>4</sup> “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

<sup>5</sup> Jesús rumo omboyeví chupe: “Peicua catu, peyembopa ucai rene ambuae ava upe. <sup>6</sup> Esepia, setá ava yugüerura, ‘Che niha Poropisirosar aico’ ehi tēira ava eta mbopa yuvireco.

<sup>7</sup> “Pesenduse rumo ñehesa vavasa resendar cohove, iyavei que rupi, ndapeyembosiquiyei chietera. Esepia niha, ēgüe ehi rane itera; ndehi vitei chira rumo ari cañi. <sup>8</sup> Esepia, ñepeí ivi pipendar ovavara ambuae ivi pipendar rese oyeupe yuvireco; iyavei oimera ivi riri opacatu-catu tēi tecua rupi, tiavor avei. Co rumo omboipi ramomira mbahe tēi porarasa.

<sup>9</sup> “Peñearo catu. Esepia, pe rerasora mborerecurar rovai yuvireco, iyavei pe nupara tũparove yuvireco. Pe reraso aveira mborerecuareta rovai, iyavei mborerecurar ivate catu vahe rovai che recocuer sui tēi yuvireco. Ēgüe peyera peñehe che recocuer rese chupe. <sup>10</sup> Cañi renonde rumo co ñehesa pñirosa resendar opacatu rane ité ava upe icua ucasara ivi rupi. <sup>11</sup> Iyavei, ‘¿Mbahe pñha amombehura chupe?’ ndapeyei chira pe mondose mborerecurar rovai yuvireco. Aheve voi eté omboyecua Tũpa pe ñehe āgua pëu. Esepia, ndahei chira peyesui tēi peñehe, Espiritu Santo ité oñehera. <sup>12</sup> Ipare rumo ava omondoñora vivri yamotarēhisar upe ‘toyuca yuvireco’ oya. Ēgüe ehi aveira ava guahir upe; tahir avei oyamotarēhiñora oyesupa yuca uca āgua yuvireco che recocuer rese. <sup>13</sup> Opacatu avei ava ndape ambotai chira che recocuer sui tēi yuvireco. Acoi ava oyemoviracua vaheño rumo ari ipa vahe rupi, ahe ipñiroproi yuvirecoira.

<sup>14</sup> “Tũparo guasu maranehi pipe pesepiase mbahe-mbahe tēi aposa —acoi oyeroqui vahe, ahe tosenducua tupri yuvireco —, evocoyase acoi yuvirecoi vahe ivi Judea rupi, toñemipa poyava ivitri rese yuvireco.

<sup>15</sup> Acoi güēta harive secoi vahe, ahe ari toi que iri eme güētave mbahe renose āgua. <sup>16</sup> Acoi que rupi tēi secoi vahe, toyeví eme avei güētave oyeaosa renose āgua. <sup>17</sup> ¡Iparaisu itera cuña ipuruha vahe ahe ari pipe, imembi pñtani vahe avei! <sup>18</sup> Peporandu Tũpa upe, toime eme co nungar mbahe sñhisa vahe pipe pëu. <sup>19</sup> Esepia, ahe ari pipe ava iparaisu catura



opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar. <sup>20</sup> Iyavei yande Yar nomombituhuse ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

<sup>21</sup> “Que oimese aipo ehi vahe: ‘Esepia, co Poropisirosar secoi’ ehi, anise, ‘Peve secoi’ ehise yuvireco pëu, aní chira peroya aipo ehi vahe. <sup>22</sup> Esepia, yugüerura ava, ‘Che Poropisirosar aico’ ehi tēi vahe, iyavei, ‘Che amombehu vahe Tūpa Ñehengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Aviyeteramo ombopa aveira ava Tūpa reroyasar. <sup>23</sup> ¡Peicua catura! opa aipo co senondeve amombehu pëu” ehi.

### *Mara ehira Tūpa Rahir oyevisé*

<sup>24</sup> “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, <sup>25</sup> yasitata avei opara oviapi iva sui, iyavei iva resendar mbahe oririira yuvireco. <sup>26</sup> Ahese che, Ava Riquehir, iva quiha rese ayecua itera vitu che pīratasa pipe che rendigüer porañetesa pipe avei. <sup>27</sup> Ipare amboura che rembiguai eta iva pendar. Ahe evocoyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

<sup>28</sup> “Peyembohera ivira higuera recocuer sui: co ivira soqui ramose, yaicua cōimi ari sacu vahe yepota āgua yandeu yepi. <sup>29</sup> Na ehi aveira niha pëu che ñehe rupi tupri mbahe pesepiase. Sese peicuara che, Ava Riquehir, cōimi eté che yevi āgua. <sup>30</sup> Supi eté yuvirecove vitera ava osepia vahe, co mbahe opase yaviye. <sup>31</sup> Iva, ivi opara ocañi; che ñehengagüer rumo imboaviyesa rane itera.

<sup>32</sup> “Ndipoi eté rumo ava oicua vahe ari iyavei hora che yevi āgua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

<sup>33</sup> “Sese niha pemahemohara yepi, che rārora peye. Esepia niha, ndicuasai che yevi āgua. <sup>34</sup> Inungar que mbia amombri oso pota āgua renonde, güembigui oseyapa güeta rāro āgua, omondo avei ñepeipei upe iporaviqui āgua, iyavei omondo güeta roquendipi rāro āgua. <sup>35</sup> Pe evocoyase pemahemohara. Esepia, ndapeicuai marase che oi yar ayevira pëu, aviyeteramo pītu ramose, pītu mbiter, tacura ñehese, anise añihivei. <sup>36</sup> Ndaipotai pemahemohaēhiseve tēi ayevira. <sup>37</sup> Che aipo ahe pëu, opacatu upe avei: ¡Pemahemohaño ité yepi!” ehi güemimbohe eta upe.

## 14

### *Oyemomborandu Jesús yuca āgua rese yuvireco*

<sup>1</sup> Ipare ñuvirío ari judío Pascua pieta āgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuaíta rese oporombohe vahe avei oyemomborandu: “¿Mara yahera Jesús mbopa ipisi yuca āgua?” ehi yuvireco. <sup>2</sup> Ambuae rumo aipo ehi yuvireco:

—Ndiyai pieta pipe ité yaipisi ava rehii yemondiēhi āgua yandeu —ehi.

### *Cuña Jesús rese mbahe siacua vahe oipiyere*

<sup>3</sup> Ahese Jesús secoi Betania ve Simón lepra vireco vahecuer rētave. Aheve mesave chiniseve, cuña güeru mbahe siacua vahe siru reseve

sepí iteanga vahe. Ahe osovapisa rerocua, ipare oipiyere Jesús áca rese. <sup>4</sup> Ambuae ava aheve yuvinoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe siacua vahe? <sup>5</sup> Omondo vahe ité tie co tresciento ari rupindar mboraviqui repri rupi ava iparaisu vahe pñivii água viña —ehi yuvireco.

Omañeco tēi avei ahe cuña yuvireco.

<sup>6</sup> Jesús rumo aipo ehi ahe ava upe:

—Teheni, égüe tehiño, ¿mahera vo pemañeco tēi? Co mbahe oyapo vahe rumo cheu aviye ité. <sup>7</sup> Ava iparaisu vahe niha yuvirecoiño itera pe pñhube, iyavei peyapoño itera mbahe aviye vahe peyapo potase chupe; che rumo égüe ndahe viteñoi chira vichico pe pñhube. <sup>8</sup> Iyavei co cuña oyapo mbahe ocatugüer rupi; opa voi omoiacua che rete che manoēhi viteseve. <sup>9</sup> Supi eté aipo ahe pñeu: ñehesa pñirosa resendar mombehuse opacatu tecua rupi, imombehusa aveira co cuña rembiapo sese mahenduha água —ehi.

*Judas oyemoingatu Jesús mondo água yamotarēhimbar upe*

<sup>10</sup> Evocoyase Judas Iscariote, semimbohe doce vahe pñhu pendar, oso pahi eta rerecuar upe imoñeta Jesús mondo água. <sup>11</sup> Senduse, oyemboviharete: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo água yamotarēhimbar upe.

*Jesús caru agüer ipa vahe güemimbohe rese*

<sup>12</sup> Yipindar ari pan ndayapepoi vahe husa pñpe, aheve avei ovesa Pascua resendar yucapri seropovēhesa yepi, ahe ari pñpe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

<sup>13</sup> Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pñpe i. Supi pesora, <sup>14</sup> seiquestave aipo peyera sēta vahe upe: ‘Ore mbohesar oporandu: ¿Uma oi pñpe vo Pascua pieta resendar orohura che remimbohe reseve? ehi’ peyera. <sup>15</sup> Evocoyase ahe omboyecuara oi guasu ivatendar imoingatupri pñeu. Aheve pemoingatu mbahe yahu vaherã —ehi güemimbohe upe.

<sup>16</sup> Evocoyase semimbohe yuviraso tecuave. Aheve semimombehu rupi tupri osepiya mbahe yuvireco. Ichui omoingatu carusa Pascua pieta resendar yuvireco.

<sup>17</sup> Pñitu ramomise, Jesús doce güemimbohe rese aheve oyepota yuviraso. <sup>18</sup> Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pñeu: ñepepe pe pñhu pendar yande piri ocaru vahe che mondora che amotarēhimbar upe —ehi.

<sup>19</sup> Evocoyase semimbohe ndoyembovihal tēi yuvireco, iyavei oporandu-randu tēi ñepepepe chupe yuvireco:

—¿Che pñha? —ehi yuvireco.

<sup>20</sup> Omboyevi rumo güemimbohe upe:

—Ñepepe eté pe pñhu pendar ahe co omoaqui pan che caro pñpe. <sup>21</sup> Supi eté che, Ava Riquehir, amboaviyera icuachiapri; iparaisu catura rumo acoi mbia che mondosar! Aviye catura ahe mbia ndoyesuise viña —ehi.

<sup>22</sup> Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipisi; co che rete —ehi.

<sup>23</sup> Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu. <sup>24</sup> Ahese aipo ehi:

—Co che ruvi, ahe che Ru remimbotar ipiasu vahe pëu nara. Oyepiyerera ava rehii recocuer rese nara. <sup>25</sup> Supi eté aipo ahe pëu: ndaihu iri chietera uva ricuer cheu ari oyepotase voi che Ru Tüpa mborerecuasave aihura uva ricuer ipiasu vahe —ehi.

*“Pedro, ‘Ndaicuai vahe evocoi mbia’ erera cheu” ehi Jesús Pedro upe*

<sup>26</sup> Osapucaire, opa yuviraso ivitri Olivo ve. <sup>27</sup> Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tẽira ovesa opacatu rupi yuvireco’ ehi. <sup>28</sup> Che cuerayevire rumo aso voi etera pe renonera Galilea ve —ehi.

<sup>29</sup> Evocoiyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ãgüe ndahei chietera —ehi.

<sup>30</sup> Aipo ehi rumo Pedro upe:

—Che rumo supi eté aipo ahe ndeu: co pĩtu pipeve voi eté tacura ñehe yupagüe renondeve, “Ndaicuai vahe evocoi mbia” erera mbosapi oyupagüer rupi cheu —ehi.

<sup>31</sup> Ahe rumo,

—Yepe che amano tẽira nde rupi viña, che rumo, “Ndaicuai vahe evocoi mbia” ndahei chietera —ehi-ehi catuño ité chupe.

Ambuae opacatu aipo ehi tupri tẽi avei yuvireco chupe.

*Jesús oyerogui Getsemaní ve*

<sup>32</sup> Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapi cohava, che aso ranera ayeroqui peve —ehi.

<sup>33</sup> Aheve viraso Pedro, Santiago, Juan oyeupi. Ahese ndoyepihambovihai eté oico <sup>34</sup> aipo ehi:

—Che cüritei ndavihai eté. Esepia, che hã oyandu ité manosa. Pepita rane cohava, iyavei pemahemohara pe yeroqui pipe —ehi güemimbohe viraso vahe upe.

<sup>35</sup> Evocoiyase oso tenonde catumi. Aheve oyaivi ivi rese oso, oporandu Tüpa upe mbahe tasi vahe reimeẽhi ãgua oyeupe. <sup>36</sup> Oyerogui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tẽi sui eve; tayapo eme che remimbotar tẽi, nde remimbotar rupi catu tayapo” ehi.

<sup>37</sup> Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepe hora nde ropesii upe?

<sup>38</sup> Pemahemoha, peyerogui mbahe tẽi pipe pe viapiẽhi ãgua. Pe niha pequerẽhi ité viña, pe retocuer tẽi rumo nipiratai pëu —ehi.

<sup>39</sup> Ichui oso iri oyerogui, aipo ehi tupri avei oñehe. <sup>40</sup> Ipare oyevise, osesapiha iri iqueseve tẽi avei. Esepia, sopesii nomboyeroyai eté yuvireco, ahese ndoicatu eté iñehe mboyevi yuvireco. <sup>41</sup> Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mondo água ava yangaipa vahe povrive. <sup>42</sup> Pepūha, yaso. Esepia, cōimi eté che amotarēhisar upe che mondo vaherā secoi —ehi.

*Jesús ipisisa*

<sup>43</sup> Jesús oñehe viteseve ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivira reseve-seve supi. Ahe pahi eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco. <sup>44</sup> Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi. <sup>45</sup> Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

<sup>46</sup> Ahese oipisi Jesús yuvireco.

<sup>47</sup> Semimbohe secoi vahe supi ovinose oquise pucu. Ipipe oaysia pahi rerecuar ivate catu vahe rembiguai nambi. <sup>48</sup> Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi água. Imonda rai vahe nungar che rereco peye. <sup>49</sup> Ari yacatu rupi niha pe pãhuve aporombohese tūparove vichico, na ndapeyei eté cheu. Co rumo ēgüe peye icuachiapri mboaviye água cute —ehi.

<sup>50</sup> Ahese semimbohe oñemosaipa oseyá Jesús ahe ae tupri imoha yuvireco. <sup>51</sup> Mbia chíhivahe rumo turucuar pipe güerañomi oñemama vahe supive secoi viña; <sup>52</sup> ahe avei oipisi yuvireco. Oipoequiño rumo oturucuar reya oso nani tupri.

*Jesús serasosa pahi rerecuar ivate catu vahe rovai*

<sup>53</sup> Evocoyase Jesús viraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no. <sup>54</sup> Pedro avei amombri rupive tēi oi que ité oso pahi rerecuar ivate catu vahe rēta āchisa pipe. Aheve uguapiño mbia sundao pãhuve tata ipive oyepehe oī.

<sup>55</sup> Pahi eta rerecuar rumo iyavei opacatu porandusa ivate catu vahe pendar oseca-seca tēi ava oñehe-ñehe tēi vaherā Jesús rese yamotarēhisave yuca uca água yuvireco; ndoicatui eté rumo yuvireco. <sup>56</sup> Iyavei setá iteanga tēi semira yuvireco sese; oyeecopi-copi tēi rumo güemira pipe. <sup>57</sup> Amove aipo ehi tēi yuvireco seco momara água:

<sup>58</sup>—Ore orosendu iñehe aipo ehise: ‘Che opara amonduru co tūparo ava tēi rembiapo. Ipare rumo mbosapi ari rupi opara amopuha. Ndahe iri chira evocoyase ava tēi rembiapo’ ehi —ehi tēi yuvireco chupe.

<sup>59</sup> Ndahoyoyai rumo ambuae imombehusa rese.

<sup>60</sup> Ahese pahi rerecuar ivate catu vahe opūha oporandu Jesús upe:

—¿Nderemboevii chira vo iñehe yuvireco chupe? ¿Mbahe vo aipo nde amotarēhimbar oñehe nde rese? —ehi chupe.

<sup>61</sup> Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropisirosar ité vo nde ereico, Tūpa imboeteipri Rahir? —ehi.

<sup>62</sup>—Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarēhi acato coti; ayevisé avei iba quiha rese curi —ehi chupe.

<sup>63</sup> Evocoyase pahi rerecuar ivate catu vahe omondoro oturucuar aipo ehi:

—¿Mbahe iri vo yande yaipota vite yaico? <sup>64</sup> Yasendupa niha aipo Tūpa upe ñehe-ñehe tēisa, ¿mara ehi aipo evocoyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

<sup>65</sup> Ahese amove ava ondivi-ndivi sese iyavei osesacua, ipare yuvirocuarocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tūparo rārosar avei osovapete-pete yuvireco.

*Pedro, “Ndaicuai vahe evocoi mbia” ehi Jesús upe*

<sup>66</sup> Pedro ivive ñachimbri pipe secoi. Aheve cuña oyepota ou pahi mborerecuar ivate catu vahe rembiguai chupe. <sup>67</sup> Osepiase Pedro iyephehese tata ipive, omahengatu ohā sese aipo ehi chupe:

—Nde avei acoi Jesús Nazaret pendar rupindar ereico —ehi.

<sup>68</sup> Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osēse oquendipive ohā, ahese oñehe tacura. <sup>69</sup> Omahe irise co cuña mbigui sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

<sup>70</sup> Pedro rumo, “Ndahei eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

<sup>71</sup> Pedro evocoyase,

—¡Tūpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

<sup>72</sup> Aipo iheseve, tacura oñehe imoñuviriosa rupi. Ahese Pedro oye-momahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

## 15

*Jesús serasosa Pilato rovai*

<sup>1</sup> Cōhe potase, pahi eta rerecuar, judío rerecuar, Moisés porocuita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco. <sup>2</sup> Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

<sup>3</sup> Pahi eta rerecuar rumo omombehu-mbehu tēi mbahe sembiaviēhi yuvireco chupe. <sup>4</sup> Evocoyase Pilato oporandu iri chupe aipo ehi:

—¿Mahera vo ndereñehei eté? Esepia, setá mbahe nde rembiavi omombehu yuvireco —ehi.

<sup>5</sup> Nomboyevii eté rumo Pilato upe. Evocoyase, “¿Mara ehi rutei pīha?” ehi tēi.

*“¡Tayaticasa!” ehi ava Jesús upe yuvireco*

<sup>6</sup> Mborerecuar guasu recosa ité ñepei ava soquendapri renose āgua Pascua pieta pipe ava rehii porandusa rupi yepi. <sup>7</sup> Mbia Barrabás serer vahe, ahe pipeve avei soquendasa yuvireco ambuae oporapichi vahe

reseve. <sup>8</sup> Ava yugüeru Pilato upe ‘tayaposa pieta pipe yaposa vahe yepi’ oyapave yuvireco. <sup>9</sup> Pilato rumo aipo ehi:

—¿Peipota amose vaherã judío rerecuar? —ehi.

<sup>10</sup> Esepia, Pilato oicuaño ité ava rese yemoecatêhisa pipe sui pahi eta rerecuar remimondo secoise. <sup>11</sup> Pahi eta rerecuar rumo ‘Barrabás tosê’ ombohe ati-ati uca ava yuvireco. <sup>12</sup> Evocoyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

<sup>13</sup> Ahe rumo omboyevi Pilato upe:

—¡Tayaticasa curusu rese! —ehi ati-atiño yuvireco.

<sup>14</sup> Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

<sup>15</sup> Evocoyase Pilato, mbahe tupri opita âgua ava rese, omose uca Barrabás. Ipape oinupá iteanga uca Jesús tucumbo tupeicha nungar pipe, imondo curusu rese yatica âgua.

<sup>16</sup> Ahese sundao viraso mborerecuar rêta sui ambuae oi pipe, aheve opacatu omboetasa omonuha yuvireco. <sup>17</sup> Aheve omboyemonde turucuar pñraumbi vahe pipe yuvireco, ipare yu piapri omonde ñaca rese.

<sup>18</sup> Sãse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

<sup>19</sup> Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboeteisave angahu.

<sup>20</sup> Mara-mara tēi sereco pare, ovirocua iturucuar pñraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica âgua yuvireco.

### *Jesús yaticasa curusu rese*

<sup>21</sup> Ñepe mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voiño tēi yuvireco chupe.

<sup>22</sup> Jesús oviraso Gólgota serer vahesave yuvireco (‘Ava Ñca Cangüer’ oyapave aipo ehi). <sup>23</sup> Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté. <sup>24</sup> Evocoyase oyatica yuvireco. Ipape sundao iguayíño Jesús turucuar rese ‘¿uma piha virasora oyeupe’ oyapave yuvireco.

<sup>25</sup> Ahe oyatica añihivei la nueve rupi yuvireco. <sup>26</sup> Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oĩ. <sup>27</sup> Supive avei yaticasa ñuvirío imonda rai vahe ñepe mbahe rese ipocosa coti, ambuae mbahe rese ipocoêhisa coti. <sup>28</sup> Êgüe ehi imboaviye icuachiapri aipo ehi vahe: “Ava mbahe-mbahe tēi aposar nungar ipãhuve serecosa” ehi.

<sup>29</sup> Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tũparo amonduru. Ipape mbosapi ari rupi opa irira amopuha” ere acoi cuese. <sup>30</sup> ¡Eñepisiro ru nde ae cute; egüeyi curusu sui! —ehi yuvireco chupe.

<sup>31</sup> Ëgüe ehi avei pahi eta rerecuar, oporombohe vahe avei Moisés porocuaíta rese ñehe mara-mara tēi yuvireco chupe, aipo ehi yuvireco oyeupe:

—Oipĩsiro ambuae. Ahe ae rumo ndoicatuí oñepĩsiro. <sup>32</sup> ¡Poropĩsirosar Israel rerecuar guasu, toyeeroyi ahe ae curusu sui cūrítei, ahese voi seroyasara —ehi.

Iyavei supive yaticapri mara ehi-ehi tēi avei chupe.

### *Jesús mano agüer*

<sup>33</sup> Osupitise rumo mbiter ari, opa tupri pĩtu ivi rupi. Ëgüe ehi las tres rupi. <sup>34</sup> Ahese tupri avei Jesús oñehe pĩrata aipo ehi: “Eloi, Eloi, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

<sup>35</sup> Aheve ava yuvirecoi vahe rumo osenduse ñehe, aipo ehi yuvireco:

—Pesendu aipo Tũpa ñehe mombehusar Elías upe oñehe —ehi yuvireco chupe.

<sup>36</sup> Evocoyase ñepeí imboetasa oña oso mbahe saviyu vahe reca. Ahe omoaquí vinagre pipe imondo ivira apri rese chupe ‘toihu’ oya:

—Ëgüe tehiño rane, ¿oura pĩha Elías seroyi ãgua curusu sui? —ehi.

<sup>37</sup> Ahese Jesús sãse pĩrata. Ipare omano. <sup>38</sup> Aheseve tũparo asiasa turucuar ivate coti sui ovo tupri. <sup>39</sup> Iyavei sundao rerecuar Roma iguar, ahe Jesús rehögüer rese omahengatu ohã. Osenduse Jesús rãse iyavei osepiase imano, aipo ehi:

—Supi eté catu, co mbia Tũpa Rahir ité —ehi.

<sup>40</sup> Iyavei cuña aheve amombrive osepia catu yuvinoha; ahe yuvirecoi María Magdalena, José si María, ahe avei Santiago chĩhivahe catu vahe si iyavei ambuae cuña Salomé. <sup>41</sup> Co cuña eta yuvirecoiño vahe ité Jesús rupi, oipitivi vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

### *Jesús apocatu agüer tuvipa pipe*

<sup>42</sup> Pĩtu ramose, ahe ari pipe oyemoingatu ava yuvireco ari mbituhusa upe nara yepi, <sup>43</sup> ahese José, tecua Arimatea pendar, porandusa ivate catu vahe pendar, acoi Tũpa mborerecuasa osãro vahe oico, oquerẽhisa pipe ité oique oso Pilato upe oporandu ãgua Jesús rehögüer rese. <sup>44</sup> Pilato rumo oyepihamondii tēi, “Omano” hese. Oñehe sundao rerecuar upe oporandu ãgua ‘¿marase vo ãgüe ehi?’ <sup>45</sup> Sundao rerecuar omombeuse chupe, ahese omondo sehögüer José upe. <sup>46</sup> Evocoyase José virocu turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi. <sup>47</sup> María Magdalena iyavei María, José si, osepiãño yapocatuse yuvireco.

## 16

### *Jesús ocuerayevi*

<sup>1</sup> Mbituhusa ari pare, María Magdalena, María, Santiago si, Salomé avei, ahe virocu mbahe siacua vahe Jesús rehögüer rese nara yuvireco. <sup>2</sup> Iyavei añihiveive, yipindar ari semana pipe, oyepota Jesús rupipave icatu ramose yuvirasó. <sup>3</sup> Aheve aipo ehi oyeupe yuvireco:

—¿Ava pĩha co tehögüer rovapisa virocuara yuvireco yandeu? —ehi.

<sup>4</sup> Osepiase rumo ita guasu yuvireco, ndahe irise güendave ihã, <sup>5</sup> yuviroiquese tehögüer ruvipave yuvireco, aheve osepia ombahe rese pocosa coti mbia chihivahe, iturucuar pucu morochi vahe oguapise oĩ. Aheve cuña oyembosiquiye yuvireco. <sup>6</sup> Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohave. Pesepia ru supagüer. <sup>7</sup> Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri’ peyera —ehi.

<sup>8</sup> Evocoiyase ahe cuña yuvinosese tuvipa sui, yuvinoña yuviraso, oriri avei osiquiyepave. Iyavei nomombehui eté ambuae ava upe osiquiyepave yuvireco.

*Jesús oyemboyecua María Magdalena upe*

<sup>9</sup> Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi siete tupri carugar opa omboyepipi. <sup>10</sup> Ahe oso imombehu supindar upe. Ahe rumo oyaseho vite oviharêhisave yuvireco. <sup>11</sup> Osenduse cuña ñehe: “Jesús ocuerayevi, che ité asepia” ehise, ndoviroyai eté yuvireco.

*Jesús oyemboyecua ñuvirío güemimbohe upe*

<sup>12</sup> Ipare Jesús oyemboyecua iri ñuvirío güemimbohe upe ambuae güepiaca pipe peri rupi. <sup>13</sup> Ahe avei yuviraso omboetasa upe imombehu; ndoviroya viteiño avei rumo yuvireco.

*Jesús oyocuai güemimbohe*

<sup>14</sup> Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaêhisa rese chupe, iyavei ocuerayevisa mombehusar reroyaêhi rese avei. <sup>15</sup> Ipare aipo ehi güemimbohe upe: “Peso opacatu ivi rupi, pemombehu co ñehesa pĩsirosa resendar peico. <sup>16</sup> Acoi viroya vahe, iyavei oñeapiramo vahe, ahe oñepisirora yuvireco; acoi ndoviroyai vahe rumo, ahe imocañipirã tēi yuvirecoira. <sup>17</sup> Co mbahe poromondiisa omboyecua che reroysar yuvireco: Che rer pipe omboyepipira carugar ava sui. Oñehe aveira ñehesa ndicuasai vahe pipe yuvireco. <sup>18</sup> Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

*Jesús oso ivave*

<sup>19</sup> Oñehe pare, yande Yar Jesús oso ivave. Aheve oguapi Vu Tũpa acato coti oĩ. <sup>20</sup> Semimbohe evocoiyase opa yuviraso opacatu ivi rupi ñehesa pĩsirosa resendar mombehu. Yande Yar avei oipĩtivi, iyavei mbahe poromondiisa pipe omboyecua uca ité ñehesa pĩsirosa resendar supi eté vahe. Aipo rupive.



## LUCAS REMBICUACHIA JESUS RECOUER RESENDAR SAN LUCAS

*Lucas oicuachia Teófilo upe*

<sup>1-2</sup> Imboeteipri Teófilo, setá ava oicuachia yuvireco opacatu aracahe-  
dar mbahe imombehupri mboaviyesa cūritei yande pāhuve co Jesucristo  
recouer resendar. Acoi ava yipisuive osepia vahe omombehu tupri  
vahe Jesucristo recouer ava upe yuvireco, ahe omombehu tupri avei  
yuvireco cheu. <sup>3</sup> Sese che avei opa aseca tupri yipisuive opacatu co  
mbahe cua tupri āgua, Teófilo. Ichui che amoingatu tupri pota icuachiapri  
sesendar ndeu nara avei sereco. <sup>4</sup> Evocoyase nde ereicua tupri ra co  
porombohesa supi eté vahe acoi nde mbohe agüer.

*Tüpa rembiguai omombehu Juan Oporoãpiramo vahe ha āgua*

<sup>5</sup> Yipindar Jesús ha renondeve, Herodes mborerecuar ivi Judea rupin-  
dar recose aracahe, ahese aipo judío pahi secoi Zacarías serer vahe.  
Ahe pahi Abías rupindar secoi. Sembireco aipo pahi Aarón suindar,  
ahe serer Isabel. <sup>6</sup> Co ñuvirío secocuer aviye tupri Tüpa upe; viroya  
tupri opacatu Yar porocuita yuvireco. Evocoyase ndipoi eté que ava  
“mara” ehi vahe yuvireco chupe. <sup>7</sup> Zacarías rumo yipisuive ndatahi  
vahe. Esepia, sembireco ndimembii vahe ité, iyavei oyoya ité ocuacua-  
cuacuami yuvireco.

<sup>8</sup> Ñepe ari aipo osupiti icuaita tüparo pipe imboetasa reseve iporaviqui  
āgua Tüpa rovaque yuvireco. <sup>9</sup> Pahi recosa ité ēgüe ehi aracahe suive,  
ahese iporavosa Zacarías yipindar yasiapri tüparo maranehi pipe oi que  
vahe rā itaisi rapi āgua. <sup>10</sup> Itaisi rapi viteseve aipo, opacatu ava oyerure  
yuvireco ocarve. <sup>11</sup> Aheseve aipo oyemboyecua yande Yar rembiguai  
itaisi renda maranehi ique coti chupe. <sup>12</sup> Tüpa rembiguai repiase aipo,  
oyembosiquiyé iteanga. <sup>13</sup> Tüpa rembiguai rumo aipo ehiño chupe:

—Zacarías —ehi—, eresiquiye eme. Tüpa osendu nde yeruresa. Sese  
nde rembireco Isabel imembira ndeu. Ahe nde rahir rer-ra Juan.  
<sup>14</sup> Ereviharetera sese, iyavei oyemboviharetera opacatu ava yuvireco  
nde rahir ohase. <sup>15</sup> Esepia niha, nde rahir secocuer tuvichara oico Tüpa  
rovaque. Ndoihi chietera uva ricuer sai vahe, iyavei que ambuae  
mbahe sai vahe; secoira rumo Espiritu Santo rese ohaēhi viteseve. <sup>16</sup> Ēgüe  
ehira omonguerēhi setá ava judío Yar Tüpa reroya iri āgua oico. <sup>17</sup> Ahe  
virecora espíritu piratasa oyese oyoyara Tüpa ñehe mombehusar Elías  
rese ‘ava guahir rese tiñero yuvireco oyeupe’ oya, ‘toyembohe avei ava  
ndiporeroyai vahe yuvireco seco catupri vahe aracuasa mboyeroya āgua  
rese’ oyapave. Ēgüe ehira ava mbohe imoingatu yande Yar pisi āgua  
sereco —ehi chupe.

<sup>18</sup> Evocoyase,

—¿Mara ahera pīha aipo reroya? Che rumo acuacuami eté vichico,  
iyavei che rembireco ocuacuami avei no —ehi Tüpa rembiguai upe.

<sup>19</sup> —Aní —ehi chupe—. Che aico Tüpa rembiguai Gabriel, Tüpa  
rovaindar. Ahe niha che mbou ndeu che ñehe āgua iyavei co ñehesa aviye  
vahe mombehu āgua. <sup>20</sup> Nde rumo ndereroyai acoi amombehu vahe

nde. Sese co pipe suive ité nandehengatui chira eico. Osupitise voi che remimombehugüer, acoi ohase nde rahir, ahese ramo ndehengatura — ehi aipo Tüpa rembiguai chupe.

<sup>21</sup> Osáro pucu tēi aipo ocarve ambuae imboetasa eta yuvireco. “¿Mahera pīha nose vitei tūparo pipe sui?” ehi tēi yuvireco chupe. <sup>22</sup> Osēse aipo tūparo pipe sui, niñehengatui voi eté. “Ñaro osepia mbahe tūparo pipe” ehiño ité aipo imboetasa eta yuvireco chupe. Ipo āta-āta tēi aipo oñehengatuēhise mbahe mombehu oico.

<sup>23</sup> Ipare omboaviyese ocuaita tūparo pipe, oyevi oso güētave. <sup>24</sup> Coiye aipo sembireco Isabel ipuruha oico. Judío porocuita mboyeroyasave nose iri eté ambuae ava piri poyandepo yasi rupi. Ipihañemoñeta: <sup>25</sup> “Yar Tüpa ité ēgüe ehi cheu ava che rese ñeheēhi iri āgua yuvireco” ehi vorivetesa pipe aracahe.

*Tüpa rembiguai Jesús yesu āgua omombehu*

<sup>26</sup> Coiye seis yasi pipe Tüpa omondo güembigui Gabriel tecua Nazaret ve ivi Galilea rupi <sup>27</sup> cuñatai ndaseco marai vahe upe iñehe āgua; ahe serer María. Ahe omenda pota vahe cuimbahe mborerecurar guasu David suindar José serer vahe rese. <sup>28</sup> Tüpa rembiguai oi que co cuña rētave aipo ehi chupe:

—¿María, Tüpa nde rovasa, erereco mbahe icatupri vahe pītiviisa Yar Tüpa suindar! Tüpa nde rese ité secoi; nde rovasa catu opacatu cuña sui —ehi chupe.

<sup>29</sup> Tüpa rembiguai repiase, “¿Mara oya pīha co aipo ehi cheu?” ehi tēi osiquiyepave opihañemoñeta rereco. <sup>30</sup> Evocoiyase Tüpa rembiguai aipo ehi chupe:

—María, eresiquiye eme. Esepia niha, Tüpa ité nde poravo nde rovasa āgua. <sup>31</sup> Cūritei voira rumo ndemembira: ererecora nde membri; ahe serer-ra Jesús. <sup>32</sup> Ahe niha secouvicha catu vahe rā secoira; “Tüpa seco ivate vahe Rahir secoi” ehira yuvireco chupe. Iyavei niha Yar Tüpa ité omoinguera mborerecurar guasu seco āgua inungar tamoi David aracahe. <sup>33</sup> Mborerecurar guasu secoira judío recua rupi apirēhi vahe rā; imborerecuasa niha apirēhi vahe rā ité secoira —ehi.

<sup>34</sup> Evocoiyase ahe aipo ehi:

—¿Mara ahera vo aipo che membri viña? Esepia niha, ndaico vitei vahe cuimbahe rese —ehi Tüpa rembiguai upe.

<sup>35</sup> —Espíritu Santo ogüeyira nde harive iva quiha nungar; Tüpa güeco pīratasa pipe nde momembira. Sese acoi ohase nde membri seco maranehi vahe, “Tüpa Rahir” hesara chupe. <sup>36</sup> Cūritei nde mu Isabel avei ocuacuami pipe imembri oico; ahe niha ndimembri vahe yipindar viña, cūritei rumo vireco seis yasi omembri vie pipe. <sup>37</sup> Esepia niha, Tüpa upe ndipoi eté mbahe yavai vahe —ehi.

<sup>38</sup> Evocoiyase María aipo ehi:

—Che Yar rembiguai aico, tayaviye ayase Tüpa remimbotar cheu nde ñehe rupi —ehi.

Aipo ihe pare, Tüpa rembiguai oyepēpi oso ichui.

*María oso omu Isabel piri*

<sup>39</sup> Ahese María oso voi eté ivitri rupi tecua ivi Judea ve. <sup>40</sup> Aheve aipo Zacarías rēta pipe oi que se oso, oyapo “avirave” omu Isabel upe. <sup>41</sup> Evocoiyase Isabel rie pipe omii imembri iñehe renduse. Ahese Espiritu

Santo oigue Isabel aviterve. <sup>42</sup> Ipape osapucaí pĩrata aipo ehi chupe vorivetesave:

—¡Tũpa nde rovasa cuña opacatu sui, iyavei osovasa nde membri!  
<sup>43</sup> Noromohai eté che pĩri ereyu vaheṛã viña, che Yar si. <sup>44</sup> Esepia, cheu “avirave” ereyapose, che membri omĩ voi vorivetesave che rie pipe.

<sup>45</sup> ¡Sovasapĩ ereico! Esepia, ereroya ité ñehesa ndeundar. Iyavei Tũpa omboaviyera güemimombehu nde rese —ehi Isabel chupe.

<sup>46</sup> Evocoiyase aipo ihese,  
 “Che niha amboetei che Yar vichico;

<sup>47</sup> cheroriveté Tũpa che Pĩsirosar rese.

<sup>48</sup> Esepia, ahe omahe che rese che reco yemominisa pipe seroyasar che recosave.

Co pipe suive, ‘Sovasapĩ secoi’ ehira opacatu ava yuvireco cheu.

<sup>49</sup> Esepia niha, Tũpa mbahe mboavaisarēhi, oyapo mbahe tuvichá vahe cheu.

¡Tũpa imboeteipĩri catu tasecoi yepi!

<sup>50</sup> Ahe oiparaisuereco opacatu omboeteisar yepi.

<sup>51</sup> Nomboavai eté mbahe yapo.

Osecoreroyi ava oyemboivate ai tēi vahe.

<sup>52</sup> Viroyi mborerecar seco pĩrata vahe pĩratasa sui; ava seco mbegüemi vahe rumo osecomboivate.

<sup>53</sup> Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

<sup>54</sup> Oipĩtĩvi niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mondo ãgua  
<sup>55</sup> güemimombegüer rupi yande ramoi aracahendar Abraham upe, ichuindar upe avei yepi no” ehi vorivetesave pipe omu

Isabel upe.

<sup>56</sup> Ipape María opita Isabel pĩri mbosapĩ yasi rupi. Ichui oyevi oso güetave.

*Juan Oporoãpiramo vahe haragüer*

<sup>57</sup> Osupitise ari Isabel upe, imembira. Ahe imembri cuimbahemi.

<sup>58</sup> Imu iyavei icotĩndar oyanduse Tũpa rembiapo mbahe aviye vahe, aipo ehi yuvireco chupe: “Aviye ai catu Yar Tũpa secoi co cuña rese” ehi vorivetesave yuvireco. <sup>59</sup> Ocho ari pipe aipo, ahe pĩtani ombocircuncida yuvireco judío porocuaita mboyeroyasa pipe. Ipape aipo omondo pota iyepu Zacarías rer yuvireco sese viña, <sup>60</sup> ichi rumo,

—Ani —ehiño—. Juan itera rumo serer —ehi.

<sup>61</sup> —¿Mahera vo? Ndipoi eté rumo nde mu rer aipo nungar —ehi yuvireco chupe.

<sup>62</sup> Evocoiyase aipo omahe pĩtani yesupa rese yuvireco ‘¿mbahe pĩha ahe omondo pota sererguã viña?’ oyapave yuvireco. <sup>63</sup> Evocoiyase aipo iyepu oporandu ivirapemi rese sese serer oicuachía vaheṛã. Ahe serer oicuachía: ‘Juan sererguã’ ehi imoi. Ahese aipo opacatu ava: “¿Mara ehi rutei pĩha co?” ehi tēi oyeupe yuvireco. <sup>64</sup> Ahese ramo Zacarías ñehengatu, omboipi Tũpa upe osapucaí oico. <sup>65</sup> Opacatu aipo sēta cotĩndar oyembosiquiye tēi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco. <sup>66</sup> Mbahe osendu vahecuer rese avei aipo oporandu-randu oyeupe yuvireco: “¿Mbahe pĩha aipo pĩtani oyapora curi?” ehi. Esepia niha, supi eté Tũpa osovasa.

*Zacarías sapucaí agüer*

<sup>67</sup> Zacarías, Espíritu Santo pĩratasa pipe, oñehe Tũpa oyeupe ñehesa pipe aipo ehi:

<sup>68</sup> “¡Yande Yar Tũpa imboeteipri tasecoi!

¡Esepia niha, ahe ou yande judío yaico vahe pĩsiro ãgua!

<sup>69</sup> Ombou niha Poropĩsirosar güembiguai David suindar yandeu.

<sup>70</sup> Ëgüe ehi imombehu opacatu oñhengagüer mombehúsar seco maranehi vahe upe aracahe.

<sup>71</sup> Ahe yande pĩsirora yande amotarẽhimbar sui.

<sup>72</sup> Ëgüe ehi Tũpa imbou oporoparaisuerecosa yande ramoi aracahendar upe, iyavei iyemomahenduha ãgua güemimbotar maranehi mombehu agüer rese.

<sup>73</sup> Evocoyase, ‘Che supi eté ayapora evocoi mbahe’ ehi yande ramoi Abraham upe aracahe

<sup>74</sup> yande renose ãgua yande amotarẽhimbar povri sui ‘tache mboetei osiquiyehisa pipe yuvireco’ oya;

<sup>75</sup> ‘toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi’ oyapave.

<sup>76</sup> Nde, che rahir, ‘Co Tũpa ivate vahe ñehe mombehúsar secoi’ ehira ava yuvireco ndeu.

Esepia, nde eremoingatura ava recocuer Yar pisi ãgua senondeve eico.

<sup>77</sup> Supi eté nde niha eremboyecua opacatu ava Tũpa upendar yuvirecoi vahe upe angaipa sui ñeroisa pisi ãgua ññepisiro ãgua.

<sup>78</sup> Esepia, yande Ru Tũpa, oporoparaisuerecosa pipe ombou oporoesapesa iva pendar yandeu yande reco mbopiasu ãgua

<sup>79</sup> iyavei ava Tũpa cuaparẽhi resape ãgua ‘toyuvirecoi mbahe tupri pipe’ oyapave.

Esepia, ahe inungar ava pĩtumimbisave yuvirecoi vahe, ocañi tẽi vaherã yuvireco”

ehi Zacarías.

<sup>80</sup> Ichui pĩtani ocuacua iyavei vireco pĩratasa Espíritu suindar oyese. Ipare rumo oso oyemboerecua ivi iporupirẽhi rupi. Coiye oyemboyecua omu Israel pendar upe oico.

**2***Jesús yesu agüer*

<sup>1</sup> Yipĩndar mborerecuar guasu Augusto oporocuai oico, “Tayecuachiasa opacatu tecua rupi” ehi. <sup>2</sup> Ahe yipĩndar yecuachiasa mborerecuar Cirenio, Siria pendar rẽise. <sup>3</sup> Opacatu ava yuviraso güecua yacatu rupi oyecuachía ãgua yuvireco.

<sup>4</sup> Sese José avei osẽ Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi. <sup>5</sup> Ëgüe ehi oyoya yuviraso güembirecovi María rese oyecuachía ãgua. María rumo imembira pota ité oico. <sup>6</sup> Aheve oyepota ramose, osupiti ari imembira ãgua. <sup>7</sup> Aheve oha imembri yipĩndar vahe cuimbahemí. Ahese María oyao omembri turucuar pipe, Ëgüe ehi imoñeno imondo mbahe mimba rembihi riru pipe. Esepia niha, ndoyosui eté oque ãgua aheve yuvireco.

*Tūpa rembiguai eta omombehu Jesús haragüer ovesa rãrosar upe yuvireco*

<sup>8</sup> Namombriimi Belén sui ovesa rãrosar yuvirecoi. Aheve osãro ovesa pĩtu pipe yuvireco. <sup>9</sup> Aviyeteramo tẽi oyemboyecua Tūpa rembiguai iva pendar chupe. Tūpa porañetesa avei sendi yivii chupe yuvireco. Ahe sepiase, oyembosiquiyé iteanga tẽi yuvireco ichui. <sup>10</sup> Ahe rumo aipo ehi chupe: “Pesiquireme. Esepia, che ayu mbahe icatupri vahe mombehu ãgua pẽu pe mboviharete ãgua iyavei opacatu ava mboviharete ãgua avei no. <sup>11</sup> Co pipe oha David recua Belén ve Poropisĩrosar pẽu nara. Ahe niha Tūpa Rembiporavo, pe Yarguã seci. <sup>12</sup> Icuã ãgua peyosura pĩtani yaopri tuprĩmi vahe tui mbahe mĩmba rembihu riru pipe” ehi.

<sup>13</sup> Aviyeteramo tẽi oyemboyecua ambuae setá Tūpa rembiguai iva pendar yivii yuvireco. Tūpa upe osapucaĩ yuvireco aipo ehi:

<sup>14</sup> “¡Imboeteipri tasecoi Tūpa ivave!

¡Ivive ava Tūpa rembiaĩsu toyuvirecoi tupri oyeaisusa pipe!” ehi osapucaĩ yuvireco.

<sup>15</sup> Opase oyevi Tūpa rembiguai ivave yuviraso, ahese ovesa rãrosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

<sup>16</sup> Evocoyase ipoyava yuviraso. Ipare osepia María, José, Jesús pĩtani avei yuvireco cute. Ahe pĩtani omoñenomi mbahe mĩmba rembihu riru pipe ino. <sup>17</sup> Ipare yuvinose omombehu-mbehu ambuae ava upe Tūpa rembiguai remimombehugüer pĩtani resendar ñehesa yuvireco. <sup>18</sup> Evocoyase opacatu ava oyepĩhamondĩ co ñehesa renduse yuvireco. <sup>19</sup> María rumo opacatu co mbahe rese oyapisacaño; ahe ehiño ité ipihañemoñetasa. <sup>20</sup> Oyevise ovesa rãrosar yuviraso, omboetei iyavei osapucaĩ Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

*Jesús pĩtani seropovẽhesa Tūpa upe tũparo pipe*

<sup>21</sup> Ocho arĩ pipe ahe pĩtani ombocircuncida yuvireco; omondo sererguã Jesús yuvireco, ahe terer tupri avei acoi Tūpa rembiguai omombehu María upe imembĩehi viteseve.

<sup>22</sup> Ipare omboaviyese ohari güetave oñemoatiro ãgua, ahe aipo ãgüe ehi Moisés porocuita rupi yuvireco yepi, ahese vinose pĩtani seraso tecua guasu Jerusalén tũparo pipe seropovẽhe ãgua Yar upe yuvireco. <sup>23</sup> ãgüe ehi yuvireco. Esepia, Yar porocuita aipo ehi icuachiapri pipe aracahe: “Opacatu yipĩndar pĩtani cuimbahe mini yuviroha vahe ipehasara Tūpa upe nara yepi” ehi. <sup>24</sup> Yuviraso oporerocosa reropovẽhe ãgua yuvireco yande Yar porocuita rupi: “Ñepeĩ oyovaichor reseve picuhi, anise ñuvirio apicasu peropovẽhera” ehi vahe.

<sup>25</sup> Ahe pipe mbia Jerusalén ve seci Simeón serer vahe. Ahe mbia aviyeteprĩ vahe. Oyerure vahe Tūpa upe, osãro vahe avei Israel recua pendar Pĩsĩrosar imombehupri. Ahe seci vahe ité Espĩritu Santo rese. <sup>26</sup> Ahe chupe Espĩritu Santo opa uca oicua “eresepia rane itera Poropisĩrosar Tūpa remimbou nde mano renondeve” ehi vahe. <sup>27</sup> Ahe arĩ pipe Espĩritu Santo viroguata tũparove. Oyepotase José, María reseve yuvireco tũparove Jesús pĩtani reropovẽhe ãgua Tūpa porocuita rupi tupri, <sup>28</sup> ahese Simeón oyemboya oso sese, osupi ichi sui, viroyeroqui Tūpa upe señoa aipo ehi:

29 “Che Yar, cūrítei che, nde rembiguai, amano tupriño itera.

Esepia niha, nde remimombehugüer eremboaviye ité cheu.

30 Asepia ité niha Poropĩsirosar vichico cute.

31 Nde niha erembou opacatu ava rembiepiave.

32 Ahe niha poroesapesa ité secoi.

Esepia, omboyecuara mbahe supi eté vahe ava ndahei vahe judío yuvirecoi vahe upe, iyavei omondara poromboeteisa nde recua Israel pendar judío yuvirecoi vahe upe”

ehi oyerogui.

33 José iyavei María ndoyembovihai tēi yuvireco pītani rese Simeón yeroqui renduse. 34 Evocoyase Simeón osovasa ahe pītani iyesupa reseve. Ipare aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecuara mbahe ava upe. Amove rumo viroñroñora yuvireco. 35 Ipipe sui ava pihañemoñetasa icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

36 Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñatamiseve rumo omenda, iyavei secoi raimi tēi omer rese siete araviter rupive. 37 Cūrítei secoi omer mano pare ochenta y cuatro araviter. Nosei eté tūparo pipe sui oico. Ēgüe ehi yande Yar mboetei pītu, ari rupi oyecuacusa pipe iyavei oyeruresa pipe avei oico no. 38 Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipare oñehe secocuer rese opacatu ava Jerusalén pendar osāro vahe güecua pĩsiro āgua upe oico.

*Jesús pītani reroyevi agüer Nazaret ve*

39 Evocoyase opacatu Moisés porocuita mboaviyere, opa oyeve Galilea pendar güecua Nazaret ve yuvireco. 40 Ahese pītani ocuacua catumi imbahecua-ecua irimi eté oico iyavei ipĩrata catu irimi. Esepia, Tūpa osovasa ité sereco no.

*Jesús chĩhivahe tūparo pipe secoi*

41 Iyesupa yuviraso araviter yacatu Jerusalén ve Pascua pieta repia yepi. 42 Jesús doce araviter virecose, ahese viraso iyesupa Jerusalén ve oyeupi pieta repia yuvireco. Esepia, ěgüe ehi eté judío recocuer pietase yuvireco yepi. 43 Ahe pieta pare voi, oyeveise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipĩtase yuvireco. 44 “Ouño revo ava pāhu rupi” ehi yuvireco chupe viña; aipo ehiño ité ñepeí ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no, 45 ndoyosui eté yuvireco. Ahese oyeveí iri tēi Jerusalén ve seca yuvireco.

46 Imombosapisa ari pipe oyosu ramo tūparo pipe yuvireco. Aheve oguapi ava Tūpa porocuita rese oporombohe vahe pāhuve oĩ; oyapisaca iñehe rese iyavei oporandu-randu ahe ava upe Tūpa Ñehengagüer rese oĩ. 47 Evocoyase opacatu ava ndoyembovihai tēi imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa. 48 Oyosuse iyesupa, oyepihamondii yuvireco. Ahese ichi aipo ehi chupe:

—Che membri, ¿mahera vo ñgüe ere eico oreu? Nde recasa tēi opacatu rupi, ore mopihañemoñeta ati uca eve —ehi.

<sup>49</sup> Evocoiyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vahe rā? —ehi osi upe.

<sup>50</sup> Iyesupa rumo ndosenducuai eté aipo oyeupe hesa yuvireco.

<sup>51</sup> Evocoiyase oyeve Nazaret ve oso supi. Aheve omboyeroyaño ité oyesupa. Ichi niha opacatu co mbahe rese oyapısacaño ité. <sup>52</sup> Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tūpa upe iyavei ava eta upe avei no.

### 3

*Juan Oporoãpiramo vahe secoi ivi iporupirēhisava rupi*

<sup>1</sup> Quince araviter pipe mborerecuar guasu Tiberio recose, Poncio Pilato evocoiyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoiyase mborerecuar secoi Iturea ve iyavei Traconite ve, Lisantias avei mborerecuar secoi Abilinia ve. <sup>2</sup> Anás iyavei Caifás ahe pahi rerecuar ivate catu vahe yuvirecoi. Ahese Tūpa, “Emombehu che ñehe ava upe cute” ehi Zacarías rahir Juan upe oico ivi iporupirēhisave. <sup>3</sup> Juan evocoiyase oso opacatu iai Jordán ivi oico, supi aipo ehi ava upe: “Pemboasi pe angaipa, peyeve Tūpa upe, aheve opoãpiramora Tūpa pēu ñero ñgua pe angaipa rese” ehi. <sup>4</sup> Co yaviye ité Tūpa ñehe mombehusar Isaías rembicuachiagüer pipendar aipo ehi vahe:

“Sendusa ivi iporupirēhisave ava sapucaisa aipo ehi vahe:

‘Pemoingatu yande Yar raperā, pemohivi tupri avei’ ehi.

<sup>5</sup> ‘Evocoiyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi peri ipāri vahe, ahe imohivisapara; peri ipicucu ati vahe opara imboapiposa tupri chupe.

<sup>6</sup> Iyavei opacatu ava osendura ñehesa pısirosa resendar Tūpa remimbu yuvireco cute’ ehi vahe” ehi.

<sup>7</sup> Ava rehü yuvinosepa chupe ‘tayande ãpiramo’ oyapave yuvireco viña. Ahe rumo aipo ehi: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vahe rā sui’ ehi tupri tēi pēu? <sup>8</sup> Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepisiro ñgua. Esepia, Tūpa oicatuño ité co ita sui Abraham suindar nungar tupri apo ñgua oyeupe nara yepi. <sup>9</sup> Hacha niha imoingatusa voi eté opacatu ivira iha naporai vahe sapo rupi yasia ñgua yepi. Yasiapri evocoiyase imondosapara tatave” ehi.

<sup>10</sup> —¿Mbahe pıha evocoiyase oroyapora ore recocuer recuñaro ñgua oroico? —ehi ava rehü oporandu yuvireco chupe.

<sup>11</sup> —Pe pereco vahe ñuvirıo pe camisa, ñepeı pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyevi ava upe.

<sup>12</sup> Yugüeru avei moviro ava sui guarepochi rerocuar ‘tayande ãpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata ñgua oroico? —ehi yuvireco chupe.

<sup>13</sup> Evocoyase aipo ehi ahe ava yuvirecoi vahe upe:

—Aní perocua catu iri guarepochi pëu imombehusa sui —ehi.

<sup>14</sup> Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tēi chira ava upe sembiapoēhi rese, iyavei peyembovihanora pe poraviqui repri rese —ehi sundao upe.

<sup>15</sup> Ava rumo, “¿Ndahei pīha co Poropīsirosar sārombri secoi?” ehi tēi Juan upe yuvireco. <sup>16</sup> Juan rumo aipo ehi opacatu ava upe: “Che opoãpiramo i pipe tēi; oura rumo ambuae che raquicuei, ahe pe ãpiramora Espiritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisā yora āgua ichui” ehi. <sup>17</sup> “Ahe güeru trigo mbovevesa ihigüer sui ipēha āgua. Sāhi evocoyase yapocatusa, ihigüer rumo imondosa tata apirēhi vahesave” ehi ava upe.

<sup>18</sup> Omombehu-mbehu vite ñehesa aviye vahe ava upe ‘toyemonguerēhi güecocuer recuñaro āgua yuvireco’ oya. <sup>19</sup> Ipare rumo Juan oñehe pīrata mborerecuar Herodes upe secocuerai rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo. <sup>20</sup> Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

#### *Jesús ãpiramosa*

<sup>21</sup> Yipindar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure viteseseve, aviyeteramo tēi oyemboi tupri iva. <sup>22</sup> Ipare Espiritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

#### *Ava eta yesu vahe Jesucristo yesu renondeve*

<sup>23</sup> Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi, <sup>24</sup> Elí evocoyase Matat rahir, ahe Matat evocoyase Leví rahir, Leví evocoyase Melqui rahir, ahe Melqui evocoyase Jana rahir, Jana evocoyase José rahir, <sup>25</sup> ahe José Matatías rahir, Matatías evocoyase Amós rahir, ahe Amós evocoyase Nahúm rahir, Nahúm evocoyase Esli rahir, ahe Esli Nagai rahir, <sup>26</sup> Nagai evocoyase Maat rahir, ahe Maat Matatías rahir, Matatías evocoyase Semei rahir, ahe Semei evocoyase Josec rahir, Josec evocoyase Judá rahir, <sup>27</sup> ahe Judá Joanán rahir, Joanán evocoyase Resa rahir, ahe Resa evocoyase Zorobabel rahir, Zorobabel evocoyase Salatiel rahir, ahe Salatiel Neri rahir, <sup>28</sup> Neri evocoyase Melqui rahir, ahe Melqui Adi rahir, Adi evocoyase Cosam rahir, Cosam evocoyase Elmadam rahir, Elmadam evocoyase Er rahir, <sup>29</sup> ahe Er Jesús rahir, Jesús evocoyase Eliezer rahir, ahe Eliezer Jorim rahir, Jorim evocoyase Matat rahir, <sup>30</sup> ahe Matat Leví rahir, Leví evocoyase Simeón rahir, ahe Simeón evocoyase Judá rahir, Judá evocoyase José rahir, ahe José Jonam rahir, Jonam evocoyase Eliaquim rahir, <sup>31</sup> Eliaquim Melea rahir, ahe Melea Mena rahir, Mena evocoyase Matata rahir, ahe Matata evocoyase Natán rahir, <sup>32</sup> Natán David rahir, ahe David evocoyase Isaí rahir, Isaí Obed rahir, ahe Obed evocoyase Booz rahir, Booz Sala rahir, ahe Sala evocoyase Naasón rahir, <sup>33</sup> Naasón Aminadab rahir, ahe Aminadab evocoyase Admin rahir, Admin evocoyase Arni rahir, Arni evocoyase



Esrom rahir, ahe Esrom evocoyase Fares rahir, Fares evocoyase Judá rahir, <sup>34</sup> ahe Judá Jacob rahir, Jacob evocoyase Isaac rahir, ahe Isaac Abraham rahir, Abraham evocoyase Taré rahir, Taré evocoyase Nacor rahir, <sup>35</sup> ahe Nacor Serug rahir, Serug evocoyase Ragau rahir, ahe Ragau evocoyase Peleg rahir, Peleg Heber rahir, ahe Heber evocoyase Sala rahir, <sup>36</sup> Sala Cainán rahir, ahe Cainán evocoyase Arfaxad rahir, Arfaxad evocoyase Sem rahir, ahe Sem evocoyase Noé rahir, Noé evocoyase Lamec rahir, <sup>37</sup> ahe Lamec Matusalén rahir, Matusalén evocoyase Enoc rahir, Enoc evocoyase Jared rahir, ahe Jared Mahalaleel rahir, Mahalaleel evocoyase Cainán rahir, <sup>38</sup> ahe Cainán evocoyase Enós rahir, Enós evocoyase Set rahir, ahe Set Adán rahir, Adán evocoyase Tüpa rahir.

## 4

### *Jesús recoãhasa*

<sup>1</sup> Jesús Espíritu Santo rese ité secói. Ahe osê iai Jordán sui oso. Ipare Espíritu viroguata ivi iporupirêhisa rupi. <sup>2</sup> Aheve cuarenta ari secoise Caruguar osecoãha. Ndocarui avei oico. Sese ndasiepoi eté. <sup>3</sup> Caruguar evocoyase aipo ehi chupe:

—Tüpa Rahir ité nde recose, co ita sui eyapo pan cūrítei —ehi.

<sup>4</sup> Evocoyase Jesús omboyeví chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Caruguar upe.

<sup>5</sup> Ipare Caruguar viraso ivate vahesave. Aheve ñepei reseve opacatu ava-ava tēi mborerecuasa ivi pipendar omboyecua chupe. <sup>6</sup> Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahē nde povrīve. Esepia niha, co opacatu cheu imboupri; iya ité amondo vaherã ava upe che remimbotar rupi. <sup>7</sup> Acoi ereñenopihase cheu che mboetei ãgua, ahese opacatu co mbahe ereipisira nde mahera —ehi tēi Caruguar chupe.

<sup>8</sup> —Icuachiapri pipe rumo: ‘Emboetei nde Yar Tüpa, ahe güeraño tupri avei eremboyeroyara’ ehi —ehi Caruguar upe.

<sup>9</sup> Ipare Caruguar viraso oyeupi tecua guasu Jerusalén ve. Aheve oviroyeupi tüparo apiterve. Aheve Caruguar aipo ehi chupe:

—Tüpa Rahir ité nde recose, eviapi cohave sui. <sup>10</sup> Esepia niha, icuachiapri pipe:

‘Tüpa oyocuaira güembigui eta nde rãro ãgua.

<sup>11</sup> Ahe nde mopuhara yuvireco que ñepei ita nde momara rãgüer sui’ ehi —ehi Caruguar chupe.

<sup>12</sup> Evocoyase omboyeví Caruguar upe:

—¡Aní! Icuachiapri pipe niha aipo ehi avei: ‘Nderesecoãhai chira nde Yar Tüpa’ ehi —ehi chupe.

<sup>13</sup> Ahese Caruguar ndoicatu iri eté Jesús recoãha ãgua oico. Ipare oyepepiño raimi tēi oso ichui.

### *Jesús omboipi oporombohe Galilea rupi*

<sup>14</sup> Jesús, Espíritu Santo reco pīratasa pipe, oyeví oso Galilea ve. Ipare serãcua oguata opacatu tecua-tecuami rupi. <sup>15</sup> Esepia, ahe oporombohe judío tüparo pipe oico. Ahese opacatu ava omboetei yuvireco.

### *Jesús oyeví Nazaret ve*

<sup>16</sup> Ichui Jesús oyeveí Nazaret ve ocuacua agüerve. Aheve judío mbituhusa ari pipe oique tūparove inungar oyapo yepi. Ahese opūha ‘tayeroqui icuachiapri maranehi pipe’ oya. <sup>17</sup> Evocoiyase tūparo rese ñangarecuar pītiviisar omondo Tūpa ñehe mombehusar Isaías rembicuachía chupe. Oyorase ahe cuachiar, oyerorqui icuachiapri aipo ehi vahe pipe ohā:

<sup>18</sup> —“Yar Espíritu secoi che rese.

Esepia niha, ahe ombou che cuaitarā cheu co ñehesa aviye vahe mombehu āgua ava iparaisu vahe upe.

Che cuaita avei ava mbahe-mbahe tēivriye yuvirecoi vahe senose āgua ichui, iyavei ava ndasesapisoi vahe ambosarecora; iyavei che cuaita ava mbahe-mbahe tēi rasicuer oiporara vahe sui senose āgua,

<sup>19</sup> iyavei ‘cūrítei Yar oyemoingatu oporovasasa mondo āgua pēu’ he āgua” ehi icuachiapri pipe

—ehi oyerorqui.

<sup>20</sup> Sese oyerorqui pare, oyapoapipa cuachiar imondo tūparo rese ñangarecuar pītiviisar upe. Ipare oguapri oī ava rembiepiave. Ahese opacatu tūparo pipendar omahe ati yuvireco sese. <sup>21</sup> Evocoiyase ahe oñhe aipo ehi:

—Cūrítei yaviye co icuachiapri pipendar opacatu pe rovaque —ehi.

<sup>22</sup> Opacatu ava oñhe tupriño ité yuvireco sese. Ndoyembovīhai tēi iñhe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tēi? —ehi yuvireco chupe.

<sup>23</sup> Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pipe, ēgüe ere avei eyapo cohava nde recua pipe ité’ peyera cheu —ehi.

<sup>24</sup> —Supi eté, ndipoi eté niha que ñepeí yepe Tūpa ñehe mombehusar oipisi tupri vahe güecua pipe yuvireco yepi. <sup>25</sup> Supi tupri ité Tūpa ñehe mombehusar Elías recose, iñhe rupi tupri ndoquii eté mbosapri aravīter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña, <sup>26</sup> Tūpa rumo nomondoi Elías cuña imer mano vahecuer Israel pendar upe ipītivīi āgua. Ēgüe ehi rumo omondo cuña ndahei vahe Israel pendar ipītivīi āgua. Ahe cuña tecua Sarepta pendar, ahe Sarepta Sidón ipiimindar. <sup>27</sup> Iyavei setá ava oime Israel recua pipendar imbaheasi vahe lepra rerecosar yuvirecoi evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepeí ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

<sup>28</sup> Ahese opacatu ava judío tūparo pipendar oñemoiró iteanga yuvireco sese aipo mbahe renduse. <sup>29</sup> Sese opa voi eté opūha Jesús reraso āgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. <sup>30</sup> Jesús rumo ipāhu sui osē tupriño oso.

*Jesús ombogüera mbia carugar vireco vahe oyese*

<sup>31</sup> Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe. <sup>32</sup> Ipare opacatu ava, “¡Mara ehi

rutei!” ehi tēi iporombohesa renduse yuvireco. Esepia niha, ahe oñehe güeco pīratasa pipe.

<sup>33</sup> Aheve judío tūparo pipe oime mbia vireco vahe caruguar oyese, ahe oñehe pīrata Jesús upe:

<sup>34</sup> —¡Ore mañeco tēi eme eve! ¡Mahera ereyuño tēi cohove oreu, nde, Jesús Nazaret pendar! ¿Ereyu vo ore mocañi ñgua tēi? Che orocua ité. Nde niha seco maranehi vahe ereico Tūpa suindar —ehi chupe.

<sup>35</sup> Evocoiyase,

—¡Quiriri, esē co mbia sui! —ehi oñehe pīrata caruguar upe.

Ahese caruguar omboviapi ahe mbia ava rovai, osē ocua ichui; nomomaraí eté rumo. <sup>36</sup> Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pipe oyocuai caruguar ava sui imose ñgua! —ehi yuvireco.

<sup>37</sup> Sese Jesús rerācua oyandu opacatu tecua-tecuami ivirindar yuvireco.

*Jesús ombogüera Simón Pedro rembireco si*

<sup>38</sup> Evocoiyase Jesús osē judío tūparo pipe sui oso, oique Simón Pedro rētave. Simón rembireco si sohí iteanga ou. Evocoiyase oñehe ahe pendar sese Jesús upe ‘tombogüerami tēi’ oyapave yuvireco. <sup>39</sup> Evocoiyase Jesús oyeaivi oso chupe sohí sui imbogüera ñgua. Ocuera pare voi ahe cuña oñarapuha; ohañeco ahe ava yuvirecoi vahe rese.

*Jesús ombogüera setá ava imbaheasi vahe*

<sup>40</sup> Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoiyase opo omondo iyacatu iharive ñepeipei imbogüera. <sup>41</sup> Iyavei setá ava sui opa omose caruguar. Evocoiyase caruguar osapucaí tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñehe pīrata caruguar upe, nomoñehe iri. Esepia niha, caruguar oicua ité ahe Tūpa Rembiporavo seco rese yuvireco.

*Jesús oporombohe judío tūparo rupi oico*

<sup>42</sup> Ahere ayihive cōhe ramomise, Jesús osē tecua pipe sui, oso ivi iporupirēhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoēhi ñgua ité yuvireco vinā.

<sup>43</sup> Ahe rumo aipo ehi ava eta upe:

—Tamombehu rane catu ambuae tecuave avei ñehesa avīye vahe Tūpa mborerecuasa resendar ava upe. Esepia, aherā niha che mbousa —ehi.

<sup>44</sup> Ëgüe ehi Jesús uguata oporombohe Judea tūparo rupi oico.

## 5

*Pira mboha atí agüer*

<sup>1</sup> Ñepeí ari Jesús secoi ipa Genesaret popi rupi. Aheve ava rehíi oyepota yuvireco chupe, oyere atí yuvireco sese. Esepia niha, ahe osendu pota ité Tūpa Ñhengagüer yuvireco. <sup>2</sup> Aheve oime ñuvirío carite imbehi popiye. Ahe ava pira mbohasar opa yuvínose evocoi carite pipe sui yuvireco. Ipare opira mbohasa oyosei yuvinoi. <sup>3</sup> Evocoiyase Jesús osepiase, oha Simón carite pipe iyavei aipo ehi chupe: “Tosiri catumi tēi chíhi coi coti íai popi sui” ehi. Ipare uguapi oí carite pipe. Aheve ombohe ava cute. <sup>4</sup> Oñehe pare aipo ehi Simón upe:

—Yaso ipa tipí catu vahesave. Aheve erembohara pira —ehi.

<sup>5</sup> Simón rumo omboyeveí chupe:

—Porombohesar, orosãha tēi niha pĩtu momba pira mboha oroico. Nde porocuaita pipe rumo amondo irira pira mbohasa ive —ehi.

<sup>6</sup> Ēgüe ehise, pira rehii omondoromi ombohasa yuvireco. <sup>7</sup> Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugüerumi yande pĩtivii’ oyapave yuvireco chupe. Ahe yugüeru chupe. Ipare opa ñuvirio carite omboapipo tupri yuvireco; seni iri rumo omondo ipive. <sup>8</sup> Co mbahe repiase, Simón Pedro oñenopiha oso sovai aipo ehi chupe:

—¡Eyepepimi tēi che sui, che Yar! ¡Esepia, che yangaipa vahe tēi aico! —ehi.

<sup>9</sup> Esepia, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco. <sup>10</sup> Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ěgüe ere aveira ava reca cheu nara —ehi.

<sup>11</sup> Evocoiyase opa vinose carite ivi ãtasave yuvireco, oseyapaño opacatu mbahe. Ipare yuviraso supi.

*Jesús ombogüera ava lepra rerecosar*

<sup>12</sup> Ñepeí ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

<sup>13</sup> Evocoiyase, opocose sese,

—Aipota. ¡Erecuerara cūrítei! —ehi chupe.

Aipo ihe ramoseve voi eté ocuera. <sup>14</sup> Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavēhe nde porerecosa nde cuerasa resendar Moisés porocuaita rupi. Ipipe sui toicua opacatu ava nde cuerasa yuvireco —ehi chupe.

<sup>15</sup> Jesús rerãcua rumo oyembouvicha catu-catu iri eté. Evocoiyase setá ava oyemboya yuvireco sese iñehe rendu ãgua ‘tayande mbogüerami tēi yande mbaherasisa sui’ oyapave yuvireco. <sup>16</sup> Ava rehii sui rumo amove Jesús oyepipiño ahe aemi oyerure ãgua yepi.

*Jesús ombogüera ava ndoguatai vahe*

<sup>17</sup> Ñepeí ari Jesús oporombohe oico. Yar Tüpa pĩratasa vireco oyese ava mbogüera ãgua. Aheve avei oguapí yuvinoi fariseo, Moisés porocuaita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no. <sup>18</sup> Ahese ava ndoguatai vahe güeru supa pipe yuvireco. Viroique pota oi pipe sovai eté seroyi ãgua yuvireco viña; <sup>19</sup> ndoicatui eté rumo seroique yuvireco ava rehii pãhu rupi. Evocoiyase viroyeupi yeupisa rupi ahe oi ipe vahe harive yuvireco. Aheve virocuca teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. <sup>20</sup> Ahe oicuase co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

<sup>21</sup> Ichui oporombohe vahe Moisés porocuita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero ñgua” ehi tēi oyeupe yuvireco.

<sup>22</sup> Ahe rumo oicuaño ité ahe ava pihañemoñetasa. Evocoyase aipo ehi chupe:

—¡Mahera vo pepihañemoñeta rai tēi che rese! <sup>23</sup> ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie? <sup>24</sup> Tapeicua ru che, Ava Riquehir, areco ité mborerecuasa co ivi pipe ava angaipa upe che ñero ñgua —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

<sup>25</sup> Ahese opūha voi ava rovaque, osupi vupagüer. Ipare osapucaí oso güētave Tūpa upe. <sup>26</sup> Ahese opacatu tupri ité ava, “¡Too! ¿Mara ehi rutei pīha co?” ehi tēi imboetisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepiai vahe ité —ehi.

*Jesús oñehe Leví upe*

<sup>27</sup> Ichui osēse Jesús, osepia mbia Roma ve nara guarepochi rero cuasar Leví serer vahe, ahe guarepochi rero cuasave chini. Sepiase,

—Erio che rupi —ehi chupe.

<sup>28</sup> Evocoyase Leví opūha. Oseyapa oporaviquisa, oso supi.

<sup>29</sup> Ipare Leví oyapo pieta guasu chupe nara güētave. Aheve iyemborisave setá imboetasa ava guarepochi rero cuasar iyavei ambuae ava ocaru yuvinoi ipiri. <sup>30</sup> Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rero cuasar rese iyavei ambuae ava yangaipa guasu vahe rese tēi avei no! —ehi.

<sup>31</sup> Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. <sup>32</sup> Esepia, che ndayui ava seco catupri vahe reca; che rumo ayu ava yangaipa vahe reca Tūpa uve iyeví ñgua yuvireco —ehi.

*Yecuacusa rese ñehesa*

<sup>33</sup> Ipare ava oporandu yuvireco chupe:

—¿Mahera vo oyeacu serai iyavei oyerure Juan Oporoāpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

<sup>34</sup> Ahe rumo omboyeví chupe aipo ehi:

—Ndiyai eté ichohopri mboyecuacu mendasave imer oicove viteseve ipāhuve. <sup>35</sup> Oimera rumo ari imer reraso ñgua ichui, ahese ramo oyeacuacura yuvireco cute —ehi.

<sup>36</sup> Iyavei ambuae mbahe rese oporombohe imboyeví ñgua:

—Ndiyai eté ava upe virocuva vaherā turucuar ipiasu vahe sui ambuae turucuar cuacuami vahe apete ñgua. Esepia niha, ñgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. <sup>37</sup> Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, ñgüe ehise, uva ricuer piasu evocoyase opara ombopu mbahe pিরer cuacua

viña, ēgüe ehira oyepiyerepa, mbahe pিরer avei evocoyase ocañi tēira viña. <sup>38</sup> Uva ricuer piasu rumo yamondora mbahe pিরer piasu pipe. <sup>39</sup> Iyavei ndipoi eté que ava oihu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

## 6

### *Jesús remimbohe oipoho trigo mbituhusa ari pipe yuvireco*

<sup>1</sup> Ñepeí mbituhusa ari pipe Jesús viroguata güemimbohe mbahe miti pāhu rupi. Semimbohe evocoyase oipoho-poho yuviraso trigo rāhi. Ipare oyequii opo pipe sāhi yuvireco igua. <sup>2</sup> Evocoyase fariseo osepiase, aipo ehi yuvireco semimbohe eta upe:

—¡Mahera peporaviquiño tēi co mbituhusa ari pipe peico! —ehi.

<sup>3</sup> Jesús rumo omboyevi chupe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. <sup>4</sup> Ahe niha oique ité Tūpa rēta pipe, opoco pan imboeteipri Tūpa upendar rese evocoi pahí upe güeraño ipotasa vahe ihu āgua yepi. Ahe rumo ohu, ondugüer tohu avei omondo —ehi.

<sup>5</sup> Iyavei aipo ehi chupe:

—Ava Riquehir mbituhusa ari rerecuar ité secói —ehi fariseo upe.

### *Jesús ombogüera mbia ipo nomii vahe*

<sup>6</sup> Ambuae mbituhusa ari pipe, Jesús oique judío tūparo pipe oporombohe oico. Aheve mbia yasu coti ipo nomii vahe secói. <sup>7</sup> Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pīha co mbia mbituhusa ari pipe?’ oya; ‘yaiñehengapo angahu’ oyapave tēi yuvireco. <sup>8</sup> Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epūha cohave terehā ava pāhuve —ehi.

Ahe mbia evocoyase opūha, opita aheve ohā <sup>9</sup> Ahese Jesús oporandu ahe ava upe:

—Aporandura mbahe rese pēu —ehi—. ¿Mbahe vo yaposara mbituhusa ari pipe yepi, mbahe tupri pīha, anise mbahe naporai vahe tie? ¿Yaiپیsiro pīha ava recocer; yamocañi uca tēi tie? —ehi.

<sup>10</sup> Evocoyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoyase oichoho oyiva; evocoyase ipo ocuera tupri ité. <sup>11</sup> Evocoyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pīha imomara āgua?’ oya.

### *Jesús oiporavo doce tupri güemimboherā*

<sup>12</sup> Ahe ari rupi Jesús oso ivitrive, oyerure pītu momba tupri Vu upe oico. <sup>13</sup> Cōhese, “Perío” ehi güemimbohe eta upe. Ipāhu sui oiporavo doce tupri, ahe chupe, “Apóstol” ehi. <sup>14</sup> Co ahe yuvirecoi: Simón, ahe acói Pedro avei serer; Andrés Simón rivri; Santiago, Juan, Felipe, iyavei Bartolomé; <sup>15</sup> Mateo, Tomás, Santiago Alfeo rahir; Simón, ava güecua rese secatēhi vahe pāhu pendarer; <sup>16</sup> Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

*Jesús ombohe ava rehii*

<sup>17</sup> Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava êgüe ehi iñehe rendu potasave yuvireco ‘tayande mbogüeramí tēi yande mbaherasisa sui’ oyapave yuvireco. <sup>18</sup> Acoi espíritu naporai vahe remimombaraisu avei ocuera tupri yuvireco. <sup>19</sup> Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pīratasa pipe oico.

*Ava sorivete vahe iyavei ava ndoyembovihai vahe*

<sup>20</sup> Ipare omahe Jesús güemimbohe rese aipo ehi chupe:  
“Perorivete catu pe iparaisu vahe. Esepia niha, Tūpa mborerecuasa pēu nara ité seci.

<sup>21</sup> “Perorivete catu cūríteindar ndasiepoi vahe. Esepia niha, pehītarora peico curi.

“Perorivete catu pe acoi ava cūrítei oyaseho vahe. Esepia niha, peviharetera coiye peico.

<sup>22</sup> “Perorivete catu pe acoi ava pe amotarēhise, pe mboyepipiñose avei oyesui yuvireco, iñehe-ñehe tēise yuvireco pēu pe amotarēhisave, iyavei acoi viroīrose pe rer mbahe tēi pipe che, Ava Riquehir, recocuer sui tēi yuvireco. <sup>23</sup> Peyembovihaiño iyavei perorivete catuñora ahe ari pipe peico. Esepia niha, ipare peipisira porerecosa tuvichá vahe ivave. Êgüe ehi tupri avei evocoi ava ramoi aracahendar mara-mara tēi Tūpa ñehe mombehúsar sereco yuvireco” ehi.

<sup>24</sup> “¡Peparaisu catu rumo cūrítei mbahe yar peico vahe! ¡Esepia niha, pemboaviye pe rivetesa peico!

<sup>25</sup> “¡Peparaisu catu acoi pe ihītaro vahe cūrítei! ¡Esepia niha, ndaperiepoi chira peico coiye!

“¡Peparaisu catu acoi peviha vahe pe pietase cūrítei! ¡Esepia, peyasehora pe viharēhisa pipe peico coiye!

<sup>26</sup> “¡Peparaisu catu acoi peipisi vahe pe mboeteisa opacatu co ivi pipendar ava tēi sui! ¡Esepia niha, êgüe ehi tupri tamoi Tūpa ñehe mombehúsar angahu tēi vahe upe yuvireco aracahe!” ehi.

*Iyacatu yasaisu yande amotarēhimbar*

<sup>27</sup> “Pe che ñehe rese peyapisaca vahe upe rumo aipo ahe: Pesaisu ava pe amotarēhimbar; peyapo tupri mbahe aviye vahe ava nape ambotai vahe upe. <sup>28</sup> Peporandu Tūpa porovasasa rese ava pēu iñehe-ñehe tēi vahe upe nara; peyure Tūpa upe pēu mbahe tēi oyapo vahe recocuer rese. <sup>29</sup> Acoi que pe amotarēhimbar pe rovetese, co cotindar avei pemoporēhiñora chupe. Iyavei acoi que ava virocuaño tēise pe yeasa pe sui, toviraso avei pe yemondesa güemimbotar rupi” ehi. <sup>30</sup> “Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira pēu imboyevi āgua rese. <sup>31</sup> Acoi mbahe peipota vahe ambuae ava oyapo vaherã pēu, ahe tupri avei peyapora chupe.

<sup>32</sup> “Acoi ava pe raisupar güeraño pesaisu catu tēise, ndipoi eté mbahe aviye vahe ipipe. Esepia niha, ava naporai vahe êgüe ehi yuvireco yepi. <sup>33</sup> Anise, acoi ava mbahe tupri ai oyapo vahe pēu, chupe güeraño mbahe

tupri peyapose, ¿mbahe vo evocoyase oime aviye vahe ipipe? Esepia niha, ava angaipa viyar avei ěgüe ehi yuvireco yepi. <sup>34</sup> Acoi pemondoño tēise mbahe ava upe ‘tomboyevi mbahe cheu’ pe hesave, ¿mbahe vo evocoyase oime aviye vahe ipipe? Esepia niha, ava angaipa viyar ěgüe ehi avei yuvireco. <sup>35</sup> Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasāroño rane mbahe cheu imboyevi āgua vichico’ ndapeyei chiterera. Ahese oimera porerecosa aviye catu vahe pēu. Pe evocoyase Tūpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. <sup>36</sup> Pe peporoparaisuereco inungar pe Ru Tūpa oporoparaisuereco yepi” ehi.

*Ndiyai ambuae ava seroĩrosa*

<sup>37</sup> “Ndiyai, ‘Oyavi ité mbahe’ peye voiño tēi ambuae ava upe. Evocoyase Tūpa, ‘Oyavi mbahe’ ndehi chira pēu. Pemocañi uca tēi eme ambuae ava. Evocoyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu. <sup>38</sup> Pemondose mbahe ava upe, evocoyase Tūpa omondoño itera mbahe aviye vahe pēu inungarra omondo pe mbahe riru pipe pēu sāhambri tupri aviye vahe viña. ěgüe ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

<sup>39</sup> Ipare Jesús omombehu co ambuae porombohesa: “¿Oicatu pīha ñepeí ndasesapisoi vahe ambuae ndasesapisoi vahe reroguata? ¡Aní eté! Esepia, oyoya voi ovīapira que ivicuar pipe yuvireco viña. <sup>40</sup> Ñepeí yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

<sup>41</sup> “¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara. <sup>42</sup> Ndiyai pēu, ‘Che toropitivi mbahe nde rembiavi rese’ peye vahe rā chupe. Esepia, pe peyavi guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

*Ava recocuer icuasa sembiapo rese*

<sup>43-44</sup> “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sāchi ati vahe sui higuera ha, iyavei ndahipohosai uva, yu pāhu sui. <sup>45</sup> ěgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opīha pipe yepi. Iyavei acoi ava ndaseco pōrai vahe oyapo mbahe tēi. Esepia niha, ahe vireco mbahe tēi eté opīha pipe yepi. Esepia niha, pe pīha pipe sui tēi osē pe ñehe āgua” ehi.

*Ava oyemoviracua vahe iyavei ndoyemoviracuai vahe Jesús reroyasave*

<sup>46</sup> “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu? <sup>47</sup> Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu: <sup>48</sup> ahe inungar tupri ité acoi ava oyapo vahe güētara ita harive yepi. Yipindar rumo oyoho picucu rane ité ita harive imopuha āgua. Yepe ahe oi upe oyepota tēi ivitu ai, amarusu reseve oinupa pīrata tēi, nomboyerocuai eté rumo. Esepia niha, vireco ité ovīracuasa. <sup>49</sup> Acoi ava che ñehengagüer rese ndoyapisacai



vahe rumo, ahe ndoyavii acoi ava oyapo vahe güētara ivi cuhi harive tēi, ndovirecoi eté ovīracuasa. Ipape amar, ivitu ai reseve oinupa pīratá, opaño omonduru; ocañi tēi eté evocoyase” ehi Jesús ava mbohe.

## 7

*Jesús ombogüera chīhivahe sundao rerecuar Roma iguar remimboacua*

<sup>1</sup> Jesús oñehapase ava upe oico, oso Capernaum ve. <sup>2</sup> Ahe tecua pipe sundao rerecuar ndaheí vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. <sup>3</sup> Jesús rerācua anduse rumo, oyocuai moviro tēi omboripar judío imboeteipri chupe iñehe āgua ‘toumi tēi che remimboacua mbogüera’ oyapave. <sup>4</sup> Ahe judío evocoyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi tēira mbahe icatupri vahe chupe viña. <sup>5</sup> Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

<sup>6</sup> Evocoyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omboripar chupe. Imboripar evocoyase omombehu iñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rēta pipe nde reique āgua. <sup>7</sup> Sese niha che teieté ndasoi nde reca. Nde ñehe pipe tēi rumo che remimboacua erembogüerara. <sup>8</sup> Esepia, che avei niha areco che cuaita. Iyavei areco sundao che voya. Eso peve, ahese ñepeí upe, ahe evocoyase oso voi eté; ambuae upe: Erio, ahese, ou voño ité cheu. Ipape, Ereyapora co mbahe, ahese che rembiguai upe, ahe evocoyase che reroyaño voi’ ehi ore mboripar” ehi Jesús upe yuvireco.

<sup>9</sup> Aipo oyeupe hese Jesús, “¡Too!” ehi. Ipape aipo ehi vupindareta upe: —Supi eté ndasepiai vahe ité co mbia che reroya tupri vahe nungar judío eta pāhuve —ehi.

<sup>10</sup> Yuviroyevipase sundao rerecuar mboripar sētave yuvireco, aheve osepia evocoi semimboacua yuvireco ocuera tuprise.

*Jesús ombogüerayevi cuña imer mano vahecuer membri cuimbahe*

<sup>11</sup> Ipape voi Jesús oso tecua Naín ve, iyavei semimbohe yuvirasoño ité supi ava rehii reseve avei no. <sup>12</sup> Virovise tecua oso, osepia tehögüer ava virocuase yuvireco ñoti āgua. Ahe cuña imer mano vahecuer membri ñepeí vahe ité viña. Tecua pipendar setá iteanga ava yuviraso supi. <sup>13</sup> Cuña repiase rumo, oiparaisuereco. Ipape aipo ehi chupe:

—Ereyaseho eme —ehi.

<sup>14</sup> Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipape aipo ehi tehögüer upe:

—Mbia chīhivahe, che aipo ahe ndeu: ¡Eñarapuha! —ehi.

<sup>15</sup> Evocoyase omano vahecuer oñarapuha oñ iyavei oñehe no. Ichui Jesús omondo ichi upe. <sup>16</sup> Opacatu tupri ité ava oyembosiquiye sepiase yuvireco:

—Cūrítei oyemboyecua Tūpa ñehe mombehusar seco ivate vahe yande pāhuve cute —ehi yuvireco.

Iyavei,

—Tūpa niha ou güecua pītivii āgua oico —ehi avei yuvireco.

17 Ipape co Jesús rerãcua yandusa opacatu Judea rupi, yivirindar rupi avei no.

*Juan Oporoãpiramo vahe omondo vupindar Jesús recocuer cua uca água*

18 Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe. 19 Evocoiyase omondo ñuvirío vupindar Jesús upe mbahe rese porandu água ‘¿nde ité vo Tũpa Rembiporavo aipo sãrombri ereico, anise oime tie ambuae orosãro vaherã?’ oyapave. 20 Evocoiyase oyepota yuviraso Jesús upe aipo ehi yuvireco chupe:

—Juan Oporoãpiramo vahe ore mbou ndeu co mbahe rese porandu água: ¿Nde ité vo Tũpa Rembiporavo ereico imombehupri ereyu vaherã, anise ambuae pĩha orosãrora oroico? —ehi yuvireco chupe.

21 Ahe arĩ pipeve voi Jesús ombogüera setá ava imbaherasisa sui oico, ava carugar rerecosar sui avei no. Iyavei ava ndasesapisoi vahe setá ombogüera. 22 Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei psendu vahe: “Ndasesapisoi vahe osareco tupri cūrítei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehupa pĩsirosa resendar ñehesa” peyera chupe. 23 ¡Oviharetera acoi ava oyeroyaño vahe che rese! —ehi Juan rupindar upe.

24 Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porẽhisave, capihiata ivitu ombova-mbova vahe nungar pĩha? 25 Anise, ¿pesepia tie iturucuar porañete ai vahe iyemboeteise? Ëgüe ehi vahe rumo secoi mborerecuar guasu guapisave yepi. 26 ¿‘Mara ehi secocuer’ peye vo chupe? ¿Tũpa ñehhe mombehugar ité pĩha? Ahe ité, iyavei evocoi niha ivate catu vahe Tũpa ñehhe mombehugar sui. 27 Ahe chupe ité Tũpa icuachiapri arachendar pipe aipo ehi:

‘Amondora che ñehhe mombehugar nde renondeva nde raperã moingatu água’ ehi.

28 Aracahe suive ndipoi eté ivate catu vahe Juan sui. Yepe ahe ivate catu vahe viña, Tũpa mborerecuasave rumo ava seco mbegüemi catu vahe ivate catu ichui.

29 “Co iñehhe renduse opacatu ava, opacatu guarepochi rerocuarar yuvirecoi vahe avei oñeapiramo uca vahecuer Juan upe yuvireco: ‘Supi eté Tũpa aviye vahe ité’ ehi eté yuvireco cute. 30 Fariseo eta rumo iyavei Moisés porocuaíta rese oporombohe vahe ahe noñeapiramo uca potai vahe Juan upe yuvireco, ahe viroĩroño Tũpa remimbotar oyeupendar yuvireco.

31 “¿Mbahe rese pĩha amboyoyara ava recocuer cūríteindar? ¿Mara ehi pĩha secocuer? 32 Ahe inungar chĩhivahe iguayi tẽi vahe ocar rupi. Ipape oñehhe pucu-pucu omboripar upe yuvireco aipo ehi: ‘Oromoñehhe tẽi mimbĩ pẽu, ndapepivoi eté rumo; iyavei orosapucaĩ tẽi sapucaisa viharẽhisa resendar pẽu, ndapeyasehoi avei’ ehi. 33 Esepia, ou Juan Oporoãpiramo vahe oico. Ahe ndohui vahe pan iyavei ndoihui vahe uva ricuer. Pe evocoiyase, ‘Co mbia carugar vireco vahe’ peye tupri tẽi chupe no. 34 Coiye che ayu, Ava Riquehĩ, acaru iyavei aihu tupri avei. Ipape, ‘Co mbia icaru guasu ai vahe secoi, iihu guasu ai vahe avei no’ peye

cheu; ‘Ava angaipa viyar mboripar tēi iyavei ava guarepochi rero cuasar mboripar tēi’ peye avei cheu. <sup>35</sup> Ava Tūpa mbahecuasa vireco vahe rumo icuasara sembiapo rese” ehi.

*Fariseo Simón serer vahe rētave Jesús secoi*

<sup>36</sup> Fariseo Simón serer vahe oñehe Jesús upe: “Terecarumi che pirí” ehi. Jesús evocoyase oso sētave oguapí oĩ mesave. <sup>37</sup> Ahese cuña angaipa viyar evocoi tecua pendar secoi vahe oyandu ichose Simón rētave icaru āgua. Sese viroyepota aheve mbahe sñacua vahe siru pipe seraso sepirusu vahe chupe. <sup>38</sup> Aheve oyasehó ite oñenopiha Jesús pive iyavei güesai pipe opa tupri omoaqui ipi. Ipare opaño omombiru oha apri pipe ichui, iyavei oipirupite, oipiyere avei mbahe sñacua vahe ipi rese. <sup>39</sup> Sepiase fariseo, ipihañemoñeta tēi: “Co mbia Tūpa ñehe mombaheusar itese, oicuaño itera co cuña opoco vahe oyese ndipihai vahe viña” ehi tēi fariseo chupe. <sup>40</sup> Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

<sup>41</sup> Evocoyase Jesús aipo ehi chupe:

—Ñuvirío mbia oime vırocua guarepochi mbia guarepochi mondosar sui yuvireco. Ñepeı vırocua guarepochi quiniento tupri mboraviqui repirā ichui. Ambuae evocoyase cincuenta rupive vırocua. <sup>42</sup> Ipare ndoicatu irise ité imboyeıvı āgua yuvireco chupe, evocoi mbia guarepochi mondosar iñeroño chupe yuvireco —ehi—. Esāha, emombehu cheu, ¿uma evocoyase osaisu catura mbia guarepochi mondosar? —ehi fariseo upe.

<sup>43</sup> —Cheu ndoyavı guarepochi vırocua catu vahe ichui —ehi Simón.

—Taa, supı eté aipo ere —ehi Simón upe.

<sup>44</sup> Evocoyase omahe cuña rese aipo ehi Simón upe:

—ıEmahe co cuña rese! Aiquese acoi nde rēta pipe, nde nderembouimi eté i che piseı āgua cheu; co cuña rumo güesai pipe oyoseı che pi. Ipare omombiru oha apri pipe ae no. <sup>45</sup> Iyaveı nde ndache rovarupıteı eve; co cuña rumo, acoi nde rēta pipe che reique ramomiseve che pirupite voi eté.

<sup>46</sup> “Nde nderemondoı mbahe sñacua vahe che āca rese; co cuña rumo opa tupri voi oipichi mbahe sñacua vahe che pi rese. <sup>47</sup> Sese co cuña opa oipısi ñerosa oangaipa guasu rese. Esepia, che raisú iteanga. Acoı ava upe nañerosa tuprıı vahe rumo, ahe ndoporoaisu tuprıı aveı” ehi.

<sup>48</sup> Ahese aipo ehi cuña upe:

—Oime nde angaipa upe ñerosa ndeu —ehi.

<sup>49</sup> Evocoyase ambuae ava ichohopri oguapı vahe yuvınoi aheve, ahe aipo ehi oyeupe yuvireco:

—ıUma pıha co mbia iñero vahe ité angaipa upe! —ehi.

<sup>50</sup> Jesús rumo aipo ehiño cuña upe:

—Nde yeroyasa pipe ereipısi pısirosa. Sese eso tuprıño eico —ehi.

## 8

*Cuña oipııııı vahe Jesús yuvireco*

<sup>1</sup> Ipare Jesús oguata opacatu tecua rupı, omombehu ñehesa aviye vahe Tūpa mborerecuasa resendar oico. Doce vahe apóstol supıve yuvirecoı. <sup>2</sup> Cuña aveı yuvıraso supı, ahe ombogüera vahecuer caruguar rerecosa sui imbaherasısa sui aveı no. Ahe ipāhuve aveı María secoı, Magdalena

serer yoapisa vahe, ahe ichui osē vahecuer siete tupri carugar; <sup>3</sup> iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipitívii mbahe güembireco pipe yuvireco.

*Yembohesa mbahe miti rese tecocuer mboyoyasa*

<sup>4</sup> Setá ava yuvínose tecua yacatu rupi pipe sui Jesús repia água yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi: <sup>5</sup> “Ñepeí mbia osē omaheti oico. Ahe otiapí-apíise mbahe rāhii oso, moviro oiti perí rupi. Ahe opa tēi oicambe yuvireco, iyavei vírai opa tēi yuvirohu. <sup>6</sup> Iyavei moviro tēi oiti ivi nayanai vahesave ita pāhuve. Sese cūrítei sorí; opaño rumo ipiru. Esepia niha, ivi nañaquii chupe. <sup>7</sup> Iyavei ambuae oiti yu pāhuve. Ipare oyoya tupri sorí yuvireco; yu rumo opaño oyopi. <sup>8</sup> Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepeí-peí mbahe miti sui osē” ehi.

Aipo ohe pare, Jesús oñehe pīratá iteanga aipo ehi: “¡Acoi ava osenducua pota vahe che ñehe, toyapísacaño sese!” ehi ava rehii upe.

*¿Mahera pīha co yembohesa imboyoyasa ambuae mbahe rese?*

<sup>9</sup> Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. <sup>10</sup> Evocoyase omboyeví chupe: “Pēu Tūpa oicua uca ité mbahe ndicuasai vahe omborerecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

*Jesús omombehu tupri yembohesa mbahe tisa resendar*

<sup>11</sup> “Co yembohesa resendar aipo oyapave aipo ehi: Mbahe rāhii ahe inungar Tūpa Ñehengagüer; <sup>12</sup> iyavei mbahe rāhii perí rupi seitipri, ahe inungar acoi ava osendu tēi vahe Tūpa Ñehengagüer yuvireco oyapave. Ipare rumo ou vírai chupe, ahe inungar carugar ou vahe chupe opaño oyaracua mocañi Tūpa Ñehengagüer sui ‘toviroya eme iyavei toñepisiro eme yuvireco’ oyapave tēi. <sup>13</sup> Acoi mbahe rāhii seitipri ita mahugüer rupi, ahe inungar acoi ava osendu tēi vahe Tūpa Ñehengagüer yuvireco iyavei oipisi tupri oviharetesa pipe yuvireco viña no. Ahe rumo inungar co mbahe miti ndovirecoi vahe guapo ovīracua água; viroya raimi tēi yuvireco. Oyepotase rumo mbahe tēi chupe, oyepépi voiño yuvireco ichui. <sup>14</sup> Acoi mbahe rāhii seitipri yu pāhu rupi, ahe inungar acoi osendu tēi vahe. Ipare rumo oyemboyepepi uca mbegüeño ambuae mbahe rese opīhañemoñetá iteangasa pipe tēi, ombahe eta rese iyavei güemimbotarai mbahe tēi potasa pipe avei. Ēgüe ehi ahe ava inungar mbahe miti ndihai vahe ité. <sup>15</sup> Acoi mbahe rāhii seitipri rumo ivi aviye vahesave, ahe inungar ava vireco vahe opīhañemoñetasa aviye vahe iyavei oyemoin-gatu voi Tūpa Ñehengagüer rese oyapísaca água yepi; viroya tupri ité no; yuvirecoiño ité sese. Ēgüe ehise, oyapo mbahe aviye vahe yuvireco” ehi.

*Yembohesa tataendi resendar*

<sup>16</sup> “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape água. <sup>17</sup> Esepia, ndipoi eté mbahe

ñomipri, ndayasepiai vaherã curi. Iyavei yaposa vahe imombehupirêhi, icuasaño itera curi.

<sup>18</sup> “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocusaño itera” ehi oporombohe.

*Jesús sí, tivireta avei*

<sup>19</sup> Ichui Jesús sí iyavei tivireta oyepota secosave yuviraso. Ndiyai eté rumo chupe yuviraso vaherã yuvireco ava rehii sui. <sup>20</sup> Oime rumo ambuae ava imombehusar chupe,

—Nde sí, nde rivireta reseve nde repia pota tēi ocarve yuvireco —ehi chupe.

<sup>21</sup> Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che sí, che rivri yuvirecoi —ehiño Jesús chupe.

*Jesús omombituhu i ohitu vahe, ivitu ai reseve*

<sup>22</sup> Ñepai ari Jesús oha carite pipe güemimbohe eta reseve. Ipare aipo ehi: —Yaso peve ipa rovai —ehi.

Evocoyase ahe yuviraso. <sup>23</sup> Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guasu carite pipe i, omondo pota ité ipive viña. <sup>24</sup> Evocoyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pĩrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri. <sup>25</sup> Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe pĩha co mbia! Esepia niha, ivitu ai, para guasu avei omboyeroya —ehi tēi oyeupe yuvireco.

*Mbia Gerasa iguar vireco vahe carugar oyese*

<sup>26</sup> Coiye oyepota yuviraso Gerasa ivi rese cute, ahe ambuae ipa coti ivi Galilea rovai. <sup>27-29</sup> Aheve mbia tecua iguar carugar vireco vahe secoi. Aracahe suive nani tupri ité secoi iyavei ndopitai vahe ité oi pipe yepi; ěgüe ehi rumo ahe tehögüer ruvipa rupindar tēi secoi. Setá rupi carugar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ité iyavei carugar omoñemi ucaño ava porêhisa rupi sereco. Evocoyase Jesús osêse carite pipe sui, osovaichi ahe mbia. Sepiase rumo, ahe mbia oñenopiha voi oso sovai oñehe pĩrata chupe:

—¡Eyepepi che sui, Jesús, Tũpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai carugar sereco ‘tosê ichui’ oyapave.

<sup>30</sup> —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri carugar yuviroique yaviterve. <sup>31-32</sup> Oimese rumo cuchí setá ocaru vahe ivitri ruambesave, carugar

evocoyase oporandu chupe aipo ehi: “Toroiqueñomi tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pipe’ oyapave viña. “Peiqueño sese” ehi carugar upe. <sup>33</sup> Ahese opa yuvinose mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pipe. Aheve ipive opa tēi eté ocañi yuvireco.

<sup>34</sup> Cuchi rārosar osepiase ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no. <sup>35</sup> Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepia ahe mbia carugar rerecosarer oguapi oñipiimi, oyemonde tupri, yaracua tupri avei oico. Ahese oyembosiquiye tēi yuvireco. <sup>36</sup> Acoi ava osepia vahecuer, ahe opa mbahe omombehu yuvireco co mbia carugar rerecosar cuera agüer. <sup>37</sup> Ahese opacatu ava Gerasa pendar, yivirindar avei Jesús upe, “Esiri cohave sui” ehi yuvireco. Esepia niha, osiquiyé iteanga yuvireco ichui. Evocoyase oha carite pipe. Ipare osoño. <sup>38</sup> Yipindar rumo evocoi mbia carugar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

<sup>39</sup>—Eyevi nde rētake, emombehupa opacatu mbahe Tüpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

*Jesús ombogüera Jairo rayri iyavei cuña iturucuar rese opoco vahe*

<sup>40</sup> Oyevisé Jesús ipa rovai oso, aheve ava rehi oviharetesa pipe oipisi tupri yuvireco. Esepia niha, ava opacatu ité osāro yuvireco. <sup>41</sup> Ahese Jairo serer vahe oyepota oso Jesús upe, evocoi judío tūparo rese yangarecuar secói vahe. Ahe mbia oñenopiha sovai oso, oporandu chupe ‘tosomi tēi che rētake che rayri mbogüera’ oyapave. <sup>42</sup> Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rētake, aheve peri rupi ava rehi yuvirasoño supi; oyemboti tupri ité yuvireco. <sup>43</sup> Ahe ipāhu rupi oime cuña doce araviter rupi suvi yepiyere-yere vahe. Opa-opa tēi omondo ombahe ocuera āgua repirā yepi; ndocuerai eté rumo. <sup>44</sup> Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui. <sup>45</sup> Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Porombohesar, ava rehi mo oyemboya nde rese iyavei nde moañi-añi yuvireco opacatu rupi —ehi.

<sup>46</sup>—Che rumo aicua oime ava opoco vahe che turucuar rese. Esepia, ayandu che pīratasa osēse che sui —ehi Pedro upe.

<sup>47</sup> Ahe cuña ndoicatui oñemi. Sese oriri oñenopiha sovai. Oye-mombehu chupe opacatu ava rovaque: “Che apoco nde turucuar rese. Esepia, ‘Acuera tuprira apocose iturucuar rese’ ahe ndeu” ehi. <sup>48</sup> Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

<sup>49</sup> Jesús ñehe viteseve, ahese oyepota aheve mbia Jairo rēta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

<sup>50</sup> Evocoyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

<sup>51</sup> Oyepotase Jairo rētave oso, aheve ndomougue uca potai eté ava oyeupi. Pedro, Santiago, Juan iyavei cuñatai yesupa upeño oipota seique āgua. <sup>52</sup> Aheseve opacatu ava oyaseho ati, ndoyembovhai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

<sup>53</sup> Ava rumo opuca ete-eteño seroyaēhisave yuvireco. Esepia niha, ahe oicua ité imanose yuvireco viña. <sup>54</sup> Evocoyase oipopi cuñatai. Ipare aipo ehi chupe:

—¡Cuñatai, eñarapuha! —ehi.

<sup>55</sup> Ahe evocoyase oñarapuha voi eté ocuerayevi. Ipare Jesús, “Pembocarú” ehi iyepa upe. <sup>56</sup> Iyepa evocoyase, “¿Mara ehi rutei pñha co?” ehi tēi yuvireco chupe. Jesús rumo omombehu chupe: “Ndapemombehu chietera que ñepeí ava upe” ehi.

## 9

*Jesús doce güemimbohe omondo Vu Tūpa mborerecuasa resendar mombehu āgua*

<sup>1</sup> Jesús opa omonuha güemimbohe doce vahe oyeupe. Ipare omondo opīratasa opacatu upe caruguar ambuae-ae tēi vahe imboyepepi āgua ava sui iyavei ava mbogüera āgua imbaherasisa sui. <sup>2</sup> Opa omondo Vu Tūpa mborerecuasa resendar mombehu āgua, ava imbaheasi vahe mbogüera āgua avei. <sup>3</sup> Yipindar rumo aipo ehi chupe:

—Ndaperasoí chira mbahe pe guatasa rupi: que mbococa, mbahe riru, tembihu, que guarepochi avei no. Perasora rumo ñepeí güeraño pe turucuar; ndahei chira ñuvirío peraso. <sup>4</sup> Pepitami ranera ñepeí oi pipe güeraño tecua yacatu peico. <sup>5</sup> Acoi ava ndape moingue uca potaise güeta pipe yuvireco, peyepepiñora ichui iyavei peipipetera pe pi sui ivi cuhi ‘toicua Tūpa ñemoirosa oyeupendar yuvireco’ pe hesave —ehi güemimbohe eta mondo.

<sup>6</sup> Evocoyase opa yuvinose yuviraso, iyavei oñemosai opacatu tecua rupi omombehu Tūpa Ñehengagüer písirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

*Herodes, “¿Mara ehi pñha?” ehi Jesús upe*

<sup>7</sup> Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pñha?” ehi tēi. Esepia niha, aipo, “Juan ocuerayevi” ehi yuvireco chupe. <sup>8</sup> Ambuae aipo ehi: “Tūpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepeí Tūpa ñehe mombehusar aracahendar revo, ahe tēi ocuerayevi” ehi yuvireco viña. <sup>9</sup> Herodes rumo aipo ehi:

—Che niha ayasia uca Juan āca —ehi—. ¿Uma rerācua pñha evocoyase ayandu? —ehi tēi.

Sese Herodes osepia pota ité Jesús.

*Jesús oyopoi cinco mil cuimbahe*

<sup>10</sup> Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehi sui, viraso ivi iporupirêhisave tecua Betsaida cotive. <sup>11</sup> Ahe ava rehi rumo oyanduse yuvireco, yuvirasoña saquicuei. Evocoyase, “Perioño” ehi chupe. Ipare oñehe Vu Tûpa mborerecuasa rese ava upe iyavei ombogüerapa ava imbaherasisa sui.

<sup>12</sup> Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cõi vahesa rupi? Esepia niha, cohave ndipoi eté mbahe —ehi yuvireco chupe.

<sup>13</sup> Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tõi rumo pan orovireco, ñuviriomi tõi avei pira, toroso ayase co ava opacatu remihura rerocua —ehi yuvireco chupe.

<sup>14</sup> Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

<sup>15</sup> Ëgüe ehi semimbohe yuvireco chupe. Ipare oguapi opacatu ava yuvireco. <sup>16</sup> Evocoyase oipisi poyandepo pan iyavei ñuvirio pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehi upe imondo água yuvireco. <sup>17</sup> Evocoyase opacatu ava ocaru vahe ihitaropa tõi yuvireco. Ipare semimbohe omboapipopa doce tupri iruova sembihu rumbirer yuvireco.

*Pedro, “Jesús, Tûpa Rembiporavo Poropĩsirosar secoi” ehi*

<sup>18</sup> Ñepe ari pipe Jesús oyoerqui ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

<sup>19</sup> —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tûpa ñehe mombehusar arachendar ocuerayevi” ehi yuvireco ndeu —ehi.

<sup>20</sup> Evocoyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tûpa Rembiporavo Poropĩsirosar ereico —ehi Pedro imboyeve chupe.

*Jesús omombehu omano água*

<sup>21</sup> Ahe rumo aipo ehi güemimbohe eta upe: “Pemombehui rene Tûpa Rembiporavo che recosa ava upe” ehi. <sup>22</sup> Iyavei aipo ehi chupe:

—Che, Ava Riquehi, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaite rese oporombohe vahe remiamotarêhi aicora. Ahe avei che yuca ucara yuvireco; mbosapi ari rupi rumo acuerayevira —ehi.

<sup>23</sup> Ipare aipo ehi opacatu upe:

—Acoi uguata pota vahe che rupi, topoi mbahe güemimbotar tõi aposa sui iyavei inungar-ra curusu rese ovosira viña, toyemoingatu voi che recocuer rese oparaisu água ari yacatu rupi iyavei toguata tupri che



rupi. <sup>24</sup> Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisirora. <sup>25</sup> Esepia, ¿aviye ai angahu pīha ava upe opacatu mbahe co ivi pipendar pisi āgua tēi, ahe ae tēi omocañise güecocuer yuvireco viña? <sup>26</sup> Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ēgüe ahera ichui acoi ayevise che reco pīratasa pipe, che Ru reco pīrata porañetesa pipe avei sembiguai rehii iva pendar maranehi reseve curi. <sup>27</sup> Supi eté, oimera amove cohava ava nomano vitei chivaherā, osepia rane itera ouse Tūpa mborerecuasa yuvireco curi —ehi.

*Jesús ñecuñaro agüer*

<sup>28</sup> Ocho ari pare Jesús oyeupi ivitri rese oso oyerure āgua. Pedro, Santiago iyavei Juan ahe viraso oyeupi. <sup>29</sup> Oyerure viteseve, oñecuñaro sepiaca. Iturucuar evocoyase sendi, morochí eteanga. <sup>30</sup> Ahese ñuvirío ava oyemboyecua yivii imoñeta yuvinocha. Evocoi ava yuvirecoi vahe ahe Moisés, Elías avei. <sup>31</sup> Oyere tupri sendigüer iporañetesa yuvireco sese, iyavei co ñuvirío mbia oñehe imano āgua rese yuvireco chupe: “Nde niha ereyemomborarara nde mano āgua Jerusalén pipe eico” ehi yuvireco chupe. <sup>32</sup> Yepe Pedro, ondugüer reseve sopesii eteanga yuvireco viña. Aviyeteramo tēi opa sopesii yuvireco ichui. Ahese osepia Jesús porañetesa yuvireco iyavei co ñuvirío mbia yuvinocha vahe yivii no. <sup>33</sup> Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepi ndeu nara, ambuae Moisés upe, ambuae evocoyase Elías upe nara —ehi.

Pedro rumo ndoicuai eté aipo ohesa. <sup>34</sup> Iyavei iñehe viteseve, aviyeteramo tēi iporēhi iva quiha, oyopipa tupri ité. Evocoyase osiquiye tēi yuvireco. <sup>35</sup> Ipāhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu iñehe rese” ehi.

<sup>36</sup> Opase osendu co ñehesa yuvireco, ahese osepia Jesús, ahe ae ihāise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

*Jesús ombogüera chīhivahe caruguar rerecosar*

<sup>37</sup> Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco. <sup>38</sup> Ahese mbia ava pāhuve aipo ehi pīrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité; <sup>39</sup> caruguar rumo opoco sese, omoase pucu-pucu uca yepi iyavei omoeñha-ñha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. <sup>40</sup> Amombehu tēi niha nde remimbohe upe ‘tomboyepepimi tēi caruguar ichui’ che yapave viña; nomboyepepi eté rumo ichui yuvireco —ehi.

<sup>41</sup> Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pāhuve che ñemosasa pipe? Eru nde rahir cohava cheu —ehi ahe mbia upe.

<sup>42</sup> Chīhivahe oyemboyase rumo sese, caruguar omboviapi voi imondo ivive, imoeñha iri. Jesús rumo oñehe pīrata caruguar upe imose āgua chīhivahe sui. Ahese chīhivahe ocuera tupri ité. Ipare omboyevi tu upe.

<sup>43</sup> Ahese opacatu ava, “¡Mara ehi rutei!” ehi tēi yuvireco Tūpa pīratasa rembiapo avīye vahe repiase.

*Jesús omombehu iri omano āgua*

Opacatu ava ndoyembovihal viteseve yuvireco, ahese aipo ehi güemimbohe upe:

<sup>44</sup> —Pesendu tupri che ñehe; peresarai eme ichui: che, Ava Riquehir, imondopri aicora che amotarēhimbar povrive —ehi.

<sup>45</sup> Semimbohe rumo ndosenducuai eté oyeupe ñehesa yuvireco. Esepia niha, Tūpa ndoiptai eté senducua āgua chupe; osiquiye chupe oporandu āgua yuvireco yepi.

*¿Ava vo seco ivate catu vahe?*

<sup>46</sup> Coiye semimbohe eta omboipi oyeecopi-copi yuvireco ‘¿ava ité pīha ivate catu vaherā curi?’ oyapave. <sup>47</sup> Jesús rumo oicuaño ipihañemoñetasa yuvireco. Evocoyase oipisi chñihvahemi seru oipive imoha. <sup>48</sup> Ipare aipo ehi güemimbohe eta upe:

—Acoi ava oipisi vahe co chñihvahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pāhu pendar, ahe avīye catu vahe —ehi.

*Acoi yande mboyoyasar, ahe ndahei yande amotarēhisar*

<sup>49</sup> Evocoyase Juan aipo ehi chupe:

—Ore mbohesar, orosepia niha mbia ombogüera vahe carugar pīratasa sui ava nde rer pipe oico; ore rumo ndoroiptai chupe evocoiya seco āgua. Esepia niha, ndahei yande rupindar secoi —ehi.

<sup>50</sup> Jesús rumo,

—¡Aní ndapeiptai chupe! —ehi—. Esepia niha, evocoi nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

*Jesús oñhengata Santiago upe, Juan upe avei*

<sup>51</sup> Virovise rumo ari ivave Jesús so āgua, ahese ahe aipo ehi: “Yaso ru Jerusalén ve cūrítei” ehi. <sup>52</sup> Evocoyase omondo ava güenonera. Ahe yuviraso tecua Samaria ivi rupi ipituhu āgua moingatu viña; <sup>53</sup> Samaria iguar rumo nomoingue potai eté güetave yuvireco. Esepia, oicua Jerusalén ve ichose yuvireco. <sup>54</sup> Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi āgua —ehi yuvireco chupe viña.

<sup>55</sup> “¡Aní!” ehi oyemboyere chupe. <sup>56</sup> Ipare yuviraso ambuae tecuave.

*Oguata pota vahe Jesús rupi*

<sup>57</sup> Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

<sup>58</sup> Ahe rumo aipo ehi:

—Aguara vireco güetara, vīrai avei vireco guaiti; che rumo, Ava Riquehir, ndarecoi que che rēta che pituhu āgua —ehi chupe.

<sup>59</sup> Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

<sup>60</sup>—Aní—ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tūpa mborerecuasa resendar ava upe—ehi.

<sup>61</sup> Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rētave mbahe moingatu che so āgua—ehi.

<sup>62</sup>—¡Aní! —ehi ahe mbia upe—. Esepia, inungar acoi oipisi vahe ivi mboyeresas imohivi tupri āgua, omahese rumo guaquicuei coti, evocoi nungar naporai Tūpa mborerecuasave yuviroique vaherā—ehi.

## 10

### *Jesús oyocuai setenta y dos tupri güemimbohe*

<sup>1</sup> Ipare yande Yar oiporavo setenta y dos ava ñepepei tecua rupi ñuvirío-río güenonera.

<sup>2</sup> Yipindar rumo aipo ehi: “Supi eté mbahe imonuhapirā setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha āgua” ehi. <sup>3</sup> “Peso, opomondo ovesami nungar ava mbahe mimba oñaro vahe nungar pāhuve. <sup>4</sup> Peraso rene mbahe riru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. <sup>5</sup> Acoi peiquese que oi pipe, yipindar rumo peyapo ranera: ‘Avirave. Tūpa tape rovasa’ peyera. <sup>6</sup> Acoi aheve oimese ava aviye vahe, ahe oipisira Tūpa porovasasa; anise evocoyase ndipoi chira porovasasa chupe nara. <sup>7</sup> Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rēta rupi-rupi tēi. Ñepepei oi pipe güeraño pepitañora. <sup>8</sup> Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui. <sup>9</sup> Ahe pendar imbaheasi vahe evocoyase pembogüerara, iyavei aipo peyera chupe: ‘Tūpa mborerecuasa namombriimi pe sui’ peyera. <sup>10</sup> Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: <sup>11</sup> ‘¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tūpa mborerecuasa namombriimi pe sui’ peyera chupe. <sup>12</sup> Supi eté acoi arí cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

### *Opacatu tecua ndiporeroyai vahe*

<sup>13</sup> “¡Peparaisu ava tecua Corazín pendar, pe avei peparaisu tecua Bet-saida pendar! Esepia, acoi poromondisa pe pāhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharēhisa resendar, tanimbu avei omondora oāca rese oangaipa mboasisa pipe yuvireco viña no. <sup>14</sup> Pe rumo peipisira ivate catu vahe Tūpa ñemoirosa ava Tiro, Sidón pendar sui arí cañi pipe coye. <sup>15</sup> Pe avei no tecua Capernaum pendar, ¡pemoha co ivave pe reco āgua viña! ¡Pe mombosapara rumo ivicuar ipicucu catu vahesave!

<sup>16</sup> “Acoi ava oyapisaca vahe pe ñehe rese yuvireco, ahe evocoyase oyapisaca avei che ñehe rese. Iyavei acoi ava pe mboyepipiño vahe oyesusi, ahe evocoyase che avei che mboyepipi oyesusi yuvireco. Acoi

ava rumo che mboyepepiño vahe oyesui, ahe evocoyase che mbousar avei omboyepepiño oyesui” ehi güemimbohe upe.

*Oyevipa iri ava setenta y dos vahe*

<sup>17</sup> Oyevipase ava setenta y dos vahe, oviharetsave aipo ehi yuvireco chupe:

—¡Ore Yar, caruguar avei eté niha ore mboyeroya etepri yuvireco nde rer pipe! —ehi.

<sup>18</sup> Evocoyase aipo ehi güemimbohe eta upe:

—Taa, asepia ité niha caruguar rerecur oviapise iva sui overa vahe nungar. <sup>19</sup> Che niha amondo pīratasa pēu peguata vaheṛā mboi iyavei mbahe rumbiquiāpe hari rupi opacatu pe amotarēhisar pīratasa reroyi āgua, que mbahe pe momaraēhi āgua avei. <sup>20</sup> Peyemboviharetei rene caruguareta pe mboyero yase. Iya rumo peyemboviha pe rer iva pendar icuachiapri rese —ehi güemimbohe eta upe.

*Jesús oviharete*

<sup>21</sup> Ahe pipeve voi Jesús, Espíritu Santo rese, vorivetesa pipe aipo ehi: “Che Ru, che oromboetei. Nde niha iva Yar, ivi Yar avei no. Esepia niha, ereñomi co mbahe ava oyesui tēi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tuprii vahe upe nde rese oyeroyase. Ahe niha ereipota ité, che Ru” ehi.

<sup>22</sup> “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

<sup>23</sup> Evocoyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese. <sup>24</sup> Esepia niha, setá etepri ava Tūpa ñehe mombehusar yuvirecoi vahe iyavei mborerecur guasu eta arachendar osepia pota tēi mbahe pe rembiepia; ndosepiaí eté rumo yuvireco. Osendu pota tēi co pe remiendu yuvireco; ahe rumo ndosendui avei yuvireco” ehi güemimbohe upe.

*Jesús porombohesa Samaria iguar recocuer sui*

<sup>25</sup> Iyavei no Tūpa porocuita rese oporombohe vahe oso Jesús upe secoāha āgua, mbahe rese oporandu:

—Porombohesar, ¿mara ahera vo vichico teco apirēhi vahe rereco āgua? —ehi chupe.

<sup>26</sup> Ahe omboyevi:

—¿Mara ehi vo Moisés porocuita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

<sup>27</sup> Evocoyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde pīratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuita —ehi chupe.

<sup>28</sup> —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecovesa apirēhi vahe —ehi co mbia upe.

<sup>29</sup> Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

<sup>30</sup> Evocoyase omboyeve chupe:

—Oime mbia Jerusalén sui oso vahe Jericó ve. Ahe peri rupi yuvínose ava ndipihai vahe yuvireco chupe. Ahe vïrocuapa imbahe yuvireco ichui, iturucuar opacatu reseve; iyavei yuvïrocua-rocuva yuvireco sese. Ipare oyuca seni seya peri rupi yuvïraso. <sup>31</sup> Ahese judío pahi ou ahe peri rupi. Evocoi mbia repiase rumo, co coti rupi oñacuasaño oso. <sup>32</sup> Ëgüe ehi tupri avei ambuae mbia pahi pïtiviisar levita, osepiase, oñacuasa tupriño avei oso no. <sup>33</sup> Ipare rumo mbia sepia potapirēhi Samaria iguar oso ahe peri rupi avei. Ahe osepiase, oiparaisuereco. <sup>34</sup> Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese. <sup>35</sup> Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: “Esáro tuprimi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe. <sup>36</sup> Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

<sup>37</sup> Evocoyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

*Jesús oso Marta iyavei María rētave*

<sup>38</sup> Ipare Jesús güemimbohe eta reseve oguata vite oyepota cuña recosave yuvïraso, ahe cuña rer Marta. Ahe omoingue tupri güēta pipe. <sup>39</sup> Icupihir evocoyase María serer. Ahe oguapi Jesús pive ñehe rendu oī. <sup>40</sup> Marta rumo oyembopihavïracua opacatu mbahe rese oico. Ipare oyemboya oso Jesús rese opihavïracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache pïtivi rane —ehi chupe.

<sup>41</sup> Omboyeve rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo ãgua eico? <sup>42</sup> Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava vïrocua vahe rā ichui —ehi Jesús Marta upe.

## 11

*Jesús ombohe güemimbohe eta yerure ãgua rese*

<sup>1</sup> Ñepe ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure ãgua rese eve inungar Juan ombohe güemimbohe eta sereco yepi —ehi chupe.

<sup>2</sup> —Aviye —ehi—. Peyeroquise, aipo peyera:

‘Ore Ru Tūpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iva pendar nungar.

<sup>3</sup> Embou ore rembihi ari yacatundar oreu.

<sup>4</sup> Iyavei ndeñero ore angaipa rese oreu.

Esepi niha, ore oreñero opacatu ore amotarēhimbar upe.

Ore mboangaipa ucái rene eve, ore renose catu mbahe tēi sui eve’ peyera —ehi

<sup>5</sup> Iyavei aipo ehi no:

—Inungar co perecora pe mboripar viña. Ipape pesora ahe sētave p̄itu mbiter rupi aipo peyera chupe: ‘Che mboripar, emboumi tēi mbosapi pan cheu tamboyevíre ndeu. <sup>6</sup> Esepia, ambuae che mboripar oyepota ou che rētave; ndarecoi eté rumo mbahe amondomi vaheṛā chupe’ peyera chupe. <sup>7</sup> Ipape ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña. <sup>8</sup> Supi eté, yepe nopuhai chietera mbahe mondo pēu pe mboripar secose viña, opūhaño itera rumo ‘tache mañeco iri eme’ oyapave. Ipape omondoño itera opacatu mbahe pe porandusa pēu. <sup>9</sup> Sese aipo ahe pēu: Peporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ěgüe peyera peyeroquisa pipe Tūpa upe, ahese imboisara mbahe mbou āgua pēu. <sup>10</sup> Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerokuva pipe omota vahe oquenda Tūpa upe, chupe imboisara.

<sup>11</sup> “Oimese tahi vahe pe pāhuve, tahir oporanduse pira rese vu upe, ¿omondora p̄iha mboi tēi guahir upe viña? <sup>12</sup> anise, ¿omondora p̄iha oporanduse mbahe rupiha rese, mbahe rumbiquiāpe tēi chupe viña? <sup>13</sup> ¡Aní! Esepia, pe yepe ava ndaseco p̄orai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru ¡va pendar omondo catura Espiritu Santo acoi ava oyeupe porandusar upe!” ehi güemimbohe eta upe.

*“Jesús vireco carugar p̄iratasa oyese” ehi tupri tēi ava yuvireco*

<sup>14</sup> Ambuae ari pipe, Jesús osepia mbia carugar nomoñehengatui vahe. Evocoyase omose carugar ichui. Aheseve voi iñehengatu. Ipape ava rehii sepiase, ndoyembovihal tēi yuvireco. <sup>15</sup> Amove rumo ava aipo ehi tēi yuvireco: “Beelzebú, carugar rerecuar p̄iratasa pipe revo omboyepepi carugar oico” ehi tēi yuvireco chupe.

<sup>16</sup> Ambuae ava secoāhasa pipe oporandu yuvireco chupe: “Eyapo ru mbahe nde rembiapo ¡va pendar nde recocuer cua āgua” ehi tēi. <sup>17</sup> Ahe rumo oicuaño ipihañemoñetas. Evocoyase aipo ehi chupe:

“Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar p̄iratasa ocañi tēira. Iyavei ava omu rese ae oyeamotarēhi vahe, oyemocañi aveira yuvireco no. <sup>18</sup> ěgüe ehi avei niha carugar. Esepia, serecuvar omboyepepise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esepia pe, ‘Beelzebú p̄iratasa pipe tēi opa omose carugar ava sui oico’ peye tēi cheu. <sup>19</sup> ěgüe ahese rumo viña, ¿ava p̄iratasa pipe ru evocoyase pe voya omboyepepi carugar ava sui? Pe voya ae omboyeacara pe ñehe pe rembiavi yuvireco pēu. <sup>20</sup> Che rumo Tūpa p̄iratasa pipe carugar omboyepepi ava sui. Sese cūritei Tūpa mborerecuasa oyepota ité pēu.

<sup>21</sup> “Inungar oime ava ip̄irata etepri vahe, iyavei vireco oyeroyasa. Ipipe osāro güeta opacatu mbahe ip̄ipendar avei icañiēhi āgua. <sup>22</sup> Acoi ouse rumo ambuae ip̄irata catu vahe chupe, ahe osecoreroyise, opa virocua iyeroyasa ichui. Evocoyase güembierocua ahe opa viraso oyeupe.

<sup>23</sup> “Acoi ava ndache mboyoyai vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui” ehi.

*Carugar oyevi iri güeco agüerve*

<sup>24</sup> “Acoi osēse carugar ava sui, uguata tēi ivi ipiru vahe rupi opituhu āgua reca. Ipore rumo ndoyosuisse, ipihañemoñeta oyeupe, ‘Ayevi irira che reco agüerve vicho’ ehi. <sup>25</sup> Aheve oyevice, osepia iri secocuer inungar oi sahuvapri tupri. <sup>26</sup> Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui” ehi Jesús ava rehii upe.

*Tüpa Ñehengagüer viroya vahe sovasapri secoira*

<sup>27</sup> Oñehe viteseve aipo mbahe rese, cuña ava rehii pāhu pendar oñehe pīrata aipo ehi:

—jEvocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

<sup>28</sup> Ahe rumo aipo ehi:

—jAcoi osendu vahe ité che Ru Tüpa Ñehengagüer iyavei viroya vahe ité, ahe sovasapri secoira che Ru Tüpa rovaque! —ehi ahe cuña upe.

*Ava eta ndaseco pōrai vahe oporandu poromondiisa rese yuvireco*

<sup>29</sup> Ava rehii oyere ati vitese Jesús rese yuvireco, ahe aipo ehi: “Pe cūrteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara. <sup>30</sup> Inungar Jonás poromondiisa secoi ava Nínive pendar upe, ēgüe ehi aveira niha Ava Riquehir reco pipe oimera poromondiisa ava cūrteindar upe. <sup>31</sup> Acoi ari cañi pipe cuña mborerecuar guasu irohi coti secua vahe porandusave omombehura co ava cūrteindar cañipa āgua. Esepia, ahe ou amombri ivi sui Salomón mbahecuasa rendu āgua; cūrtei rumo oime ivate catu vahe cohava Salomón sui. <sup>32</sup> Iyavei ari cañi pipe ava tecua Nínive pendar porandusave omombehura ava cūrteindar cañipa āgua. Esepia niha, omboasise oangaipa, oyevi Tüpa upe yuvireco Jonás omombehuse Tüpa Ñehengagüer chupe; cūrtei rumo oime ivate catu vahe Jonás sui pe pāhuve” ehi.

*Tesapesa yande retecuer resendar*

<sup>33</sup> “Ndayañomi chira tataendi que imoendi imoi; ndayamondoi chiaveira que mbahevrive. Iyacatu rumo yamondora ivate tataendi rendave ‘tosesape opacatu ava oique vahe oi pipe’ yande yapave. <sup>34</sup> Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pītumimbi vahe nungar tēi. <sup>35</sup> Sese peicua catu co poroesapesa pereco vahe, tape rereco eme pītumimbi vahe nungar. <sup>36</sup> Co supi eté vahe osesape tuprise opacatu pe pihave, ndipoise que pītumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pītu vahe pēu” ehi.

*Jesús omombehu fariseo iyavei Moisés porocuaita rese oporombohe vahe recocuerai*

<sup>37</sup> Opase oñehe Jesús, fariseo viraso güētave imbocarú. Oique se sētave oso, uguapi mesave oi. <sup>38</sup> Ocaru renondeve ndoyepoise rumo, ahese

fariseo ndoyembovi hai tēi nomboaviyeise judío porocuita. <sup>39</sup> Ahe rumo aipo ehi fariseo upe:

—Inungar iġua rīru iyavei tembiġu rīru icupe rupi tēi yoseipri, ipipe rumo iquiġa opitaño ité, ēġūe ehi tupri avei pe recocuer pe monda raisave mbaġe-mbaġe tēi pe reco pipe. <sup>40</sup> ¡Pe ndayaracuai vaġe peico! ¿Ndapeiġuai vo pe rete aposar, pe piġa aposar avei? <sup>41</sup> Sese pemondo porerecosa ava iparaisu vaġe upe pe recatēhiēġisa pipe. Evocoyase ipipe sui opacatu imoatirombri peicora.

<sup>42</sup> “¡Peparaisu pe fariseo! Esepia, yepe pe remiti sui pemondo peyacatu ñepepe-pei diez vaġe sui Tūpa upe viña, pe rumo ndaperoyai teco ivisa iyavei peseyaño tēi Tūpa poroaisusa. Iyacatu rumo peyapora evocoi mbaġe pe porerecosa sui pe poiēġisa pipe viña.

<sup>43</sup> “¡Peparaisu pe fariseo! Esepia, peipota pe renda porañete catu vaġe pe guapi āġua tūparo pipe, iyavei peipota pēu opacatu ‘avirave’ oyapora ava pe mboetisave ocar rupi yuvireco.

<sup>44</sup> “¡Peparaisu! Esepia, pe recocuerai inungar tehōġüer ruviġa icuaēġise ava oguata ihari rupi yuvireco” ehi chupe.

<sup>45</sup> Evocoyase Moisés porocuita rese oporomboġe vaġe,

—Poromboġesar —ehi—, aipo eremombehu vaġe pipe niġa ava ore amotarēhiño yuvireco —ehi.

<sup>46</sup> Ahe rumo aipo ehi:

—¡Peparaisu avei pe Moisés porocuita rese oporomboġe vaġe! Esepia, pemondo porocuita yavai vaġe ava upe; pe rumo evocoyase ndapeipitiviimi eté aġe ava imboaviye āġua rese yuvireco.

<sup>47</sup> “¡Peparaisu! Esepia, pemoingatu Tūpa ñeġe mombeġusar ruviġagüer peico Tūpa mboeteisa angahu pipe tēi. Pe ramoi teieté rumo oyuca yuvireco. <sup>48</sup> Evocoyase pemboyecua co pe ramoi eta piġañemoñeta agüer secocuer moña pipe peico. Esepia, aġe oyuca Tūpa ñeġe mombeġusar yuvireco. Pe evocoyase cūritei pemoingatu vite suviġagüer peico.

<sup>49</sup> “Sese Tūpa ombaġecua pipe aipo ehi: ‘Amondora ġe ñeġe mombeġusar, apóstol avei ndiporeroyai vaġe upe. Aġe ipāġu pendar oyucara yuvireco. Iyavei ambuae mara-mara tēi viġecora yuvireco’ ehi. <sup>50</sup> Esepia, ava ndiporeroyai vaġe cūriteindar upe ité omondora oñemoirosa opacatu oñeġe mombeġusar yucagüer rese aracaġe suive, cūriteindar avei oyucase yuvireco. <sup>51</sup> Abel yuca agüer suive oyepotara Zacarías yuca agüerve oso. Aġe oyuca tūparo maraneġi rocar mbaġe reropovēġesa rovai. Supi eté aipo aġe pēu: Tūpa opara omondo oñemoirosa aġe yuca agüer rese ava ndiporeroyai vaġe cūriteindar upe curi.

<sup>52</sup> “¡Peparaisu pe Moisés porocuita rese oporomboġe tēi vaġe! Esepia, pe mbaġecua aviye soquendapri pereco ava sui. Pe niġa ndaperoyai, iyavei ambuae ava upe ndapeipotai seroya āġua” ehi chupe.

<sup>53</sup> Ipare Jesús osē oso ichui. Aġese Moisés porocuita rese oporomboġe vaġe iyavei fariseo eta oñemoiró iteanga yuvireco sese. Aġe omañeco tēi, oporandu-randu mbaġe rese yuvireco chupe, <sup>54</sup> osecoāġa-āġa tēi mbaġe pipe ‘toyavi angahu oñeġe yandeu’ oġesa pipe yuvireco.

## 12



<sup>1</sup> Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavii supi tupri vahe viña; ndahei eté rumo. <sup>2</sup> Esepia, yaposá vahe imombehupirêhi cūrítei icuasaño itera curi. Iyavei mbahe ñomipri icuasaño aveira no. <sup>3</sup> Supi eté opacatu mbahe pemombehu vahe pītumimbisave, ahe sendusa tuprira arí pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesá pipe, serosapucaisara oi harive opacatú ava rovaque” ehi.

*¿Uma sui pīha siquiyesara?*

<sup>4</sup> “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo āgua pēu. <sup>5</sup> Che rumo amombehura pēu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

<sup>6</sup> “Pe pemondo poyandepo vīrai ñuvirío guarepochi rupivemi tēi yepi. Tūpa rumo ndasesarai eté que ñepeí sui. <sup>7</sup> Tūpa niha oicua ñepeí-peí yande ha retacuer. Sese, pesiquiye eme; pe niha ivate catu vahe ité peico opacatu vīrai sui” ehi.

*“Che aroya ité Jesucristo” ehi vahe opacatu ava rovaque*

<sup>8</sup> “Acoi ava ‘che aroya Jesús’ ehi vahe opacatu ava rovaque, che avei, Ava Riquehír, ‘Co che reroyasar secoi’ aipo ahera che Ru upe sembiguai rovaque. <sup>9</sup> Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoiyase, ‘Co ndahei che reroyasar secoi’ ahe aveira che Ru Tūpa upe sembiguai rovaque” ehi.

<sup>10</sup> “Iyavei opacatu oñehe-ñehe tēi vahe che, Ava Riquehír, rese, ahe chupe oimeño ñeroisa. Acoi que ava iñehe-ñehe tēi vahe rumo Espiritu Santo amotarēhisave, ahe chupe ndipoí chietera ñeroisa” ehi.

<sup>11</sup> “Acoi pe amotarēhisar che recocuer sui tēi pe rerasose porandusave pe recoāha āgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe pīha amombehura?’ ndapeyei chira. <sup>12</sup> Esepia niha, ahe pipeve voi Espiritu Santo pe mbohera aviyeteramo tēi mbahe mombehu āgua rese” ehi güemimbohe eta upe.

*Ñearosa mbahe pota raisa sui*

<sup>13</sup> Ñepeí mbía ava rehii pāhu pendar aipo ehi Jesús upe:

—Porombohesar, emombehumi che riquéhír upe, tomboyahomi tēi mbahe che mombahesa cheu —ehi.

<sup>14</sup> Ahe rumo omboyeví chupe:

—Che mboripar, che ndachecuaitai mbahe moingatu āgua, mbahe mboyaho-yaho āgua avei —ehi ahe mbía upe.

<sup>15</sup> Ipape aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco atí āgua pe recocuer —ehi.

<sup>16</sup> Ipape omboyoya ambuae mbahe rese imbohe: “Oime mbía mbahe yar, iha tupri ai eté semiti. <sup>17</sup> Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu āgua’ ehi. <sup>18</sup> Ipape ipihañemoñeta cute: ‘Aicua mbahe che rembiaporá. Opara aroyí tambihu rēta. Ichui ayapo irira ambuae tuvichá catu vahe. Aheve ayapocatura che remiti rāhii opacatu mbahe areco vahe

avei no. <sup>19</sup> Evocoiyase aipo ahera cheyeupe: Che mboripar, oime setá mbahe cheu araviter momba-momba água; sese cūritei apituhura vichico, acarura, acahura iyavei ayemboviharetera no, ahera' ehi. <sup>20</sup> Tūpa rumo aipo ehira chupe: 'Mbia, nandearacuai eté eico, co pītu pipeve voi eté eremanora. Co mbahe nde rembiapocatu, ¿ava mahera pīha evocoiyase?' ehira chupe. <sup>21</sup> Ēgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque" ehi ahe mbia upe.

*Tūpa osāro opacatu guahir*

<sup>22</sup> Ipare aipo ehi Jesús güemimbohe upe: "Co amombehura pēu: Ndapeyemomahenduha guasu ai chira pe remihura rese pe recove água, pe turucuarã rese tēi avei no. <sup>23</sup> Yande recovesa rumo aviye catu vahe tembihu sui; yande retecuer avei aviye catu turucuar sui no. <sup>24</sup> Pesepia vīrai: nomahetii vahe, nomonuhai vahe avei, ndovirecoi vahe avei mbahe rāhii rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vīrai sui! <sup>25</sup> Ndipoi eté que ñepepe pe pāhu pendar oicatu vahe opīhañemoñetá iteangasa pipe tēi güecocuer mbosavifiño água. <sup>26</sup> Supi eté ndapeicatuise yapo, ndiyai peyemomahenduha guasu ai mbahe rese.

<sup>27</sup> "Pemahecua ru mbahe potri caha pipendar rese: ndoporaviqui eté iyavei ndoipiai oturucuarã. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. <sup>28</sup> Tūpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pēu, pe ava nimbahe reroya tuprii vahe! <sup>29</sup> Sese, '¿Mbahe pīha yahura, mbahe pīha yamondera?' ndapeyei chira pe yemomahenduha guasu aisa pipe. <sup>30</sup> Esepia, ava Tūpa reroysarēhi co ivi pipendar aipo nungar mbahe reseño tēi ipīhañemoñeta yuvireco yepi. Pe Ru Tūpa rumo oicua ité pēu mbahe ipane vahe. <sup>31</sup> Aviye catu rumo pesecara pe Yar Tūpa povrive pe reco água, ahese omboura que mbahe ipane vahe pēu" ehi.

*Ivave mbahe eta oime vahe yandeu*

<sup>32</sup> "Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovrive pe rereco água. <sup>33</sup> Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda rai vahe ndoiquei chira ñomi água pe sui iyavei mbahe rasoi nomomarai chiaveira. <sup>34</sup> Esepia, pe mbahe pe rembiereco setá catu vahesa rupi-rupi pe pīhañemoñeta yepi" ehi.

*Peyemoingatu Tūpa Rahir yevi água*

<sup>35</sup> "Peyemoingatu tupri che yevi água. Inungar tataendi ndogüei vahe, pemboyecua tupriño ité che recocuer pe recocuer pipe ava upe. <sup>36</sup> Peico imboacuapri güerecuar osāro vahe nungar mendasa sui iyevise, oquenda imotase, omboi voi vahe yuvireco chupe. <sup>37</sup> Aviye itera serecuar upe osepiase iyemoingatu voi; evocoiyase serecuar ae niha ihañecora sese, omboguapira mesave imbocarú. <sup>38</sup> Yepe serecuar oyepotara pītu mbiter ou viña, anise añihiveive, ahe rumo osāroño itera chupe imboi água yuvireco. Evocoiyase serecuar aviye ai etera chupe. <sup>39</sup> Peyapisaca tupri co rese: acoi oi yar oicua mbahe hora imonda vahe yepota água, ahese

opitara imonda vahe rãro güëta pipe sui mbahe renoseëhi ãgua. <sup>40</sup> Ëgüe peye aveira peyemoingatu che yevi ãgua. Esepia niha, che, Ava Riquehir, aporoesapiha tẽira vitu curi” ehi Jesús viroyasareta upe.

*Mbiguai omboaviye vahe ocuaita iyavei nomboaviyei vahe*

<sup>41</sup> Evocoyase Pedro oporandu Jesús upe aipo ehi:

—Che Yar, ¿oreuñomi pĩha eremombehu co porombohesa eremboyoya vahe ambuae mbahe rese, opacatu upe tie? —ehi.

<sup>42</sup> Evocoyase omboyevi Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseyá icuaitarã güëta pipendar rese hañeco ãgua ‘tembihu tomondo che rëta pipendar upe che porocuita rupi’ ohesave. <sup>43</sup> Acoi omboaviyese ocuaita, ahese oviharetera güerecuar yevise. <sup>44</sup> Supi eté niha, serecuar oyocuíra opacatu ombahe rese hañeco ãgua. <sup>45</sup> Ahe mbiguai rumo ‘ndoyepota vitei chira revo che rerecuar’ oya omboetasa cuimbahe iyavei cuña omboipi mara-mara tẽi sereco iyavei ocaru, oiñu tẽi osavaipo-ipoño avei oico. <sup>46</sup> Ipare rumo serecuar oyepotara imahe-mohaëhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

<sup>47</sup> “Acoi mbiguai oicua tẽise mbahe güerecuar remimbotar, noyemoin-gatuisse rumo iyavei ndoviroyaise oico, ahe evocoyase serecuar oinupara. <sup>48</sup> Acoi mbiguai nomboaviyei vahe ocuaita icua tupriëhisa pipe, nañemoirosa rutei chira chupe. Esepia niha, acoi imondosa catu vahe icuaitarã, porandusa catura chupe. Acoi oyeroya catu vahe, oporandu catu aveira sese” ehi.

*Jesús reroyasa pipe sui oimera yeamotarëhisa*

<sup>49</sup> “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya. <sup>50</sup> Aique ranera rumo mbahe tẽi che recoãhasa pipe, jëgüe ahera che paraisú itera imboaviye ãgua! <sup>51</sup> ‘Mbahe tupri ai revo güeru co ivi pipe’ ndapeyei chira cheu. Ëgüe ehi rumo che ayu che sui ava yeamotarëhi ãgua. <sup>52</sup> Esepia niha, co pipe suive ité que poyandepo tupri revo oñemu yuvirecoi vahe amove oyeamotarëhira yuvireco che recocer sui: mbosapi oyamotarëhira ñuvirio vahe, ñuvirio vahe evocoyase oyamotarëhira mbosapi vahe yuvireco. <sup>53</sup> Que ava oyamotarëhira guahir, anise tahir evocoyase oyamotarëhira vu; cuña oyamotarëhira omembri, imembri evocoyase oyamotarëhira osi; sovayar oyamotarëhira vovayar” ehi güemimbohe upe.

*Iva pendar poromondiisa mboyecuasa*

<sup>54</sup> Ipare Jesús aipo ehi ava rehii upe: “Pe pesepiase mbahe pĩtu ari sosa coti sui opũhase, ahese, ‘Oquirá’ peye. Ëgüe ehi eté oqui. <sup>55</sup> Iyavei acoi ivitu oipeyuse irohí coti sui, ahese, ‘Sacú iteangara’ peye. Ipare ëgüe ehi eté. <sup>56</sup> ¡Pe Tũpa reroyasar angahu tẽi peico vahe! Pe niha peicua mbahe iva rese oyecua vahe tẽi iyavei ivi rese mbahe oyecua vahe tẽi mombehu, ¡mahera ru ndapeicuai peyeupe mbahe cũritei oime vaherã mombehu peico!” ehi.

*Peñero pe amotarëhimbar upe*

<sup>57</sup> “¿Mahera napesãha ranei pe ae ité co mbahe supi eté vahe? <sup>58</sup> Acoi que ava nde amotarëhisar nde soho ucase nde mondo ãgua mborerecuar rovai, emoingatu tupri voi mbahe eico chupe tenondeve nde rerasoëhi

ãgua sovai; anise, mborerecuar nde mondora ava naporai vahe rarõsar upe. Ahe evocoiyase nde roquendara. <sup>59</sup> Supi eté nderesêi chietera acoi eremboepipase voi eté eresêra ichui” ehi ava rehii upe.

## 13

*Aviye catu ité yañecuñaro*

<sup>1</sup> Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovêhese mbahe mimba yucapri yuvireco chupe. Ahe suvi oyeseha mbahe mimba ruvi rese.

<sup>2</sup> Ipare Jesús aipo ehi chupe: “Pemoha co pe: Mbahe têi oime vahe evocoi mbia Galilea pendar upe, yangaipa guasu catu rese ambuae güecua pendar sui êgüe ehi mbahe chupe viña. <sup>3</sup> ¡Aní rumo! Acoi ndapemboasiise pe angaipa Tûpa upe pe yevi ãgua, pe avei opara pecañi têi. <sup>4</sup> Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no. <sup>5</sup> Aní rumo; acoi ndapemboasiise pe angaipa Tûpa upe peyevi ãgua, pe avei opara pecañi têi” ehi.

*Yembohesa ivira higuera ndihai vahe resendar*

<sup>6</sup> Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia viresco vahe ivira higuera oco pipe. Setá ari ahe oso sepia ‘¿iha pîha?’ oyapave. Ndosecai eté rumo iha sese. <sup>7</sup> Ahese aipo ehi mbia oco rãrosar upe: ‘Esendu, che ayu pihi têi higuera ha reca mbosapi araviter rupi. Ndasepiai eté rumo que ñepe iha sese yepi’ ehi. ‘Eyasiapa; ndiyai ihã tupri têi cohave’ ehi. <sup>8</sup> Ico rarõsar rumo omboyevi chupe aipo ehi: ‘Che rerecuar, êgüe tehiño vite têi rane co araviter; amonguhira ivi chupe. Ipare amondora ivi sũ vahe mbahe repochi resendar sese. <sup>9</sup> Ahese revo ambuae araviter ihara cute; anise ité rumo, ereyasia ucaño itera’ ehi ico rãrosar güerecuar upe” ehi Jesús ava mbohe.

*Jesús ombogüera cuña oyecuhapami vahe mbituhusa ari pipe*

<sup>10</sup> Ñepe mbituhusa ari pipe Jesús oporombohe judío tûparo pipe. <sup>11</sup> Aheve oime cuña imbaheasi vahe, dieciocho araviter rupi ahe mbahehasisa viresco, caruguar têi omboyeapami uca sereco. Sese ndoicatu opûha tupri oguata. <sup>12</sup> Osepiase rumo Jesús, “Erio” ehi chupe.

—Cuña, cūrītei nanembaheasi iri eico cute —ehi.

<sup>13</sup> Evocoiyase omondose opo sese, aheseve voi cuña oyemohivi. Ipare omboetei Tûpa oico. <sup>14</sup> Judío tûparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui ãgua; ahe ari pipe peyura peposano ãgua, ndahei chira mbituhusa ari pipe —ehi.

<sup>15</sup> Evocoiyase ahe mbia upe omboyevi aipo ehi:

—Pe Tûpa reroyasar angahu têi peico vahe, ¿nomboihui vo pe pãhu pendar acoi güeimba tivi iyavei guaricu mbituhusa ari pipe yuvireco yepi no? <sup>16</sup> Co rumo cuña, Abraham suindar Caruguar omombaheasi vahe dieciocho araviter suive sereco, ¿ndiyai eté pîha evocoiyase imbogüerasa mbituhusa ari pipe? —ehi tûparo pendar rerecuar upe.

<sup>17</sup> Aipo ehise, opacatu yamotarêhisar yuvinochi têi yuvireco ichui. Ambuae ava rumo oyembovihaño opacatu Jesús rembiapo osepiase yuvireco.

*Yembohesa mostaza rãhii suindar*

<sup>18</sup> Evocoiyase Jesús aipo ehi avei: “¿Mbahe nungar pãha Tũpa povri pendar, iyavei mbahe rese vo amboyoyara? <sup>19</sup> Oyoya tupri ité mostaza rãhii rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sãca rese vĩrai rehii oyapo guaitirã” ehi oporombohe.

*Yembohesa pan mboapeposa sui*

<sup>20</sup> Evocoiyase Jesús aipo ehi iri: “¿Mbahe rese pãha amboyoyara Tũpa povri pendar? <sup>21</sup> Oyoya tupri co pan mboapeposa rese, acoi cuña omboyeseha tupri vahe mbosapi sãhambri trigo cuhi rese opacatu imboapepo ãgua yepi” ehi oporombohe.

*Jesús peri icãhimi vahe nungar*

<sup>22</sup> Ipare Jesús osoño Jerusalén ve, opita-pita tecua yacatu rupi oporombohe oico. <sup>23</sup> Ahe supi ichose, ñepei mbia oporandu chupe aipo ehi:

—Che Yar, ¿supi eté pãha moviromi tẽi ava oñepisirora yuvireco? —ehi. Ahe evocoiyase amboyeve chupe:

<sup>24</sup> —Peyemoviracua tupri catu peique ãgua oquendipi cãhimi rupi. Esepia niha, supi eté setá ava osãha tẽira yuviroique vaherã ahe oquenda rupi yuvireco viña, ndoyuviroique catui chira rumo yuvireco. <sup>25</sup> Supi eté ahe inungar oi yar ouse oquenda mboya viña. Amove ava evocoiyase ocarve yuvirecoi vite vahe omota tẽira oquenda, ‘Ore yar, emboimi tẽi oreu’ ehi tẽira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. <sup>26</sup> Evocoiyase ahe aipo ehi tẽira yuvireco: ‘Ore niha orocarua vahe, oroihu vahe nde pãri, iyavei ore mbohe ore rocar rupi eve yepi’ ehi tẽira yuvireco chupe. <sup>27</sup> Ahe rumo aipo ehira: ‘Ñepei reseve niha acoi, Ndopocuai vahe, ahe pẽu. ¡Pesiri che sui, pe opacatu mbahe-mbahe tẽi aposar!’ ehiñora chupe. <sup>28</sup> Pe rumo imombopri pe recocuer Tũpa povri sui, sese peyaseho tẽira, peyemoaitere tẽira peico pesepiase Abraham, Isaac, Jacob iyavei opacatu Tũpa ñehe mombehusareta yuvirecoise Tũpa povri ve ivave. <sup>29</sup> Iyavei ava yugüerura añihivei coti sui, caharu coti sui, norte coti sui iyavei irohí coti sui, ahe evocoiyase yuviroguapira ocaru Tũpa mborerecuasave ipiri yuvireco. <sup>30</sup> Supi eté amove ava ndoyavii ipa tẽi vahe seique ãgua ivave Tũpa pãri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavii ahe rane oique vaherã ivave viña. Ahe rumo ipa tẽi yuviroiquera —ehi Jesús ava rehii upe.

*Jesús oyaseho Jerusalén pendar rese*

<sup>31</sup> Ahe ari pipe oyepota moviro fariseo aipo ehi tẽi Jesús upe yuvireco: —Eyepipiño ave sui. Esepia, Herodes niha nde yuca pota oico —ehi tẽi yuvireco chupe.

<sup>32</sup> Ahe rumo,

—Peso, tapemombehu aipo mbia aguara nungar tẽi upe: ‘Esepia, co pipe iyavei ayihive amboyepepiñora ava sui carugaretta vichico, ambogüerañora ava imbaherasisa sui, curi ayihive evocoiyase amombara che cuaita’ peyera. <sup>33</sup> Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tũpa ñehe mombehusar omano co coti tẽi Jerusalén sui yuvireco —ehi.

<sup>34</sup> “¡Too rutei pe Jerusalén pendar, peyuca vahe Tũpa ñehe mombehusar, iyavei ita pipe peyapi-yapi ava Tũpa remimbou yepi! ¡Setá rupi che opomonuha pota tẽi pe rereco, inungar tacura omonuha

vahe omembri opepovri ve, ěgüe ahe pota tēi pe rereco viña, pe rumo ndapeipotai eté! <sup>35</sup> Sese seyapirã tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

## 14

### *Jesús ombogüera mbia iruru sui*

<sup>1</sup> Ñepeí mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco. <sup>2</sup> Aheve avei mbia iruru vahe secoi. <sup>3</sup> Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera ãgua; aní tie? —ehi.

<sup>4</sup> Ahe rumo noñehiño yuvireco chupe. Ahese ahe opoco imbaheasi vahe rese, ombogüera. Ipare, “Eso tupriño” ehi chupe. <sup>5</sup> Fariseo eta upe evocoyase aipo ehi:

—¿Ava pñha pe pñhu pendar novinose voi chira güeimba guaricu, anise tiví oviapise ivicuar pipe mbituhusa ari pipe viña? —ehi.

<sup>6</sup> Ahese nomboyeví catui eté iñhe yuvireco chupe.

### *Jesús ombohe mendasave ichohopri yuvireco*

<sup>7</sup> Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

<sup>8</sup> —Acoi que yande soho ucase mendasa pietasave yuvireco, ndayaguapii chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco. <sup>9</sup> Ipare yande soho ucasar aipo ehira yandeu: ‘Epñha evocoi sui, co mbia toguapi eipeve’ ehira yandeu. Evocoyase yande yachĩ tēira yaso ipami tēi yaguapi. <sup>10</sup> Yande soho ucase rumo yuvireco, yaguapira evocoyase ipa; yande soho ucasar ouse, aipo ehira yandeu: ‘Mbori, erio cohava tenda imboeteipri catu vahesave ore piri’ ehira. ěgüe yahera imboeteipri yaico acoi ava yuviroguapi vahe rovaque yande piri. <sup>11</sup> Esepia niha, acoi ava oyemboivata ai vahe opara seco reroyisa; acoi ava seco mbegüe vahe rumo, ahe seco mboivata catusara curi —ehi.

<sup>12</sup> Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rēta cotindar imbahe eta vahe. Esepia niha, ahe omboyevira ndeu, nde soho ucara oyepiri yuvireco; ěgüe ehira evocoyase mbahe imboyevipa yuvireco ndeu. <sup>13</sup> Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipāri-pāri vahe, ndasesapisoi vahe avei. <sup>14</sup> Esepia niha, ahe ndoicatui mbahe mboyeví yuvireco ndeu. Opase rumo ocuerayeví ava seco catupri vahe yuvireco, ahese ereviharetera eico. Esepia, ereipisira mbahe aviye vahe Tūpa suindar —ehi.

### *Jesús oporombohe carusa rese*

<sup>15</sup> Iñhe renduse rumo, ñepeí mbia yuviroguapi vahe mesave, ahe aipo ehi Jesús upe:

—¿Sovasapri catu ava Tūpa piri ocaru vahe imborerecuasave! —ehi.

<sup>16</sup> Evocoyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri. <sup>17</sup> Ipare oyepotase ari caru ãgua, ahese aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi. <sup>18</sup> Opatatu rumo ava, ‘Eñemosañomi tēi cheu’ ehi pãve yuvireco. Yipindar mbia aipo ehi: ‘Che rumo arocua ivi; iya ité aso sepia. Sese eñemosañ cheu’ ehi chupe. <sup>19</sup> Ambuae mbia aipo ehi: ‘Che arocua ramo diez tupri tiví, ahe asãha ranera. Sese eñemosañ cheu’ ehi chupe. <sup>20</sup> Ambuae aipo ehi no: ‘Che amenda ramomi vichico. Sese tēi ndasoi chira’ ehi. <sup>21</sup> Oyevisé mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipãri-pãri vahe avei no’ ehi. <sup>22</sup> Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi. <sup>23</sup> Evocoyase aipo ehi güembiguai upe: ‘Eguata iri ambuae peri tecua ivirindar rupi avei toyugüerumi che rētave yuvireco che piri, tompoapopá ité che rēta yuvireco’ ehi. <sup>24</sup> ‘Esepia niha, acoi yipindar ava aichoho uca vahe ndipoi chietera que ñepeí ocaru vaheerã che piri’ ehi güembiguai upe —ehi Jesús ahe mbia mbohe.

*Yavai Cristo rupi guata ãgua*

<sup>25</sup> Ava rehí Jesús raquicuei uguata yuvireco. Sese ahe oyemboyere aipo ehi ava upe: <sup>26</sup> “Acoi oimese que ava oipota vahe che rupi uguata ãgua, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ëgüe ndehise, evocoyase ndiyai chupe che remimbohe seco ãgua. <sup>27</sup> Iyavei que ava noñemosañoi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi uguata ãgua, ahe chupe ndiyai che remimbohe seco ãgua” ehi. <sup>28</sup> “Que ava pe pãhu pendar omopuha potase oi, ¿ndoyapisaca ranei chira ‘¿amomba angara pãha?’ oyapave?” <sup>29</sup> Esepia niha, omondose oi renara yipindar. Ipare rumo nomboaviye catuise, ahese opacatu ava sepia virõirora <sup>30</sup> aipo ehira yuvireco: ‘Aye evocoi mbia omopuha pota tēi oi viña, ndoicatuí eté rumo imboaviye’ ehira yuvireco chupe. <sup>31</sup> Iyavei que mborerecuar guasu diez mil sundao vireco vahe oyeepi potase ambuae mborerecuar veinte mil ava vireco vahe sui, oyapisaca ranera yipindar icua tupri ãgua ‘¿yaicatura pãha setá catu vahe rese yavava?’ ohesave. <sup>32</sup> Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehusar mbahe tupri rese porandu ãgua chupe. <sup>33</sup> Ëgüe ehi avei pe recocuer ndapeseya potaise pe mbahe opacatu, Ëgüe ehi vahe ndahei eté che remimbohe” ehi.

*Yande recocuer inungar yucrí*

<sup>34</sup> “Yucrí aviye vahe ité yandeu; nasehe irise rumo, ndayaicatuí chietera imoehe iri ãgua. <sup>35</sup> Naporai eté ivi upe nara; ndiyai avei ivi mbahe repochi resendar rese oyeseha vaheerã. Evocoyase ahe imombopri tēi vaheerã. Sese aipo ahe acoi ava oyapisaca pota vahe, toyapisacaño” ehi.

## 15

*Porombohesa ovesa ocañi tēi vahe resendar*

<sup>1</sup> Opacatu ava sui guarepochi rerocuasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu água yuvireco. <sup>2</sup> Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroiro tēi yuvireco aipo ehi:

—Co mbia omborī pota rai ava yangaipa guasu vahe tēi oico yepi, ocaru avei ipāhube no —ehi.

<sup>3</sup> Evocoiyase Jesús omombehu ovesa resendar yembohesa: <sup>4</sup> “Que ñepepe pe pāhube virecose cien ovesa güeimba, ipare co ocañira ñepepe ichui viña, oseyá ranera evocoiyase evocoi noventa y nueve tēi aviye vahesave seco água. Ipare oyevíra ocañi vahe reca oso, oyosu rane itera viña. <sup>5</sup> Oyosuse, osupira oachihive vorivetesa pipe. <sup>6</sup> Ipare oyepotase güetave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira. <sup>7</sup> Supi eté egüe ehi aveira oime torivetesa guasu catu ivave acoi ñepepe ava yangaipa guasu vahe oñecuñarose güecocuera sui noventa y nueve yuvirecoi tupri vahe sui yuvireco” ehi.

*Yembohesa guarepochi ocañi vahe resendar*

<sup>8</sup> “Acoi que cuña omocañise ñepepe guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. <sup>9</sup> Evocoiyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. <sup>10</sup> Supi eté egüe ehi aveira oime torivetesa Tüpa rembiguai íva pendar rehi upe que ñepepe ava yangaipa guasu vahe oñecuñarose güecocuera sui” ehi.

*Yembohesa mbia rahir ocañi vahe resendar*

<sup>11</sup> Aipo ehi avei oporombohe: “Oime mbia vireco vahe ñuvirío guahir. <sup>12</sup> Chihivahe catu vahe aipo ehi oyesupa upe: ‘Che ru, embou mbahe che mombahe cheu’ ehi. Iyesupa evocoiyase omboyaho ombahe imondo chupe. <sup>13</sup> Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. <sup>14</sup> Acoi oiporupa tēise rumo opacatu ombahe, aheve oime tiavor ahe ivi rupi. Ahe evocoiyase ndasiepoi tēi oico. <sup>15</sup> Evocoiyase oso mboraviqui reca mbia piri aheve. Ahe mbia evocoiyase omondo ocove güeimba cuchi rāro água. <sup>16</sup> Aheve oyemohitaro pota tēi cuchi rembihi pipe oico viña. Ndipo eté rumo omondo vahe chupe. <sup>17</sup> Evocoiyase oyemomahenduha tēi güeta pendar oporaviqui vahe rese: ‘¡Che ru rētave oporaviqui vahe rumo co omoumbire guasu-guasu tēi güembihu yuvireco! ¡Che rumo che yuca pota tēi che rieporēhi che rereco cohave! <sup>18</sup> Sese ayevira che ru rētave. Aipo ahera chupe: Ayemboangaipa Tüpa rese, nde rese avei no. <sup>19</sup> Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi. <sup>20</sup> Evocoiyase oyevi iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovañchi, oyaco osovaupite avei. <sup>21</sup> Ahese tahir aipo ehi chupe: ‘Che ru, ayemboangaipa Tüpa rese, nde rese avei; ndiya iri nde rahir che reco água’ ehi. <sup>22</sup> Tu rumo aipo ehi güembiguai upe: ‘Peso, taperumi aviye catu vahe turucuar pemboyemonde, pemonde avei cuā penda sese, pitaqui avei. <sup>23</sup> Iyavei guaca iquira catu vahe peyuca. ¡Yayapora pieta guasu!’ ehi. <sup>24</sup> ‘Esepia, co che rahir aviye omano vahe secoi viña,



cūrítei rumo oyeví iri cheu' ehi. Ēgüe ehi opacatu sorivete yuvireco pieta apo.

<sup>25</sup> “Tahír cuacua catu vahe rumo ocove vite secói. Oyevíse ou güëta rerovicave, osendu voi ípieta guasu vahe yuvireco. <sup>26</sup> Evocoiyase oporandu mbiguai upe mbahe oime vahe rese. <sup>27</sup> ‘Nde rivrí mo co oyeví tuprí iri ou. Sese nde ru oyuca uca guaca iquira vahe iyevísa resendar’ ehiño. <sup>28</sup> Evocoiyase tiqehír oñemoírosa pípe, ndoique potai oyesupa uve oi pípe; tu rumo osëño ité ocarve ‘eique’ oya chupe. <sup>29</sup> Evocoiyase tahír omboyeví chupe aipo ehi: ‘Che niha setá aravíter rupi oropítivíi vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta água’ ehi vu upe. <sup>30</sup> ‘Indó, cūrítei oyepota ndeu nde rahír, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquira vahe chupe’ ehi.

<sup>31</sup> “Evocoiyase tu: ‘Eyapísacaño, che rahír, nde niha nderesíríi vahe che sui. Opacatu che areco vahe rumo nde mbahe ité yepi. <sup>32</sup> Cūrítei rumo iyacatu ité yande rorivetesave yayapora pieta. Esepia, co nde rivrí ocañi tēi vahecuer rese yamahe iri’ ehi guahir upe” ehi Jesús ava eta mbohe.

## 16

*Mbahe yar mbahe rese ñangarecuar ndoyemboaracuai vahe resendar yembohesa*

<sup>1</sup> Jesús aipo ehi avei güemimbohe eta upe: “Oime mbia imbahe eta vahe. Ahe víreco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu. <sup>2</sup> Evocoiyase serecuar ñepeí opítivíisar omondo seca, ahe güeruse, ‘¿Mbahe vo aipo ereyapo eico; ayandu cūrítei nde rerácuca? Emoingatupa tuprí voiño nde poravícuca resendar cheu’ ehi, ‘Nandehañeco iri chira cohava mbahe rese cheu’ ehi, ‘Nandehañeco iri chira cohava mbahe rese cheu’ ehi chupe. <sup>3</sup> Evocoiyase mbahe rese ñangarecuar: ‘¿Mara ahera píha co evocoiyase vichico imomboprí che recose che poravícuca sui? Ndareco iri rumo píratasa cheyese iví rese che poravícuca água. Achí eteanga aveira rumo mbahe rese che porandu água’ ehi tēi. <sup>4</sup> ‘Aicua rumo cute mara ahera vichico: che poravícuca sui opa che momboise, oimera che písi tuprí vaherá oyepírí’ ehi. <sup>5</sup> Evocoiyase oñehe ñepeí-peí güerecuar sui mbahe vínose tēi vahe rese chupe. Yipíndar vahe upe oporandu: ‘¿Mboví mbahe erenose tēi yande rerecuar sui?’ ehi. <sup>6</sup> ‘Cien tuprí chereve aceite síru tuvichagüe vahe rese’ ehi. Evocoiyase, ‘Eguapí ru, co oime cuachiar sesendar nde yecuachía agüer. Emondo, eyapo iri ambuae cincuenta rupíndar año’ ehi chupe. <sup>7</sup> Ichui ambuae mbahe vínose tēi vahe upe oporandu no: ‘¿Mboví mbahe vo erenose tēi yande rerecuar sui?’ ‘Cuatro ciento quintar rupíndar’ ehi. Evocoiyase, ‘Co oime cuachiar sesendar. Yaicuachíara rumo tresciento veinte quintar rupíndar’ ehi. <sup>8</sup> Evocoiyase serecuar oyanduse, ‘Too, oicua ité mbahe apo’ ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu água. Supi eté ava ndoicuai vahe Tüpa oicua catu mbahe moingatu água oyeupe Tüpa reroyasar sui.

<sup>9</sup> “Sese che aipo ahe péu: péiporu pe guarepochi pereco vahe co iví pípe pe mboripar reime água. Ichui opa tēise pe guarepochi, oimera pe písi vaherá teco apirēhisave.

10 “Acoi ava mbahe tupri ch̄hi oyapo vahe, ahe oyapo tupri catura mbahe tuvichá vahe. Iyavei acoi ěgüe ndehi vahe ch̄hi vahe rese, ěgüe ndehi ch̄aveira mbahe tuvichá vahe rese. 11 Evocoyase ndapemboaviyeise co īvi pipendar pe cuaita guarepochi rese, ahese ndaperecoi chira ivave mbahe rese hañeco āgua. 12 Iyavei acoi ndapemboaviye tupriise pe cuaita ambuae ava mbahe rãro pipe, ¿ava p̄ha evocoyase omondora pe mbahe ité p̄u viña?

13 “Iyavei ndipoi chietera ñepei mbiguai omboyeroya vahe ñuvirío güerecur. Esepia, ñepei osaisu catura imboyeroya pipe, ambuae evocoyase ndoyambotai chira imboyeroya potaēhisa pipe. ěgüe peye avei ndapeicatui Tūpa mboyeroya guarepochi pota raisa pipe” ehi güemimbohe eta upe.

14 Aipo ñehesa renduse, fariseo yuvirecoi vahe oguarepochi raisusa pipe oviroĩro yuvireco. 15 Evocoyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tūpa rumo oicua opacatu pe p̄hañemoñetasa. Esepia, yepe ava rovaque ndoyavii aviye ai vahe pe recocuer viña, Tūpa uve rumo mbahe t̄ei eté” ehi.

*Mborocuaita iyavei Tūpa mborerecuasa rese ñehesa*

16 “Ȳipisuive Moisés porocuaita iyavei Tūpa ñehe mombehúsar porombohesa Juan recosa rupive opa. Ichuive tupri ité rumo imombehúsar ñehesa aviye vahe Tūpa mborerecuasa resendar, sese ava iquer̄hi catu cūr̄itei aheve yuviroique vahe r̄a.

17 “Yavai catura que ñepei Tūpa porocuaita mboaviyeēhi āgua co īva, īvi opa vahe r̄a sui” ehi.

*Jesús oporombohe mendasa sui poiēhi āgua*

18 “Acoi opoi vahe güembireco sui, omendase ambuae cuña rese, ahe oyemboaguasa t̄ei vahe. Iyavei acoi omendase cuña omenda vahecuer rese t̄ei, oyemboaguasa t̄ei vahe avei” ehi Jesús.

*Ava mbahe yar iyavei Lázaro*

19 “Iyavei oime mb̄ia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. 20 Oime avei mb̄ia iparaisu ité vahe Lázaro serer vahe. Ahe mb̄ia icaracha ati vahe imboguapisa īvive imoi mbahe yar roquendipive. 21 Co mb̄ia iparaisu catu vahe aipo ehi oyeupe, ‘Tomboumi t̄ei que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco. 22 Omanose co mb̄ia iparaisu vahe, ahese Tūpa rembiguai eta ov̄iraso yuvireco Abraham p̄iri ivave. Mbahe yar avei omano, opa oñoti yuvireco.

23 “Ahese oso Tūpa ñemoirosave. Aheve oparaisuse, omahe ivate coti, osepia amombri arachendar Abraham Lázaro reseve. 24 Evocoyase osapuc̄ai p̄irata: ‘¿Che ramoi Abraham, che paraisuerecomi t̄ei eve! Emboumi t̄ei Lázaro che āpecu morohisa āgua ive ocuã pipe. Esepia, che paraisu etepri co tata p̄iratagüer pipe vitu’ ehi. 25 Evocoyase Abraham omboyevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi t̄ei oico’ ehi. ‘Cūr̄itei rumo Lázaro oviharete oico cohava, nde evocoyase nde paraisu eipeve eico. 26 Iyavei oime co īvicuar ipicucu vahe rasaēhi āgua oreu iyavei p̄u no’ ehi.

27 “Ahe mbia aipo ehi: ‘Che ramoi Abraham, emondomi tēi Lázaro  
 28 che rivi poyandepo vahe upe, chupe iñehe água. Ahe tosecuñaro  
 güecocuer yugüeruēhi água co tecocuer mbahe tēisave’ ehi. 29 Abraham  
 rumo, ‘Vireco niha Moisés porocuaita iyavei Tūpa ñehe mombehúsar  
 rembicuachiagüer yuvireco. ¡Ahe toviroya yuvireco!’ ehiño chupe.  
 30 Evocoiyase, ‘Taa, che ramoi Abraham, que omano vahecuer pāhu  
 pendar rumo yuvirasose chupe, ahe evocoiyase omoingatura güecocuer  
 yuvireco viña’ ehi. 31 Abraham rumo aipo ehi chupe: ‘Acoi ndoyapisaca  
 potaise Moisés porocuaita rese iyavei ambuae Tūpa ñehe mombehúsar  
 remimombehu rese no, ndoviroyai chiaveira que ava omano vahecuer  
 ocuerayevise yuvireco’ ehi Abraham ava mbahe yar upe” ehi.

## 17

### *Iparaisu itera ava oporomboangaipa uca vahe*

1 Jesús aipo ehi güemimbohe eta upe: “Oimeño itera poroãtoisa che  
 reroyasar reiti água. ¡Ahe imboangaipa ucasar rumo iparaisu itera!  
 2 Iyacatu evocoi nungar ava ñapichisa ita mbahe mbocuhisa iyeseho  
 rese para guasu pipe imombo água chihivahemi nungar mboangaipa uca  
 rägüer sui. 3 ¡Sese peñero tupri!

“Acoi nde mboetasa Tūpa reroyasar oyemboangaipase,  
 pemboaracuara. Omboasi pare oyevise güecocuer tupri pipe, ahese  
 peñerora chupe. 4 Supi eté acoi que ambuae ava pe amotarēhi viteso  
 rumo siete yupagüer ñepeí ari pipe, acoi ouse pēu siete yupagüer avei,  
 ‘Ēgüe ndahe iri chira’ ehise, peñero chupe” ehi Jesús güemimbohe upe.

### *Yayeroyase Tūpa rese oime pīratasa*

5 Co doce tupri apóstol aipo ehi chupe:

—Emboumi oreu Tūpa rese ore yeroya catu água —ehi yuvireco chupe.

6 Evocoiyase yande Yar omboyeví chupe:

—Supi eté, Tūpa rese pe yeroyasa, yepe ndoyavii chira mostaza rāhii  
 tahimi vahe viña, co ivira tuvicha vahe upe rumo, ‘Eyeapoho ave sui.  
 Eso eñeñeti para guasu aviterve’ peyese Tūpa rese pe yeroyasa pipe, ahe  
 evocoiyase pe mboyeroya itera —ehi.

### *Ambuae ava rese hañecosar cuaita*

7 “Inungar que pe pāhu pendar virecora güembiguai oporaviqui vahe  
 ivi mboyerere cove, anise que guaca rāro yuvi rupi viña; ichui iyevise,  
 ¿‘Eique, eguapi terecaru’ ehira pīha serecuar chupe? 8 Aní eté, ahe rumo  
 aipo ehiñora chupe: ‘Emoingatu voi mbahe che tohu, che toihurā avei.  
 Ipare nde erecarura, ereihura’ ehira chupe. 9 ‘Aviye ndeu’ ndehi chietera  
 icuai pare chupe. 10 Ēgüe peye avei mbiguai nungar pe opacatu Tūpa pe  
 cuaitarā ombou vahe mboaviyere, ‘Yande niha mbiguai tēi yaico. Esepia,  
 yande cuaita mboaviyesar tēi yaico’ peyeñora” ehi.

### *Jesús ombogüera diez tupri ava lepra pipe imbaheasi vahe*

11 Osose Jesús Jerusalén ve, oguata ivi Samaria iyavei ivi Galilea rupi.  
 12 Oyepotase tecuamive oso, ahese yuvinose diez ava lepra pipe imbaheasi  
 vahe yuvireco chupe. Amombrive rumo opitaño yuvireco ichui.  
 13 Osapucái yuvireco chupe aipo ehi:

—¡Jesús, Porombohesar, ore paraisuerecomi tēi eve! —ehi.

14 Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco. 15-16 Evocoiyase ñepe i pãhu pendar, Samaria pendar, osepiase ocuerasa, oyevi chupe osapuca i pĩrata Tũpa upe imboetisave. Oñenopiha oso sovai, oyai vi, “Aviye ndeu” ehi Jesús upe. 17 Evocoiyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? 18 ¿Co mbia ambuae i vi pendar güeraño rumo oyevi ‘aviye ndeu’ ohesave Tũpa uve! —ehi.

19 Evocoiyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

*Tũpa mborerecuasa yande pãhuve secoi*

20 Ñepe ari pipe fariseo eta, “¿Marase vo aipo oura Tũpa omborerecuasa pipe mbahe moingatu ãgua?” ehi Jesús upe yuvireco. Ahe omboyevi chupe:

—Tũpa mborerecuasa ndahei acoi yasepia vahe. 21 ‘Co secoi, aheve secoi’ ndapeyei chira chupe. Esepia, ahe oicove ite pe pãhuve —ehi fariseo eta upe.

22 Ipare aipo ehi güemimbohe eta upe:

—Oimera ari pe peipota tẽira aico vahe rã pe piri que ñepe ari rupi che, Ava Riquehir, che recosa pipe; ndache repiai chira rumo peye. 23 Iyavei ava, ‘Co secoi, aheve aipo secoi’ ehi tẽira yuvireco cheu. Ndapesaquicue moñai chira rumo. 24 Esepia, inungar acoi overa vahe osesape guasu i va rese ocua yepi, ãgüe ahera che, Ava Riquehir, vitu ari osupitise che yevi ãgua curi. 25 Yipindar rumo co i vi pipe che paraisu ranera ava cũriteindar mara-mara tẽi che rerecose yuvireco che repia potaẽhisave. 26 Inungar ava Noé recose yuvirecoi aracahe, ãgüe ehi tupri aveira che, Ava Riquehir, yevi ãgua renonde. 27 Esepia, ocaru, oi hu, omendaño avei yuvireco. Oyepotase rumo ari ipapapri amarusu viapi ãgua, ahesa Noé yuviroique arca pipe. Ambuae ava rumo opa ocañi tẽi yuvireco. 28 ãgüe ehi avei aracahe Lot recose, ava ocaru tẽi, oi hu tẽi, virocua tẽi mbahe omahera yuvireco iyavei mbahe mondosar tẽi, mbahe tĩsar tẽi, oi aposar tẽi avei yuvirecoi oyapisacaẽhisa pipe. 29 Osẽse rumo Lot tecua Sodoma sui, avi yeteramo tẽi oviapi tata amar nungar i va sui. Opa tupri oyuca ava rehi aracahe. 30 ãgüe ahe aveira avi yeteramo tẽi che, Ava Riquehir, ayemboyecuaru curi.

31 “Ahe ari pipe acoi ava güeta harive secoi vahe, ahe toique iri eme güeta pipe ombahe renose. Iyavei ava que rupi tẽi secoi vahe, toyevi iri eme güetave. 32 Sese peyemomahenduha co aracahendar Lot rembireco rese. 33 Opacatu güecocuer osaisu vahe, ahe ocañi tẽira. Iyavei setecuer tẽi ocañi vahe, ahe rumo oñepisirora” ehi.

34 “Ahe pĩtu pipe oimera que ñuvirio ava vupave yuviroque vahe yugüeru: ñepe acoi che reroyasar serasosara, ambuae rumo opitara. 35 Ahesa avei ñuvirio cuña ohichora yuvireco: ñepe serasosara, indugüer rumo opitara. 36 ãgüe ehi aveira ñuvirio ava amombri güecua sui yuvirecoi vahe: ñepe serasosara, indugüer rumo opitara” ehi.

37 Aipo ñehesa renduse, oporandu yuvireco chupe:

—Ore Yar, ¿que vo aipo ãgüe ehira mbahe curi? —ehi.

Ahe evocoiyase,

—Mbahe rehōgüer reimesave uruvu oñemonuha atira yuvireco —ehi güemimbohe eta upe.

## 18

*Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese*

<sup>1</sup> Jesús omboyoya ambuae ava recocuer sui querēhisa pipe yerureño āgua ari yacatu rupi <sup>2</sup> aipo ehi: “Ñepei tecuave oime mbia mborerecuar mbahe moingatusar ndosiquiyei vahe Tūpa sui, ambuae ava sui avei. <sup>3</sup> Ahe tecuave avei oime cuña imer mano vahecuer. Ahe oso co mborerecuar rētave, ‘Oime ava oyapo mbahe tēi eté cheu, tomboepi cheu’ ehi chupe. <sup>4</sup> Yipindar rumo noipitivii potai. Coiye catu rumo cuña ombopihaviracua tēise, ipihañemoñeta iri: ‘Yepe che ndasiquiyei vahe Tūpa sui, ava sui avei ndasiquiyei vahe ité, <sup>5</sup> amoingatuñora rumo mbahe co cuña che mañeco tēisar upe. Ayapoñora semimbotar cheu iyu pihiehī āgua’ ehi opihañemoñetasave” ehi.

<sup>6</sup> Ipare yande Yar aipo ehi: “Peyapisaca aipo mborerecuar naporai vahe ñehe rese. <sup>7</sup> Tūpa avei niha omoingatura mbahe güembiporavo oyeupe yeruresar ari, pītu rupindar upe yepi. Nosaro tēi chiranera opitivii āgua yuvireco. <sup>8</sup> Supi eté Tūpa omoingatu voira mbahe aviye vahe yande porandusa pipe yandeu. Co rumo che, Ava Riquehir, ayevisé co ivi pipe vitu, oimera ava moviromi tēi oyeroya vite vahe che rese yuvireco” ehi Jesús.

*Yembohesa fariseo sui iyavei guarepochi rerocuasar sui*

<sup>9</sup> Ichui Jesús oporombohe iri ambuae ava recocuer rese. Esepia, oime amove ava aviye ai angahu secoi oyeupe viña, iharive rumo viroiro ambuae ava. <sup>10</sup> “Ñuvirío ava yuviraso tūparove oyerocu. Ñepei ava fariseo, ambuae evocoiyase ava sui guarepochi rerocuasar. <sup>11</sup> Evocoiyase fariseo oso tenonde ava rembiepiave oyerocu aipo ehi: ‘Tūpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbia ava sui guarepochi rerocuasar nungar tēi aico no. <sup>12</sup> Iyavei ñuvirío yupagüer ñepei semana pipe ayecuacu ité nde recocuer rese, iyavei ñepei-peí cien guarepochi che poraviqui reprimi aipisi vahe sui amboyaho diez che porerecosa ndeu’ ehi. <sup>13</sup> Ava sui guarepochi rerocuasar rumo opitaño amombri ichui. Aheve nomahei íva rese oyerocu āgua oangaipa mboasisa pipe. Oyepochihanupa-nupa aipo ehi: ‘¡Tūpa, che paraisuerecomi eve, che angaipa viyar aico!’ ehi oyerocu” ehi. <sup>14</sup> “Sese aipo ahe pēu: co mbia ava sui guarepochi rerocuasar opa oipisi ñerosa Tūpa suindar güētave oso. Fariseo rumo aní eté. Esepia niha, opacatu acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

*Jesús osovasa chīhivahe eta*

<sup>15</sup> Iyavei chīhivahe güeru Jesús uve yuvireco sovasapirā. Evocoiyase semimbohe osepiase yuvireco, “¿Mahera vo peruño tēi chīhivahe?” ehi opihaviracua pipe serusar upe yuvireco. <sup>16</sup> Jesús rumo aipo ehi:

—¡Mahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa povrive. <sup>17</sup> Supi

eté acoi ndoipisii vahe che Ru Tūpa mborerecuasa chīhivahe nungar yuvireco, ahe evocoiyase ndoyuviroiquei chietera ipipe —ehi.

*Ñepei mbia mborerecuar imbahe eta vahe omoñeta Jesús*

<sup>18</sup> Ñepei mbia mborerecuar oporandu Jesús upe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

<sup>19</sup> Jesús evocoiyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepei aviye vahe ité, ahe Tūpa seci. <sup>20</sup> Ereicua niha co porocuita aipo ehi vahe: ‘Nandea-gua-sai chira, ndereporoyuca chira, nandemondai chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

<sup>21</sup> Ahe mbia rumo,

—Che aipo nungar opacatu amboaviye ité che chīhivahemi suive —ehiño chupe

<sup>22</sup> Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe seprī evocoiyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

<sup>23</sup> Aipo oyeupe hese rumo, ahe mbia ndoyembovihai tēi. Esepia niha, mbahe yar ité seci. <sup>24</sup> Sese omahe aipo ehi:

—¡Yavai eté rumo ava mbahe yar reique āgua che Ru Tūpa mborerecuasave! —ehi—. <sup>25</sup> Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

<sup>26</sup> —¿Ava angahu pīha evocoiyase oñepisīrora yuvireco viña? —ehi sendusar chupe.

<sup>27</sup> Evocoiyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

<sup>28</sup> Evocoiyase Pedro aipo ehi:

—Che Yar, ore rumo opa oroseya ore mbahe nde rupi ore guata āgua —ehi chupe.

<sup>29</sup> Evocoiyase aipo ehi güemimbohe upe:

—Supi eté acoi oseya vahe que güēta, güembireco, viquehīr, vivri, oyesupa, que guahīr Tūpa mborerecuasa rese, <sup>30</sup> ahe setá iteanga catu oipisira mbahe aviye catu vahe co ivi pīpe oseya vahe sui. Ipare rumo tecua ambuaeve oipisi aveira tecovesa apirēhi vahe curi —ehi.

*Jesús omombehu iri omano āgua*

<sup>31</sup> Evocoiyase yande Yar opa viraso co cotimi doce güemimbohe. Aheve aipo ehi: “Cūritei yasora tecua Jerusalén ve yaico, aheve omboaviyera co Tūpa ñehe mombehusar rembicuachiagüer co che, Ava Riquehīr, resendar ñehesa. <sup>32</sup> Che imondoprī aicora ndahei vahe yande mu upe mara-mara tēi che rereco āgua. Che reroīro-īrora iyavei ondīvi-ndīvira yuvireco che rese” ehi. <sup>33</sup> “Iyavei che nupa-nupara. Ipare che yucara yuvireco. Imombosapīsa arī pīpe rumo acuerayevira omano vahe pāhu sui” ehi.

<sup>34</sup> Semimbohe rumo ndosenducuai eté iñehe yuvireco. Esepia niha, yavai eté senducua āgua yuvireco chupe.

*Jesús ombogüera ñepei mbia ndasesapisoī vahe*

<sup>35</sup> Evocoiyase Jesús ovirovise tecua Jericó oso, aheve mbia ndasesapiso vahe oguapi oĩ peri popive porerecosa oyeupe mondo ãgua rese. <sup>36</sup> Osenduse ahe ndasesapiso vahe ava rehii piambu, ahese, “¿Mbahe vo pëu?” ehi ava upe. <sup>37</sup> Ahe evocoiyase, “Jesús, Nazaret pendar, ocuara co rupi” ehi yuvireco chupe. <sup>38</sup> Evocoiyase ahe güendapeve ofehe pĩrata:

—¡Jesús, David suindar, che paraisuerecomi tēi eve! —ehi chupe.

<sup>39</sup> Evocoiyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pĩrataño ité chupe.

<sup>40</sup> Evocoiyase Jesús opitase aheve, oyocuai ava seru ãgua. Ovirovise seru yuvireco, aipo ehi ndasesapiso vahe upe:

<sup>41</sup> —¿Mbahe vo ereipota ayapo vaherã ndeu? —ehi.

—Che Yar, che mbosarecomi tēira eve viña —ehi chupe.

<sup>42</sup> —¡Esareco, erecuera niha! Esepia, ereyeroya ité che rese —ehi chupe.

<sup>43</sup> Ahe ramoseve ndasesapiso vahe, osareco tupri ité; osoño ité Jesús rupi imboetisave. Opatu ava osepia vahe avei omboetei Tūpa yuvireco.

## 19

### *Zaqueo osepia pota Jesús*

<sup>1</sup> Ichui Jesús oique tecua Jericó pipe oguata oico. <sup>2</sup> Aheve mbia mbahe yar Zaqueo serer vahe secoi. Ahe ava sui guarepochi rerocuar rerecuar. <sup>3</sup> Osepia pota tēi Jesús ‘taicua ité’ oya viña. Ndoicatui rumo opucuehise ava rehii pãhve sepia ãgua. <sup>4</sup> Evocoiyase ahe oña tenonde oso ‘tasepia ité’ oyapave, oyeupi ivira rese ivate oĩ senonera. <sup>5</sup> Evocoiyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rētave nde piri —ehi.

<sup>6</sup> Aipo oyeupe he ramoseve, Zaqueo ogüeyi voi vorivetesa pipe oipisi. <sup>7</sup> Sepiase rumo opacatu ava, “Yangaipa guasu vahe rētave tēi oso” ehi yuvireco chupe. <sup>8</sup> Evocoiyase Zaqueo opũha aipo ehi chupe:

—Che Yar, esendu rane, amboyaho tupri ra che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyevi ãgua —ehi chupe.

<sup>9</sup> —Co pipe Tūpa oipisiro ité co mbia. Esepia, ahe niha Abraham suindar avei secoi. <sup>10</sup> Esepia, che, Ava Riquehir, ayu co ivi pipe ava ocañi tēi vahe pisiro ãgua —ehi Jesús Zaqueo upe.

### *Guarepochi sui yembohesa*

<sup>11</sup> Aipo ñehesa rendu viteseve, Jesús oporombohe ambuae tecocuer resendar rese. Esepia, virovi Jerusalén, “Oyepota voi etera revo Tūpa mborerecuasa” ehi ava yuvireco viña.

<sup>12</sup> Ahe rumo aipo ehi ava upe imbohe: “Oime mbia imboyeroyapri, ahe senoipri oso vaherã amombri oivi pendareta rerecuarã oyevise. <sup>13</sup> Oso ãgua renonde oichohopa uca diez tupri güembigua. Ahese opa omondo ñepepepe upe guarepochi sepirusu vahe, aipo ehi chupe: ‘Peporaviqui co guarepochi rese imboeta ãgua che yevise nara’ ehi. Ipare oso. <sup>14</sup> Setã ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarã secoi ãgua, tehi yuvireco’ oya viña.

15 “Ahe rumo mborerecuar guasu güecosa pipe oyevi ou cute. Opa uca oichoho oguarepochi pisisarer ‘¿mbovi-mbovi pîha oipîsi oyacatu yuvireco?’ oya. 16 Evocoiyase yipîndar mbîa guarepochi oipîsi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. 17 Evocoiyase mborerecuar guasu omboyevi chupe: ‘Mbiguai aviye vahe ereico, nde cuaita co nde poraviquisa chîhimi vahe eremboaviye ité. Sese ereicora diez tecua guasu pendar rese hañeco âgua’ ehi chupe. 18 Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. 19 Aipo ehi tupri avei ahe chupe: ‘Nde evocoiyase ereicora cinco tecua pendar rese hañeco âgua’ ehi.

20 “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco. 21 Esepia, che asiquiye nde sui. Nderecatêhi mete ai vahe mbahe rese. Ambuae ava poraviqui sui têi iyavei acoi ndahei vahe mbahe nde remiti, ichui têi avei ereipîsi mbahe ndeyeupe nara yepi’ ehi chupe. 22 Evocoiyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicuase êgüe che hesa viña, 23 evocoiyase, ¿mahera ru ndereyapocatui che guarepochi guarepochi apocatusave che yevise voi senose âgua cheu imboyevi catumi âgua viña?’ ehi. 24 Evocoiyase, ‘Perocua guarepochi ichui. Pemandora acoi diez rupi guarepochi omboeta vahe upe’ ehi vupîndar upe. 25 Supîndar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi têi yuvireco chupe. 26 Evocoiyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. 27 ‘Acoi ava che amotarêhimbar, ndache potai vahe mborerecuarâ yuvireco, ahe opara peru cohava che rovai yucapa âgua’ ehi” ehi Jesús ava eta upe.

### *Jesús oique Jerusalén pipe*

28 Jesús aipo ohe pare, oguata vite oso Jerusalén coti. 29 Evocoiyase coiye catu tecua Betfagé iyavei Betania rerovicave, ivitri Olivo îpîimi, aheve omondo ñuvirío güemimbohe 30 aipo ehi chupe:

—Peso co tecuamive, yande rovaïndarve. Peyepotase aheve, pesepi-ara guaricu ñapichimbrî imoha ava ndoyeupi vitei vahe yuvireco sese. Ahe peyorañora seru. 31 Acoi, ‘¿Mahera vo peyora?’ ehise que ava pëu, ‘Yar oïporu pota’ peyeñora chupe —ehi güemimbohe upe.

32 Evocoiyase semimbohe yuviraso, semimombehu rupi tupri ité osepia mbahe yuvireco. 33 Evocoiyase oyorase guaricu,

—¿Mahera vo peyora ore reimba? —ehi iyar yuvireco.

34 —Yar oïporu pota —ehiño yuvireco chupe.

35 Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso âgua. 36 Oyeupise oso guaricu harive, oïpipira ava oturucuar peri rupi senonera imboetei guasusave yuvireco. 37 Ovirovise ivitri Olivo sui ogüeyi âgua oso, opacatu ava seroyasar supi oguata vahe omboipi osapucai yuvireco vorivetesave mbahe poromondiisa sembiapogüer rese Tûpa upe 38 aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tûpa tasecoi! —ehi.

39 Evocoiyase amove fariseo yuvirecoi vahe supi aipo ehi chupe:



—Porombohesar, eñehe nde rupi uguata vahe upe imonguiriri ãgua — ehi tēi yuvireco.

<sup>40</sup> Evocoyase aipo ehi:

—Supi eté amombehu pēu: co ava iquiririse yuvireco, ita rumo evocoyase osapucái pīratara che mboetisave — ehi.

<sup>41</sup> Oyepota senimise tecua Jerusalén ve, ahe tecua repiase, oyaseho sese <sup>42</sup> aipo ehi: “¡Pesenducara tarahu co co arí pipe teco tuprisa amondo pota vahe pēu viña, cūrítei rumo ocañi tupriño pe sui, ndapeicatui eté sepia!” ehi oyaseho. <sup>43</sup> “Oimera rumo arí imombehupri naporai vahe pēu curi. Pe amotarēhimbar oñachi irira pe recua. Ipare oyere tuprira yuvireco pe rese pēu ovava ãgua. <sup>44</sup> Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepeí oya vahe ambuae rese. Esepia, ndapeicuai eté Tūpa ouse pēu pe pīsiro ãgua” ehi Jerusalén pendar rese oyaseho.

*Jesús omombopa ava mbahe rerecosar tūparo pipe sui*

<sup>45</sup> Ichui Jesús oique judío tūparo guasu pipe. Aheve omboipi ava mbahe mondosar mombopa tupri ocarve oico <sup>46</sup> aipo ehi:

—Icuachiapri aracahendar pipe aipo ehi: ‘Che rēta yeruresa rētarã’ ehi. Pe rumo, imonda rai vahe rēta nungar tēi pereco — ehi.

<sup>47</sup> Ichui ahe tūparo guasu pipe arí yacatu oporombohe oico. Aheve avei rumo pahi eta rereciar yuvirecoi vahe, Moisés porocuita rese oporombohe vahe iyavei tecua rereciar guasu yuvirecoi vahe, ‘¿Mara yahera pīha yuca uca ãgua viña?’ ehi yuvireco chupe. <sup>48</sup> Ndoicatu rumo yuvireco. Esepia, ava rehíi oyapisaca iporombohesa rese yuvireco.

## 20

*Jesús mborerecuasa*

<sup>1</sup> Ñepeí arí Jesús judío tūparo guasu pipe güecose, ombohe ava eta, omombehu ñehesa pīsirosa resendar oico. Aheve yugüeru pahi eta rereciar guasu yuvireco iyavei Moisés porocuita rese oporombohe vahe, ava rereciar guasu yuvirecoi vahe avei <sup>2</sup> aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborereciarã? — ehi ahe ava yuvireco chupe.

<sup>3</sup> Ahe omboyeví chupe:

—Che avei aporandura mbahe rese pēu. Pemboyevíra cheu — ehi—. <sup>4</sup> ¿Ava vo Juan ombou ava ãpiramo ãgua: Tūpa pīha, ava tēi tie? — ehi ahe ava yuvirecoi vahe upe.

<sup>5</sup> Ahese, “¿Mara yahera pīha?” ehi-ehi tēi oyeupe yuvireco. “ ‘Tūpa’ yahese chupe, ‘¿Mahera ru ndaperoyai?’ ehira yandeu. <sup>6</sup> Anise, ‘Ava tēi remimbou’ yahese chupe, opacatu seroyasar evocoyase yande apiapira ita pipe yuvireco. Esepia, ava, ‘Juan omombehu vahe ñehesa Tūpa suindar’ ehi eté yuvireco chupe” ehi tēi oyeupe yuvireco. <sup>7</sup> Evocoyase ahe ava, “Ndoicuai rumo Juan mbousar, que sui oporoãpiramo oico” ehiño yuvireco chupe. <sup>8</sup> Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera pēu — ehi mborereciar guasu upe.

*Ava mbahe tēi oporaviqui vahe recocuer sui yembohesa*

<sup>9</sup> Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oiví pipe. Ipare oseya oiví ava oporaviqui

vahe upe iporu āgua. Ichui oso pucu que amombri vahesa rupi. <sup>10</sup> Evocoyase oyepotase ari uva pohosa, ahese omondo ñepe güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyeve tupri tēi yuvireco serecuar upe. <sup>11</sup> Ipare ambuae güembigui omondo iri no. Ahe oinupa-nupaño, ñehe mara-mara tēi avei ipogüer tēi imboyeve imondo yuvireco. <sup>12</sup> Ichui omondo iri tēi imombosapisa rese ambuae güembigui no. Ahe oyapicha-pichaño imosē imondo yuvireco.

<sup>13</sup> “Coie miti yar aipo ehi: ‘¿Mara ahera pīha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi. <sup>14</sup> Evocoyase ahe ava tahir repiase, ‘Co aipo oipisira vu mbahe. Yayucaño. Yandeu nara pāve topita co ivi’ ehi oyeupe yuvireco. <sup>15</sup> Evocoyase ovinose miti pāhu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe? <sup>16</sup> Oura evocoyase ahe ava mocañipa āgua, omondora ambuae ava upe oivi rese oporaviqui vaherā” ehi.

Aipo renduse,

—¡Egüe tehi eme! —ehi ava yuvireco chupe.

<sup>17</sup> Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri āgua’ ehi.

<sup>18</sup> Acoi que oviapi vahe evocoi ita harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuar eta upe.

<sup>19</sup> Pahi eta rerecuar guasu iyavei oporombohe vahe Moisés porocuita rese, ñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyēño rumo ava rehii sui yuvireco.

*Judío rerecuar osecoñha iri tēi Jesús guarepochi rese yuvireco*

<sup>20</sup> Ahe judío rerecuar evocoyase omondo ava ndaseco asiimi angahu vahe iviro, chupe ñehe āgua ‘toyavi angahu oñehe’ oya viraso vaherā mborecuar Pilato rovai. <sup>21</sup> Ahe evocoyase,

—Porombohesar, ore oicua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tūpa recocuer rese. <sup>22</sup> ¿Aviyera pīha yamondo guarepochi Roma pendar mborecuar ivate catu vahe upe viña? ¿Aní tie? —ehi yuvireco chupe.

<sup>23</sup> Opa rumo oicua ñehe porombopasa tēi. Sese,

<sup>24</sup> —Pemboyecua ru ñepe guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborecuar guasu —ehiño yuvireco chupe.

<sup>25</sup> —Taa, pemondo ru mborecuar uve chupendar, iyavei Tūpa upendar pemondoño ité Tūpa upe —ehi ahe ava upe.

<sup>26</sup> Ndoyavi uca catui eté ñehe ava rovaque ipisi āgua yuvireco. Ahe rumo oyeupe imboyeve, iquiriripa tupriño oyepihamondiisa pipe yuvireco.

*Porandusa cuerayevisa rese*

<sup>27</sup> Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

<sup>28</sup> —Porombohesar, Moisés niha oseya güembicuachiagüer yandeu aipo ehi: ‘Que cuimbahe omenda vahe omanose guahiēhiseve, tivri evocoyase omendara sembirecocuer rese. Ahe viquehir omano vahecuer upe nara tahira oico’ ehi. <sup>29</sup> Evocoyase oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiēhiseve. <sup>30</sup> Ichui tivri omenda sese. Ahe omanoño avei guahiēhiseve. <sup>31</sup> Ipare imombosapisa tivri omenda iri tēi sese. Ēgüe ehi tupriño avei chupe. Ambuae ichuindar ēgüe ehi tupri avei omanopa yuvireco guahiēhiseve. <sup>32</sup> Coiye cuña avei omano cute. <sup>33</sup> Evocoyase opase ocuerayevi yuvireco, ¿uma rebireco itera pīha omendase opacatu siete yuvirecoi vahe rese? —ehi saduceo yuvireco chupe.

<sup>34</sup> Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi. <sup>35</sup> Ocuerayevi pare oicatu vahe ivave yuviroique vaherā, chupe ndipo iri chira mendasa. <sup>36</sup> Iyavei nomanoi chietera aheve. Esepia, yuvirecoira Tūpa rahir, Tūpa rembiguai eta iva pendar nungar yuvireco. <sup>37</sup> Moisés rebicuachía agüer pipe niha caha pāhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tūpa” ehi. <sup>38</sup> ¡Tūpa ndahei omano vahe Tūpa! ¡Ahe rumo oicove vahe ité Tūpa secoi! Esepia, chupe opacatu yuvirecove vahe —ehi saduceo upe.

<sup>39</sup> Evocoyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

<sup>40</sup> Sese niquerēhi iri eté mbahe rese oporandu āgua yuvireco chupe.

*¿Ava suindar pīha Poropīsīrosar?*

<sup>41</sup> Evocoyase Jesús aipo ehi ahe ava upe:

—¿Mahera ru, “Poropīsīrosar David suindar ité” ehi yuvireco? <sup>42</sup> David teieté niha aipo ehi güembicuachía pipe:

‘Yar aipo ehi che Yar upe:

Eguapi che acato coti <sup>43</sup> acoi che amondose voi eté nde amotarēhimbar ñenopiha āgua nde povrive yuvireco’ ehi David aracahe.

<sup>44</sup> ¿Mahera ru, “Poropīsīrosar David suindar secoira” peye? David teieté, “Che Yar” ehise chupe —ehi Jesús ahe ava upe.

*Jesús oicua uca Moisés porocuita rese oporombohe vahe recocuerai*

<sup>45</sup> Opacatu ava oñhe rendu viteseve, Jesús aipo ehi güemimbohe upe:

<sup>46</sup> “Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo āgua ocar rupi omboeteisa pipe yuvireco. Oseca avei tenda porañete catu vahe güenara otūparo pipe, carusave avei oseca tenda aviye catu vahe yuvireco. <sup>47</sup> Iyavei vīrocuā-rocuāño tēi cuña imer mano vahecuer rēta ichui. Oarondaguā tēi avei oyerocui pucu-pucu yuvireco. Ahe rumo oipīsira Tūpa ñemoirosa ipirata catu vahe yuvireco curi” ehi güemimbohe eta upe.

## 21

*Cuña imer mano vahecuer iparaisu vahe porrecosa*

1 Ipape Jesús osepia ava imbahe eta vahe omondose oporerecosa guarepochi riru pipe yuvireco. 2 Aheve avei cuña imer mano vahecuer iparaisu vahe, omondo ñuviriomi guarepochi oporerecosa. 3 Evocoiyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui. 4 Esepia, ava imbahe eta vahe, oguarepochi rumbirer tēi omondo oporerecosa Tūpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporereco āgua Tūpa upe —ehi.

*Jesús omombehu tūparo guasu monduru āgua*

5 Evocoiyase amove semimbohe oñehe yuvireco tūparo guasu recouer rese: “Co tūparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

6 —Oimera ari opacatu co mbahe cūritei pesepia vahe pipe ndipoi chietera que ñepe ita oyeha vite vahe; opacatu ité imondurusara curi —ehi güemimbohe eta upe.

*Cañi renonde sepiasara setá mbahe poromondiisa iva rese*

7 Evocoiyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

8 Evocoiyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropisirosar aico, cūritei osupiti ari imombepri yandeu’ ehi tēira yuvireco. Ndaperoyai chira rumo ava aipo ehi vahe. 9 Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serācua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

10 “Ñepeivi pipendar ovavara ambuae ivi pipendar rese oyeupe yuvireco. 11 Ahese avei oimera ivi riri tuvichá vahe, tiavor, mbahehasisa opacatu-catu tēi tecua rupi. Iyavei pesepiara iva rese mbahe pe mbosiquiye vahe, poromondiisa tuvichá vahe avei curi.

12 “Co mbahe-mbahe tēi reime renondeve rumo pe pisira yuvireco che recouer sui mara-mara tēi pe rereco āgua. Pe reraso aveira pēu porandu āgua tūparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recouer sui tēi. 13 Ipipe pemombehura che recouer chupe yuvireco. 14 ‘Aipo ahera añehe’ ndapeyei chira pepihañemoñeta rereco pe yeepe āgua. 15 Esepia, che amondora che mbahecuasa pe ñehe āgua. Ndoicatui chietera evocoiyase pe amotarēhimbar imboyevi yuvireco pēu. 16 Pe amotarēhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pāhu pendar yuvireco. 17 Opacatu ava ndape ambotai chira che recouer sui tēi yuvireco. 18 Nocañi chietera rumo que ñepe pe ha pe āca sui. 19 ¡Peyemoviracua evocoi nungar mbahe upe pe ñepisiro āgua!

20 “Iyavei pesepiase ava Jerusalén rese sundao oyere tuprise, peicuara evocoiyase mbahe-mbahe tēi reime āgua yuvireco chupe. 21 Evocoiyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvinose poyava avei ichui. Iyavei acoi que rupi yuvirecoi vahe, ahe toyevi iri eme yuvireco.

<sup>22</sup> Esepia, ahe ari oimera Tūpa ñemoirosa. Ahe omboaviyera icuachi-apri aracahendar pipe imombehupri. <sup>23</sup> ¡Iparaisu itera ahe ari pipe cuña ipuruha vahe, imembi pītani vahe avei! Esepia, oimera tecosisa co ivi pīpendar upe, ñemoirosa tuvichá vahe ahe ava recocuer rese. <sup>24</sup> Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pīpendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

### *Ava Riquehir yevisa*

<sup>25</sup> “Iva rese iporēhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasu-guasú tēi aveira yuvireco para guasu riapugüer renduse. <sup>26</sup> Ahese ava setá yaracua cañi tēira osiquiyepave yuvireco opihañemoñeta guasu aise co ivi pipe mbahe oime vahe rā sui. Ahese avei iva resendar opacatu mbahe oririira. <sup>27</sup> Ahese ramo opacatu ava che, Ava Riquehir, che repiara yuvireco, agüeyise iva quiha rese che pīratasa rendigüer porañetesa pipe. <sup>28</sup> Omboipise evocoi nungar mbahe, peyemonguerēhi catura, peyemopoase pe querēhisa pipe. Esepia, pe renosesa pihaivira mbahe tēi sui” ehi.

<sup>29</sup> Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. <sup>30</sup> Co ivira soqui ramose, yaicua cōimi ari sacu vahe yepota āgua yandeu yepi. <sup>31</sup> Na ehi aveira pēu che ñehe rupi tupri mbahe pesepiase. Sese peicuara Tūpa mborerecuasa cōimi eté secoise.

<sup>32</sup> “Supi eté yuvirecove vitera ava osepia vahe co mbahe opase yaviye. <sup>33</sup> Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

<sup>34</sup> “Peicua catu, aní pemboavai etepri pe mbahe reroya āgua mbahe tēi aposa pipe, pe caguar tēisa pipe, co ivi pīpendar tecocuer rese pe pihañemoñeta tēisa pipe avei. Evocoiyase topoosapiha eme <sup>35</sup> inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. <sup>36</sup> Sese peyemoingatu, peyeroqui ari rupi co mbahe tēi sui pe yepipi āgua, pe yemboyecua tupri āgua che, Ava Riquehir, rovai” ehi güemimbohe eta upe.

<sup>37</sup> Ēgüe ehi Jesús oporombohe ari rupi tūparo guasu pipe. Pītu pipe evocoiyase opīta ivitri Olivo rese. <sup>38</sup> Iyavei opacatu ava yuvirasos añihiveite tūparo guasu pipe iñehe rendu āgua yepi.

## 22

### *Yemomborandusa Jesús yuca āgua*

<sup>1</sup> Ovirovise Pascua pieta pan ndayapepoi vahe hu āgua, <sup>2</sup> ahese pahi rerecuareta, Moisés porocuita rese oporombohe vahe avei ava sui osiquiyepave, oseca-seca tēi Jesús yuca āgua yuvireco.

<sup>3</sup> Evocoiyase Carugar oique Judas piha pipe, ahe acoi doce tupri semimbohe pāhu pendar Iscariote serer vahe. <sup>4</sup> Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta āgua, “Tamondo Jesús pe povrive” ehi. <sup>5</sup> Ahe evocoiyase oyemboviharete yuvireco. “Yamondo guarepochi chupe” ehi voi eté yuvireco. <sup>6</sup> Judas

evocoyase, “Aviye” ehi. Oseca voi ava porêhiseve Jesús mondo âgua yamotarêhimbar upe.

*Yande Yar caru agüer ipa vahe*

<sup>7</sup> Oyepota ari yipindar vahe pan ndayapepoi vahe hu âgua. Ahe pipeve avei ovesa Pascua pieta resendar yucapri seropovêhesa yepi.

<sup>8</sup> Evocoyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru âgua Pascua pieta resendar —ehi.

<sup>9</sup> Semimbohe rumo,

—¿Que vo ereipota oromoingatura? —ehi yuvireco chupe.

<sup>10</sup> Evocoyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sêtave supi. <sup>11</sup> Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. <sup>12</sup> Evocoyase ahe omboyecua oi guasu, ivatandar pëu. Aheve pemoingatura yande caru âgua —ehi güemimbohe upe.

<sup>13</sup> Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

<sup>14</sup> Osupitise icaru âgua apóstol reseve yuviroguapi mesave.

<sup>15</sup> Evocoyase aipo ehi:

—¿Cueseve tēi eté niha aipota acarú vaheerã pe piri Pascua pieta resendar rese che mano âgua renonde! <sup>16</sup> Esepia niha, ndayapo iri chira pieta Pascua resendar acoi yaviyese voi eté Tûpa mborerecuasa pipe —ehi.

<sup>17</sup> Evocoyase oipisi igua riru, “Aviye ndeu” ehi Vu upe, iyavei aipo ehi:

—Co amondora pëu, perova-rova peyacatu. <sup>18</sup> Esepia, co pipe suive ndaihu iri chira uva ricuer acoi ouse voi Tûpa mborerecuasa —ehi.

<sup>19</sup> Ipare oipisi pan, “Aviye ndeu” ehi Vu upe. Aipo ohe pare ombohimbóhi imondo güemimbohe upe.

—Co che rete, omboyecua imondopirã pe recocuer rese. Na peyera pe mahenduhasa pipe che rese yepi —ehi.

<sup>20</sup> Êgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pëu nara, ahe che ruvi ipiyerepirã pe recocuer rese nara. <sup>21</sup> Cûritei rumo oime mbia mesave yande piri che mondo vaheerã che amotarêhimbar upe. <sup>22</sup> Supi eté imboaviyesa itera che, Ava Riquehir, rese ñehesa yipive imombehupri. ¡Iparaisu catura rumo acoi mbia che mondosar! —ehi.

<sup>23</sup> Evocoyase aipo ehise, semimbohe oporandu-randu tēi oyeupe: “¿Ava pïha êgüe ehi?” ehi tēi yuvireco.

*¿Ava vo ivate catu vahe?*

<sup>24</sup> Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco. <sup>25</sup> Evocoyase Jesús aipo ehi: “Ava mborerecuar co ivi pipendar oyocuai pïrata ava yuvireco yepi. Ahe chupe rumo, ‘Mbahe tupri aposar’ ehi yuvireco. <sup>26</sup> Pe rumo êgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihãeco catu ambuae ava rese. <sup>27</sup> ¿Uma pïha ivate catu vahe: co mesave oguapi vahe ocaru yuvireco? ¿Sese

ihañeco vahe tie? Acoi mesave oguapî vahe niha. Che rumo co aico pe pãhuve inungar pe rese ihañeco vahe.

<sup>28</sup> “Pe rumo peico vahe che rupi yepi opacatú che recoãhasa pipe. <sup>29</sup> Sese che amondo pêu pe mborerecuasa inungar che Ru ombou cheu che mborerecua ãgua. <sup>30</sup> Esepia, pecarura iyavei peihura che mborerecuasave che piri. Iyavei peguapîra opacatu judío recocuer rese porandu ãgua” ehi güemimbohe upe.

*Jesús, “Ndaicuai vahe evocoi mbia’ erera cheu” ehi Pedro upe*

<sup>31</sup> Aipo ehi avei yande Yar:

—Simón, Simón, esendu: Caruguar oporandu pe recoãha ãgua rese. <sup>32</sup> Che rumo ayeroqui nde rese nde yeroyasa paneëhi ãgua. Ereyevise cheu, emonguerëhi catu ambuae nde rivireta imoviracua uca ãgua yuvireco oyese —ehi Pedro upe.

<sup>33</sup> —Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

<sup>34</sup> —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapî oyupagüer rupi cheu —ehi.

*Virovi ité Jesús recoãha ãgua*

<sup>35</sup> Evocoiyase Jesús oporandu güemimbohe eta upe:

—Opomondose acoi mbahe riru porëhi, guarepochi riru porëhi, ambuae pe pitaqui ndugüer rerasoëhise, çipane vo acoi mbahe ahese pêu? —ehi.

—Aní eté —ehi yuvireco chupe.

<sup>36</sup> Evocoiyase,

—Cûritei, acoi mbahe riru vireco vahe, tovírecoveño, guarepochi riru vireco vahe, tovírecoveño avei; acoi ndovirecoi vahe quise pucu, tomondo oyeaosa quise repirã. <sup>37</sup> Supi eté amombehu pêu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco põrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

<sup>38</sup> Evocoiyase semimbohe aipo ehi yuvireco:

—Ore Yar, cohave oime ñuvirío quise pucu —ehi.

—Ahe güeraño ité aviye —ehi güemimbohe eta upe.

*Jesús oyerocu Getsemaní ve*

<sup>39</sup> Ipare Jesús osë oso ivitri Olivo ve. Ahe ivitrive oso yepi, aheve semimbohe yuviraso yuvireco supi. <sup>40</sup> Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoëhi ãgua —ehi.

<sup>41</sup> Ipare oyepipi güemimbohe sui, inungar ita imombosa vahe amombrimi, aheve oñenopiha, oyerocu <sup>42</sup> aipo ehi: “Che Ru, ereipotase, che renose eve co mbahe têi sui; tayapo eme che remimbotar têi, nde remimbotar rupira rumo” ehi.

<sup>43</sup> Evocoiyase oyemboyecua Tûpa rembiguai chupe, seco momirata ãgua. <sup>44</sup> Mbahe-mbahe têi porarasa pipe oyerocu catu. Ahese sacuvor inungar tuvi osë ichui otiqui ivive.

<sup>45</sup> Oñarapuhase oyerocuisa sui, oyevi oso güemimbohe uve. Ahe rumo opaño yuviroque yuvirocua oviharëhisa pipe. <sup>46</sup> Evocoiyase,

—¡Mahera opaño peque! Peñarapuha, peyeroqui catu pe viapiëhi ägua mbahe tëi pipe —ehi güemimbohe upe.

*Jesús oipisi yuvireco*

<sup>47</sup> Jesús ñehe viteseve, oyepota ati ava yuvireco chupe. Judas doce semimbohe pãhu pendar tenonde secoi. Ahe oyemboya oso sese sovaupite ägua. <sup>48</sup> Evocoyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarëhimbar upe? —ehi.

<sup>49</sup> Semimbohe eta rumo, mbahe-mbahe tëi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

<sup>50</sup> Ñepe rumo supindar, pahi rerecuar ivate catu vahe rembiguai nambi yasu cotindar oyasia. <sup>51</sup> Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. <sup>52</sup> Ichui aipo ehi güecasar opacatu pahi eta rerecuar upe, tũparo rãrosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? <sup>53</sup> Aicose tũparo pipe pe pãhuve ari yacatu rupi, na ndapeyapoi eté co nungar cheu. Aviyeño rumo, oyepota ité niha pëu imombehupri Carugar piratasa pipe mbahe-mbahe tëi apo ägua —ehi.

*Pedro, “Ndaicuai vahe evocoi mbia” ehi Jesús upe*

<sup>54</sup> Evocoyase Jesús oipisi yuvireco, oviraso pahi eta rerecuar ivate catu vahe rëtave yuvireco. Pedro rumo amombri rupive tëi osaquicue moñaño oso. <sup>55</sup> Aheve ñachimbri pipe oyatapi yuvireco, oyere tupri tata rese oyepehe yuvinoi. Aheve avei Pedro ipãhuve chini. <sup>56</sup> Evocoyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

<sup>57</sup> Ahe rumo aipo ehiño:

—Cuña, ndaicuai vahe ité ahe mbia —ehi.

<sup>58</sup> Iparemi tëi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tëi, ndahei eté rumo che supindar aico —ehi.

<sup>59</sup> Ñepe hora paremi tëi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

<sup>60</sup> Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. <sup>61</sup> Evocoyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese. <sup>62</sup> Ahese osë, oyasehó iteanga oso.

*Sãrosar mara-mara tëi Jesús vireco yuvireco*

<sup>63</sup> Evocoyase ava Jesús rãrosar iguay tëi yuvirocua-rocua yuvireco sese. <sup>64</sup> Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

<sup>65</sup> Iyavei setá mbahe rese oñehe-ñehe tëi yuvireco chupe.

*Jesús serasosa ava ñemonuhasa ivate catu vahesave*



<sup>66</sup> Ahe ari pipe, cōhese, oñemonuha ava judío rerecuar, pahi eta rerecuar iyavei opacatu Moisés porocuaíta rese oporombohe vahe yuvireco Jesús reraso uca āgua ava ñemonuhasa ivate catu vahesave, oporandu mbahe rese yuvireco chupe:

<sup>67</sup> —¿Supi eté vo nde Poropĩsirosar ereico? Emombehu ru oreu —ehi yuvireco chupe.

—Amombehuse rumo pēu, ndache reroyai chietera peye —ehi judío rerecuar upe—. <sup>68</sup> Inungar che aporanduse mbahe rese pēu, pe avei ndapemboyeví chietera cheu viña no. <sup>69</sup> Co pipe suive rumo che, Ava Riquehĩr, aguapĩra Tũpa mbahe mboavaisarēhi acato coti —ehi.

<sup>70</sup> Ichui opacatu ava oporandu yuvireco chupe:

—Evocoyase, ¿nde ité ereico Tũpa Rahĩr? —ehi.

—Supi eté niha aipo aipo peye cheu —ehi mborerecuareta upe.

<sup>71</sup> Evocoyase ahe aipo ehi yuvireco:

—¡Indó! ¿Ava iri vo evocoyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

## 23

### *Jesús serasosa mborerecuar Pilato rovai*

<sup>1</sup> Evocoyase opacatu ava opũha yuvireco Jesús reraso āgua mborerecuar Pilato rovai. <sup>2</sup> Aheve oiñehengapo aipo ehi yuvireco:

—Orosepia co mbĩa oipĩhañemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropĩsirosar mborerecuar ivate catu vahe aico” ehi oico —ehi yuvireco Pilato upe.

<sup>3</sup> Evocoyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyeví Pilato upe.

<sup>4</sup> Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbĩa que mbahe oyapo vaherã —ehi

<sup>5</sup> Ahe ava eta rumo,

—Supi eté opacatu ava oipĩhañemoñeta mboyeaviratí uca opacatu tecua rupindar. Yipindar omboipĩ Galilea rupi oico. Cũritei co Judea ve ěgũe ehiño ité —ehi ava eta Pilato upe yuvireco.

### *Jesús imondosa mborerecuar Herodes rovai*

<sup>6</sup> Pilato osenduse aipo ñehesa oporandu, “¿Supi eté pĩha co mbĩa Galilea iguar?” ehi. <sup>7</sup> “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secói Jerusalén ve. <sup>8</sup> Herodes sorivete Jesús repiase. Esepia, setá ari osepia pota tēi serãcua anduse yepi. Evocoyase oipota ité poromondiisa oyapo vaherã oyeovaque viña. <sup>9</sup> Sese oporandu ati mbahe rese chupe. Nomboyeví eté rumo Herodes upe. <sup>10</sup> Aheve opacatú pahi eta rerecuar iyavei Moisés porocuaíta rese oporombohe vahe eta seroĩrosave oñemoñetañeta tēi sese Herodes rovaque yuvireco. <sup>11</sup> Evocoyase Herodes osundao eta reseve iñehe mara-mara tēi Jesús upe sese oguayĩ tēisa pipe yuvireco. Omboyemonde avei turucuar iporañete vahe pipe yuvireco. Ěgũe ehi imboyeví Herodes Pilato upe. <sup>12</sup> Ahe ari pipe suive oyemborĩ Pilato Herodes rese. Ndoyeambotai vahe tie yipindar yuvireco viña.

*“¡Tayaticasa!” ehi Jesús upe yuvireco*

<sup>13</sup> Evocoyase Pilato opa uca omonuha opacatu pahi eta rerecuar, judío rerecuareta, opacatu ava eta avei. <sup>14</sup> Ipare aipo ehi chupe:

—Pe niha peru co mbia cohawe cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi. <sup>15</sup> Herodes avei, ‘Ndipoi mbahe sembiapo naporai vahe imano ãgua’ ehi. Sese omboyeveño Jesús imbou cheu. <sup>16</sup> Ainupa ucara rumo. Ipare amoseñora —ehi Pilato.

<sup>17</sup> Pascua pieta pipe iya ité Pilato ava upe ñepe soquendapri mose ãgua.

<sup>18</sup> Opacatú guasu rumo ava oñehe pĩrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

<sup>19</sup> Co mbia Barrabás tecua pipe mbahe tēi mopuhasa sui iyavei oporapichisa sui oyeoquenda uca vahe. <sup>20</sup> Pilato rumo omose pota Jesús viña. Sese oporandu iri ava upe imose ãgua. <sup>21</sup> Ahe rumo osapucái pĩrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

<sup>22</sup> Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca ãgua, ainupa uca tēira rumo. Ipare amoseñora —ehi.

<sup>23-24</sup> Ava rehi rumo osapucái pĩratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe. <sup>25</sup> Ëgüe ehi imose co mbia Barrabás, acoi soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo ãgua sese.

*Jesús yaticasa curusu rese*

<sup>26</sup> Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica ãguave, ahe mbia upe, “Nde terevosii curusu rese Jesús raquicuei” ehi voño tēi yuvireco.

<sup>27</sup> Ava rehi yuviraso saquicuei. Cuña avei setá oyaseho oviharēhisave yuvireco sese. <sup>28</sup> Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membri rese avei. <sup>29</sup> Esepia, oura arí naporai vahe. Ahese aipo peye tēira: ‘Aviye catu acoi cuña nimembii vahe iyavei ndoicuai vahe imocambu omembri’ peye tēira. <sup>30</sup> Ahese avei ava ivitri uve aipo ehira yuvireco: ‘¡Toviapi ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco. <sup>31</sup> Esepia, Ëgüe ehise ivira yivive vitese, ¿mara ehira vo catu oipise? —ehi cuña eta upe.

<sup>32</sup> Iyavei viraso ñuvirío mbia ndaseco pōrai vahe supive yaticapirã yuvireco. <sup>33</sup> Oyepotase Ava Ñca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepe mbahe rese ipocosa coti, ambuae evocoyase mbahe rese ipocoēhisa coti. <sup>34</sup> Ahese Jesús aipo ehi:

—Ché Ru, ndeñero co ava upe sembiapo rai rese. Esepia, ndoicuai co mbahe güembiapo yuvireco —ehi.

Sundao evocoyase iguayíño Jesús turucuar rese oyeupe imboyahoyaho ãgua yuvireco. <sup>35</sup> Ava rehi osepia yuvireco; mborerecuareta avei seroñrosave aipo ehi yuvireco chupe:

—Oipĩsĩro ambuae ava, toñepĩsĩro ru ahe ae ité cute Tũpa Rembiporavo Poropĩsĩrosar güecosa pipe —ehi yuvĩreco.

<sup>36</sup>Iyavei sundao seroĩropare omondo vinagre itoihu yuvĩreco, <sup>37</sup>iyavei aipo ehi yuvĩreco chupe:

—ĩNde niha aipo ava judío eta rerecuar guasu ereico! ¡Eñepĩsĩro ru nde ae ité! —ehi sundao eta yuvĩreco chupe.

<sup>38</sup>Curusu rese ñaca harĩve icuachiapri aipo ehi oĩ: “Co judío rerecuar guasu” ehi.

<sup>39</sup>Evocoyase ndaseco pōrai vahe yaticapri iñehe mara tēi chupe aipo ehi:

—ĩNde Poropĩsĩrosar ereicose, eñepĩsĩro ru nde ae, ore avei ru ore pĩsĩro eve! —ehi chupe.

<sup>40</sup>Ambuae evocoyase aipo ehi voi ondugüer uve:

—¿Nderesiquiyeimi rutei vo Tũpa sui? Nde avei niha ocañi tēi vaherã. <sup>41</sup>Yande rumo co yande rembiapo sui tēi mara-mara tēi yande rereco yuvĩreco; co mbia rumo mbahe sembiapoẽhi pipe sui tēi na ehi serecosa —ehi ondugüer upe.

<sup>42</sup>Evocoyase aipo ehi iri:

—Jesús, che paraisuerecomi tēi eve nde eremboipise nde mborerecuasa —ehi.

<sup>43</sup>Evocoyase omboyevi chupe:

—Supi eté co pipe ereicora tecua apirẽhi vahesave che rupi —ehi Jesús ahe mbia upe.

### *Jesús mano agüer*

<sup>44</sup>Osupitise rumo mbiter ari, opa tupri pĩtu ivi rupi; las tres pipe rumo opa icatu. <sup>45</sup>Ari avei ogüe tupri, turucuar guasu tũparo asiassa avei mbiter rupi tupri ovo. <sup>46</sup>Evocoyase Jesús oñehe pĩrata:

—¡Che Ru, amondo che espíritu ndeu! —ehi.

Aipo ohe pare voi omano.

<sup>47</sup>Evocoyase Roma iguar sundao rerecuar osepiase co mbahe poromondiisa Tũpa mboeteisa pipe aipo ehi:

—Supi eté co mbia ndaseco marai vahe —ehi.

<sup>48</sup>Iyavei opacatu ava supindar yuvĩrecoi vahe osepiase co nungar mbahe, oyepochiha nupa-nupa tēi oyepĩhamondiisa pipe yuvĩreco.

<sup>49</sup>Opacatu avei ava oicua vahe Jesús, ipãhuve cuña Galilea sui yugüeru vahe, osepiãño tēi amombrĩve co nungar mbahe yuvĩreco.

### *Jesús apocatu agüer tuvĩpa pipe*

<sup>50-51</sup>Oime mbia aviye etepri vahe, ahe serer José, tecua Arimatea pendar. Ahe tecua ivi Judea pĩpendar, judío rerecuar ñemonuhasa ivate catu vahe pendar secoci. Ahe mbia viroya vahe ité Tũpa ombou vaherã omborecuasa pipe mbahe moingatu ãgua. Sese ndahei ipiñañemoñeta rupi co mborerecuar oyapo vahe mbahe Jesús upe yuvĩreco. <sup>52</sup>Evocoyase ahe oso Pilato rētave oporandu ãgua Jesús rehögüer rese. <sup>53</sup>Curusu sui seroyi pare voi, oimama turucuar secose vahe pipe, ipoyava imondo tuvĩpa pipe ita guasu yohopri ndiporusa vitei vaheve yuvĩreco. <sup>54</sup>Esepia, ahe ari omoingatu mbahe mbĩtuhusa ari upe nara, ahe mbĩtuhusa rumo osupiti pota ité.

<sup>55</sup> Cuña yugüeru vahe Jesús rupi Galilea sui, yuvirasoño ité suvípave, osepia sehögüer apocatuse yuvireco. <sup>56</sup> Oyevise güetave yuvireco omoin-gatu mbahe síacua vahe tehögüer resendar ipichi água.

## 24

### *Jesús ocuerayevi*

Ahe cuña opítuhu mbítuhusa ari pipe judío porocuita reroyasave yuvireco. <sup>1</sup> Cõhe ramomise domingu pipe, oyevi yuviraso tuvípave mbahe síacua vahe reseve. <sup>2</sup> Oyepotase yuvireco tuvípave, osepia soquendasa ita gvasu ndipo irise güendagüerve. <sup>3</sup> Evocoiyase yuviroique voi tuvipa pipe. Ndoyosui rumo yande Yar rehögüer yuvireco. <sup>4</sup> Ndoyembovihai tõi; ndoicatu iri. Ahese aviyeteramo tõi osepia ñuvirío mbia iturucuar sendi vahe oipive yuvireco. <sup>5</sup> Opaño ñaca iviso ivi coti yuvireco osiquiyepave. Evocoiyase co mbia aipo ehi yuvireco chupe:

—¡Mahera peseca tuvipa pãhu rupi ava oicove vahe! <sup>6</sup> Ndipoi mo cohave; ocuerayevi mo ahe. Peyemomahenduha ñehengagüer ivi Galilea rupi omombehu vahecuer rese, <sup>7</sup> “Che, Ava Riquehir, imondopira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

<sup>8</sup> Evocoiyase cuña oyemomahenduha voi Jesús ñehengagüer rese yuvireco. <sup>9</sup> Oyevise tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei. <sup>10</sup> Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. <sup>11</sup> Apóstol upe rumo oyeupe mombehuse aviye aipo ehi tõi vahe; ndoviroyai eté yuvireco.

<sup>12</sup> Pedro rumo yandu ramoseve voi, osẽ, oña oso tuvípave. Omahese tuvipa pipe, turucuar güeraño osepia co cotimi tuisse. Evocoiyase oyepihamondii tõi “¿mara ehi rutei pãha?” oya oyevi oive oso.

### *Jesús oyemboyecua ñuvirío güemimbohe upe tecua Emaús piar rupi*

<sup>13</sup> Ahe ari pipeve caharuse, ñuvirío semimbohe yuviraso tecua Emaús ve. Ahe once kilómetro tecua Jerusalén sui. <sup>14</sup> Ahe peri rupi oñemoñeta yuviraso opacatu co mbahe oime vahecuer rese. <sup>15</sup> Oñemoñeta viteseve, Jesús teieté oyemboya sese, uguata supi. <sup>16</sup> Yepe osepia tõi, ahe rumo ndoyepiacua ucai eté chupe. <sup>17</sup> Evocoiyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvinoha. <sup>18</sup> Ipãhu pendar Cleofas serer vahe omboyevi chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

<sup>19</sup> Evocoiyase,

—¿Mbahe vo oime yandeu? —ehi.

—Jesús mo Nazaret pendar, ahe Tüpa ñehe mombehuse seco pĩrata vahe opacatu mbahe apo água, mbahe mombehu água avei Tüpa rovaque iyavei opacatu ava rovaque. <sup>20</sup> Omondo pahi rerecuar iyavei yande rerecuareta yamotarẽhisave yuca uca água curusu rese yuvireco. <sup>21</sup> Ore rumo oroyeroya ité sese. “Ahe yande pĩsiora yande amotarẽhimbar sui” orohẽ chupe viña. Cũritei rumo opa mbosapi ari yucare. <sup>22</sup> Ore

pāhu pendar cuña ndore mbovīhai eté oyevise suvīpa sui yuvireco. Esepia, yipīndar yuvirasose añihiveive tuvīpave,<sup>23</sup> ndoyosui eté sehögüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cūrītei” ehi. Ahe evocoyase yugüeru imombehu oreu.<sup>24</sup> Iyavei ambuae ore ndugüer yuvirasose tuvīpave cuña remimombehu rupi tupri avei. Ndosepiaí eté rumo Jesús yuvireco —ehi Cleofas chupe tupri ité.

<sup>25</sup> Evocoyase aipo ehi ahe ñuvirío mbia upe:

—¡Ndapeicuai eté rumo pe piha pipe seroya tupri ñgua opacatu Tūpa ñehe mombehugar remimombehugüer!<sup>26</sup> ¿Ndapeicuai vo Poropisīrosar iparaisu rane itera mbahe-mbahe tēi virecosa pipe güecua porañetesave güeique ñgua renondeve? —ehi.

<sup>27</sup> Ipare opa omombehu icuachiapri Moisés cuachiar pipendar iyavei opacatu Tūpa ñehe mombehugar cuachiar pipendar oyese ñehe agüer.

<sup>28</sup> Oyepotase ahe tecuave yuviraso, Jesús rumo aviye oguataño vite vaheñā senonde.<sup>29</sup> Co mbia rumo oñehe yuvireco chupe:

—Epitaño ore piri, caharu etepri. Pitura moco ndeu —ehi yuvireco chupe.

Evocoyase oique, opitaño ipiri yuvireco.<sup>30</sup> Oguapise yuvinoi mesave, oipisi pan, “Aviye ndeu” ehi Tūpa upe. Ipare ombohi co ñuvirío mbia upe imondo.<sup>31</sup> Ahese voi semimbohe omahecua ramo yuvireco sese, ahe rumo cūrīteimi ndoyemboyecua iri sovai chupe.<sup>32</sup> Evocoyase aipo ehi oyeupe yuvireco:

—Yande mbopīhañemoñeta pīratami eté peri rupi oñehese yandeu co tecocuer icuachiapri rese —ehi yuvireco.

<sup>33</sup> Ipare ndopita pucu iri; oyevīño voi yuviraso tecua Jerusalén ve. Aheve osepia once tupri vahe apóstol, omboetasa avei.<sup>34</sup> Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

<sup>35</sup> Evocoyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

### *Jesús oyemboyecua güemimbohe eta upe*

<sup>36</sup> Ahe oñehe viteseve yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

<sup>37</sup> Ahe rumo oyembosiquiye guasu yuvireco ‘hāgüer revo’ oyapave.

<sup>38</sup> —¡Mahera pesiquiye! ¡Mahera pereco vite pe poreroyaēhisa pe piha pipe!<sup>39</sup> Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hā ndovirecoi voho iyavei oangüer; che rumo areco ité —ehi güemimbohe eta upe.

<sup>40</sup> Aipo ohe viteseve omboyecuapa opo, opi avei chupe.<sup>41</sup> Ahe rumo vorivetesā pipe iyavei oyepīhambosiquiye vitesa sui ndoviroya tupri vitei eté yuvireco. Evocoyase aipo ehi:

—¿Perecomi vo mbahe yande caru ñgua? —ehi güemimbohe upe.

<sup>42</sup> Evocoyase omondo pira apiremi oyi vahe yuvireco chupe.<sup>43</sup> Ipare oipisi, ohu opacatu güemimbohe rovaque.<sup>44</sup> Ipare aipo ehi:

—Co rese acoi añehe vichico cuese pe rese aico vitesa che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tupa ñehe mombehusar yuvirecoi vahe rembicuachiagüer pipe, Salmo pipe avei —ehi.

<sup>45</sup> Ëgüe ehi evocoyase opacatu osenducua uca aracahendar icuachiapirer güemimbohe upe <sup>46</sup> aipo ehi:

—Co icuachiasa Poropĩsirosar iparaisura omano água. Ipare mbosapi ari pare ocuerayevira. <sup>47</sup> Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tupa upe pëu ñeroi água” hesara. <sup>48</sup> Pe niha peico opacatu co nungar mbahe repiasar imombehu água. <sup>49</sup> Che amboura che Ru remimombehu pe harive. Pepitañora rumo cohava tecua Jerusalén ve acoi peipisise voi pĩratasa iva suindar —ehi güemimbohe eta upe.

*Ivave Jesús so agüer*

<sup>50</sup> Evocoyase Jesús yuvinose tecua sui yuviraso tecua Betania popive. Aheve ñuvirio opo omopuha, osovasa mbahe tupri reime água chupe. <sup>51</sup> Ipare oyepepi güemimbohe sui. Ahe ramoseve serasosa ivave. <sup>52</sup> Semimbohe evocoyase osapucaí imboetisave. Ipare oyevi Jerusalén ve vorivetesa pipe yuvireco. <sup>53</sup> Iyavei ahe ari yacatu rupi yuviraso tũparo gasu pipe osapucaí Tupa mboetisave yuvireco yepi. Aipo rupive.

## JUAN REMBICUACHIA JESUS RECOUER RESENDAR SAN JUAN

*Tūpa Ñehe oyeapo ava*

<sup>1-2</sup> Jesús yipisuiwe ité Tūpa Ñehe seci. Ahe oicove mbahe apoēhi viteseve Tūpa rese. Esepia, ahe niha Tūpa seci. <sup>3</sup> Ipipe avei Tūpa opacatu mbahe oime vahe oyapo; ndipoi eté mbahe sembiapoēhi. <sup>4</sup> Jesús niha vireco tecovesa apirēhi vahe oyese. Ahe tecovesa tesapesa nungar seci opacatu ava upe. <sup>5</sup> Ahe tesapesa omboyecua tecocuer supi eté vahe pītumimbi nungar mbahe naporai vahe aposar pāhuve. Ahe mbahe tēi aposar rumo ndoicatui eté secopi yuvireco.

<sup>6</sup> Oime mbia Tūpa remimbou. Ahe Juan serer vahe. <sup>7</sup> Ahe rumo ou co tesapesa cua uca āgua ‘toviroya opacatu ava yuvireco’ ohesave. <sup>8</sup> Ahe rumo ndahei eté tesapesa; imombehusar tēi rumo seci. <sup>9</sup> Co tesapesa supi eté vahe osesape opacatu ava. Ahe ou ité co ivi pipe.

<sup>10</sup> Yepe tie ipipe yapopri opacatu ava viña, sembiapo rumo ndoicuai co ivi pipe secoise yuvireco. <sup>11</sup> Supi eté ouse güecuave, secua pendar ae rumo ndoipisii yuvireco. <sup>12</sup> Opacatu rumo acoi oipisi vahe seroyasave yuvireco, ahe chupe omondo ñecuñarosa Tūpa rahir seco āgua yuvireco. <sup>13</sup> Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

<sup>14</sup> Ipare ahe Tūpa Ñehe, oyeapo ava, oicove yande pāhuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesa. Co seco porañetesa oipisi vahe Vu sui Tahir ñepe vahe güeco pipe. <sup>15</sup> Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vaherā che raquicuei, ahe ivate catu vahe che sui. Esepia, yipive ité seci che yesuēhi viteseve’ ahe” ehi.

<sup>16</sup> Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi. <sup>17</sup> Mborocuaita yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu. <sup>18</sup> Ndipoi eté ava osepia vahe Tūpa; Tahir ñepe vahe, seci vahe ité ipiri, ahe oicua uca yandeu.

*Juan Oporoãpiramo vahe oñehe Jesucristo rese*

<sup>19</sup> Judío rerecuar guasu tecua Jerusalén pendar oyocuai pahi eta iyavei ipītiviisareta imondo Juan uve ‘¿Ava vo nde? tehi yuvireco chupe’ oyapave icua āgua. <sup>20</sup> Ahe rumo oyemombehu ité aipo ehi:

—Che ndahei eté Poropisirosar aico —ehi.

<sup>21</sup> Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tūpa ñehe mombehusar ou vaherā? —ehi yuvireco chupe.

—Aní eté —ehi.

<sup>22</sup> —¿Ava rutei vo evocoyase nde? ¡Emombehu oreu ore oromombehu vaherā ore mbousar uve! ¿Mbahe ité vo eromombehura ndeyesuindar oreu? —ehi yuvireco chupe.

23 —Che aico oñehe vahe ivi iporupirêhisa rupi aipo ahe: ‘Pemoingatu pe recocuer yande Yar yepotase nara’ ahe pëu. Ahe inungar acoi Tûpa ñehe mombehusar Isaías aipo ehi vahe aracahe —ehi.

24 Ahe yuviraso vahe chupe, fariseo remimondo yuvirecoi, 25 oporandu yuvireco chupe:

—Evocoyase ndahei niha aipo nde Poropĩsirosar, ndahei avei Elías, ndahei eté Tûpa ñehe mombehusar imombehupri ereico. ¿Mahera ru evocoyase ereporoãpiramo? —ehi yuvireco chupe.

26 Evocoyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe. 27 Ahe co ivi pipe ou vaherã che raquicuei. Che rumo ndahei eté seco catupri vahe aico ipitaquisã yora ãgua —ehi.

28 Co opacatu mbahe yaposa tecua Betania ve, iai Jordán rovai añihivei coti. Aheve Juan oporoãpiramo yepi.

*Tûpa remimbou Ovesa nungar opacatu ava angaipa repirã*

29 Ahere ayihive Juan osepia Jesús oyemboyase oyese aipo ehi: “iPesepia, co Tûpa remimbou Ovesa nungar seropovêhepirã opacatu ava angaipa mocañi ãgua! 30 Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese. 31 Che rumo yipindar ndaicuai ahe yande remiaro ou vaherã. Sese niha aporoãpiramo i pipe vichico imboyecua ãgua che mu judío yuvirecoi vahe upe” ehi.

32 “Che asepia Espiritu Santo ogüeyise iba sui inungar apicasu, opita tupri iharive” ehi. 33 “Yipindar rumo ndaicuai eté. Tûpa che cuai vahe rumo che poroãpiramo ãgua i pipe, aipo ehi cheu: ‘Acoi eresepiase Espiritu Santo ogüeyise, opitase mbia harive, ahe mbia oporoãpiramora Espiritu Santo pipe’ ehi. 34 Che niha asepia ité. Sese, ‘Co Tûpa Rahir ité secoi’ ahe pëu” ehi.

*Yipindar vahe Jesús remimbohe*

35 Ahere ayihive Juan secoi aheve avei ore ñuvirío mbia oroico vahe reseve. 36 Jesús ore cuãse, Juan aipo ehi oreu:

—iPesepia, ndo co mbia Tûpa remimbou Ovesa nungar seropovêhepirã! —ehi oreu.

37 Aipo ihe ramoseve, oroguata voi eté supi. 38 Evocoyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoyase,

—Porombohesar, ¿que vo nde recosa? —orohe chupe.

39 —Yaso, tapesepia ru —ehi oreu.

Evocoyase oroso, oroyepota las cuatro pipe secosave. Aheve ore pĩtu ité ipiri.

40 Simón Pedro rivri, Andrés, ahe che ndugüer ahese. 41 Ahe rane aipo oseca viquehir Simón aipo ehi chupe:

—Orosepia ité Poropĩsirosar —ehi (‘Cristo’ oyapave).

42 Ipare voi, viraso Simón Jesús uve. Osepiase, Jesús aipo ehi chupe:

—Nde Simón, Juan rahir, ndererguã rumo Cefas —ehi (‘Pedro’ oya-pave).

*Jesús oñehe Felipe upe, Natanael upe avei oyeupi iguata ãgua*



<sup>43</sup> Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

<sup>44</sup> “Aviye” ehi Felipe, ahe Pedro iyavei Andrés recua Betsaida pendar secoi. <sup>45</sup> Ipare oso Natanael reca, aipo ehi chupe:

—Orosepia Poropisirosar, sesendar acoi Moisés oicuachía cuachiar porocuita resendar pipe aracahe, oicuachía avei sesendar Tūpa ñehe mombehusareta yuvireco. Ahe Jesús, José rahir, tecua Nazaret pendar —ehi.

<sup>46</sup> Natanael rumo aipo ehi:

—¿Oime pīha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

<sup>47</sup> Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

<sup>48</sup> —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higueravrive ereicose —ehi Natanael upe.

<sup>49</sup> —Porombohesar, inde niha Tūpa Rahir ereico, Israel iguar rereciar guasu! —ehi Natanael chupe.

<sup>50</sup> —¿Che roroya voi eté acoi, “Oroepia iviravrive” che he sui tēi eve! Eresepia rumo co mbahe sui aviye catu vahe —ehi.

<sup>51</sup> Iyavei aipo ehi opacatu upe:

—Supi eté pesepiara iva oyemboi tuprise iyavei Tūpa rembiguai eta igüeyise che, Ava Riquehir, upe, iyevise avei ivave yuvireco —ehi.

## 2

### *Mendasa tecua Caná ve*

<sup>1</sup> Ipare imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve, <sup>2</sup> iyavei Jesús ore semimbohe oroico vahe reseve ore soho avei yuvireco aheve. <sup>3</sup> Ëgüe ehi rumo opa tēi uva ricuer. Evocoyase Jesús si,

—Ndipo iri uva ricuer —ehi chupe.

<sup>4</sup> —Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

<sup>5</sup> Ichi rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

<sup>6</sup> Aheve oime seis cambuchi guasu ita cuhi apopri, ñepeipei cambuchi pipe oique cincuenta litro, amove oique setenta litro i ipipe. Ahe judío oiporu pietase oyepoi ãgua yuvireco Tūpa porocuita mboaviye ãgua yepi.

<sup>7</sup> Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco. <sup>8</sup> Evocoyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ëgüe ehi eté yuvireco. <sup>9</sup> Ihañeco vahe pieta rese osãha i oyeapo vahe uva ricuer. Ndoicuai eté que sui osē ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñehe cuimbahe omenda vahe upe <sup>10</sup> aipo ehi chupe:

—Opacatu ava omondo uva ricuer aviye catu vahe yipindar. Ipore acoi ava hitaropase yuvireco, omondo ndasepii vahe. Nde rumo ereyapoc-atupaño aviye catu vahe, ahe cūritei ramo erenose —ehi.

<sup>11</sup> Co yipindar vahe poromondiisa Jesús oyapo vahe aheve. Ipipe omboyecua güeco pīratasa. Sese semimbohe viroya ité yuvireco.

<sup>12</sup> Ipore oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tēi.

*Jesús omombopa ava mbahe rerecosar tūparo pipe sui*

<sup>13</sup> Ipore judío upendar Pascua pieta yepota senise, Jesús oso Jerusalén ve. <sup>14</sup> Aheve osepia tūparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi. <sup>15</sup> Co mbahe repiase rumo, Jesús oyapo tucumbo omombopa tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiapi-apii iguarepochi ivi rupi, iyavei imesa opa omombo. <sup>16</sup> Apicasu mondosareta uve aipo ehi:

—¡Penosepa co mbahe cūritei ave sui! —ehi—. ¡Aní che Ru rēta mbahe mondosa tēi pereco! —ehi.

<sup>17</sup> Aipo hese, ore oroyemomahenduha ñehesa icuachiapri arachendar aipo ehi vahe rese: “Nde rēta rese che recatēhisa sui che mocañira” ehi vahe.

<sup>18</sup> Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi āgua oreu cūritei? —ehi yuvireco chupe.

<sup>19</sup> Evocoyase,

—Pemondurupa co tūparo, che evocoyase mbosapi ari rupive amopuha irira —ehi judío eta upe.

<sup>20</sup> Aipo hese, mborerecuar aipo ehi yuvireco chupe:

—Co tūparo rumo imopuhasa cuarenta y seis araviter rupi, ¿ereicatura pīha aipo nde imopuha iri mbosapi ari rupive? —ehi yuvireco chupe.

<sup>21</sup> Oñehese Jesús tūparo rese, güete upe tēi rumo aipo ehi.

<sup>22</sup> Ocuera yevise rumo manosa sui, ore oroyemomahenduha ñehese agüer rese. Sese oroviroya sesendar ñehesa icuachiapri pipe iyavei semimombehugüer.

*Jesús oicua opacatu ava recocuer*

<sup>23</sup> Jesús secoi vitese Jerusalén ve Pascua pieta pipe, setá ité ava viroya osepiase poromondiisa sembiapo yuvireco. <sup>24</sup> Ndoyeroyai eté rumo ahe ava eta rese. Esepia, opacatu ité ava recocuer oicua. <sup>25</sup> Ndipoi eté que ambuae ava pihañemoñeta mombehu āgua chupe. Esepia, ahe ité opa oicua.

### 3

*Nicodemo omoñeta Jesús*

<sup>1</sup> Oime mbia fariseo, Nicodemo serer vahe, ahe mbia mborerecuar judío pāhuve secoi vahe. <sup>2</sup> Ahe oso Jesús piri pītu pipe, aipo ehi chupe:

—Porombohesar, oroicua ité Tūpa nde mbose ore mbohe āgua —ehi—. Esepia, ndipoi eté que ava oicatu vahe evocoi nungar poromondiisa apo Tūpa oyese secoēhise —ehi.

<sup>3</sup> Evocoiyase,

—Supi eté aipo ahe ndeu: acoi ava ndoyesu piasu iri vahe, ndoiqueei chietera Tüpa mborerecuasave —ehi Jesús chupe.

<sup>4</sup> Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña? —ehi—. ¿Oicatu irira pñha osi aviterve oique oyesu iri ñgua? —ehi Jesús upe.

<sup>5</sup> Jesús omboyevi chupe:

—Supi eté aipo ahe ndeu: acoi ava i pipe iyavei Espiritu pipe ndoyesui vahe, evocoi nungar ndoyuviroiquei chira Tüpa mborerecuasave. <sup>6</sup> Acoi oyesu vahe co ivi pipendar oyesupa sui, inungar tupri avei ahe; Espiritu pipe oyesu vahe rumo, ahe espíritu. <sup>7</sup> Ereyepihamondii rene, ‘Peyesu piasu irira’ ahese ndeu. <sup>8</sup> Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgüe ehi avei ava oyesu vahe Espiritu pipe —ehi Jesús chupe.

<sup>9</sup> —¿Mara ehi pñha aipo evocoiyase? —ehi Jesús upe.

<sup>10</sup> —iNde niha porombohesar ivate vahe Israel pendar ereico, ndere-senducuai eté rumo co nungar mbahe! —ehi chupe—. <sup>11</sup> Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. <sup>12</sup> Añehe tñi niha mbahe co ivi pipendar rese pñu; ndache reroyai eté rumo peye. Tahetru revo mbahe iva pendar amombehuse pñu ndaperoyai chietera viña —ehi.

<sup>13</sup> “Esepia, ndipoi eté ambuae ava ivave oyeupi vahe; che güeraño, Ava Riquehir, iva sui agüeyi vahe pñu. <sup>14</sup> Inungar Moisés osupi ivate mboi rahanga ivi iporupirñhisa rupi aracahe. Ëgüe ehi aveira che, Ava Riquehir, rerecosa ivate che rupira yuvireco <sup>15</sup> opacatu ava che reroyasar tecovesa apirñhi rereco ñgua yuvireco” ehi Jesús Nicodemo upe.

### *Tüpa poroaisusa ava upe nara*

<sup>16</sup> “Supi eté Tüpa osaisü iteanga opacatu ava. Sese ombou Guahir ñepeí vahe ‘tocañi tñi eme che Rahir royasar yuvireco’ oya, ‘tovireco tecovesa apirñhi vahe’ ohesave. <sup>17</sup> Esepia, nomboui Tüpa Guahir co ivi pipe ava mocañi tñi ñgua; ahe rumo ombou ava pñiro ñgua.

<sup>18</sup> “Ava viroya vahe Tüpa Rahir, ndahei eté ocañi tñi vaheñã; acoi ava ndoviroyai vahe rumo, oipisi itera cañisa yuvireco Tüpa Rahir ñepeí vahe reroyañhisa pipe. <sup>19</sup> Ëgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipotata catu mbahe Carugar suindar pñtumimbi vahesave güeco ñgua yuvireco. <sup>20</sup> Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potañhisa. <sup>21</sup> Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tüpa remimbotar oyapo vahe cua uca ñgua opacatu ambuae ava upe —ehi.

### *Juan Oporoãpiramo vahe oñehe iri Jesús rese*

<sup>22</sup> Ipare Jesús oso güemimbohe eta rese ambuae tecua rupi-rupi ivi Judea ve. Aheve secói pucu raimi oporoãpiramo. <sup>23</sup> Iyavei Juan oporoãpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca ñgua. <sup>24</sup> Co rumo mbahe yaposa Juan roquendañhi viteseve.

<sup>25</sup> Evocoyase Juan remimbohe omboipi ambuae omu judío rese oyecopi-copi vaheṛā i pipe ñeapiramosa resendar sui tēi yuvireco. <sup>26</sup> Sese yuviraso Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehe oreu, cūrítei ahe oporoāpiramoño tēi iyavei opacatu yuviraso supi —ehi semimbohe yuvireco chupe.

<sup>27</sup> Evocoyase aipo ehi güemimbohe upe:

—Ava ndoicatu mbahe apo Tūpa nombouise chupe. <sup>28</sup> Pesendu tupri ité che ñehe cuese: “Che ndahei Poropĩirosar aico, che rumo senonde imboupri tēi aico” ahese pēu. <sup>29</sup> Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivi ohā, oyemboviharete sese. Ēgüe ahe avei che cūrítei, ayemboviharete Jesús rese. <sup>30</sup> Ahe niha seco ivate catu-catuño itera arı rupi oico; che rumo ivi coti catu aicora ichui —ehi Juan güemimbohe upe.

*Iva suindar ou vahe*

<sup>31</sup> Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. <sup>32</sup> Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco. <sup>33</sup> Acoi ava viroya vahe rumo iñehe, “Supi tupri ité Tūpa omombehu mbahe” ehi. <sup>34</sup> Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. <sup>35</sup> Tūpa osaisu Guahir iyavei opacatu mbahe omondo ipove. <sup>36</sup> Opacatu ava viroya vahe Tūpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipirata vahe ité yuvireco.

## 4

*Jesús oñehe Samaria pendar cuña upe*

<sup>1</sup> Fariseo eta oyandu yuvireco Jesús vireco catuse ava oyeupi oguata vahe iyavei oporoāpiramo catuse avei Juan sui <sup>2</sup> (ndahei eté rumo Jesús oporoāpiramo; semimbohe tēi rumo ēgüe ehi yuvireco). <sup>3-4</sup> Jesús oicuase aipo nungar, osē Judea sui, oyeve iiri ivi Samaria rupi, Galilea ve yuviraso.

<sup>5</sup> Aheve Samaria ivi rese oyepota tecua Sicar serer vaheve yuvireco. Ahe tecua serovicave oime ivi Jacob omondo vahecuer guahir José upe aracahe. <sup>6</sup> Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapi mbiter arı potase ocueraise oĩ. <sup>7-8</sup> Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chíhi nde i taihu —ehi.

<sup>9</sup> Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

<sup>10</sup> Evocoyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

11 —Ndererecoi rumo i renose água. Esepia, co água ipicucú ité. ¿Que sui vo aipo evocoiyase eremboura i ndopai vahe cheu viña? —ehi cuña chupe—. 12 Esepia, co água ore ramoi Jacob oseyá oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde pīha ivate catu ereico ichui? —ehi cuña chupe.

13 —Opacatu ava oihu vahe co i, ihuseiño itera yepi, —ehi cuña upe—. 14 Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vahe ité. Ahe omboura tecovesa ndopai vahe ava upe —ehi cuña upe.

15 —Nde ava, emboumi ahe i taihu che husei iriēhi água, tanose iri eme i cohava sui —ehi.

16 —Eso rane nde mer reca, seseve peyu cohava —ehi cuña upe.

17 —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. 18 Esepia, cinco tupri erereco nde mer iyavei cūritei erereco vahe nde resendar tēi. Supi eté aipo ere: “Ndarecoi che mer” ere cheu —ehi cuña upe.

19 —Nde ava aviye moco Tūpa ñehe mombehúsar ereico cheu —ehi—. 20 Ore ramoi eta omboetei Tūpa co ivitri rese yuvireco. Pe rumo, judío peico vahe, “Jerusalén ve yamboeteira Tūpa yepi” peye —ehi.

21 —Che reroya eve cuña, virovi ari pēu peso iriēhi água Tūpa mboetei co ivitri rese iyavei Jerusalén ve. 22 Pe Samaria pendar peico vahe pemboetei tēi pe rembiguaēhi. Ore rumo orocua oromboetei vahe. Esepia, ñepisiroso ou judío sui. 23 Oyepota rumo ari cute, ahe ité co cūritei co pīpe suive supi eté Tūpa omboetei vahe, Tūpa Espiritu pīpe omboeteira yuvireco. Supi eté Tūpa, “Ēgü tehi che mboetei yuvireco” ehi. 24 Esepia, Tūpa niha Espiritu secoi. Sese acoi omboetei vahe oyapora Espiritu pīpe supi tupri vahe ité yuvireco —ehi cuña upe.

25 Cuña evocoiyase aipo ehi chupe:

—Che aicua Poropisrosar yu água (ahe ‘Cristo’). Acoi ahe ouse, omombehu tupri ra opacatu mbahe yandeu —ehi cuña chupe.

26 —Che niha ahe aico añehe vahe ndeu —ehi cuña upe.

27 Aheseve semimbohe eta oyevi yuvireco, nombovihaipri güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe. 28 Ahese cuña oseyá tupriño ocambuchi, oso güecuave aipo ehi ava eta upe:

29 —Perio, tapesepia pe ava omombehupa tupri vahe che recouer cheu. ¿Ndahe pīha ahe Poropisrosar? —ehi omu eta upe.

30 Evocoiyase ava rehí yuvinose tecua sui, yuviraso Jesús recosave sepia. 31 Ava yepotaēhi viteseve, semimbohe eta,

—Ore mbohesar, ecarumi —ehi tēi yuvireco chupe.

32 —Oimera rumo ambuae mbahe cheu che moviracua água. Ahe ndapeicuai vahe —ehi güemimbohe eta upe.

33 Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

34 Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei amboaviye rane itera iporaviqui —ehi—. 35 Esepia, pe aipo peye: ‘Ipave vite irungatu yasi mbahe miti ha monuha água’ peye yepi; che rumo aipo ahe pēu: pemahe pe ivirindar ava eta rese. Opa ité opiha omoingatu

yuvireco, ahe inungar mbahe miti ha yaviye vahe. <sup>36</sup> Acoi oporaviqui vahe Tüpa upe ava hã pisi ãgua rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoyase ava upe ofehe vahe iyavei oipisi vahe ava hã ivave nara, oyoya guasu oviharetera ipisipri rese yuvireco. <sup>37</sup> Supi eté co ñehesa aipo ehi vahe: ‘Ñepeí eté omaheti vahe; imonuhasar rumo ambuae ité’ ehi. <sup>38</sup> Che opocuai ava hã pisi ãgua ambuae ava poraviquisave; yipindar rumo ambuae oporaviqui ité yuvireco sese. Pe evocoyase peique iporaviqui agüer rupi —ehi güemimbohe eta upe.

<sup>39</sup> Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. <sup>40</sup> Evocoyase ava rehí Samaria pendar yuviraso chupe ‘epítami ore piri’ oya. Evocoyase opita ipiri ñuvirío ari rupi. <sup>41</sup> Setá catu iri ava viroya yuvireco ñehe ité renduse. <sup>42</sup> Evocoyase ava eta aipo ehi cuña upe yuvireco:

—Cüritei oroviroya ité cute, ndahei nde ñehe suiño oroviroya. Esepia, ore ité orosendu ñehe cute, oroicua avei ahe supi eté opacatu ava pisisrosar ou vahe —ehi ava eta cuña upe yuvireco.

### *Jesús ombogüera mborerecuar rahír*

<sup>43</sup> Ñuvirío ari pare, Jesús osé ivi Samaria sui, osoño ivi Galilea ve. <sup>44</sup> Ahe ae ité aipo ehi: “Tüpa ñehe mombehusar ndasaísusai ivi rese yuvireco yepi” ehi. <sup>45</sup> Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

<sup>46</sup> Evocoyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. <sup>47</sup> Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rētave, tombogüeramí che rahír omano pota vahe cheu’ oya. <sup>48</sup> Evocoyase aipo ehi ahe mborerecuar upe:

—Pe ndache reroyai eté peye ndapesepiase mbahe promondíisa che rembiapo —ehi.

<sup>49</sup> —Che Yar, eyu poyavañomi tēi che rahír mano viteēhiseve —ehi mborerecuar chupe.

<sup>50</sup> —Eyevi nde rētave; nde rahír oicove —ehi mborerecuar upe.

Ahese viroya voi oyeupe ñehesa. Sese oyevi voi eté güētave. <sup>51</sup> Amombri seco vitesave, yuvinoña voi sovañchi sembiguai imombehu:

—¡Nde rahír oicove! —ehi yuvireco chupe.

<sup>52</sup> Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

<sup>53</sup> Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahír oicove’ ehi” ehi. Evocoyase ahe iyavei opacatu imu eta viroya Jesús yuvireco.

<sup>54</sup> Co imoñuviriosa promondíisa oyapo Jesús güecocuer cua uca ãgua ivi Judea sui oyevisé Galilea ve.

## 5

*Jesús ombogüera ava ndoguatai vahe tecua Betzata pendar*

<sup>1</sup> Ipare oime judío pieta guasu Jerusalén ve, aheve Jesús oso. <sup>2</sup> Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pãve. <sup>3</sup> Aheve ava eta imbaheasi vahe oñeno yugüeru ivi rupi: ndasesapiso vahe, ndoguatai vahe, ndipindugüei vahe avei i ñemomiisa osãro yuvireco yepi. <sup>4</sup> Esepia, amove tẽi Tũpa rembiguai ogüeyi ahe ivicuarve i momii ãgua, “Acoi ahe rane ocui vahe i ñemomiiseve ive, ocuera voi eté ombaheasisa sui” ehi yuvireco chupe. <sup>5</sup> Aheve oime mbia ombaheasisa vireco vahe treinta y ocho araviter rupi. <sup>6</sup> Osepiase Jesús, oicua voi eté vireco pucuse ombaheasisa. Evocoiyase oporandu chupe:

—¿Ereipota vo nde cuera ãgua? —ehi chupe.

<sup>7</sup> Imbaheasi vahe omboyevi:

—Nde mbia, ndipoi eté que ava che mongui vaherã i pipe i ñemomiise. Asãha tẽi ‘tacui’ viya. Ambuae rane-raneño rumo yuvirocui che sui yepi —ehi.

<sup>8</sup> Evocoiyase,

—Epũha, esupi nde rupa, eguata —ehi imbaheasi vahe upe.

<sup>9</sup> Ahe ramoseve ahe mbia ocuera tupri, osupi vupa, uguata voi oico. Mbituhusa ari pipe tupri rumo ãgüe ehi. <sup>10</sup> Evocoiyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii ãgua —ehi yuvireco chupe.

<sup>11</sup> Ahe mbia evocoiyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

<sup>12</sup> —¿Uma vo aipo ehi ndeu? —ehi judío yuvireco chupe.

<sup>13</sup> Ahe mbia rumo ndoicua iri ombogüerasar. Sese ndoicatui imboyevi ãgua. Esepia, Jesús aviyeteramo tẽi ndoyecua iri ava rehii pãhuve. <sup>14</sup> Coiye rumo Jesús osepia iri tũparove ahe mbia, aipo ehi chupe:

—Ereicua co nde cuerasa cüritei, aní ereyemboangaipa iri mbahe tẽi catu reime iri ãgua ndeu —ehi chupe.

<sup>15</sup> Ahe mbia evocoiyase oso voi eté judío eta rereciar upe ‘Jesús che mbogüera’ oya. <sup>16</sup> Sese judío osaquicue moña iyavei oyuca pota yuvireco mbituhusa ari pipe iporombogüera rese tẽi. <sup>17</sup> Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

<sup>18</sup> Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo oyeapo Tũpa nungar, Tũpa uve ‘che Ru’ ohe angahu tẽisa pipe” ehi yuvireco chupe.

### *Tũpa Rahir mborerecuasa*

<sup>19</sup> Evocoiyase Jesús aipo ehi judío upe: “Supi eté aipo ahe: Tũpa Rahir ndoicatui eté mbahe apo oyesui tẽi, Vu rembiapo mbahe oicua; aheño tupri avei oyapo yepi. <sup>20</sup> Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporã, ‘¡Mara ehi rutei co!’ pehe tẽi ãgua chupe. <sup>21</sup> Esepia, che Ru ombogüerayevi omano vahe iyavei omondo tecovesa chupe. Ëgüe ehi avei Tahir omondo tecovesa ava upe güemimbotar rupi. <sup>22</sup> Iyavei Tu nomondo iri ava upe sembiapo repri. Esepia, ombou Guahir upe opacatu pĩratasa ava upe sembiapo repri

mondo āgua. <sup>23</sup> Ēgüe ehi Guahir upe opacatu ava imboetei āgua yuvireco inungar Tu imboetipri. Acoi ava Tahir nombotei vahe, Tu imbousar avei nombotei yuvireco.

<sup>24</sup> “Supi eté aipo ahe pëu: acoi oyapisaca vahe che ñehe rese, viroya vahe avei che mbousar, ahe virecora tecovesa apirëhi vahe; ndahei chietera imocañipri. Esepia, osë manosa sui oipisi tecovesa. <sup>25</sup> Supi eté aicua uca pëu: oura ari imombehupri, cūritei eté co ari oyepota, ava eta omano vahecuer osendura Tūpa Rahir ñehe. Acoi osendu vahe, oicoveño itera. <sup>26</sup> Esepia, Tu vireco tecovesa oyese. Ēgüe ehi avei Guahir upe imondo tecovesa rereco āgua. <sup>27</sup> Ombou avei imborerecua āgua chupe ava recocuer rese iporandu āgua. Esepia, ahe Ava Riquehir secoci. <sup>28</sup> Peyepihamondii rene aipo che hesa sui. Esepia, oyepotara ari imombehupri, ahese opacatu ava omano vahecuer osendura ñehe. <sup>29</sup> Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apirëhi rereco āgua; acoi oyapo vahe rumo mbahe naporai vahe, ocuerayevira yuvireco Tūpa ñemoirosa pisi āgua” ehi Jesús judío rerecuar upe.

### *Jesús omboyecua tupri omborerecuasa*

<sup>30</sup> “Che ndaicutui mbahe apo cheyesui tēi. Che, ‘Pe peyavi vahe mbahe, peipisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo āgua. Che Ru, che mbousar remimbotar rumo ayapo. <sup>31</sup> Que cheyese ae tēi añehese, ahese ndache reroyai chira peye viña. <sup>32</sup> Oime rumo ambuae che mombehusar. Ahe supi eté che mombehu pe seroya āgua; ahe Juan. <sup>33</sup> Pe niha, pemondo ava chupe imbororandu mbahe rese. Ahe semimombehu niha supi tupri vahe ité. <sup>34</sup> Yepe ahe supi eté viña, che rumo ndayeroyai ava tēi che mombehusa rese. Che rumo aipota peñepisiro āgua. Sese aipo ahe pëu. <sup>35</sup> Juan niha inungar tataendi, ēgüe ehi omboyecua mbahe supi eté vahe. Sese pe peyemboviha raimi tēi iporombohesa tesapesa nungar pipe peico. <sup>36</sup> Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo āgua. Co mbahe ayapo vahe, ahe ité omboyecua che Ru Tūpa che mbousar. <sup>37</sup> Iyavei che Ru avei eté che cua ucasar. Ahe ñehe rumo ndapesendui vahe ité, iyavei ahe ndapesepiai eté. <sup>38</sup> Ñehengagüer icuachiapri avei ndoiquei eté pe rese. Ipipe niha ndache reroyai eté peye che Ru che mbose. <sup>39</sup> Pe peicua tupri pota icuachiapri ‘icuapa tupri pipe revo tecovesa apirëhi yarecora’ peye viña. Co rumo cuachiar che mombehu vahe: <sup>40</sup> pe rumo ndapeyu potai eté cheu co tecovesa apirëhi rereco āgua.

<sup>41</sup> “Ndaipisi eté ava che mboeteisa tēi. <sup>42</sup> Iyavei opocua Tūpa ndapesaisuisse. <sup>43</sup> Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyese tēi oñehe vahe, evocoi nungar tēi peroyara. <sup>44</sup> Ndapeicutui eté che reroya āgua peye. Esepia, pe ae tēi peyemboetei; ndapesecai eté Tūpa ñepe vahe suindar yemboeteisa. <sup>45</sup> Ndapepihañemoñetai chira che pe recocuer mombehu āgua rese che Ru rovai. Moisés peroya vahe ité niha oicuachia pe Tūpa reroyañehisa chupe imombehu āgua. <sup>46</sup> Peroyase rumo Moisés ñehe viña, che avei che reroyara peye viña. Esepia, Moisés niha oicuachia che resendar ñehesa.



47 Ndaperoyaise ahe sembicuachía, evocoyase ndapeicatui chietera che remimobehu reroya água” ehi Jesús oamotarêhimbar upe.

## 6

### *Jesús oyopoi cinco mil ava*

1-4 Ipare Pascua pieta ñipiimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoyase oyeupi ivitri rese. Aheve oguapi opacatu güemimbohe eta reseve yuvinoi. 5-6 Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã. 7 Evocoyase Felipe omboyevi chupe:

—Dosciento denario pan ndosupitii chietera que chñhi-chñhimi ava retacuer viña —ehi.

8 Aipo hese, ñepeí semimbohe pãhu pendar, Simón Pedro rivri, Andrés aipo ehi chupe:

9 —Co chñhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

10 Evocoyase aipo ehi:

—Pemomobehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava. 11 Evocoyase oipisi cinco vahe pan, “Aviye ndeu” ohe pare Vu Tüpa upe, opa ombohi-mbohi imondo ava rehii upe. Ëgüe ehi avei pira upe, imondopa semimbotar rupi-rupi yuvireco. 12 Opase ava ihñitaro,

—Pemonuhapa sumbirer iyemombucañhi água —ehi güemimbohe upe.

13 Evocoyase omonuha doce iruova sumbirer yuvireco pan cincomi vahe sui. 14 Evocoyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tüpa ñehe mombehusar ivi pipe” ehi icuachiapri aracahendar pipe —ehi yuvireco.

15 Jesús rumo oicuase ava opiratasa pipe tñi güeraso pota água mborerercuar guasu vireco água oyeupe nara yuvireco, ahese oyeupi iri oso ivate catu. Aheve ahe ae güeco água.

### *Jesús oguata i hari rupi*

16 Pñtu ramose ogüeyi yuviraso Jesús remimbohe ipave, 17 yuviroha carite pipe sasa água yuvireco tecua Capernaum ve yuviraso. Ahese pñtu ité. Jesús rumo ndoyevi vitei eté. 18 Ahese oipeyu pñrata ivitu, i avei ohitu pñrata. 19 Yuviraso pucumi tñi cinco, anise seis kilómetro rupi. Ahese osepia Jesús yuvireco osupiti senise carite. Ahe i hari rupi oguata oso chupe. Evocoyase osiquiye ité yuvireco ichui. 20 Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

21 Evocoyase sorivete yuvireco carite pipe seroha. Iparemi tñi oyepota yuviraso oyuvirasosave.

*Ava eta oseca Jesús*

<sup>22</sup> Ahere ayihive ava rehi opita vahe sovai yuvireco, “Semimbohe año rumo yuviraso ñepe vahe carite pipe. Jesús rumo ndosoi eté güemimbohe rupi” ehi tēi yuvireco. <sup>23</sup> Aheseve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroyeroqui agüer rorovicave. <sup>24</sup> Evocoyase ava rehi oicuase Jesús semimbohe reseve iporēhise yuvireco, yuviroha yuviraso āgua co ambuae carite pipe tecua Capernaum ve seca.

*Jesús, pan nungar, tecovesa apirēhi vahe secoi*

<sup>25</sup> Oyepotase ava rehi ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

<sup>26</sup> Evocoyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi, ndahei co che poromondiisa reroyasave ité peico pota che rupi.

<sup>27</sup> Peoporaviqui eme catu tembihu ndasecosei vahe rese; iyacatu rumo peoporaviqui tembihu secose vahe rese omondo vahe tecovesa apirēhi. Co tembihu che, Ava Riquehir, amondora pēu. Esepia, che Ru Tūpa omboyecua ité che ichuindar aicose —ehi.

<sup>28</sup> Aipo hese,

—¿Mbahe mboraviqui vo oroyapora Tūpa upe? —ehi yuvireco.

<sup>29</sup> —Tūpa oipota pe che reroyara peye che semimbohu che recose —ehi ava eta upe.

<sup>30</sup> Evocoyase,

—¿Mbahe poromondiisa vo eremboyecua irimira oreu orosepia vaherā nde reroya tupri catu āgua? <sup>31</sup> Esepia, aracahe ore ramoi eta yuvirohu ivi iporupirēhisa rupi. Icuachiapri arachendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

<sup>32</sup> —Supi eté amombehu pēu: ndahei Moisés omondo pan iva pendar chupe, che Ru rumo omondo chupe. Cūritei che Ru ombou pēu pan supi eté vahe iva sui. <sup>33</sup> Esepia, co pan ombou vahe Tūpa iva suindar ité. Ahe omondora tecovesa ivi pipendar upe —ehi ava eta upe.

<sup>34</sup> Evocoyase,

—Ore mbohesar, embouño catu co pipe suive aipo pan oreu —ehi yuvireco chupe.

<sup>35</sup> —Che ité ahe pan aico tecovesa mondo āgua. Acoi ou vahe cheu ndiyumbiasi iri chietera iyavei acoi che reroya vahe ndihusei chiaveira.

<sup>36</sup> Aipo ahe niha acoi pēu. Yepe pe che repia peye viña, pe rumo ndache reroyai eté peye. <sup>37</sup> Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui. <sup>38</sup> Esepia, ndayui iva sui mbahe che remimbotar apo āgua tēi; ayu rumo che mbousar porocuita apo āgua. <sup>39</sup> Che Ru che mbousar ndoipotai que ñepe vahe ombou vahe cheu amocañira. Ahe semimbotar rumo che ambogüerayevira ahe ari ipa vahe pipe. <sup>40</sup> Che Ru oipota avei opacatu ava oyeroya vaherā che, Tūpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi —ehi ava eta upe.

<sup>41</sup> Evocoyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese <sup>42</sup> aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe iva sui” ehi no? —ehi yuvireco chupe.

<sup>43</sup> Evocoyase judío eta upe aipo ehi:

—Pepoiño che roeroïrosa sui. <sup>44</sup> Ndipoi chietera que oicatu vahe ou cheu, nomonguerêhiise che Ru che mbousar; omonguerêhi vahe rumo oicatu yugüeru cheu. Ahe ambogüerayevira ari ipa vahe pipe. <sup>45</sup> Tüpa ñehe mombehusar cuachiar pipe aipo ehi: ‘Tüpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

<sup>46</sup> “Ndipoi eté que ñepeï ava osepia vahe che Ru; acoi ichui ou vaheño ité, ahe güeraño tupri ité osepia. <sup>47</sup> Supi eté aipo ahe pëu: acoi che reroya vahe vireco tecovesa apirêhi. <sup>48</sup> Che pan nungar aico amondo vahe tecovesa. <sup>49</sup> Aracahe pe ramoi eta niha yuvirohu ité tembihu maná serer vahe ivi iporupirêhisa rupi. Ahe rumo opa iriño ité omano yuvireco. <sup>50</sup> Che rumo añehe pan ìva sui ogüeyi vahe rese, acoi ava ohu vahe, nomanoi chietera. <sup>51</sup> Ahe pan oicove vahe niha che aico ìva sui ogüeyi vahe; acoi ohu vahe co pan, oicovera apirêhi vahe rã ité. Co pan amondo vahe rã, ahe che rete ité. Ahe amondora ava recocuer rese” ehi judío eta upe.

<sup>52</sup> Aipo hese, judío rerecuar oyecopi-copi yuvireco aipo ehi:

—¿Mara ehira vo aipo co imbou tã güete yande tohu viña? —ehi yuvireco.

<sup>53</sup> —Supi eté aipo ahe pëu: ndapehuisse Ava Riquehir rete, ndapehuisse avei suvi, ndaperecoi chietera tecovesa. <sup>54</sup> Acoi ohu vahe che rete, oihu vahe avei che ruvi, vireco tecovesa apirêhi iyavei che ambogüerayevira ari ipa vahe pipe. <sup>55</sup> Esepia, che rete supi eté vahe tembihu; che ruvi supi eté vahe avei igua. <sup>56</sup> Acoi ohu vahe che rete, oihu vahe avei che ruvi, secoi che rese, che avei aico sese. <sup>57</sup> Che Ru, che mbousar, vireco tecovesa. Ichui che aicove; êgüe ehi aveira che husar che sui yuvirecovera. <sup>58</sup> Añehe pan ìva sui ogüeyi vahe rese. Co pan ndahei maná pe ramoi eta yuvirohu vahe nungar. Esepia, yande ramoi opaño ité omano yuvireco. Acoi ohu vahe rumo co che rete, oicovera apirêhi vahe rã ité —ehi ava eta upe.

<sup>59</sup> Jesús oporombohe co mbahe rese judío ñemonuhasave tecua Capernaum ve.

### *Ñehesa tecove apirêhisa resendar*

<sup>60</sup> Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya água; ¿ava vo viroya tãira viña? —ehi yuvireco.

<sup>61</sup> Jesús rumo oicua voi eté iñehe-ñehe tãise co mbahe rese yuvireco, evocoiyase oporandu:

—¿Pemboasiño tie che ñehe? <sup>62</sup> ¿Mara peyera pãha che repiase peye che, Ava Riquehir, ayeupise che reco agüerve vicho viña? <sup>63</sup> Espiritu ité niha omondo tecovesa; yande retocuer rumo êgüe ehi tã vahe. Co amombehu vahe pëu ahe espiritu iyavei tecovesa. <sup>64</sup> Oime vite rumo amove pe pãhuve ndache reroyai vahe —ehi ava rehi upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarêhimbar upe <sup>65</sup> aipo ehi:

—Sese niha acoi aipo ahe pëu: “Ndipoi chietera que ava ou vahe rã cheu che Ru nomonguerêhiise imbou” ahe —ehi.

<sup>66</sup> Ichuive tupri Jesús rupi uguata vahe setá oseya yuvireco; ndoguata iri eté yuvireco supi. <sup>67</sup> Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

<sup>68</sup> Simón Pedro rumo omboyevi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirêhi vahe. <sup>69</sup> Ore nde reroyasar ité oroico iyavei oroicua nde ndaseco marai vahe, Tüpa supi eté vahe remimbou ereico —ehi Pedro chupe.

<sup>70</sup> —Che niha opoporavo doce peico vahe, ñepeí rumo pe pãhu pendar carugar ité —ehi Simón upe.

<sup>71</sup> Jesús oñehe Simón Iscariote rahir, Judas, rese. Yepe doce semimbohe pãhu pendar viña, ahe rumo omondora ava yamotarêhimbar upe.

## 7

### *Jesús ndoviroyai tivri yuvireco*

<sup>1</sup> Ipape Jesús uguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. <sup>2-3</sup> Virovise judío pieta guasu teyupa apo água yuvireco, aheve tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi uguata vahe avei tosepia poromondiisa nde rembiapo yuvireco. <sup>4</sup> Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

<sup>5</sup> Seroyaêhisave tēi avei tivri aipo ehi yuvireco chupe. <sup>6</sup> Evocoyase vivri upe aipo ehi:

—Ndehi vitei rumo ari che so água. Pe guata água rumo opacatu ariño tēi aviye. <sup>7</sup> Esepia, pe ndape amotarêhi eté ava co ivi pipendar; che rumo che amotarêhi ité yuvireco. Esepia, che amboyecua ité mbahe sembiapo naporai vahe chupe. <sup>8</sup> Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

<sup>9</sup> Evocoyase Jesús opitaño Galilea ve.

### *Jesús oso omu judío eta pietasave*

<sup>10</sup> Vivireta so pare, Jesús avei oso pietasave. Ndoymboyecuai eté rumo ava upe. <sup>11</sup> Judío eta oseca tēi yuvireco pietasave aipo ehi:

—¿Que pãha acoi mbia? —ehi tēi yuvireco.

<sup>12</sup> Ava rehii pãhuve setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tēi vahe ava” ehi yuvireco.

<sup>13</sup> Nomboyecuai eté rumo oñehe yuvireco sese güerecuar sui osiquiyepave.

<sup>14</sup> Pieta mbiterse, Jesús aviyeteramo tēi oi que ava pãhuve tũparo pipe ava mbohe. <sup>15</sup> Judío eta rerecuar evocoyase,

—¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoymbohei vahe niha yande yeroquisave! —ehi tēi yuvireco.

<sup>16</sup> Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—. <sup>17</sup> Que ñepeí pe pãhu pendar oyapo potase Tüpa remimbotar, oicua che porombohesa ndahei vahe che suindar, ahe

Tūpa suindar ité. <sup>18</sup> Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ēgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

<sup>19</sup> “Moisés niha omondo tēi mborocuita pēu. Que ñepepe pe pāhu pendar rumo ndipoi eté omboyero vahe. ¿Mahera ru che yuca pota peye?” ehi.

<sup>20</sup> —iNde erereco carugar ndeyese! ¿Ava vo nde yuca pota? —ehiño ava eta yuvireco chupe.

<sup>21</sup> Aipo ehi ava upe:

—Cuese acoi ayapose mbahe mbituhusa ari pipe, ahese, “iToo, mahera ēgüe ehi!” peyeño acoi cheu. <sup>22</sup> Pe avei rumo amove peporaviqui mbituhusa ari pipe peporombocircuncidase porocuita Moisés omondo vahe reroyasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.) <sup>23</sup> Oyepotase rumo chíhivahe mbocircuncida āgua mbituhusa ari pipe tupri pēu, peyapoño rane ité mborocuita mboaviye āgua. ¿Mahera ru cheuño pemboasi ñepepe mbiā mbituhusa ari pipe ambogüera tupri vahe rese? <sup>24</sup> “Oyavi evocoi” peye voi rene catu ava upe; peicua tupri rane ‘¿supi eté pīha?’ pe yapave —ehi Jesús ava eta upe.

*Jesús oñehe güecocuer Tūpa suindar rese*

<sup>25</sup> Evocoiyase amove Jerusalén pendar mbiā aipo ehi oyeupe yuvireco:

—¿Ndahei vo acoi co oseca tēi yuca āgua yuvireco? —ehi—. <sup>26</sup> Ahe ité co niha co ava pāhuve oñehe oico, ndipoi eté que mara ehi vahe yuvireco chupe. ¿Omoha pīha mborerecuar co mbiā Poropísirosar seco āgua yuvireco? <sup>27</sup> Yande rumo yaicua que sui turi. Acoi ouse rumo Poropísirosar ité coiye, ndipoi chietera que ava oicua vahe iyusa —ehi yuvireco.

<sup>28</sup> Evocoiyase aipo renduse oporombohe vitesevē tūparove, oñehe pīrata aipo ehi:

—iPe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuai vahe. <sup>29</sup> Che rumo aicua ité. Esepia, che ichui ayu iyavei ahe ité che mbou pēu —ehi.

<sup>30</sup> Aipo ihese, oipisi pota yuvireco soquenda āgua viña. Aní eté rumo. Esepia, ndoyepota vitei ihari chupe. <sup>31</sup> Setá iteanga rumo ava viroya iyavei aipo ehi yuvireco:

—Ouse Poropísirosar, ¿oyapo catura pīha mbahe poromondiisa co mbiā sui? —ehi yuvireco.

*Fariseo oyocuai sundao tūparo rārosareta Jesús pisi āgua*

<sup>32</sup> Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omondo sundao tūparo rārosar Jesús pisi āgua yuvireco.

<sup>33</sup> Jesús rumo aipo ehi:

—Aicove vitemira pe rese chíhi rupive. Ipare voi ayevira che mbousar piri vicho —ehi—. <sup>34</sup> Che reca tēira peye, ndapeicatui chietera rumo che reca. Esepia, ndapeicatui chiaveira peso vahe rã che recosave —ehi ava eta upe.

<sup>35</sup> Evocoiyase judío oporandu-randu oyeupe yuvireco:

—¿Que pīha aipo osora yande sui seca iriñhi āgua? ¿Osora tie que amombri yande mu oñemosai vahe pāhu rupi ambuae ava ndahei vahe

yande mu mbohe ägua? <sup>36</sup> ¿Mara oya pñha evocoyase aipo, ‘Che reca tẽira peye, ndapeicatui chietera rumo che reca. Esepia, ndapeicatui chiaveira peso vaheřa che recosave’ ehi yandeu? —ehi-ehi tẽi oyeupe yuvireco.

*Espıritu iai ndopai vahe nungar*

<sup>37</sup> Pieta ipa, ahe imboeteisa catu vahe, ahe ari pipe Jesúś oñehe pĩrata ohã aipo ehi:

—Acoi que ava ihusei vahe, toyugüeru cheu. Che evocoyase tamboihu —ehi—. <sup>38</sup> Esepia, inungar aipo ehi vahe icuachiapri pipe, che reroyasar pñha sui osẽra iai ndopai vahe nungar —ehi.

<sup>39</sup> ‘Che reroyasar oipisira Espıritu curi’ ohesave aipo ehi. Espıritu rumo ndou vitei ahese. Esepia, Jesúś ahese ndoyevi vitei avei güecosa porañetesave.

*Ava rehii oyemboyaho Jesúś recocuer sui yuvireco*

<sup>40</sup> Osenduse ava rehii aipo nungar, amove aipo ehi:

—Supi eté co mbia Tũpa ñehe mombehugar imombehupri ou vahe —ehi yuvireco chupe.

<sup>41</sup> Ambuae aipo ehi:

—Co Poropĩsirosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tẽi oura Poropĩsirosar viña? —ehi—.

<sup>42</sup> Icuachiapri pipe rumo aipo ehi Poropĩsirosar oyesura mborerecuar guasu David sui iyavei ahera Belén pendar, David recua pendar itera —ehi.

<sup>43</sup> Evocoyase ava oyemboyaho-yaho yuvireco Jesúś recocuer sui tẽi.

<sup>44</sup> Amove ava viraso pota tẽi yuvireco soquenda; ndipoi eté rumo ěgüe ehi vahe yuvireco chupe.

*Judío rerecuar ndoviroyai Jesúś yuvireco*

<sup>45</sup> Sundao tũparo rãrosar oyeve yuvireco Jesúś recosa sui. Fariseo eta iyavei pahi eta rerecuar evocoyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

<sup>46</sup> Sundao tũparo rãrosar evocoyase aipo ehi:

—¡Ndipoi eté que ava oñehe vahe ahe mbia nungar! —ehiño yuvireco.

<sup>47</sup> Fariseo eta iyavei mborerecuareta evocoyase aipo ehi yuvireco:

—¿Pe avei eté rumo peyembopa uca chupe? —ehi—. <sup>48</sup> Ndipoi eté niha ore mboetasa mborerecuar iyavei fariseo viroya vahe yuvireco. <sup>49</sup> Co ava rehii tẽi ěgüe ehi yuvireco. Ahe rumo ndoicuai vahe Tũpa porocuita yuvireco, sese iñemoirosavri ve ité yuvirecoi —ehi sundao tũparo rãrosar upe yuvireco.

<sup>50</sup> Evocoyase Nicodemo, acoi oso vahe pĩtu pipe Jesúś piri, ahe avei eté fariseo pãhuve secoi, ahe aipo ehi:

<sup>51</sup> —Yandeundar porocuita mboaviye ägua ndiyai, “Ereyavi mbahe” yahe voiño tẽi que ava mbahe sembiapocuaẽhi vitesese —ehi.

<sup>52</sup> Evocoyase omboyeve yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipipe eresepiara ndipoi eté que ñepei ou vahe Galilea sui Tũpa ñehe mombehugar —ehi mborerecuareta Nicodemo upe yuvireco.

*Cuña oyemboaguasa tẽi vahe resendar*

<sup>53</sup> Ipare opa yuviraso ñepei-pei güeta rupi.

## 8

<sup>1</sup> Jesús rumo oso ivitri Olivo ve. <sup>2</sup> Ahere ayihive cōhese, oyevi tūparove. Ahese opacatu ava oyemboya yuvireco sese. Ahe evocoiyase oguapi oī oporombohe.

<sup>3</sup> Evocoiyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehii rovai, <sup>4</sup> aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepei ava. <sup>5</sup> Moisés porocuita rumo ore cuai co nungar cuña yuca āgua ita pipe. ¿Mara ere vo catu nde co nungar upe? —ehi fariseo eta yuvireco chupe.

<sup>6</sup> Ahe rumo secoãhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyaivi, ombahecuachía ocuã pipe ivi rese. <sup>7</sup> Evocoiyase oporandu vitese ava yuvireco, opūha aipo ehi:

—Que ñepei pe pāhu pendar ndoyemboangaipai vahe, ahe rane toyapi ita pipe —ehi.

<sup>8</sup> Oyaivi iri, ombahecuachía ivi rese. <sup>9</sup> Osenduse rumo judío rerecuareta, omboipi ñepei-pe yuvinose yuvireco, cuacua catu vahe sui rane yuvinose. Opacatu yuvinosepase, Jesús güerañomi cuña rese opita yuvireco. <sup>10</sup> Evocoiyase opūhase, ahese aipo ehi chupe:

—Cuña, ¿que que ru ava? ¿Ndipoi eté que ñepei opita vahe nde mocañi āgua? —ehi

<sup>11</sup> —Aní eté, che Yar, ndipoi eté —ehi.

Evocoiyase aipo ehi chupe:

—Che avei ndoromocañi tēi potai. Sese cūrítei eso, ereyapo iri eme angaipa —ehi cuña upe.

*Jesús tesapesa ava upe secoi*

<sup>12</sup> Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pītumimbisa nungar mbahe-mbahe tēi vahe pipe —ehi.

<sup>13</sup> Evocoiyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyaprii eté —ehi yuvireco chupe.

<sup>14</sup> —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté. <sup>15</sup> Pe peseca ava rembiapo cua tupri āgua ava tēi pihañemoñeta rupi. Che rumo ndayui evocoi nungar mbahe apo. <sup>16</sup> Asecase ava rembiapo cua tupri āgua, ahe supi tupri vahe ité. Esepia, ndahei che ae tēi ēgüe ahe, che Ru, che mbousar rumo secoi che rese. <sup>17</sup> Porocuita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi. <sup>18</sup> Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

<sup>19</sup> Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndaché cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

<sup>20</sup> Jesús aipo ehi tūparo pipe, guarepochi monuhapri riru ipive oporombohe ohā. Ndipoi eté rumo ahese osoquenda vahehā. Esepia, ndoyepota vitei eté ahese ihari chupe.

*Jesús, “Che sosave pe ndapeicatui chira peso” ehi*

<sup>21</sup> Jesús aipo ehi iri:

—Che asose, che reca tēira peye. Pe rumo opara pemanu pe angaipa reseve. Che sosave ndapeicatui chietera peso vaherā —ehi.

<sup>22</sup> Aipo ihese, judío eta aipo ehi yuvireco:

—¿Oyeyucara pīha ahe ae; ayeve pīha aipo ehi yandeu? —ehiño yuvireco chupe.

<sup>23</sup> —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico.

<sup>24</sup> Sese niha acoi aipo ahe pēu: “Pemanopañu itera pe angaipa reseve” ahe. Esepia, ndache reroyaise peye, pe angaipa reseve ité pemanofora —ehi fariseo eta upe.

<sup>25</sup> Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pēu. <sup>26</sup> Setá iteanga areco che ñehe āgua pēu mbahe pe rembiavi rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

<sup>27</sup> Ahe rumo ndosenducuai eté Vu rese iñehese yuvireco. <sup>28</sup> Sese aipo ehi fariseo upe:

—Pesupise rumo Ava Riquehir ivira rese, ahese voi peicua che recocuer, ahese avei peicua cheyesui tēi mbahe ndayapoise; che rumo amombehu che Ru che mbohesa güeraño. <sup>29</sup> Che mbousar niha che rupive ité secoi; ndache reyai eté. Esepia, ayapofuño ité mbahe semimbotar yepi —ehi ava eta upe.

<sup>30</sup> Aipo ihese, setá iteanga ava viroya yuvireco.

*Ava Tūpa rahir ité yuvirecoi vahe iyavei ava angaipa pipe tēi yuvirecoi vahe*

<sup>31</sup> Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remindohe supi eté vahe.

<sup>32</sup> Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

<sup>33</sup> Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

<sup>34</sup> Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvireco. <sup>35</sup> Mbiguai tēi ndahei güerecuar rēta pipe nara ité; tahir rumo opitaño itera güeta pipe nara. <sup>36</sup> Sese Tahir pe renosese mbiguai tēi pe recosa sui, supi eté ndapeico iri mbiguai nungar. <sup>37</sup> Aicua niha Abraham suindar pe recosa. Pe rumo che yuca potañu peye. Esepia, ndaperoyai eté che ñehe. <sup>38</sup> Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

<sup>39</sup> —¿Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. <sup>40</sup> Che rumo, “Tūpa che mbohe mbahe supi eté vahe rese” ahe tēi pēu. Pe evocoyase che yuca potañu ité peye. ¡Abraham rumo ndoyapoi



eté co nungar mbahe! <sup>41</sup> Esepia, pe peyapo mbahe peyesupa rembiapo tēi eté —ehi.

Evocoiyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco.

<sup>42</sup> Evocoiyase aipo ehi co judío eta upe:

—Tūpa ité pe yesupase rumo, che raísura peye viña. Esepia, che ayu Tūpa sui. Sese cūrítei cohave aico. Ndahei cheyesui tēi ayu, Tūpa rumo che mbou. <sup>43</sup> ¿Mahera pīha ndapesenducua catui eté mbahe che remimombehu? Esepia, ndapeyapísaca potai eté che ñehe rese. <sup>44</sup> Peyesupa niha Caruguar ité, sese niha pe ahe tupri avei peico. Peyapo pota mbahe semimbotar tēi. Esepia, Caruguar yipísuive ité oporoyuca serai vahe. Ndoyapoi vahe ité mbahe supi tupri vahe, noñehi avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe. <sup>45</sup> Che rumo añehese mbahe supi tupri vahe rese, ndache reroyai eté peye. <sup>46</sup> ¿Ava pīha pe pāhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoiyase ndache reroyai eté peye? <sup>47</sup> Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

*Poropīsirosar yipive catu vahe Abraham sui*

<sup>48</sup> Evocoiyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, caruguar ité erereco ndeyese —ehi yuvireco chupe.

<sup>49</sup>—Che ndarecoi eté caruguar cheyese. Che rumo che Ru amboetei; pe rumo ndache mboetei eté peye. <sup>50</sup> Iyavei che ndasecai ava che mboetei āgua. Oime rumo ñepe oipota vahe. Ahe niha omondora ava rembiapo repri chupe. <sup>51</sup> Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

<sup>52</sup> Evocoiyase judío omboyevi yuvireco chupe aipo ehi:

—Cūrítei oroicua ité cute nde ererecose caruguar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? <sup>53</sup> ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoiyase eremoha ndeyese! —ehi yuvireco chupe.

<sup>54</sup>—Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. <sup>55</sup> Pe rumo ndapeicuai eté. Che rumo aicua. “Ndaicuai” ahese, evocoiyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe. <sup>56</sup> Esepia, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

<sup>57</sup> Evocoiyase judío eta:

—¿Mara erera vo aipo Abraham repia ndererecomi viteise cincuenta araviter? —ehiño yuvireco chupe.

<sup>58</sup>—Supi eté aipo ahe pēu: che aicove vahe Abraham yesuēhi viteiseve —ehi.

<sup>59</sup> Aipo ihese, oipísipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

## 9

*Jesús ombogüera mbia ohasa suive ndasesapisoi vahe*

<sup>1</sup> Jesús oguatase ocar rupi, osepia mbia ohasa suive ndasesapisoi vahe.

<sup>2</sup> Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoi eté oha? ¿Oyesupa angaipa sui pīha? ¿Oangaipa sui ae tie? —orohe chupe.

<sup>3</sup>—Ndahei eté oangaipa sui, ndahei avei oyesupa angaipa sui; co rumo ĕgüe ehi Tūpa mbahe sese mboyecua āgua. <sup>4</sup> Sese oime vītese ari yandeu che mbousar poraviquisa apo āgua, iya ité ahe yayapo. Esepia, pītura, ahese ndayaicatui chītera mbahe apo. <sup>5</sup> Co ivi pipe che recove vītese rumo, che aico ava upe tesapesa nungar —ehi oreu.

<sup>6</sup> Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese. <sup>7</sup> Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoiyase oso, oyovai. Oyevise ichui, omahe tupri ité. <sup>8</sup> Evocoiyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co uguapi oī guarepochi rese oporandu yepi? —ehi yuvireco.

<sup>9</sup> Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Avīye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

<sup>10</sup> Evocoiyase oporandu yuvireco chupe:

—¿Mara ere vo co esareco? —ehi.

<sup>11</sup>—Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoiyase aso, ayovaise, ahese amahe tupri ité —ehi.

<sup>12</sup>—¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güēta cotindar uve.

*Fariseo oporandu ndasesapisoi vahe cuera agüer rese yuvireco*

<sup>13-14</sup> Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera āgua. Sese vīraso ndasesapisoi vahecuer fariseo eta rovai yuvireco. <sup>15</sup> Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

<sup>16</sup> Evocoiyase ambuae aipo ehi yuvireco chupe:

—Aipo mbia ndahei eté revo Tūpa suindar. Esepia niha, nomboetei eté mbituhusa ari —ehi yuvireco.

Ambuae evocoiyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyeavirati tēi ipīhañemoñetasa. <sup>17</sup> Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pīhañemoñeta co mbia rese? —ehi.

Ahe evocoiyase aipo ehi:

—Che amoha ité Tūpa ñehe mombehúsar secose —ehi.

<sup>18</sup> Ahe fariseo rumo ndoviroyai eté icuerasa yuvireco, oichoho uca rane ité iyesupa yuvireco. <sup>19</sup> Chupe oporandu aipo ehi:

—¿Pe rahir ité vo co? ¿Ndasesapísoi oha? ¿Mara ehi vo co cūrítei osareco no? —ehi iyesupa upe yuvireco.

<sup>20</sup> —Ore rahir ité niha co, ndasesapísoi oha. <sup>21</sup> ¿Mara ehi vo catu co cūrítei osareco? iyavei ¿ava vo catu ombogüera? ¡Ndoroicuai eté! Peporandu chupe. Ocuacua niha; ahe ae oicua ucara pëu —ehiño iyesupa yuvireco fariseo upe.

<sup>22</sup> Iyesupa rumo osiquiyepave tēi aipo ehiño yuvireco. Esepia, fariseo opa ité oyemoingatu yuvireco ava “Jesús Poropísirosar secoi” ehi vahe oñemonuhasa sui ñepeí reseve imombo água. <sup>23</sup> Sese niha iyesupa aipo ehiño yuvireco: “Peporandu chupe. Ocuacua niha” ehiño.

<sup>24</sup> Evocoyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tūpa rovaque mbahe supí tupri vahe. Esepia, ore oroicua ité evocoi mbia angaipa viyar seco rese —ehi.

<sup>25</sup> Ahe evocoyase omboyeví chupe:

—Che ndaicuai eté angaipa viyar tie revo. Co güeraño catu che aicua: che ndacheresapísoi vahecuer aico; cūrítei rumo asareco —ehi.

<sup>26</sup> Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

<sup>27</sup> —Amombehu niha acoi pëu. Pe rumo ndache reroyai eté peye. ¿Mahera vo peipota amombehu vite vaheṛã pëu? ¿Pe avei tie peguata pota supí? —ehi fariseo eta upe.

<sup>28</sup> Ahese oñehe rai tēi yuvireco chupe:

—Nde ahe mbia rupindar tēi ereico. Ore rumo yande ramoí aracahendar Moisés rupi oroguata vahe. <sup>29</sup> Esepia, oroicua ité Tūpa oñehese Moisés upe. Aipo mbia rumo ndoroicuai eté que sui osē —ehi yuvireco chupe.

<sup>30</sup> —¡Mara peye rutei pe ndapeicuai que suindar ahe! Che rumo che mbosareco. <sup>31</sup> Supí eté, yaicua Tūpa ndosendui eté ava angaipa viyar ñehe; ava omboeteisar iyavei viroyasar ñehe güeraño ité niha osendu.

<sup>32</sup> Esepia, ndipoí eté que avaño tēi ava oyesu sui ndasesapísoi vahe ombogüera vahe. <sup>33</sup> Ahe rumo ndaheise Tūpa suindar ou vahe viña, ndoicatui chietera revo mbahe apo viña —ehi fariseo eta upe.

<sup>34</sup> Evocoyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

Ipape omose ñepeí reseve oñemonuhasa sui yuvireco.

*Jesús reroyasarēhi ndasesapísoi vahe nungar tēi*

<sup>35</sup> Jesús oicua ndasesapísoi vahecuer mombosa. Vupitise aipo ehi chupe:

—¿Ereyeroya nde Ava Riquehir rese? —ehi.

<sup>36</sup> Mbia evocoyase aipo ehi chupe:

—Che mbohesar, emombehumi cheu; tayeroya catu ru sese —ehi.

<sup>37</sup> —Eremahe niha co sese; che ité ahe aico —ehi ndasesapísoi vahecuer upe.

<sup>38</sup> Evocoyase mbia oñenopiha sovai:

—Oroviroya, che Yar —ehi chupe.

<sup>39</sup> Ichui aipo ehi:

—Che ayu co ivi pipe mbahe supi tupri vahe apo ãgua; ava ndasesapisoï vahe nungar upe mbahe supi eté vahe che Ru suindar mboyecua ãgua iyavei ava oicua tēi vahe mbahe Tūpa suindar mboesapisoēhi iri ãgua — ehi.

<sup>40</sup> Evocoyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapisoï vahe nungar oroico? —ehi.

<sup>41</sup> Evocoyase omboyevi ahe fariseo upe:

—Peicose ndasesapisoï vahe nungar viña, “Peyavi mbahe” ndehi chitera Tūpa pe angaipa rese pēu viña. Pe rumo, “Ore oroicua tupri Tūpa suindar mbahe” peye tēi. Sese Tūpa, “Peyavi mbahe” ehi eté pēu —ehi Jesús fariseo eta upe.

## 10

### *Jesús ovesa rãrosar nungar*

<sup>1</sup> “Supi eté aipo ahe pēu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. <sup>2</sup> Oique vahe rumo oquendipi rupi eté, ahe sãrosar ité secoi. <sup>3</sup> Oquendipi rãrosar omboi chupe. Evocoyase ovesa rãrosar oñehe serer rupi güeimba ovesa upe senose ãgua sēta sui. Ahe evocoyase oicua iñehe yuvireco. <sup>4</sup> Güeimba ovesa renose pare uguata senonde; seimba ovesa evocoyase uguata saquicuerive. Esepia, oicua ité iñehe yuvireco. <sup>5</sup> Ndoguatai eté rumo oyarēhi rupi yuvireco; yuvinoña-noñaño ichui. Esepia, ndoicuai eté iñehe” ehi <sup>6</sup> omboyoya güecocuer ovesa rãrosar rese. Ava rumo ndosen-ducuai eté yuvireco.

### *Jesús ava rãrosar aviye vahe*

<sup>7</sup> Evocoyase Jesús aipo ehi iri: “Supi eté, aipo ahe pēu: che año ité oquendipi nungar aico ovesa upe. <sup>8</sup> Opacatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. <sup>9</sup> Che rumo oquenda nungar aico. Acoi oique vahe che rupi, ahera ipisiropirã yuvirecoi. Iyavei inungar acoi ovesa oique vahe güeta pipe, ichui osē capihi reca ãgua igua yepi, ēgüe ehira che reroyasar yuvireco.

<sup>10</sup> “Imonda rai vahe rumo omonda ãgua tēi ou, oporoyuca ãgua, mbahe mocañi ãgua tēi avei. Che rumo ayu ‘tovireco ava tecovesa ndopai vahe rã ité yuvireco’ viya. <sup>11</sup> Che ité ava rãrosar aviye vahe aico. Sese ayemoingatu tupri che recocuer mondo ãgua ava cheundar repirã; <sup>12</sup> acoi guarepochi repirã tēi oporaviqui vahe rumo, osepiase mahembiar oñaro ai vahe, oseyapaño güemiaro, oña oso. Esepia niha, ovesa ndahei eté seimba, ndahei avei eté ahe sãrosar ité secoi. Evocoyase mahembiar oñaro ai vahe omondi-mondii eté ipisi ãgua. <sup>13</sup> Evocoi mbia oñaño. Esepia, guarepochi repirã tēi oporaviqui. Sese niha ndosaisui eté güemiaro ovesa.

<sup>14-15</sup> “Che rumo ava rãrosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco. <sup>16</sup> Areco avei ambuae ité che reimba ovesa. Ahe avei aru pota che mboyeroya vahe rã yuvireco. Ahese ñepeï reseve guasu che remiaro yuvirecoira.

<sup>17</sup> “Che Ru niha che raisu ité. Esepia, amondo itera che recocuer manosave. Ipape rumo acuerayevira. <sup>18</sup> Ndoicatui chira ava ahe ae tēi che yuca āgua; che teieté rumo amondora che récocuer che remimbotar rupi eté. Che areco ité pīratasa imondo āgua, che cuerayevi iri āgua avei. Sese ité niha che Ru che cuai” ehi güemimbohe eta upe.

<sup>19</sup> Osenduse judío eta aipo nungar ñehesa, opa ipihañemoñeta yoavirati yuvireco. <sup>20</sup> Setá iteanga ipāhu pendar aipo ehi:

—¿Mahera vo co pemboyero? Vireco ité carugar oyese, ndayaracuai eté —ehi yuvireco chupe.

<sup>21</sup> Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? —ehi amove judío yuvireco Jesús upe.

*Judío rerecuar ndoyambotai Jesús yuvireco*

<sup>22</sup> Ari sōhisa vahe pipe tecua Jerusalén ve tūparo rovasagüer pieta oyepota. <sup>23</sup> Ahese Jesús oguata oico tūparo Salomón oyapo vahacuer rocupe ivii rupi. <sup>24</sup> Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tuprira Poropisīrosar nde recosa oreu? Emombehu tupri catu ñepe reseve oreu —ehi yuvireco chupe.

<sup>25</sup> —Amombehu niha acoi pēu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropisīrosar che recosa; <sup>26</sup> pe rumo ndache reroyai eté peye. Esepia, pe ndahei eté che remiaro ovesa peico. <sup>27</sup> Che remiaro ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. <sup>28</sup> Amondo avei tecovesa apirēhi yuvireco chupe icañiēhi āgua; ndipoi chietera que ava vīrocua iri vaherā che sui. <sup>29</sup> Che Ru niha ombou cheu. Esepia, ahe ipīrata catu opacatu ava sui. Ndipoi chietera que ñepe ava oicatu vahe serocua che Ru sui. <sup>30</sup> Che Ru iyavei che oroico ñepeñio ité —ehi judío rerecuareta upe.

<sup>31</sup> Aipo ihese, judío rerecuareta osupipa iri ita yuvireco yapi āgua. <sup>32</sup> Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pīratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

<sup>33</sup> Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ēgüe orohera ndeu. Esepia, nde ereñehe rai tēi Tūpa rese. Nde moco ava tēi ereico. Nde rumo ereyeapo Tūpa ndeyeupe ae —ehi yuvireco chupe.

<sup>34</sup> Evocoyase aipo ehi ahe ava upe:

—Pēundar mborocuaita icuachiapri pipe niha aipo ehi: ‘Che aipo ahe pēu: pe tūpa pāve ité peico’ ehi. <sup>35</sup> Yaicua niha icuachiapri pipendar ndiyai yayamotarēhi. Esepia, Tūpa aipo ehi: ‘Pe tūpa pāve ité peico’ ehi evocoi ava oñehe pīsīsar upe. <sup>36</sup> Che niha che Ru Rembiporavo aico. Ahe che mbou co ivi pipe. ¿Mahera ru evocoyase, ‘Nde ereñehe rai tēi Tūpa rese’ peye cheu, ‘Che Tūpa Rahir aico’ ahese pēu? <sup>37</sup> Esepia, acoi ndayapoise mbahe che Ru remimbotar, ahese ndache reroyai chietera peye viña. <sup>38</sup> Yepe ndache reroyai chira che recocuer rese peye viña,

mbahe ayapose rumo ahe tēi peroyara. Sese tapeicua ñepeí reseve che Ru secoise che rese iyavei che sese che recosa —ehi oamotarēhimbareta upe.

<sup>39</sup> Osoquenda pota iri yuvireco viña; Jesús rumo osoño ipāhu sui.

<sup>40</sup> Oyevi iai Jordán rovai. Aheve acoi Juan yipindar oporoāpiramo. Aheve opita. <sup>41</sup> Ava rehii yuviraso sepia, aipo ehi yuvireco:

—Yepe Juan ndoyapoí mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

<sup>42</sup> Setá iteanga ava Jesús viroya yuvireco aheve.

## 11

*Lázaro mano agüer*

<sup>1</sup> Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve. <sup>2</sup> Ahe María, oipiyere vahe mbahe siacua vahe yande Yar pi rese. Ipare oiquti oha pipe. <sup>3</sup> Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

<sup>4</sup> Ahe osenduse aipo ehi:

—Co mbaherasisa rumo ndahei ahe imano água ité. Ëgüe ehi rumo Tüpa reco porañetesa mboyecua água iyavei Tahir reco porañetesa mboyecua água avei —ehi.

<sup>5</sup> Yepe osaisú iteanga Marta icupihir reseve iyavei iquivri Lázaro viña, <sup>6</sup> oyanduse rumo Lázaro mbaherasisa, opita viteño ité ñuvirío ari güecosave. <sup>7</sup> Ipare omombehu ore supi oroico vahe upe:

—Yayevi iri ivi Judea rupi —ehi.

<sup>8</sup> Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cūritei co ereso pota iri aheve? —orohe chupe.

<sup>9</sup> Oreu rumo aipo ehi:

—Ñepeí ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa; <sup>10</sup> acoi oguata vahe rumo pítu pipe, oyepiapi eté. Esepia, ipane tesapesa chupe —ehi oreu.

<sup>11</sup> Ipare aipo ehi:

—Yande mboripar Lázaro oque tēi. Che rumo amomahera —ehi.

<sup>12</sup> Evocoyase ore aipo orohe chupe:

—Ore Yar, oque tēise, ocuerara —orohe.

<sup>13</sup> ‘Omano ité’ oyapave tēi aipo ehi. Ore rumo orepihañemoñeta: “Oque tēi revo” orohe chupe viña. <sup>14</sup> Ipare rumo omombehu tupri ité aipo ehi oreu:

—Lázaro omano ité. <sup>15</sup> Aviharete che ndaicoise aheve. Esepia, Ëgüe ehise ité aviye catura pēu pe che reroya água. Yaso ru catu sepia —ehi oreu.

<sup>16</sup> Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaherã supi —ehi.

*Jesús cuerayevisa secoi iyavei tecovesa*

<sup>17-18</sup> Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orendu “cūritei irungatu ari opa Lázaro ñire” ehi vahe. <sup>19</sup> Setá judío yuviraso Marta iyavei María piri

iquivri mano agüer sui imbovîha âgua. <sup>20</sup>Oicuae Marta Jesús yepota seni, oso voi eté sapeve; María rumo opitaño oi pipe. <sup>21</sup>Evocoyase Marta aipo ehi voi chupe:

—Che Yar, ehi cohava ereicose, nomanoi chietera revo ore quivri viña. <sup>22</sup>Che rumo aicua Tûpa omboura opacatu nde porandusa ndeu —ehi Marta chupe.

<sup>23</sup>—Nde quivri rumo ocuerayevi irira —ehi Marta upe.

<sup>24</sup>—Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

<sup>25</sup>—Che niha cuerayevisa aico iyavei tecovesa. Acoi ava che reroya vahe, yepe omano taira viña, oicoveño itera rumo. <sup>26</sup>Acoi che reroya vahe güecoveseve, nomanoi chietera. ¿Ereroya aipo che hesa? —ehi Marta upe.

<sup>27</sup>—Oroviroya ité, che Yar. Nde niha Poropîsirosar ereico Tûpa Rahir, ore remiaro ereyu vahe rã co ivi pipe oreu nara —ehi Marta Jesús upe.

*Jesús oyaseho Lázaro ruvîpa rovai*

<sup>28</sup>Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohava, “Tou” ehi ndeu —ehi chupe.

<sup>29</sup>Evocoyase María oso voi eté sepia. <sup>30</sup>Jesús rumo ndoique vitei eté tecua pipe; Marta rese oyoepiasave viteño ité seci. <sup>31</sup>Osepiase María sê poyava, judío eta sêtave yuvirecoi vahe imbovîhasar yuviraso voi saquicuerive, “Oquivri ruvîpave revo osora oyaseho” ehi yuvireco viña.

<sup>32</sup>Evocoyase María oyepotase chupe, oñenopiha sovai aipo ehi:

—Che Yar, ehi revo ereicoveño itese cohava, che quivri nomanoi chietera viña —ehi María chupe.

<sup>33</sup>Osepiase María yaseho iyavei judío eta yuviraso vahe supi, opiha pipe oyandu ité oviharêhisa. <sup>34</sup>Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

<sup>35</sup>Ahese Jesús oyaseho. <sup>36</sup>Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

<sup>37</sup>Ambuae rumo ipãhu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatui chira pîha Lázaro manoêhi âgua mbahe apo cuese rahe viña? —ehi yuvireco.

*Lázaro mbogüerayevi agüer*

<sup>38</sup>Jesús oyemboya suvîpave oviharêhisa pipe; ahe suvîpa ita hopri, sovapisa ita avei.

<sup>39</sup>—Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

<sup>40</sup>—¿“Che reroyase eve, Tûpa pîratasa eresepiara” ndahei vo acoi ndeu? —ehi Marta upe.

<sup>41</sup>Aipo ihe pare, vîrocua ita yuvireco ichui. Evocoyase omahe iva rese aipo ehi:

—Che Ru, “Aviye ndeu” ahe ndeu. Esepia, eresendu che ñehe. <sup>42</sup>Che aicua nde eresenduño ité che ñehe yepi, che rumo aipo ahe co ava eta

rembiepiave ‘toviroya avei nde che mbousa co ivi pipe yuvireco’ che yapave —ehi.

<sup>43</sup> Aipo ohe pare, oñehe pĩrata aipo ehi:

—¡Lázaro, esẽ eipeve sui! —ehi.

<sup>44</sup> Omano vahe evocoyase osẽ voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

*Judío rerecuareta oyemomborandu Jesús pisi ãgua yuvireco*

<sup>45</sup> Osepiase co poromondiisa, judío eta yuviraso vahe María rupi setá ité Jesús viroya yuvireco. <sup>46</sup> Ipãhu pendar rumo moviro yuviraso voi ava fariseo rerecuareta uve sembiapo mombehu ãgua. <sup>47</sup> Evocoyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico.

<sup>48</sup> Ndayayapoise mbahe chupe, opacatu tiẽte ava viroyara yuvireco viña iyavei avieteramo mborerecuar Roma iguar yanduse, yugüerura yande tũparo mondurupa iyavei omocañi tẽi uca aveira yande recua yande sui —ehi oyeupe yuvireco.

<sup>49</sup> Ñepeí rumo mbia ipãhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, <sup>50</sup> ndapesenducuai avei co tecocuer; aviye catura ñepeí mbia omanose yande recocuer rese, ndahei que opacatu yande mocañi tẽi ãgua —ehi omboetasa eta upe.

<sup>51</sup> Ahe rumo ndahei oyesui tẽi aipo ehi; Tũpa ité aipo ombohe uca. Esepia, ahe ité mborerecuar guasu chini ahese. Sese aipo ehi: “Jesús omanora yande recocuer rese” ehi. <sup>52</sup> Iyavei ndahei chira ahe ava reseño, omanora opacatu ava Tũpa Rahir oñemosai tẽi vahe ñepeí reseve imonuha ãgua. <sup>53</sup> Ègüe ehi ahe ari pipeve judío eta rerecuar oyemoin-gatupa voi yuca ãgua yuvireco.

<sup>54</sup> Sese ndoguata iri ava judío eta pãhu rupi. Ahe rumo osẽ ivi Judea sui, oso ivi iporupirẽhi vahe rerovicave, tecua Efraín ve. Aheve opacatu oropita supi.

<sup>55</sup> Virovise judío Pascua pieta apo ãgua, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei ãgua renondeve. <sup>56</sup> Oseca tẽi Jesús yuvireco. Ipare tũparove yuviroiquese, oporandu-randu oyeupe yuvireco:

—¿Mara peye pe, oura pĩha pieta repia, aní chira tie? —ehi-ehi oyeupe yuvireco.

<sup>57</sup> Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi ãgua” ehi yuvireco chupe.

## 12

*Ñepeí cuña omondo Jesús rese mbahe siacua vahe*

<sup>1</sup> Seis ari ipane vitese Pascua pieta ãgua, Jesús oso tecua Betania ve, aheve acoi Lázaro ombogüerayevi. <sup>2</sup> Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri. <sup>3</sup> Evocoyase María güeru medio litro mbahe siacua vahe nardo, sepí iteanga vahe. Omondo ipi rese. Ipare oiquiti ohavapri pipe ichui. Siacúa iteanga evocoyase opacatu oi pipe. <sup>4</sup> Evocoyase ore



mboetasa Judas Iscariote, ahe acoi omondo vaheerã ava yamotarẽhimbar uve, aipo ehi:

<sup>5</sup>—¿Mahera vo ndimondosai co mbahe sãacua vahe tresciento denario rupi ava iparaisu vahe pĩtivĩi ãgua? —ehi.

<sup>6</sup>Judas rumo ndahei ava iparaisu vahe raĩsupave aipo ehi. Ahe rumo imonda rai vahe tẽi. Setã rupi guarepochi virocua güembiporugã tẽi.

<sup>7</sup>Evocoiyase Jesús aipo ehi:

—Toyapoño cheu. Esepia, ahe che mano ãgua renonde ãgüe ehi cheu.

<sup>8</sup>Yuvirecoveño itera ava iparaisu vahe pe pãhuve yepi; che rumo ndaico pucu iri chira pe pãhuve —ehi Judas upe.

*Pahi rerecuar oyamotarẽhi Lázaro yuvireco*

<sup>9</sup>Setã iteanga ava judío oyandu yuvireco Jesús rerãcua Betania ve secoise. Sese yuviraso aheve; ndahei Jesús repia güeraño yuviraso, ãgüe ehi rumo imbogüerayevipri Lázaro repia avei. <sup>10</sup>Evocoiyase pahi rerecuar, “Yayuca avei Lázaro” ehi yuvireco oyeupe. <sup>11</sup>Esepia, ahe ichui tẽi niha setã iteanga judío oyepepi pahi rerecuar sui Jesús reroya ãgua yuvireco.

*Jesús oi que Jerusalén pipe*

<sup>12</sup>Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota ãgua ahe tecuave yuvireco. <sup>13</sup>Ahese oyasia pindo yuvireco. Oyacatu viraso Jesús rovaichi ãgua, osapucaĩ yuvireco chupe:

—¡Imboeteipri, sovasapri secoi ou vahe yande Yar Tũpa rer pipe! ¡Tũpa tosovasa Israel rerecuar guasu! —ehi yuvireco.

<sup>14</sup>Yipindar rumo opa Jesús oseca uca guaricumĩ. Ipare oyeupi sese icuachiapri aracahendar rupi tupri ité aipo ehi vahe:

<sup>15</sup>“Pesiquiyei rene, Sión pendar; pesepia, pe rerecuar guasu guaricumĩ harive ou pẽu” ehi.

<sup>16</sup>Yipindar, ore semimbohe eta, ndorosenducuai eté co aracahendar imombeupri. Ipare rumo oyevise güecosa porañetesave, ahese orema-henduha aracahendar sesendar icuachiapri rese, “Supi eté omombehu” orohe tẽi sepiase.

<sup>17</sup>Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco. <sup>18</sup>Sese ava eta yuvinoso voi sovaichi ipisi ãgua. Esepia, oicua ité ahe mbahe poromondãsa guasu yapose yuvireco. <sup>19</sup>Evocoiyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, jopacatu guasu ité ava oguata cũritei yuvireco supi! —ehi yuvireco.

*Oime griego oseca vahe Jesús yuvireco*

<sup>20</sup>Griego oime ava rehii pãhuve yuviraso vahe pieta repia Tũpa mboetei ãgua tecua Jerusalén ve. <sup>21</sup>Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

<sup>22</sup>Felipe evocoiyase oso imombehu Andrés upe; ichui yuviraso ñuvirío voi Jesús upe imombehu. <sup>23</sup>Evocoiyase chupe aipo ehi:

—Oyepota ari cheundar che, Ava Riquehir, che yevi iri ãgua che recua porañetesave. <sup>24</sup>Supi eté aipo ahe pẽu: inungar acoi trigo rãhii nañotisaise, ahese ndihai chietera; ñotise rumo, ahese iha vaira. <sup>25</sup>Acoi

ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pīpendar tēi che recocuer rese, evocoi nungar virecora tecovesa apirēhi. <sup>26</sup> Acoi ava che mboyeroya pota vahe, toguata che rupi yuvireco. Esepia, acoi che mboyeroysar yuvirecoi vahe, ahe avei yuvirecoira che piri ivave. Che Ru Tūpa evocoiyase omboeteira ahe sereco —ehi chupe.

*Jesús omombehu omano āgua*

<sup>27</sup> “¡Cūrítei ayandu ité mbahe-mbahe tēi oime vaheṛā cheu! ‘¿Mara ahera pīha?’ ahe tēi. ¿Aipo ahera: ‘Che Ru, che pīsīro eve cūrítei cheu oime vaheṛā mbahe tēi sui’ ahera viña? ¡Che rumo aicua evocoi nungarā ité ayu! <sup>28</sup> Che Ru, emboyecua nde pīratasa nde rer porañetesa mboetei āgua” ehi oyeroku.

Ichui oyeendu i va sui ñehesa aipo ehi vahe: “Ēgüe ahe niha amboyecua che pīratasa vichico, ēgüe ahe iri aveira” ehi.

<sup>29</sup> Aheve ava yuvirecoi vahe, “Osunu revo” ehi yuvireco viña; ambuae ava,

—Tūpa rembiguai revo oñehe Jesús upe —ehi yuvireco.

<sup>30</sup> Evocoiyase aipo ehi ava eta upe:

—Ndahei cheundar ñehesa pesendu, ahe rumo pēundar. <sup>31</sup> Cūrítei oimera ñemoirosa co ivi pīpendar ndache reroyai vahe upe, cūrítei avei imombosara Carugar co ivi pīpendar imborerecuasa sui. <sup>32</sup> Acoi che rupise ivate, opacatu ava arura cheyeupi —ehi.

<sup>33</sup> Aipo ñehesa pīpe omboyecua tupri ité mara ehira omano. <sup>34</sup> Aipo ihese ava eta aipo ehi:

—Ore rumo orosendu mborocuaita icuachiapri pīpe aipo ehi vahe: “Poropīsīrosar apirēhi vaheṛā ité” ehi. ¿Mahera ru aipo nde: “Ava Riquehīr osupira ivate yuvireco” ere no? ¿Uma ru aipo Ava Riquehīr; ambuae tie? —ehi ava eta yuvireco chupe.

<sup>35</sup> Evocoiyase aipo ehi ava upe:

—Pe pereco vitemira chíhi rupive tesapesa pe pāhuve. Peguata catu supi seime viteseve. Aviyeteramo pe resapiha tēira pītumimbi vahe. Esepia, acoi oguata vahe pītumimbisa rupi, ndoicuai que güecosa. <sup>36</sup> Peroya co tesapesa cūrítei pereco viteseve, ipipe ité pe reco āgua —ehi.

Aipo ohe pare, Jesús osē ava rehī pāhu sui; ndoyemboyecua iri chupe.

*Setá judío rerecuar ndoviroya vitei eté Jesús yuvireco*

<sup>37</sup> Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. <sup>38</sup> Esepia, imboaviyesa rane itera Tūpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pīratasa eremboyecuase chupe” ehi.

<sup>39</sup> Co rese avei ava ndoicatui eté senducua yuvireco. Inungar oicuachía Isaías aipo ehi:

<sup>40</sup> “Tūpa nomboesapīsoi ava iyavei nombopihañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera āgua” ehi.

<sup>41</sup> Isaías aipo ehi. Esepia, osepia ité Jesús reco porañetesa. Evocoiyase ahe oñehe sese.

<sup>42</sup> Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepeí reseve yuvireco’ oya.  
<sup>43</sup> Esepia, ahe oipota catu ava tēi suindar yemboeteisa Tūpa suindar yemboeteisa sui yuvireco.

*Jesús ñehe reroyasa rese porandusara*

<sup>44</sup> Yipindar rumo, Jesús oñehe vitesa ava rehii upe, oñehe pĩrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. <sup>45</sup> Iyavei acoi che repia vahe, che mbousar avei osepia. <sup>46</sup> Che tesapesa aico. Ayu co ivi pipe ava che reroyasar pĩtumimbisave yuvirecoiēhi āgua. <sup>47</sup> Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi āgua, che rumo ayu ipisiro āgua. <sup>48</sup> Acoi ava che roeroiro vahe, ndoviroyai vahe avei che ñehe, oime rumo imocañi āgua: Co che ñehesa supi eté vahe reroyaēhisa pipe oyemocañi ucara ari ipa vahe pipe. <sup>49</sup> Esepia, che nañehei eté cheyesui tēi; che Ru, che mbousar rumo che cuai che ñehe āgua, che porombohe āgua avei. <sup>50</sup> Che aicua co cheundar porocuita güeru tecovesa apirēhi ava upe. Sese niha amombehu che Ru che cuaisa” ehi Jesús ava rehii upe.

## 13

*Jesús oyosei güemimbohe pi*

<sup>1</sup> Pascua pieta renonde Jesús oicua ité ohari yepota co ivi reya āgua oso vaherā Vu pĩri. Ahe osaisa vahe ité ava oyeupendar co ivi pipe yepi. Ēgüe ehi saisu ari ipa vahe rupi.

<sup>2-4</sup> Carugar oi que ité Simón rahir, Judas Iscariote, piha pipe imondo āgua yamotarēhimbar uve. Jesús rumo oicua ité Vu Tūpa sui ousa, oicua avei oyevi iri āgua Vu Tūpa pĩri iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opūha, osequi oturucuar yohasa. Ipare omonde ambuae turucuar vumbicuasa rese. <sup>5</sup> Evocoyase omondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

<sup>6</sup> Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

<sup>7</sup> —Nde rumo nderesenducuai mbahe che rembiapo cūritei. Ipare rumo eresenducua —ehi Pedro upe.

<sup>8</sup> Pedro rumo aipo ehi chupe:

—¡Che pi rumo nderoyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro upe.

<sup>9</sup> Pedro evocoyase aipo ehi:

—¡Che Yar, aní catu che pi año ereyosei; eyosei che po, che rova avei! —ehi chupe.

<sup>10</sup> —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ēgüe peye ndipoi eté mbahe pe rese; ndaopacatui rumo ēgüe peye —ehi.

<sup>11</sup> Ahe aipo ehi: “Ndaopacatui rumo ēgüe peye” ehi. Esepia, oicua ité uma omondora yamotarēhimbar upe.

12 Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pëu? —ehi—. 13 Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. 14 Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepeí-peí peyacatu peyosei aveira pe pi. 15 Che niha ‘na tehi avei yuvireco’ viya opombohe pe rereco, ãgüe ahe pëu. 16 Supi eté aipo ahe pëu: ava mbiguai tãí, ahe ndahei ivate catu güerecuar sui; ãgüe ehi avei imbouprí ndahei ivate catu secoi ombousar sui. 17 Pesenducuae co nungar mbahe, peyapo tuprise, ahese peviharete catura peico —ehi.

18 “Che nañehéi opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarëhi’ ehi vahe. 19 Senondeve amombehu pëu. Evocoiyase ãgüe ehise ité cheu, che reroyara peye che ité niha aipo ahe vahe vichico. 20 Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

*Jesús omombehu: “Ñepeí pe pãhu pendar che mondora che amotarëhimbar upe” ehi*

21 Aipo ohe pare, Jesús ndoyembovihal eté iyavei mbahe oime vaherã omboyecua tupri ité,

—Supi eté aipo ahe pëu: ñepeí pe pãhu pendar che mondora che amotarëhimbar upe —ehi.

22 Evocoiyase ore oromahe-mahe tãí oreyese, “¿Ava upe pãha aipo ehi?” orohe tãí oreyeupe. 23 Che sembiaisu catu yípive acaru vïte.

24 Ipare Pedro oyaiti-iti ‘¿Ava upe vo aipo ere? tehi chupe’ oyapave cheu.

25 Evocoiyase che asiri catu irimi yípive, aporandu chupe:

—Che Yar, ¿ava ité vo? —ahe.

26 Ahe aipo ehi cheu:

—Cüritei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaquí pan rahicuer imondo Simón Iscariote rahir, Judas, upe. 27 Judas oipisise pan, oguapi voi eté Carugar sese. Evocoiyase aipo ehi Judas upe:

—Evocoi ereyapo pota vahe, eyapo voïño ité ru —ehi chupe.

28 Que ñepeí rumo mesave orocarú vahe, ndorosenducuai eté aipo ihesa. 29 Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “‘Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

30 Pan pisi pare, Judas osë voi eté oso pïtuse.

*Porocuaíta ipiasu vahe*

31 Judas sã pare, Jesús aipo ehi:

—Cüritei oyecuará che, Ava Riquehir, reco porañetesa. Che Ru Tüpa reco porañetesa avei oyecuará che rese. 32 Acoi amboyecuae che Ru Tüpa reco porañetesa, ahe avei omboyecuará che reco porañetesa, ãgüe ehira imboyecua pihaivi. 33 Che rahireta, che rembiaisu, ndaico pucu iri chira pe rese. Che reca tãira peye; inungar acoi judío rerecuar upe aipo ahe: “Ndiyái chiertera peso che sosave” ahe. 34 Sese co amondo

porocuaíta ipiasu vahe pëu ñepei-peí peyeaisu água inungar che opoaisu.  
<sup>35</sup>Pe yeaisuse ñepei-peí, opacatu tupri ité ava oicua ra yuvireco che remimbohe supí eté pe recosa —ehi.

*Jesús, “Ndaicuai eté co mbia’ erera cheu” ehi Pedro upe*

<sup>36</sup>Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyeví Pedro upe:

—Cūrítei ndiyai peso vahe rã che sosave che rupi; pesorera rumo che rupi curí —ehi.

<sup>37</sup>—Che Yar, ¿mahera ru cūrítei voi ndiyai nde rupi che so água? ¡Ayemoingatu ité amano vahe rã nde rese! —ehi Pedro chupe.

<sup>38</sup>—¿Supí eté pñha ereyemoingatu ité che rese nde mano água? Nde rumo cõhe potase tacura ñehe renondeve, mbosapí oyupagüer rupi, “Ndaicuai eté co mbia” erera cheu —ehi Pedro upe.

## 14

*Jesús, Tũpa raper yandeu*

<sup>1</sup>Ipape Jesús aipo ehi opacatu oreu: “Pepihañemoñeta atii rene; peyeroya Tũpa rese, che rese avei peyeroya. <sup>2</sup>Esepia, che Ru rêtave setá oime pe reco água; êgüe ndehise rumo, namombehui chira aipo pëu viña. Sese che asora pe recuarã moingatu. <sup>3</sup>Imoingatu pare ayevira pe reca che recosave pe reraso água cheyepiri. <sup>4</sup>Pe peicua que vo asora iyavei peicua mara peyera pe yepota água che recosave” ehi oreu.

<sup>5</sup>Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so água? —ehi.

<sup>6</sup>—Che niha perí aico supí eté vahe iyavei tecovesa. Che rupi güeraño ité peyepotara che Ru upe —ehi—. <sup>7</sup>Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

<sup>8</sup>Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

<sup>9</sup>—Felipe, setá ari aico pe rese, ¿ndapeicua vitei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vite cheu no? <sup>10</sup>¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pëu, ndahei cheyesui tēi amombehu. Che Ru secoi vahe che rese, ahe ité oyapo güemimbotar che recocuer rese —ehi—. <sup>11</sup>Che reroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—. <sup>12</sup>Supí eté aipo ahe pëu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—. <sup>13</sup>Acoi peporanduse que mbahe rese che rer pipe, che amondoño itera pëu. Ipipe che amboyecua ra che Ru reco pñratasa. <sup>14</sup>Che ayapora que mbahe che rer pipe pe porandusa —ehi oreu.

*Jesús, “Che amboura Espiritu Santo pëu” ehi viroyasar upe*

<sup>15</sup>“Che raisuse ité peye, pemboyero ya catu che porocuaíta. <sup>16</sup>Che aporandura che Ru upe ombou vahe rã Espiritu supí eté vahe pe pñvivi água, ahe secoi vahe rã ité pe rese. <sup>17</sup>Ava Tũpa ndoicuai vahe rumo,

ndoicatu chietera ipisi. Esepia, ndosepiai, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oi que itera pe p̄iha pipe.

<sup>18</sup> “Ndopoeyai chira pe güeraño t̄ei; ayevira niha pe rese aico vaherã. <sup>19</sup> Ch̄ihi t̄ei oime vite ari che reroyasar̄ehi che repia vite vahe rã yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. <sup>20</sup> Ahe ari pipe peicuara che Ru rese che recosa, che rese pe recosa avei iyavei che aicose pe rese. <sup>21</sup> Acoi oicua vahe che porocuaíta, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

<sup>22</sup> Judas (ndahei vahe rumo Iscariote) aipo ehi:

—Che Yar, ¿mahera oreño ereyemboyecua; mahera ru ndereyemboyecua iri chira ava nde reroyasar̄ehi upe? —ehi chupe.

<sup>23</sup> Evocoyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vahe rã sese. <sup>24</sup> Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui t̄ei; ahe rumo che Ru, che mbousar suindar —ehi.

<sup>25</sup> “Pe rese che reco vitese, opa co mbahe amombehu vichico p̄eu. <sup>26</sup> Esp̄iritu Santo rumo, Porop̄itiv̄isar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu p̄eu che ñehe aḡuer rese.

<sup>27</sup> “Aseya teco tuprisa p̄eu, ahe che reco tuprisa; ndahei rumo avaño t̄ei rembiapo nungar amondo p̄eu. Aní, ‘¿Mara yahera p̄iha?’ peyera; aní chiaveira pesiquiye. <sup>28</sup> Pesendupa niha acoi, ‘Asora, ipare ayevi irira pe rese aico vahe rã’ che hesa. Supi eté che raisuse peye, peviharetera peicuase che Ru p̄iri che sosa. Esepia, ahe ivate catu vahe ité che sui. <sup>29</sup> Sese amombehupa voi co mbahe tenondeve p̄eu, eḡüe ehise ité, ahese peroyara.

<sup>30</sup> “Namombehu pucu iri chira mbahe p̄eu. Esepia, ou ité co ivi pipe oporocuai t̄ei vahe. Ahe rumo ndahei ivate catu vahe che sui <sup>31</sup> ‘toicua ava che reroyasar̄ehi che Ru raisusa yuvireco’ che hesa pipe. Ayapoño ité che Ru che cuaita.

“Pep̄uha. Yaso cohava sui” ehi güemimbohe eta upe.

## 15

### *Jesús uva hi nungar*

<sup>1</sup> Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi. <sup>2</sup> Ahe oyasia sãca ndihai vahe ichui yepi; iha vahe rumo omoatiro tupri iha catu ãgua. <sup>3</sup> Pe pe recocuer imoatiroproi ité che pe mbohesa pipe. <sup>4</sup> Peicoño ité catu che rese inungar che aicoño ité avei pe rese. Uva rãca oise oh̄i sui, ndiha iri ahe ae t̄ei; pe avei eḡüe peyera peyep̄epise che sui” ehi oreu.

<sup>5</sup> “Che niha uva hi nungar aico; pe evocoyase sãca nungar peico. Acoi secoi vahe che rese, che avei aico sese. Inungar mbahe miti iha ati vahe, eḡüe ehira ahe. Supi eté ndapeicatu chietera che por̄ehi mbahe apo. <sup>6</sup> Acoi ndasecoi vahe che rese, ahe imbosara inungar acoi uva rãca yipi vahe. Ipare imonuhasa sapi ãgua” ehi oreu.

<sup>7</sup> “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pëu” ehi.  
<sup>8</sup> “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa. <sup>9</sup> Che opoaisu ité, inungar che Ru che raisu. Sese peicoño ité catu che poroaisusa pipe. <sup>10</sup> Esepia, pemboyeroyase che porocuaita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

<sup>11</sup> “Che aipo ahe pëu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe. <sup>12</sup> Co che porocuaita: Peyeaису ñepei-pei, inungar che opoaisu. <sup>13</sup> Ndípoi eté que poroaisusa ivate catu vahe co sui omondose que ava güecocuer omboripar rese nara. <sup>14</sup> Pe che mboyeroyase peye, ahese che mboripar peico. <sup>15</sup> ‘Pe mbiguai peico’ ndahe iri pëu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pëu. Esepia, aicua ucapa ñehesa che Ru cheu omombehu vahe pëu. <sup>16</sup> Pe niha ndache poravoi peye. Che rumo opoporavo iyavei opocuai peporaviqui vaherã ava reru ãgua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pëu. <sup>17</sup> Co rese opocuai: Peyeaису catu ñepei-pei peyacatu” ehi Jesús güemimbohe upe.

*Jesús amotarëhimbar, supindar amotarëhimbar avei*

<sup>18</sup> “Acoi ava ndoicuai vahe Tüpa pe amotarëhise, peicuaño che rane che amotarëhi yuvireco yipindar. <sup>19</sup> Pe peico vitese ava Tüpa ndoicuai vahe pãhuve, evocoyase pe raisu aira yuvireco viña. Che rumo opoporavo ipãhu sui yuvireco. Sese tã ndape ambota iri yuvireco. Esepia, pe ndahe iri ipãhu pendar peico. <sup>20</sup> Peyemomahenduha pëu aipo che hesa rese: ‘Ndípoi eté que mbiguai ivate catu vahe güerecuar sui’ ahe. Che niha yipindar yamotarëhimbrí aico, pe avei pe amotarëhira yuvireco. Acoi omboyeroya vahe rumo che porombohesa, pe porombohesa avei omboyeroya yuvireco. <sup>21</sup> Co opacatu mbahe che recocuer sui tã egüe ehira pëu. Esepia, ndoicuai niha che mbousar yuvireco.

<sup>22-24</sup> “Che ndayuisse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tüpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipãhuve; ahe rumo yepe osepia co mbahe yuvireco viña, che amotarëhiño, che Ru avei oyamotarëhi yuvireco. Sese, ‘Pereco ité mbahe pe rembiavi peyese’ ehi Tüpa chupe. Esepia, acoi che amotarëhi vahe, che Ru avei oyamotarëhi yuvireco. <sup>25</sup> Co rumo egüe ehi. Esepia, imboaviyesa rane itera ñehesa sesendar icuachiapri pipe aipo ehi vahe: ‘Mbahe apoëhi pipe sui tã che amotarëhi yuvireco’ ehi vahe.

<sup>26</sup> “Acoi ambouse rumo Poropitiviisar, Espíritu supi eté vahe che Ru sui pëu, ahe omombehura che recocuer. <sup>27</sup> Pe avei pemombehura che recocuer. Esepia, yipisuive ité peico che rupi” ehi.

## 16

<sup>1-2</sup> “Pe mocañiehi ãgua che rese pe yeroyasa aipo ahe opacatu co mbahe imombehu pëu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tüpa uve nara revo na yahe’ ehira yuvireco viña. <sup>3</sup> Evocoi rumo egüe ehira yuvireco che Ru

cuaēhi pipe iyavei che cuaēhi pipe yuvireco. <sup>4</sup> Amombehu aipo pēu acoi ēgüe ehise, peyemomahenduhara che remimombehugüer rese.

*Espíritu Santo rembiapo*

“Yipisuiwe rumo namombehui co mbahe pēu. Esepia, aicoveño ité pe rese. <sup>5</sup> Cūrítei rumo asora che mbousar piri iyavei ndipoi que ñepepe pe pāhu pendar ‘¿que vo aipo eresora?’ ehi vahe cūrítei cheu. <sup>6</sup> Pe rumo ndapeyembovihaiño aipo mbahe amombehuse pēu. <sup>7</sup> Supi eté rumo aipo ahe pēu: aviye catura pēu che asose. Esepia, ndasoise viña, ndoui chietera pe rese Poropitiviisar. Asose rumo, che amboura pēu. <sup>8</sup> Ouse ahe, oicua ucara ava che cuaēhisar upe yangaipa, oicua uca aveira tecocuer ivisa iyavei cañisa ndaseco pōrai vahe upendar. <sup>9</sup> Oicua ucara yangaipa chupe ndache reroiyase yuvireco; <sup>10</sup> oicua rumo che reco ihivi tupri vahe yuvireco. Esepia, asora che Ru recosave, ahese pe ndache repia iri chietera peye; <sup>11</sup> iyavei oicua Ru Tūpa poromocañisa. Esepia niha, Carugar, ahe co ivi pipendar rereciar oipisira che Ru Tūpa ñemoirosa.

<sup>12</sup> “Setá iteanga mbahe oime amombehu vaherā pēu. Pe rumo ndapeicatui chira cūrítei senducua. <sup>13</sup> Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehi chira oyesui tēi, ahe rumo omombehura mbahe osendu vahe güeraño, oicua uca aveira mbahe coiye oime vaherā. <sup>14</sup> Ahe che mboeteira. Esepia, oicua ucara opacatu mbahe cheundar pēu. <sup>15</sup> Opacatu mbahe che Ru vireco vahe, che mbahe. Sese niha, ‘Espiritu oipisira opacatu mbahe cheundar, oicua uca aveira pēu’ ahe.

<sup>16</sup> “Aviyeteramo tēi ndache repia iri chira peye. Ipare rumo coiye catumi che repia irira peye” ehi oreu.

*Yepe semimbohe ndovihai chira viña, coiye catu rumo oviharetera yuvireco*

<sup>17</sup> Evocoyase ore oroporandu-randu tēi oreyeupe aipo orohe:

—¿Mara oya pñha: ‘Aviyeteramo tēi ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu piri no? <sup>18</sup> ¿Mara oya vo aipo: ‘Aviyeteramo tēi’ ehi? Ndayasenducuai mo aipo iñehesa —orohe oreyeupe.

<sup>19</sup> Ipare rumo ‘oporandura co mbahe rese yuvireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he agüer rese co pe porandu vite peyeupe? —ehi—. <sup>20</sup> Supi eté aipo ahe pēu: peyasehora pe viharihisa pipe, ava angaipa viyar rumo ovihareteñora yuvireco. Yepe pe, ndapevihai chira viña, coiye catu rumo peviharetera. <sup>21</sup> Inungar acoi que cuña imembira potase, tasi chupe oyepotase ari imembira água; pñtani oha pare rumo, nimahenduha iri tasicuer rese; soriveteño omembrí rese. <sup>22</sup> Ēgüe peye avei; pe cūrítei tasi avei pēu, ayevi irira rumo pe repia água, ahese peviharetera. Ahe viharetesa ndipoi chietera que ava vīrocua vaherā pe sui.

<sup>23</sup> “Ahe ari pipe, ndapeporandu iri chietera mbahe rese cheu. Supi eté aipo ahe pēu: che Ru omboura opacatu mbahe pēu che rer pipe peporanduse. <sup>24</sup> Cūrítei rumo ndapeporandu vitei mbahe rese che rer pipe. Peporandu catu sese, ahese peipisira. Ipipe sui perovete catura.

*Jesu Cristo mbahe-mbahe tēi recopisar*



<sup>25</sup> “Opacatu mbahe rese niha amboyoya tecocuer p̄u. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe p̄u che Ru recocuer resendar. <sup>26</sup> Ahe ari p̄ipe pe peporandura mbahe rese che rer p̄ipe; che rumo, ‘Ayerquirira pe rese che Ru upe’ ndahei p̄u. <sup>27</sup> Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye. <sup>28</sup> Asē che Ru sui co ivi p̄ipe vitu; cūrītei rumo asevara co ivi, ayevíra che Ru upe” ehi oreu.

<sup>29</sup> Evocoiyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu. <sup>30</sup> Supi eté ereicua opacatu mbahe, ereicua avei ore porandusa. Evocoiyase ndiya iri ore porandu āgua mbahe rese ndeu. Sese oroviroya Tūpa sui nde yusa —orohe chupe.

<sup>31</sup> —¿Evocoiyase che reroya ité peye? —ehi—. <sup>32</sup> Supi eté oyepota ari cute, co p̄ipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese. <sup>33</sup> Amombehu co opacatu p̄u che rese mbahe tupri p̄ipe pe reco āgua. Peparaisu itera co ivi p̄ipe; peyemonguerēhi catura rumo. Esepia, che opa ité ascopi co ivi p̄ipendar mbahe tēi —ehi.

## 17

*Jesús oyeriqui güemimbohe rese*

<sup>1</sup> Aipo ohe pare, Jesús omahe íva rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei. <sup>2</sup> Supi eté niha, nde erembou che mborerecua āgua opacatu ava ivi p̄ipendar harive iyavei tecovesa apirēhi mondo āgua opacatu ava nde cheu erembou vahe upe. <sup>3</sup> Co niha tecovesa apirēhi, tande cua nde Tūpa ñepeí supi eté vahe nde recose yuvireco, tache cua avei nde che mbose yuvirecō.

<sup>4</sup> “Che niha oromboetei co ivi p̄ipe, iyavei ayapo nde che cuaisa. <sup>5</sup> Sese che Ru, embou irimi cūrītei che reco porañete āgua, inungar acoi yip̄indar areco vahe nde rese ivi apoēhiseve.

<sup>6</sup> “Co nde rembiporavo ava co ivi p̄ipendar p̄ahu sui erembou vahe cheu; orocua ucapa chupe. Yip̄indar ndeundar yuvirecoi. Ipare nde erembou cheu. Ahe víroya ité nde ñehe yuvireco. <sup>7</sup> Cūrītei oicuapa opacatu mbahe nde suindar cheu erembou vahe yuvireco. <sup>8</sup> Esepia, amombehu ité nde ñehe erembou vahe cheu; ahe víroya ité yuvireco, víroya avei nde che mbousa yuvireco.

<sup>9</sup> “Che ayeriqui cheu nde remimbou rese ndeu. Esepia, ndeundar ité yuvirecoi; ndayeroqui rumo ambuae ava che reroyasarēhi rese. <sup>10</sup> Opacatu ava cheundar, ndeundar avei; ndeundar evocoiyase cheundar. Ahe sese che reco porañetesa oyecua.

<sup>11</sup> “Che ndapitai chira co ivi p̄ipe; ahe rumo opitara cohawe yuvireco. Che evocoiyase asora nde p̄iri. Che Ru, seco maranehi vahe, esāro nde p̄iratasa p̄ipe nde remimbou cheu oyese yuvirecoi tupri āgua inungar yande yaico. <sup>12</sup> Aicose co ivi p̄ipe, asāro tupri nde rer p̄iratasa cheu erembou vahe p̄ipe; chemahemoha yuvireco sese mbahe tēi sui. Ndipoi eté que ñepeí ocañi tēi vahe; acoi yip̄ive ocañi vaheño ité rumo ocañi tēi; nde ñehe rupi tupri ité ēgüe ehi.

<sup>13</sup> “Cūritei asora nde recosave. Co ivi pipe che reco viteso rumo, amombehu co mbahe chupe ‘tovireco che viharetosa yuvireco’ che yapave. <sup>14</sup> Che niha amombehu nde ñehe yuvireco chupe. Ava che reroyasrēhi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico. <sup>15</sup> ‘Enose ava Carugar povri pendar pāhu sui’ ndahei ndeu, che rumo aipota eresepira Carugar sui. <sup>16</sup> Inungar che ndahei Carugar povri pendar aico, ēgüe ehi avei ahe yuvireco. <sup>17</sup> Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. <sup>18</sup> Inungar nde che mbou eve ava co ivi pipendar pāhuve, ēgüe ahe avei che imondo ava pāhuve yuvireco. <sup>19</sup> Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

<sup>20</sup> “Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaherã rese. <sup>21</sup> Aporandu avei ndeu toyuvirecoi tupri ité yuvireco oyese inungar ñepe vahe, ēgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipape sui ava co ivi pipendar toviroya nde che mbousa yuvireco. <sup>22</sup> Che reco porañetesa nde erembou vahe cheu, ahe tupri avei amondo yuvireco chupe ñepe vahe nungar yuvirecoi āgua, inungar yande ñepe vahe yaico. <sup>23</sup> Che aico yuvireco sese, nde evocoyase ereico che rese ahe yuvirecoi tupri āgua inungar ñepe vahe. Ipape sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

<sup>24</sup> “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaherã teco porañetesa cheu erembou vahe yuvireco. Nde niha yipive ité che raisu eve ivi apoēhiseve. <sup>25</sup> Che Ru, seco catupri vahe, ava co ivi pipendar tēi nande cuai yuvireco; che rumo orocua ité, co avei oicua nde che mbousa yuvireco. <sup>26</sup> Orocua uca chupe, orocua ucaño vite itera rumo. Evocoyase nde che raisusa tovireco avei yuvireco, che avei taico yuvireco sese” ehi Jesús oyerorqui gēmimbohe recocuer rese.

## 18

### *Jesús oipisi yuvireco*

<sup>1</sup> Aipo ohe pare, Jesús ore renose ore reraso iembĩ Cedrón rovai. Aheve oime mbahe miti rēta, ipape Jesús ore reroique ore reraso. <sup>2</sup> Iyavei Judas omondo vaherã yamotarēhimbar upe oicua avei aheve secosa. Esepia, setá rupi Jesús rese oroñemonuha aheve yepi. <sup>3</sup> Sese Judas oyepotaño ité aheve sundao rehii reseve iyavei sundao tūparo rārosar pahĩ rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso. <sup>4</sup> Yipive ité rumo oicua oyeupe mbahe oime vaherã. Sese osē voi eté yuvireco chupe oporandu:

—¿Ava vo peseca? —ehi.

<sup>5</sup> Ahe ava rehii omboyevĩ yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipãhuve secói imondo ãgua yamotarẽhimbar upe. <sup>6</sup> “Che niha ahe aico” ehise ava upe; guaquicuei coti pãve opa oviapi yuvireco. <sup>7</sup> Evocoiyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

<sup>8</sup> Aipo ihese,

—“Che niha ahe aico” ahe pẽu —ehi—. Che che recase peye, pepocoi rene catu co ambuae rese, toyuvirasopaño —ehi.

<sup>9</sup> Co rumo iñehe mboaviye ãgua ãgũe ehi: “Acoi che Ru ombou vahe cheu, nocañi eté que ñepei che sui” ehi. <sup>10</sup> Evocoiyase Simón Pedro vireco vahe quise, vinose, oyasia Malco serer vahe nambi yasu cotindar, ahe pahi rerecuar ivate catu vahe rembiguai. <sup>11</sup> Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañõ itera chupe —ehi.

*Jesús serasosa mborerecuar Anás rovai*

<sup>12</sup> Evocoiyase sundao rerecuar, osundao eta reseve iyavei judío tũparo rãrosar oipisi Jesús yuvireco, oipocua. <sup>13</sup> Yipindar viraso Anás rõtave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secói. <sup>14</sup> Caifás ité aipo ehi omboetasa upe: “Yandeu aviye catu itera que ñepei mbia omanose yande rese” ehi.

*Pedro, “Ndaicuai co mbia” ehi Jesús upe*

<sup>15</sup> Ore Pedro rese orosoño ité Jesús raquicuei. Che rumo pahi eta rerecuar rõtave pipendar opa ité che cua yuvireco. Sese aiqueño ité Jesús raquicuei mborerecuar rõtave vicho. <sup>16</sup> Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoiyase asẽ, aporandu oquendipi rãrosar uve Pedro reique ãgua rese. <sup>17</sup> Evocoiyase oquendipi rãrosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rãrosar upe.

<sup>18</sup> Sõhisá iteanga ahe pĩtu pipe. Evocoiyase mborerecuar rembiguai iyavei sundao eta oyatapi yuvireco oyepehe ãgua. Pedro avei aheve ipãhuve oyepehe tata ipive ohã.

*Pahi eta rerecuar ivate catu vahe oporandu Jesús upe secocuer rese*

<sup>19</sup> Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. <sup>20</sup> Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tũparo guasu pipe avei. Indó, che nañemi eté añehe vaherã. <sup>21</sup> ¿Mahera vo evocoiyase cheu tẽi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

<sup>22</sup> Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

<sup>23</sup> Evocoiyase omboyevi ahe mbia upe:

—Añehese mbahe tẽi rese, emombehu che ñehe raisa; che rumo añehe tupri ité, ¿mahera vo evocoiyase che rovapete eve? —ehi.

<sup>24</sup> Evocoyase Anás omondo pahi eta rerecuar ivate catu vahe Caifás upe ipocuasa reseve.

*Pedro, “Ndaicuai co mbia” ehi vite Jesús upe*

<sup>25</sup> Ahese Pedro oyepheño vite ohã tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

<sup>26</sup> Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¡Aviye acoi nde ité oroepia vahe mbahe miti rēta pipe supi! —ehi chupe.

<sup>27</sup> Pedro rumo, “Aní, ndahei eté che” ehi iriño. Aipo iheseve, tacura oñehe.

*Jesús serasosa Pilato rovai*

<sup>28</sup> Evocoyase viraso Jesús Caifás rēta sui Roma pendar mborerecuar guasu recosave yuvireco. Cōhe potase ěgüe ehi. Judío rumo ndoyuviroiquei eté mborerecuar recosave oyemboangaipaēhi āgua. Espia, ahe icuaita yuviroique, ndiyai chietera Pascua resendar ovesa roho hu āgua yuvireco chupe viña. <sup>29</sup> Sese Pilato osē ava upe aipo ehi:

—¿Mbahe vo sembiapo naporai vahe? —ehi.

<sup>30</sup> Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

<sup>31</sup> Evocoyase aipo ehi ava upe:

—Peraso, pe ae peyapo mbahe pēundar ité porocuita rupi sese —ehi.

Judío rerecuar evocoyase omboyevi yuvireco:

—Ore judío oroico vahe upe rumo ndipotasai oroyuca vahe rã que ava —ehi.

<sup>32</sup> ěgüe ehi Jesús ñehe imano āgua resendar yaviye. <sup>33</sup> Ahese Pilato oique iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

<sup>34</sup> —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

<sup>35</sup> —¡Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoyase ereyapo? —ehi Pilato chupe.

<sup>36</sup> —Che mborerecuasa rumo ndahei co ivi pipendar. Co ivi pipendarse viña, che rupindareta ovavara che amotarēhimbar upe che repisave yuvireco viña. Che mborerecuasa rumo ndahei eté coha pendar —ehi.

<sup>37</sup> Ahese Pilato aipo ehi chupe:

—Evocoyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherã niha che aha co ivi pipe mbahe supi eté vahe mombehu āgua. Opatatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

<sup>38</sup> Pilato rumo,

—¿Mbahe vo aipo supi eté vahe? —ehi chupe.

*“¡Tayaticasa!” ehi ava eta Jesús uve yuvireco*

Aipo ohe pare, Pilato osẽ iri judío eta upe oñehe aipo ehi:

—Che ndayosui eté co mbía rese mbahe sembiavi. <sup>39</sup> Pe rumo peicua amose ñepeí ava soquendapri Pascua pieta pipe yepi; ¿peipota amose vaheã judío rerecuar? —ehi.

<sup>40</sup> Aipo ihese, opacatu osapucái pĩratá yuvireco aipo ehi:

—¡Evocoi ani! ¡Barrabás catu emose! —ehiño yuvireco.

Barrabás rumo imonda rai vahe secoi.

## 19

<sup>1</sup> Evocoiyase Pilato oporocuai Jesús nupa água. <sup>2</sup> Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco. <sup>3</sup> Ipare oyemboya sese aipo ehi:

—¡Imboetepri judío Rerecuar tasecoi! —ehi angahu sovapete-pete yuvireco.

<sup>4</sup> Pilato evocoiyase osẽ iri ava upe aipo ehi:

—Pesepia, anose pẽu pe icua água che ndayosui eté mbahe sembiavi —ehi.

<sup>5</sup> Evocoiyase vinose yu piapri oãca rese turucuar pĩraumbi vahe reseve senoha ava upe. Ahesa Pilato aipo ehi:

—¡Ndo co aipo mbía cute! —ehi.

<sup>6</sup> Osepiase pahi eta rerecuar, sundao rerecuar avei, omboipi osapucái:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoiyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

<sup>7</sup> Judío rerecuar rumo omboyevi yuvireco:

—Ore rumo orovireco mborocuaíta. Ipipe omanoño itera. Esepia, oyeapo tẽi Tũpa Rahir —ehi yuvireco.

<sup>8</sup> Aipo ñehesa renduse, Pilato oyembosiquiyé catu. <sup>9</sup> Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté iñehe chupe. <sup>10</sup> Evocoiyase Pilato aipo ehi chupe:

—¡Mahera ndereñehei eté cheu! ¿Ndereicuai vo che mborererecuar aico nde atica uca água, mbahe tẽi sui nde renose água avei? —ehi Pilato chupe.

<sup>11</sup> —¡Aní! Ndererecoi chietera nde mborererecuasa che harive Tũpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

<sup>12</sup> Ahe ramoseve, Pilato osãha iri tẽi Jesús renose água; judío rerecuar rumo osapucái voiño yuvireco chupe:

—¡Acoi eremosese co mbía, ndahei chietera nde mborererecuar ivate catu vahe mboripar ereico! ¡Opacatu oyemomborererecua tẽi vahe, ahe evocoiyase mborererecuar ivate catu vahe amotarẽhimbar tẽi yuvirecoi! —ehiño yuvireco chupe.

<sup>13</sup> Evocoiyase Pilato osenduse aipo ihesa, vinose uca Jesús ocarve, oguapi mborererecuar guasu renda harive. Ahe mbahe rese porandusa rer hebreo ñehe pipe Gabata ‘íta apopri’ oya. <sup>14</sup> Mbit̃er ari Pascua pieta água Pilato aipo ehi judío eta upe:

—¡Ndo co pe rerecuar cute! —ehi.

<sup>15</sup> Ahe rumo osapucái pĩratá aipo ehi yuvireco:

—¡Tomanol ¡Tomano ité! ¡Tayaticasa! —ehi yuvireco chupe.  
 Pilato rumo aipo ehi chupe:  
 —¿Evocoyase ayatica ucara pe rerecuar? —ehi.  
 Pahi eta rerecuar rumo omboyevi yuvireco chupe:  
 —¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.  
<sup>16</sup> Ipare Pilato omondo sundao upe yatica uca ñgua. Ichui viraso yuvireco.

*Jesús yaticasa curusu rese*

<sup>17</sup> Evocoyase Jesús vinose curusu seraso “Ava Ñcagüer” serer vahesave (ahe serer hebreo ñehe pipe Gólgota). <sup>18</sup> Aheve oyatica yuvireco. Seseve avei oyatica ñuvirío ava yuvireco, ñepeipei yique ivi. <sup>19</sup> Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi. <sup>20</sup> Setá iteanga ava oyerogui co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui. <sup>21</sup> Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

<sup>22</sup> Pilato rumo omboyevi:

—Co aicuachía vahe, ñgüe ehiño itera oĩ —ehi.

<sup>23</sup> Jesús atica pare evocoi irungatu sundao, omonuha iturucuar oyeupe imboyaho ñgua yuvireco. Oipisi avei iturucuar ivri pendar nimbovívísai vahe, ñepeipei reseve pucuño tēi vahe. <sup>24</sup> Sundao eta aipo ehi oyeupe yuvireco:

—Yamondoro eme; aviye catu yandeguayíño sese, ¿ava ité pīha oipisira? —ehi yuvireco.

Ñgüe ehi icuachiapirer imboaviye yuvireco aipo ehi vahe: “Omboyahoyaho ava che turucuar iyavei iguayí yuvireco sese” ehi vahe. Supí tupri ité ñgüe ehi sundao yuvireco.

<sup>25</sup> Curusu ivipive yuvirecoi ichi, ichi cupihir, María Cleofas rembireco, María Magdalena avei. <sup>26</sup> Osepiase osi iyavei che repiase yípive, che güembiaisu, aipo ehi osi upe:

—Che si, evocoi nde membirã ererecora —ehi chupe.

<sup>27</sup> Ipare voi aipo ehi cheu:

—Evocoi nde si —ehi.

Ichuive tupri amoingue ichi che rētave asãro vaherã.

*Jesús mano agüer*

<sup>28</sup> Ipare Jesús oicua ité Vu remimbotar yaviyepa iyavei icuachiapirer mboaviye ñgua aipo ehi:

—Che husei —ehi.

<sup>29</sup> Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco. <sup>30</sup> Osupite pare aipo ehi:

—Opa yaviye cute —ehi.

Ipare voi ñaca iviso omano.

*Sundao oñaruca cutu lanza pipe Jesús*

<sup>31</sup> Ñepeipei ari Pascua pieta uve ipane vahe pipe aipo ñgüe ehi. Sese judío ndoipotai ava retecuer pita curusu rese mbituhusa ari pipe. Esepia,

ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaheṛā sundao curusu rese yaticapri rētima mope āgua ‘tomanó’ oyapave curusu sui setecuer reroyipa āgua yuvireco. <sup>32</sup> Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco. <sup>33</sup> Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

<sup>34</sup> Ñepeí sundao rumo oicutu yiqueve lanza pipe. Ahe ramoseve voi osē suvi, i reseve. <sup>35</sup> Che asepia vahe ité; supi eté aipo ahe. Evocoyase amombehu pēu pe seroya āgua. <sup>36</sup> Esepia, co mbahe ēgüe ehi icuachiapirer mboaviye āgua aipo ehi vahe: “Ndimopesai chietera que ñepeí icangüer” ehi vahe aracahe. <sup>37</sup> Iyavei ambuae icuachiapri aipo ehi: “Osepiara ava eta icutupri yuvireco” ehi.

### *Jesús yapocatusa ita hopri pipe*

<sup>38</sup> Ipape José, tecua Arimatea pendar, oporandu Pilato upe Jesús rehögüer reraso āgua rese. José aipo Jesús rupindar. Ndoyecua ucai rumo omboetaso judío eta upe pahi rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer. <sup>39</sup> Nicodemo avei oipitívii, acoi oso vahe Jesús upe pītuse. Ahe güeru mbahe siacua vahe mirra, áloe rese oyeseha vahe, treinta kilo, sehögüer rese nara. <sup>40</sup> Ēgüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Ēgüe ehi judío oyapo ava omano vahe tĩ āgua yuvireco yepi. <sup>41</sup> Namombrii Jesús aticasa sui oime mbia remiti rēta. Aheve ité oime tuvipa ita hopri, ipiasu vahe iporupirēhi. <sup>42</sup> Ipipe omoingue Jesús rehögüer yuvireco. Esepia, ahe tuvipa cōimi eté ichui iyavei virovi ité judío pituhusa ari.

## 20

### *Jesús cuerayevisa*

<sup>1</sup> Domingu pipe María Magdalena oso tuvipave pĩtu vitemiseve. Ahe osepia ita tuvipa rovapisa ndahe irise güendave ihái. <sup>2</sup> Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndoroiuai que vo catu omondo yuvireco! —ehi.

<sup>3</sup> Evocoyase Pedro rese oroña oroso tuvipave. <sup>4</sup> Che rumo aña catu Pedro sui. Che rane evocoyase ayepota tuvipave. <sup>5</sup> Aiviro tēi, turucuar güeraño rumo asepia aheve. Ndaiquei rumo ipipe. <sup>6</sup> Ipape Pedro oyepota che raquicuei, oique voi tuvipa pipe. Ahe avei osepia turucuar imama agüer tēi. <sup>7</sup> Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. <sup>8</sup> Evocoyase che avei aique; asepia ēgüe ehi vahe. Ahese aroya voi eté. <sup>9</sup> Ore rumo ndorosenducua vitei eté icuachiapri: “Ocueraevira omano vahe pāhu sui” ehi vahe. <sup>10</sup> Ipape oroyevipa oroso ore rētave.

### *Jesús oyemboyecua María Magdalena upe*

<sup>11</sup> María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, <sup>12</sup> ahese osepia ñuvirío Tūpa rembiguai iturucuar morochí vahe oguapi yuvinoi sehögüer rupagüerve.

Ñepeí oguapí oĩ ñaca rupagüer cotí, ambuae ipí rupagüer cotí. <sup>13</sup> Ahe Tüpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer viraso yuvireco iyavei ndaicuai que vo catu omondo yuvireco —ehi.

<sup>14</sup> Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. <sup>15</sup> Evocoiyase oporandu María upe:

—Cuña, ¿mahera vo ereyaseho? ¿Ava vo ereseca? —ehi chupe.

Ahe omoha ‘co mbahe miti rëta rãrosar revó’ oya viña, aipo ehi chupe:

—Nde ererasose sehögüer, emombehuñomi tēi cheu que vo eremondo. Aheve taso seca —ehi chupe.

<sup>16</sup> Evocoiyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

<sup>17</sup> Evocoiyase María upe,

—Erepocoi rene che rese. Esepia, ndayeupí vitei che Ru recosave. Esoño, emombehu che reroyasar upe: “Jesús oyeupira Vu Tüpa recosave” erera chupe. Che Ru, pe Ru avei; che Tüpa, pe Tüpa avei —ehi.

<sup>18</sup> Evocoiyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

*Jesús oyemboyecua güemimbohe upe*

<sup>19</sup> Ahe arí pipeve, domingu pipe, pītuse, ore ore ñemonuhasave oroyeoquenda tuprí judío rerecuareta sui ore siquiypave. Ahese Jesús oi que ore pãhuve. Ore mboavirave.

—¡Peico tuprí! —ehi oreu.

<sup>20</sup> Aipo ohe pare, omboyecua opo, oi que avei oreu. Ahese orerorivete yande Yar repiase oroico. <sup>21</sup> Ipare aipo ehi iri:

—¡Peico tuprí! Inungar che Ru che mbou, ñgüe ahe aveira co che pëu —ehi oreu.

<sup>22</sup> Ichui ore peyu:

—Peipisi Espíritu Santo —ehi—. <sup>23</sup> Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoiyase ndoipisii chira ñeroisa —ehi oreu.

*Tomás osepia yande Yar icuerayevise*

<sup>24</sup> Ñepeí ore mboetasa rumo Tomás icõi vahe, ndipoi eté ore pãhuve Jesús oyemboyecuase oreu. <sup>25</sup> Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

<sup>26</sup> Ocho arí pare, ore oroñemonuha iri oi pipe oroico. Aheve ramo Tomás secoi ore pãhuve. Yepe oroyeoquenda tuprí ité viña, Jesús rumo oi queño ité ou ore pãhuve, ore mboavirave aipo ehi:

—¡Peico tuprí! —ehi oreu.

<sup>27</sup> Ipare aipo ehi Tomás upe:



—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerêhi eme seroya âgua” nderei chira cheu; ¡che reroya eve! —ehi.

<sup>28</sup> Evocoyase Tomás aipo ehi:

—¡Che Yar Tûpa! —ehi chupe.

<sup>29</sup> Ahese aipo ehi Tomás upe:

—¿Cûritei che reroya che repiase eve cute? ¡Aviye catu ava che repiaêhi pipe che reroya vahe! —ehi chupe.

*Co icuachiapri Jesús reroya âgua*

<sup>30</sup> Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe. <sup>31</sup> Co rumo aicuachía ‘toviroya Jesús, Poropísarosar, Tûpa Rahir secosa; ipipe tovireco tecovesa yuvireco’ che yapave.

## 21

*Jesús oyemboyecua siete güemimbohe upe*

<sup>1</sup> Ore sore ivi Galilea ve, Jesús oyemboyecua iri oreu ipa Tiberia ve. <sup>2</sup> Ahese oyeseve Simón Pedro yuvirecoi, Tomás ahe acoi icõi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. <sup>3</sup> Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, orohe carite pipe. Ahe pĩtu pipe rumo ndorombohai eté pira. <sup>4</sup> Cõhe potase rumo, Jesús oyemboyecua imbehi ivi. Ore rumo ndoroicuai eté Jesús secose. <sup>5</sup> Evocoyase aipo ehi oreu:

—Mbia chĩhivahe, ¿ndapembohaimi eté pira? —ehi.

—Aní eté —orohe chupe.

<sup>6</sup> Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ëgüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapipo tupri ité pira ipipe. <sup>7</sup> Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipindar nani secoi; opo ive oso chupe. <sup>8</sup> Ore evocoyase orovroyepota ité carite ndatipiimisave, oroichoho pira rehii imbohasa pipe seraso, cien metro tõi oroico imbehi sui. <sup>9</sup> Orovinosese ivi âtasave, orosepia tâtapii harive pira, pan reseve.

<sup>10</sup> —Peru moviro evocoi pira penose ramo vahe —ehi oreu.

<sup>11</sup> Evocoyase Simón Pedro oha carite pipe, oichoho ndatipiisave pira guasu rehii imbohasa pipe, ciento cincuenta y tres tupri; yepe setá viña, imbohasa rumo ndosoroí eté. <sup>12</sup> Evocoyase aipo ehi:

—Perio, tapecarumi rane —ehi oreu.

Ndipoi eté que ñepi ore pãhuve “¿ava vo nde ereico?” ehi vahe chupe. Esepia, oroicuaño ité yande Yar secose. <sup>13</sup> Chupe ore sore, oipisi pan, ombou oreu, Ëgüe ehi avei pira imbou oreu.

<sup>14</sup> Co rese Jesús oyemboyecua mbosapi rupi oreu ocuerayevire.

*Jesús osecóãha Pedro*

15 Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

16 Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoyase esãro tupri che reroyasar yuvireco —ehi.

17 Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovichai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tupri catu che reroyasar rese —ehi—. 18 Supi eté aipo ahe ndeu: nde chíhivahe catu vïtese, ereyemonde vïte nde ae, ereguata vïte avei nde remimbotar rupi; nde cuacua catuse rumo, ereyeyivamoatara, ambuae evocoyase nde mboyemondera, nde reraso aveira nde so potaëhisave —ehi.

19 Jesús rumo omboyecua aipo ohe pipe mara ehira Pedro omano Tüpa mboeteisave curi. Ipare,

—¡Erio che rupi! —ehi Pedro upe.

*Jesús remimbohe saïsupri*

20 Che Jesús rembiaïsu ité aico, che ité acoi carusa ipa vaheve yïpive añ acoi aporandu chupe: “Che Yar, ¿ava vo nde mondora nde amotarëhimbar upe?” ahe acoi chupe. Aguatase Pedro raquïcuei, oyemboyere che repia. 21 Ahese oporandu chupe:

—Che Yar, evocoi no, ¿mbahe oimera chupe? —ehi cheu.

22 Evocoyase omboyevi Pedro upe:

—Che aipotase secove vite ãgua che yevise nara, ¿mara vo nde ererecora viña? Nde catu, eguataño che rupi —ehi.

23 Sese ambuae Jesús reroyasar ipihañemoñeta tēi aipo che namanoi chivaherã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite ãgua che yevise nara, ¿mara vo nde ererecora viña?” ehi.

24 Che ité amombehu co mbahe, che avei aicuachía iyavei yaicua supi tupri vahe ité che remimombehu.

25 Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

## APOSTOL REMBIAPO LOS HECHOS

*Tūpa omboura Espíritu Santo viroyasar upe*

<sup>1</sup> Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipíndar sembiapocuer amombehu ndeu iyavei yipísui iporombohe agüer. <sup>2</sup> Ocueraevire, ivave oso renondeve, Jesús omombehu oporocuaíta Espíritu Santo pīratasa pipe güembiporavo apóstol upe sembiaporā. <sup>3</sup> Oyemboyecua güembiporavo upe omanore. Setá rupi omboyecua tupri ocueraevisa chupe. Semimbohe osepia yuvireco imanore cuarenta ari rupi. Ahese omombehu Tūpa mborerecuasa resendar güemimbohe upe.

<sup>4-5</sup> Oicove vītese yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tūpa güemimombehu, ahe acoi amombehu pēu. Juan niha pe āpiramo i pipe tēi; Tūpa rumo Espíritu Santo pipe pe āpiramora. Movīromi tēi ari ipane vite imondo āgua pēu —ehi güemimbohe upe.

*Jesús oso ivave*

<sup>6</sup> Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūrítei Israel iguar upe pīratasa iyeyecuai āgua? —ehi semimbohe yuvireco chupe.

<sup>7</sup> Ahe rumo aipo ehi chupe:

—Ndiyai ahe ari cua āgua pēu. Esepia, Tūpa año ité vīreco omborecuasa ahe mbahe apo āgua. <sup>8</sup> Peipísira rumo Tūpa pīratasa oiquese Espíritu Santo pe piha pipe. Ahese pemombehu tupri che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

<sup>9</sup> Aipo ihe pare, omahe apóstol yuvireco sese, aheseve Tūpa viraso ivave. Ichui Jesús oique iva quiha pāhuve. Evocoyase ndosepia iri eté yuvireco cute. <sup>10</sup> Omahe vīteseve yuvinoha ivave ichosa rese, aviyeteramo tēi ñuvirío mbia, iturucuar morochí vahe, oyemboyecua apóstol ipive yuvinoha <sup>11</sup> aipo ehi yuvireco chupe:

—Galilea iguar, ¿mahera vo pemahe vite iva rese pehā? Evocoi Jesús, inungar Tūpa viraso ivave pe sui, ēgüe ehi aveira niha ogüeyi ou co ivi pipe coiye —ehi yuvireco chupe.

*Jesús remimbohe oiporavo Matías, Judas recuñara yuvireco*

<sup>12</sup> Evocoyase apóstol oyevi yuviraso Jerusalén ve ivitri Olivo sui, ahe ihamombrigüer ñepeí kilómetro tēi. Supivemi imombehusa judío guata āgua mbítuhusa ari pipe yepi. <sup>13</sup> Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. <sup>14</sup> Co opacatu ari yacatu rupi oñemonuha oyoya guasu oyeroqui āgua yuvireco yepi Jesús rivri, ichi, ambuae cuña reseve avei.

<sup>15</sup> Evocoyase ñepeí ari pipe oñemonuha guasu ciento veinte ava yuvireco. Ipāhuve Pedro opūha aipo ehi ava upe: <sup>16</sup> “Che mu eta Jesucristo reroyasar, iya ité co imboaviyesa Tūpa Ñhengagüer Judas recocuer

resendar. Ahe imombehupri David upe Espiritu Santo pipe aracahe. Evocoi Judas viraso vahe Jesús amotarēhimbar ipisi uca āgua. <sup>17</sup> Ahe acoi secoi yande pāhuve co mboraviquisa rese yande pītiviī āgua avei viña. <sup>18</sup> Evocoi güembiapo ai repri pipe omboepi ivi. Ipare ñaca iviso oviapi oso ivive, oyetiapi. <sup>19</sup> Opatatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ivi Tuvi resendar’ oyapave. <sup>20</sup> Esepia, icuachiapri Salmo pipe aipo ehi: ‘Taseyasa sēta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rāgüer pisi āgua’ ehi vahe.

<sup>21</sup> “Evocoyase cohava oime ava yande Yar Jesús secoi vitese yande pāhuve <sup>22</sup> ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepeī ipāhu pendar yande rupi icuerayevi agüer mombehu āgua” ehi omboetasa upe.

<sup>23</sup> Evocoyase oiporavo ñuvirío mbia yuvireco: ahe José Barsabás, serosa Justo; ambuae rer Matías. <sup>24</sup> Ipare oyerocui yuvireco aipo ehi: “Nde, ore Yar, opacatu ava piha ereicua. Emboyecua cohava nde rembi-poravo oreu; ¿uma vo ereipota <sup>25</sup> eremondo vaherā icuaitarā apóstol seco āgua Judas recuñara? Ahe oangaipa pipe oyemocañi uca tēi vahe oico” ehi Tūpa upe yuvireco.

<sup>26</sup> Evocoyase osāha iporavo yuvireco. Matías ité vinose iporavopri sui yuvireco. Ichui tupri ité oique once apóstol pāhuve.

## 2

### *Espiritu Santo güeyi agüer*

<sup>1</sup> Oyepotase Pentecostés pieta, opacatu Jesús reroyasar oñemonuha oi guasu pipe yuvireco. <sup>2</sup> Aheve oi pipe aviyeteramo tēi ivitu ipirata vahe nungar siapu guasu ou iva sui. Ahe siapugüer oyendupa tupri oi pipe. <sup>3</sup> Ahese oyecua tata rendigüer nungar opacatu aheve yuvirecoi vahe harive. <sup>4</sup> Ahese avei Tūpa omoingue evocoi ava piha pipe oEspiritu Santo. Ichui ahe Espiritu omoñehe uca ambuae ñehesa pipe yuvireco.

<sup>5</sup> Ahe ari pipe setá iteanga judío yuvirecoi Jerusalén ve omboaviye vahe ocuaita Tūpa mboeteisa, ahe oñemonuha vahe opacatu ivi rupindar yuvireco. <sup>6</sup> Mbahe siapu guasu vahe renduse, oñemonuha ati tēi yuvireco oyese. Ndoyemboaracuai tēi yuvireco ambuae ava oñehe pipe ñehese. <sup>7</sup> “¡Tool!” ehi tēi oyepihamondiisa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco? <sup>8</sup> ¿Mahera piha co ñepeī-peī oñehe yande ñehe pipe yuvireco? —ehi tēi oyeupe yuvireco—. <sup>9</sup> Esepia, cohava yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, <sup>10</sup> Frigia pendar, Panfilia pendar, Egipto pendar, Libia cotindar, ahe Cirene cōquivotindar. Iyavei Roma pendar, <sup>11</sup> judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tūpa rembiapo icatupri vahe! —ehi.

<sup>12</sup> Opatatu oyepihamondi, ndoicuai opihañemoñeta āgua yuvireco.

—¿Mara ehi piha co na oya yuvireco? —ehi-ehi tēi yuvireco oyeupe.

<sup>13</sup> Ambuae ava rumo seroñrosa pipe aipo ehiño yuvireco:

—¡Osavaipo mo evocoi yuvireco! —ehi.

*Pedro oñehe ava upe*

<sup>14</sup> Evocoyase Pedro opũha opacatu once vahe apóstol pãhuve, oñehe pĩratasa aipo ehi: “Che mu judío eta, opacatu Jerusalén pendar avei, peicua co mbahe amobehu vaheerã pẽu; peyapisaca tupri che ñehe rese: <sup>15</sup> ndosavaipoi moco co mbia yuvireco. ¿Ndapesepiai vo añihivei vite cũritei? <sup>16</sup> Co niha Tũpa ñehe mombehusar Joel oicuaçhía vahe aracahe:

<sup>17</sup> ‘Tũpa aipo ehi:

Coiye, ari cañi renonde, amondora che Espíritu Santo opacatu ava upe.

Ipĩratasa pipe pe rahir, pe rayri oñehera yuvireco.

Mbia chĩhivahe osepiara oquer pendar nungar mbahe yuvireco.

Oime aveira queraisa supí eté vahe cuacua vahe upe.

<sup>18</sup> Supi eté ahe ari pipe amondora che Espíritu che rembiguai cuimbahe upe, che rembiguai cuña upe avei.

Ipape oñehera yuvireco che rese ipĩratasa pipe.

<sup>19</sup> Amboyecua poromondiisa íva rese.

Ëgũe ahe aveira poromondiisa mboyecua ívi pipe:

tuvi, tata iyavei tãtachi.

<sup>20</sup> Yande Yar ari tuvichá vahe imboeteipri renonde ohara pĩtu, yasi oyeapora tuvi nungar.

<sup>21</sup> Opacatu ava, che Yar che pĩtivii eve, ehi vahe, ahe oñepisirora yuvireco’ ehi Joel icuachía aracahe.

<sup>22</sup> “Pe Israel suindar, pesendu che ñehe: Jesús, Nazaret pendar, oyo apo poromondiisa tuvichá vahe, mbahe yavai vahe Tũpa pĩratasa pipe pe pãhuve güeco maranehi mboyecua ãgua. Ahe niha peicua opacatu.

<sup>23</sup> Ipape rumo evocoi Jesús imondosa pẽu yuca ãgua. Ahe rumo Tũpa remimbotar rupi. Esepia, yipive ité Tũpa oicua pe peipisira yuca uca ãgua curusu rese ava naporai vahe upe. <sup>24</sup> Tũpa rumo ombogüerayevi manosa sui. Esepia, manosa ndoicatuí sereco ãgua. <sup>25</sup> Supi eté mborerecuar guasu David oñehe Jesús recocuer rese aracahe aipo ehi:

‘Che aicua che Yar che rese secoi che acato coti mbahe tẽi pipe che viapiẽhi ãgua yepi.

<sup>26</sup> Sese avihaño ité vichico, asapucaí avei che rorivetesá pipe.

Iyavei che yeroya tuprisave asãrora mbahe aviye vahe che recove iri ãgua.

<sup>27</sup> Esepia, nde ndereseyai chira che hã omano vahe pãhuve, nderemonduyu ucai chiaveira nde rembiguai seco maranehi vahe retecuer.

<sup>28</sup> Co tcevesa ereicua uca cheu.

Che mbovihara eve nde rese che recose’ ehi David aracahe.

<sup>29</sup> “Che mu eta, supí eté yande ramoi David omano, ñotisa ita hopri pipe aracahe. Ahe suvipa ouve vite cohava yande pãhuve. <sup>30</sup> David rumo Tũpa ñehe mombehusar, oicua Tũpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara’ ehi vahe. <sup>31</sup> Ahe ndoyavii osepiá vahe ité Poropisirosar cuerayevisa. Evocoyase aipo ehi oñehe sese: ‘Thã ndopitai chira omano vahe pãhuve iyavei setecuer ndituyui chira’ ehi aracahe. <sup>32</sup> Evocoi Jesús, Tũpa remimbogüerayevi secoi. Ahe imombehusar opacatu ore oroico. <sup>33</sup> Ipape Tũpa viraso oacato coti imboguapi. Ahe oipisi imombepri Espíritu Santo Vu sui. Evocoyase ahe opa omondo co ava yuvirecoi vahe upe. Ahe pesepia, pesendu avei cũritei peico. <sup>34</sup> Esepia, evocoi oso vahe ivave ndahei David.

Ahe ae rumo aipo ehi aracahe:

‘Yar aipo ehi che Yar upe:

Eguapi cohave che acato coti che piri.

<sup>35</sup> Asecopi uca ranera nde amotarẽhimbar ndeu, ehi Yar che Yar upe' ehi David aracahe.

<sup>36</sup> “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatica vahecuer, ahe Tũpa omoingo opacatu yande Yarã iyavei yande pĩsiro ãgua” ehi Pedro ava rehi upe.

<sup>37</sup> Aipo renduse, tasi iteanga ipiha pipe yuvireco. Evocoiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoiyase? —ehi.

<sup>38</sup> Evocoiyase aipo ehi ahe ava upe:

—Pemboasi pe angaipa; peyevi Tũpa upe. Iyavei peñeapiramo opacatu Jesucristo rer pipe. Evocoiyase Tũpa iñerora pe angaipa rese. Iyavei omondora Espĩritu Santo pẽu. <sup>39</sup> Esepia, co ñehesa imombehupri, ahe pẽu nara, pe suindar upe nara iyavei opacatu amombri Tũpa sui yuvirecoi vahe upe nara avei, ahe acoi opacatu yande Yar Tũpa oyeupe nara güeru pota vahe —ehi.

<sup>40</sup> Ëgũe ehi oñehẽ vite ava mboaracua aipo ehi:

—¡Peyepipi co ava secocuer co coti tẽi vahe sui! —ehi chupe.

<sup>41</sup> Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. <sup>42</sup> Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyerogui iyavei oñemonuha oyeupe pan mboyaho-yaho ãgua yuvireco yepi.

*Yipindar vahe Jesús reroyasar recocuer*

<sup>43</sup> Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tũpa suindar yande porombohesa yuvireco’ oyapave. <sup>44</sup> Opacatu Jesús reroyasar ipihañemoñeta tupri ité ombahe rese yuvireco güecocuer upe nara. <sup>45</sup> Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. <sup>46</sup> Ari yacatu rupi judío tũparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho ãgua. Ipare oyoya guasu ocaru yuvireco oyembovihasa pipe, opihañemoñeta tuprisa pipe avei. <sup>47</sup> Osapucaí yuvireco Tũpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi omboeta catu ava iñepisiro ãgua Jesucristo viroya vahe pãhuve.

### 3

*Ndoguatai vahe cuerasa*

<sup>1</sup> Ñepeí ari aipo, caharuse las tres pipe, Pedro, Juan reseve oyoya yuviraso judío tũparove. Ahe hora pipe judío oyerogui yuvireco yepi.

<sup>2</sup> Ahe tũparo roquendipi rer Porañete. Aheve ari yacatu rupi viraso ñepeí ava oyesu suive ndoguatai vahe ‘tomondo guarepochi ava tũparove yuviroique vahe yuvireco chupe’ oyapave. <sup>3</sup> Ahe ndoguatai vahe omahe Pedro, Juan rese tũparove seique potase, oporandu guarepochi rese chupe. <sup>4</sup> Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

<sup>5</sup> Evocoiyase ahe mbia omahengatu sese ‘omboura revo que mbahe cheu’ oya viña. <sup>6</sup> Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epūha, eguata —ehi chupe.

<sup>7</sup> Evocoiyase oipisi ipo yasu cotindar imopuha. Ahe ramoseve opa tupri ipi, ipiñuha avei oviracua. <sup>8</sup> Evocoiyase opūha, opo, oguata; oique oso tūparove supi. Opo-opo vorivetesave iyavei osapucaí Tūpa upe. <sup>9</sup> Opacatu ava osepia yuvireco iguatase iyavei Tūpa upe isapucaise. <sup>10</sup> Omahecuase sese, “¡Too!” ehi tēi yuvireco. Iyavei ndoyembovīhai aviyeteramo tēi icuerase yuvireco. Esepia, evocoi ava oicuapa tūparo roquendipi Porañete serer vahesave chinise mbahe rese iporanduse yuvireco yepi.

*Pedro oñehe ava rehii upe tūparo Corero Salomón serer vahevrive*

<sup>11</sup> Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tūparo Corero Salomón serer vaheve yuvirecoise. <sup>12</sup> Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndoyavi co ore pīratasa pipe tēi iyavei Tūpa rese ore pihañemoñeta tuprisa pipe tēi orombogüera vahe co mbia pēu viña. <sup>13</sup> Tūpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoi eta avei no, ahe niha omondo güeco pīratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrive. Acoi omose potase, pe evocoiyase ndapeipotaiño imose āgua chupe. <sup>14</sup> Ahe seco maranehi vahe, seco ivi vahe renose rāgüer pipe, peporandu: ‘Tosē oporapichi vahe’ peye. <sup>15</sup> Ēgüe peye acoi tecovesa ombou vahe yuca. Tūpa rumo ombogüerayevi omano vahe pāhu sui. Ahe niha ore oromombehu oroico pēu. <sup>16</sup> Co Jesús rer rese yeroya pipe ité niha oipisi pīratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

<sup>17</sup> “Che mu eta, che aicua acoi pe peipitivi vahe pe rerecuar Jesús yuca uca āgua pe icua tupriēhi pipe cuese. <sup>18</sup> Ēgüe ehi Tūpa imboaviye arachendar opacatu oñehe mombehusar upe güemimombehugüer: ‘Che Rembiporavo Poropisirosar oiporarara mbahe-mbahe tēi rasicuer omano’ ehi vahe. <sup>19</sup> Sese pemboasi pe angaipa; peyevi Tūpa upe. Ipi sui tomocañi pe angaipa pe sui. Aviyeteramo co sui omboura yande Yar pe reco morohisa āgua, <sup>20</sup> ombou aveira Jesús, ahe yipisuive iporavopri pe pisiro āgua. <sup>21</sup> Cūritei rumo Jesucristo ivave vite secoi acoi Tūpa opase voi omoingatu opacatu mbahe iyevi āgua. Aipo ehi acoi imoñehe uca arachendar oñehe mombehusar ndaseco marai vahe. <sup>22</sup> Moisés yande ramoi yuvirecoi vahe upe aipo ehi imombehu aracahe: ‘Yande Yar Tūpa omopuhara ñepeí oñehe mombehusar pe pāhuve che nungar. Ahe iñehe pesendura, pemboyeroia catu aveira. <sup>23</sup> Opacatu ndoviroyai vahe iñehe Tūpa omocañira güembiporavo pāhu sui’ ehi.

<sup>24</sup> “Ēgüe ehi opacatu Tūpa ñehe mombehusar Samuel suive aracahe omombehu avei co ari cūritei yasepia vahe yuvireco. <sup>25</sup> Pēu nara niha Tūpa ñehe mombehusar remimombehugüer arachendar. Pēu nara avei acoi Tūpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co ivi pipendar ahe sovasapri yuvirecoira nde suindar sui’ ehi. <sup>26</sup> Acoi Tūpa Guahir ombogüerayevise, pēu rane ombou pe rovasa āgua ‘toseyapa ñepeí-peí güecocueraí yuvireco’ oya” ehi Pedro ava rehii upe.

## 4

*Pedro, Juan serasosa mborerecuar rovai*

<sup>1-2</sup> Pedro, Juan reseve oñehe viteseve ava rehii upe, ahese oñemoirosa pipe pahi eta, tũparo rãrosar sundao rerecuar, saduceo avei oyugũeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pãhu sui” ehi. <sup>3</sup> Ichui oipisi seraso soquenda yuvireco ‘ayihive voi yanosera mbahe rese porandu ãgua’ ohesa pipe. Esepia, caharuse tẽi osoquenda yuvireco. <sup>4</sup> Setã rumo ava ñehesa osendu vahe viroya yuvireco. Ahe cuimbahe seroyasar retacuer gũeraño seni cinco mil.

<sup>5</sup> Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar; Moisés porocuita rese oporombohe vahe, <sup>6</sup> pahi rerecuar ivate catu vahe Anás, Caifás, Juan, Alejandro, opacatu omu reseve. <sup>7</sup> Evocoyase gũeru ucasa Pedro iyavei Juan opãhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

<sup>8</sup> Evocoyase Pedro, Espiritu Santo pĩratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar: <sup>9</sup> peporandu niha co ava imbaheasi vahe ndoguata catui vahe mbogũera agũer rese oreu —ehi chupe—. <sup>10</sup> Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatĩca uca vahecuer curusu rese. Tũpa rumo ombogũerayevi iri omano vahe pãhu sui. <sup>11</sup> Co Jesús pe remieroĩro, ahe rumo yande vĩracuasa. Pe evocoyase inungar oi mopuhasar omomboño vahe ita aviye catu vahe oi moviracuasa rãgũer yepi. <sup>12</sup> Ndipoi que ambuae ava sui poropĩsirosa, Jesús gũeraño ité oicatu oporopĩsiro. Esepia, Tũpa nomboui ambuae ava tẽi co ivi pipe yande pĩsiro ãgua —ehi.

<sup>13</sup> Mborerecuar osepiase iyembosiquiyeẽhisa yuvireco, “¿Mara ehi pĩha co mbia? ¡Ava tẽi, ndoyembohei vahe niha!” ehi tẽi yuvireco chupe. Ichui oicua Jesús remimbohegũer secose yuvireco. <sup>14</sup> Iyavei acoi ava semimbogũeragũer supive ité secoise, sese ndoicatui chupe oñehe mara ãgua yuvireco. <sup>15</sup> Ipare, “Pesẽ ocarve” ehi mborerecuareta yuvireco chupe. Ahe gũeraño evocoyase opita oi pipe oñemoñeta yuvireco sese <sup>16</sup> aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ègũe ndehi” yahe chupe. <sup>17</sup> Yambosiquiye ava upe Jesús rer rese ñehe iriẽhi ãgua yuvireco. Ipipe sui ava tosendu iri eme Jesús resendar ñehesa yuvireco —ehi.

<sup>18</sup> Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. <sup>19</sup> Omboyeviño rumo oñehe yuvireco chupe:

—¿Mara ehi pe pĩhave? ¿Uma pĩha aviye catu Tũpa rovai? ¡Pe porocuita tie oroviroya catura Tũpa ore cuaisa sui! <sup>20</sup> Ndiyai rumo mbahe ore rembiepia, mbahe orosendu vahe avei mombehuẽhi ãgua oreu —ehi.

<sup>21</sup> Aipo ihese, mborerecuar ombosiquiye catu tẽi yuvireco. Ichui rumo omose tupriño. Esepia, ava omboetei guasu Tũpa yuvireco co imbaheasi vahe mbogũera repiase. Sese ndoicatui eté mbahe apo yuvireco chupe.



<sup>22</sup> Evocoi ava oipisi vahe Tūpa poromondiisa ocuera āgua, ahe oñaro catu cuarenta araviter vireco vahe sui.

*Jesús reroyasar oporandu Tūpa upe siquiyeēhisa rese yuvireco*

<sup>23</sup> Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tēisa yuvireco. <sup>24</sup> Aipo rendu pare, oyoya guasu oyoeroqui yuvireco Tūpa upe aipo ehi: “Ore Yar, nde niha Tūpa opacatu iva, ivi, para guasu, opacatu ipor reseve aposar ereico. <sup>25</sup> Nde Espiritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarēhi yuvireco?

¿Mahera vo ipihañemoñeta rai tēi yuvireco?

<sup>26</sup> Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tūpa iyavei sembiporavo amotarēhi āgua’ ehi aracahe.

<sup>27</sup> “Ēgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropisrosar Jesús, seco maranehi vahe, amotarēhi āgua. <sup>28</sup> Ēgüe ehi yapo opacatu nde pihañemoñeta aracahendar rupi tupri ité yuvireco.

<sup>29</sup> Iyavei cūrítei, ore Yar, emaha ore amotarēhisar rese. Embou nde pīratasa nde rembiguai oroico vahe upe siquiyeēhisa pipe nde ñehengagüer mombehu vite āgua. <sup>30</sup> Ipare, nde pīratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyoeroqui.

<sup>31</sup> Iyeroqui pare, Tūpa omboriri opacatu mbahe iñemonuhasave yuvireco chupe. Ahese Espiritu Santo opa oique yuvireco sese. Sese osiquiyeēhisa pipe omombehu tupri Tūpa Ñehengagüer yuvireco.

*Jesús reroyasar ombahe opacatu oyeupe nara vireco yuvireco*

<sup>32</sup> Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe. <sup>33</sup> Jesucristo apóstol omombehu vite ipīratasa pipe icuerayevi agüer yuvireco. Ipipe Tūpa osovasa catu vite opacatu yuvireco. <sup>34</sup> Ndipoi eté ipāhu pendar mbahe ndovirecoi vahe. Esepia, opacatu ivi vireco vahe iyavei oi omondo, <sup>35</sup> ahe sepri omondo apóstol upe yuvireco yepi. Ahe evocoyase omboyahoyaho opacatu upe mbahe ipane vahe rupi-rupi yuvireco. <sup>36</sup> Ēgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovihar’ oya aipo ehi), <sup>37</sup> ahe mbia omondo oivi, güeru sepri apóstol upe.

## 5

*Ananías iyavei Safira yemboangaipa agüer*

<sup>1</sup> Ambuae ava rumo, Ananías serer vahe, güembireco Safira reseve omondo ivi yuvireco. <sup>2</sup> Ahe mbia rumo omboyaho sepri, ñepi iyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu. <sup>3</sup> Evocoyase Pedro aipo ehi chupe:

—Ananías, ¡mahera ereroa Carugar nde piha pipe Espiritu Santo mbopa āgua, eremboyahoño tēi nde ivi repri guarepochi ndeyeupe nara!  
<sup>4</sup> ¿Ndahei vo nde mbahe ité ivi viña? Eremondo ité niha, evocoyase nde

mbahe ité guarepochi. ¡Mahera ereyapo co nungar! Ndahei ava upe nde remira, Tūpa upe ité rumo nde remira —ehi chupe.

<sup>5</sup> Osenduse Pedro ñehesa, oviapi sehōgüer oso sovai. Ahese opacatu oyandu vahe osiquiye tēi yuvireco. <sup>6</sup> Ipare mbia chīhivahe yugüeru, osupi sehōgüer, oipoque seraso yuvireco ñoti āgua.

<sup>7</sup> Mbosapi hora pare, sembireco Safira serer vahe oique oi pipe. Ndoicua vītei rumo omer mano. <sup>8</sup> Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

<sup>9</sup> Evocoiyase aipo ehi ahe cuña upe:

—¡Mahera peyemboyoya pe pihañemoñetasa rese pe secoāha āgua yande Yar Espiritu! Coi yugüeru nde mer tīsarar. Nde avei nde reraso āgua yuvireco eipeve —ehi chupe.

<sup>10</sup> Ahe ramosave avei oviapi sehōgüer Pedro rovai. Mbīa chīhivahe yuviroiquese, oipoque voiño ité sehōgüer seraso imer ivi ñoti āgua yuvireco. <sup>11</sup> Opacatu Jesús reroyasar, ambuae ava avei oyembosiquiye guasu yuvireco yanduse.

#### *Setá poromondiisa yaposa*

<sup>12</sup> Evocoiyase apóstol pipe Tūpa omboyecua uca setá poromondiisa ava pāhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco. <sup>13</sup> Opacatu ambuae ndoyemboyai yuvireco sese osiquiyepave. Ava rehīi rumo, omboetei eteanga apóstol yuvirecoi vahe yuvireco. <sup>14</sup> Oyemboeta catu yande Yar reroyasar setá cuimbahe, setá avei cuña. <sup>15</sup> Iyavei ava rehīi vīnose yuvireco imbaheasi vahe supa reseve-seve Pedro renonera, “Oñocuase Pedro, avieteramo omohara ihāgüer. Ahese revo ombogüerara” ehi yuvireco oyeupe. <sup>16</sup> Ava Jerusalén ivirindar avei güeru omonuha setá imbaheasi vahe, caruguar rese yuvirecoi vahe apóstol upe imbogüerapirã. Ahe evocoiyase opacatu ombogüera yuvireco.

#### *Apóstol yamotarēhipri yuvirecoi*

<sup>17</sup> Ichui tēi pahi rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatēhisave. <sup>18</sup> Sese oipisi osoquendapa uca yuvireco. <sup>19</sup> Ipare rumo, pītu pipe, Tūpa rembiguai iva pendar ou omboi oquenda, vīnose ichui, aipo ehi chupe: <sup>20</sup> “Peso tūparo guasuve, pemombehu avei ava upe co ñehesa tecocuer piasu resendar” ehi chupe. <sup>21</sup> Co mbahe rendu pare, supi tupri ité oyapo yuvireco. Cōhe ramosave yuviraso judío tūparo guasuve ava mbohe āgua.

Ahesave pahi rerecuar ivate catu vahe, supindar avei osenoi opacatu tecua pipendar mborecuar ñemonuha āgua ivate catu vahesave; omondo yuvireco güembiguai apóstol reru āgua soquendasa sui aheve nara viña. <sup>22</sup> Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu <sup>23</sup> aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sārosar osāro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

<sup>24</sup> Osenduse, pahi rerecuar ivate catu vahe, tūparo rārosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira

co mbahe sui yuvireco?” ehi tēi yuvireco oyeupe. <sup>25</sup> Aheseve ñepi mbia oyepota imombehu:

—Evocoi pesoquenda vahecuer, ahe mbia cūrītei oporombohe tūparove yuvireco —ehi chupe.

<sup>26</sup> Evocoiyase tūparo rārosar rerecuar, sembiguai avei yuviraso seru āgua mbahe tupri pipe, “Aviyeteramo yande api-api tiētera ava yuvireco yaru raise” ehi yuvireco. <sup>27</sup> Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

<sup>28</sup> —Ore mborerecuar tecua pipendar, ndoroipotai peporombohe evocoi mbia recouer rese. Pe rumo pembohe opacatu Jerusalén pendar secouer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahi rerecuar chupe.

<sup>29</sup> Pedro, omboetasa reseve, omboyevi pahi rerecuar ivate catu vahe upe yuvireco:

—Ore cuaita ité Tūpa mboyeroya, ndahei chira rumo ava tēi rane oromboyeroya —ehi yuvireco chupe —. <sup>30</sup> Yepe peyatica, peyuca uca Jesús curusu rese viña, yande Ru Tūpa rumo acoi yande ramoi eta viroya vahe, ahe ité ombogüerayevi. <sup>31</sup> Ipare osecomboivate ivave oacato coti imboguapi imoi. Ahe niha Mborerecuar guasu, Poropisirosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tūpa Israel suindar upe. <sup>32</sup> Ore Tūpa rembiapo repiasarer imombehu āgua oroico, Espíritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

<sup>33</sup> Osenduse mborerecuar aipo ñehesa, oñemoiró iteanga yuvireco. Oyucapa pota opacatu apóstol yuvireco viña. <sup>34</sup> Mborerecuar pāhu pendar rumo oime mbia fariseo, Gamaliel serer vahe, ahe Moisés porocuaite rese oporombohe vahe iyavei imboeteipri catu vahe. Ahe opūha oporocuai, “Toyuvinose raimi ocarve apóstol” ehi. <sup>35</sup> Ipare aipo ehi ambuae mborerecuaireta upe:

—Che mu, judío, peicua catu, yandepihañemoñeta tupri rane mbahe apo āgua renondeve co mbia upe yuvireco —ehi—. <sup>36</sup> Peyemomahenduha Teudas recouer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secouer opa. <sup>37</sup> Coiye catu, omombehuse mborerecuar Roma pendar ava retacuer cua āgua, ahese Judas, Galilea pendar, oyemomborerecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—. <sup>38</sup> Sese cūrītei peyapoi rene mbahe co ava upe. Yaseyaño. Esepia, evocoi mbahe sembiapo ndipocopii chira oyapose opīratasa pipe tēi yuvireco. <sup>39</sup> Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco. <sup>40</sup> Ichui rumo güeru iri apóstol inupa uca āgua iñehe iriēhi āgua Jesucristo rese yuvireco. Inupa pare opa omose yuvireco. <sup>41</sup> Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi. <sup>42</sup> Ipare ndopoi eté ari yacatu Poropisirosar Jesús recouer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

## 6

*Siete iporavosa iparaisu vahe p̃tivii āgua yuvireco*

<sup>1</sup> Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu imer mano vahecuer rese ari yacatu mbahe poropitiviisa imondosase chupe” ehi oñehe yuvireco. <sup>2</sup> Evocoiyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropitiviisa mondo āgua rese tēi —ehi yuvireco—. <sup>3</sup> Sese ore rivireta, peiporavo siete mbia seco aviye vahe pe pāhu sui, yaracua vahe iyavei Espiritu Santo viroya vahe ité opiha pipe. Ahe mbia tihañeco co mb-oraviquisa rese yuvireco. <sup>4</sup> Ore evocoiyase, oroyerureñora iyavei oropromboheño itera Tūpa Ñehengagüer rese —ehi yuvireco.

<sup>5</sup> Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espiritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa. <sup>6</sup> Ichui virasopa apóstol upe yuvireco. Ahe omondo opo iharive oyerogui yuvireco sese.

<sup>7</sup> Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya ñehengagüer yuvireco.

*Esteban p̃sisa*

<sup>8</sup> Co mbia, Esteban, vireco ité Tūpa p̃ratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve. <sup>9</sup> Evocoiyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehepoepi-epi Esteban yuvireco. <sup>10</sup> Ndoicatu rumo ñehe recopi āgua yuvireco. Esepia, ahe oñehe mbahecuasa Espiritu Santo omondo vahe pipe. <sup>11</sup> Evocoiyase yamotarēhimbar omboepi ambuae ava upe semira tēi āgua sese yuvireco. “Ore orosendu co mbia oñehese mbahe naporai vahe rese Moisés amotarēhisave, Tūpa amotarēhisave avei’ aipo peyera peñehe” ehi yuvireco chupe. <sup>12</sup> Evocoiyase ahe ava oyamotarēhi uca opacatu ava mborerecuar reseve iyavei judío porocuaita rese oporombohé vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco. <sup>13</sup> Iyavei oseca mbia semira tēi vahe oñehe vakerã sese yuvireco. Ahe aipo ehi:

—Co mbia oñehe-ñehe tēi yande tūparo guasu imaranehi vahe amotarēhisave, Moisés porocuaita amotarēhisave avei. <sup>14</sup> Ore orosendu ñehe: “Jesús Nazaret pendar omocañira tūparo guasu iyavei Moisés yande mbohese avei aipo osecañara” ehi —ehi yuvireco chupe.

<sup>15</sup> Ahese opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyavii sepiaca Tūpa rembiguai iva pendar rova.

## 7

*Esteban oñehe oyeepisa pipe*

<sup>1</sup> Evocoyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. <sup>2</sup> Ahese omboyeví chupe: “Che mu eta, peyapisaca che ñehe rese: Tüpa imboeteipri oyemboyecua yande ramoi Abraham upe aracahe. Mesopotamia ve secói vites, icho nondeve Harán ve seco água, <sup>3</sup> aipo ehi chupe: ‘Eso nde recua sui; eseyapa nde mu; eso evocoi tecuave che amboyecuara ndeu’ ehi Tüpa chupe. <sup>4</sup> Evocoyase osẽ Caldea ivi sui oso tecua Harán ve güeco água. Omano pare tu Harán ve, Tüpa ombou cohava yande recosave. <sup>5</sup> Yepe oyepota tẽi cohava aracahe, Tüpa rumo nomondoimi eté que chíhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tüpa chupe (ahe rumo ndatahi vitei ahese). <sup>6</sup> Tüpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguirã semimombaraisuguã tẽi avei yuvirecoira cuatrociento araviter rupi’ ehi. <sup>7</sup> Tüpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri água cohava yuvireco’ ehi Tüpa chupe aracahe. <sup>8</sup> Tüpa oyocuai güemimbotar pipe Abraham guahir mbocircuncida água rese. Sese Abraham ombocircuncida guahir Isaac iha pare ocho arí pipe. Isaac ẽgüe ehi avei guahir Jacob upe. Jacob ẽgüe ehi avei guahireta upe, ahe doce vahe Israel suindar” ehi.

<sup>9</sup> “Ipare yuvirecoi vahe yande ramoi Jacob rahir omondo vivri guarepochi repirã yamotarẽhisa pipe yuvireco. Ahe tivri rer José omondo vahe Egipto pendar upe yuvireco. Tüpa rumo secóiño ité sese. <sup>10</sup> Ichui vinose opacatu iparaisusa sui. Omondo ombahecuasa chupe iyavei seco aviye tupri água Egipto pendar mborerecuar guasu faraón upe. Evocoyase faraón ipotasa pipe omoingue mborerecuar seco água opacatu ava ivi Egipto pendar cuai água iyavei güeta pipendar cuai água avei.

<sup>11</sup> “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco. <sup>12</sup> Oyanduse rumo Jacob Egipto ve oime vites trigo, ahese omondo guahir aheve seca, ahe yande ramoi yuvirecoi vahe. Ahe yipindar ichosa Egipto ve yuvireco. <sup>13</sup> Ichui yuviraso yupagüe irise Egipto ve, ahese José oyecua uca viquehir upe. ẽgüe ehi faraón upe oicua uca uma sui oyesu. <sup>14</sup> Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri. <sup>15</sup> ẽgüe ehi Jacob yuviraso Egipto ve yuvirecoi água opacatu guahir reseve. Aheve omano iyavei opacatu yande ramoi eta omano yuvireco aracahe. <sup>16</sup> Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham virocua tuvipa Hamor rahir sui aracahe” ehi mborerecuar upe.

<sup>17</sup> “Ipare, virovise arí ipapapri Tüpa Ñhengagüer Abraham upendar, ahese yande ramoi setá catu-catu iri oyesu Egipto ve yuvireco aracahe. <sup>18</sup> Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José. <sup>19</sup> Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pĩtani. Ahe oyocuai iyesupa aipo ehi: ‘Peseya pe rahir oha ramomi vahe, tomanoño’ ehi yande ramoi upe aracahe. <sup>20</sup> Aheseve avei aipo Moisés oha. Ahe pĩtani aviye ité Tüpa uve. Ihare, iyesupa mbosapi yasimi rupive vireco oyese güetave yuvireco. <sup>21</sup> Oseyase rumo iyesupa ive yuvireco, ahese faraón rayri oseca ahe i rupi sui. Ichui vinose seraso

güêtave, omboacua omembri nungar ité sereco. <sup>22</sup> Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoiyase Moisés ipĩrata ité oñehese iyavei oyapose mbahe.

<sup>23</sup> “Virecose rumo Moisés cuarenta araviter, ipihañemoñeta: ‘Tasepia rane che mu israelita cohava yuvirecoi vahe’ ehi. <sup>24</sup> Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave. <sup>25</sup> Ahe rumo, ‘Oicua revo che mu Tũpa vinose uca ãgua Egipto sui yuvireco cheu’ ehi viña. Imu rumo nomohai eté Moisés vinose ãgua yuvireco evocoi ava po sui. <sup>26</sup> Ahere ayihive oso omu pãhuve. Aheve osepia ñuvirío mbia ovavase oyeupe yuvireco. Ahe rumo oipota tẽi iñero ãgua oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tẽi chupe. <sup>27</sup> Oyemoviracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pãhuve ore rerecuarã ore recocuer moingatu ãgua?’ ehi chupe. <sup>28</sup> ‘¡Che yuca pota avei tie eve inungar ereyuca evocoi Egipto pendar irapipe!’ ehi chupe. <sup>29</sup> Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

<sup>30</sup> “Omboaviyese cuarenta araviter Madián ve, Tũpa rembiguai oyemboyecua ivitri Sinaí rerovicave ivi iporupirẽhisave caha rese tata rendigüer pãhuve chupe. <sup>31</sup> Osepia mbahe sendi vahe oyepihamondii, oyemboya catu sese sepia tupri ãgua viña. Ahese osendu Yar ñehe aipo ehi vahe: <sup>32</sup> ‘Che nde ramoi Tũpa aico. Nde ramoi Abraham, Isaac iyavei Jacob che reroya vahecuer yuvireco’ ehi. Evocoiyase Moisés oriri osiquiyesa pipe nomahe pota iri sese. <sup>33</sup> Evocoiyase Yar aipo ehi chupe: ‘Esequi nde pitaqui. Esepia, ivi nimarai vahesave ereico’ ehi chupe. <sup>34</sup> ‘Che asepia tupri ité Egipto ve nde mu che rembiporavo paraisuse; asendu avei ipoãse tẽisa yuvireco yepi. Sese agüeyi ndeu nde oromondora aheve senosepa ãgua’ ehi Tũpa Moisés upe aracahe.

<sup>35</sup> “Yepe yande ramoi ndoviroya potaiño ité yuvireco, ‘¿Ava vo nde moingue ore rerecuarã ore recocuer moingatu ãgua?’ ehiño yuvireco chupe, Tũpa ité rumo oyocuai güembiguai imbogüeyi tata rendigüer pãhuve imoñehe Moisés upe iporocuai ãgua, ava renosepa ãgua avei ivi Egipto pendar mborerecuar povri sui. <sup>36</sup> Ipare ahe ité vinose yande ramoi eta Egipto sui, oyapo avei mbahe poromondiisa aheve ‘toicua Tũpa yuvireco’ oya, para guasu Pira vaheve avei oyapo poromondiisa iyavei ivi iporupirẽhisa rupi avei cuarenta araviter rupi. <sup>37</sup> Ahe avei aipo ehi israelita upe: ‘Tũpa vinosera pe pãhu sui ñepeo oñehe mombehusar che nungar’ ehi. <sup>38</sup> Ahe avei acoi ivi iporupirẽhisa rupi ava pãhu rupi seci. Chupe avei oñehe Tũpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou ãgua.

<sup>39</sup> “Yande ramoi eta rumo nomboyeroya potai eté Moisés yuvireco. Ipihañemoñetaño ité Egipto ve oyevi ãgua rese yuvireco. <sup>40</sup> Evocoiyase aipo ehi Aarón upe yuvireco: ‘Eyapomi catu ava tũpa rahanga oreu ore reroguata ãgua’ ehi yuvireco chupe. ‘¿Que vo catu Moisés, ore renosesarer Egipto sui, seci? Omano tie revo’ ehi tẽi israelita yuvireco aracahe. <sup>41</sup> Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovẽhe vaherã yuvireco iyavei oyemboviha pieta apo yuvireco güembiape ucagüer rese tẽi. <sup>42</sup> Sese Tũpa opoiño ahe ava sui, ‘Toyerure

evocoiyase yasi, yasitata upe yuvireco' ehiño chupe. Aipo ehi niha oñehe mombehusar icuachiapri pipe:

'Pe peico vahe israelita, ndahei cheu peyuca mbahe mimba seropovêhe ãgua cuarenta araviter pipe ivi iporupirêhisa rupi.

<sup>43</sup> Pe rumo che mboeteiêhisa pipe peraso tûpa rahanga Moloc rêta iyavei yasitata rahanga Refán pe ae têi peyapo vahe pe tûpaguã.

Sese che opovinosera pe recua sui pe mondo Babilonia cupe coi coti' ehi Tûpa chupe aracahe.

<sup>44</sup> "Ivi iporupirêhisa rupi yande ramoi eta vireco Tûpa porocuaita rêta oyeupive yuvireco aracahe mbahe mimba pিরer apopri. 'Na peyera yapo' ehi Moisés upe. Evocoiyase iñehe rupi tupri oyapo uca. <sup>45</sup> Ahese coiye catu yande ramoi eta vireco co oi Tûpa rêta mbahe pিরer apopri yuvireco iyavei Josué rupi yugüeru vahe güeruño ité avei yuvireco, omosepase Tûpa ambuae ava co yande recuavi sui. Êgüe ehiño vite ité ahe sereco yuvireco mborerecuar guasu, David, secoise aracahe. <sup>46</sup> Ahe David aviye ité Tûpa upe, oyapo pota setarã 'toime tûparoguã yande ramoi Jacob rembieroya upe' oya. <sup>47</sup> Tahir Salomón rumo omopuha ité ahe tûparo. <sup>48</sup> Tûpa rumo, seco ivate vahe, ndasecoi vahe tûparo ava têi rembiapo pipe. Inungar acoi omombehu vahe Tûpa ñehe mombehusar aracahe aipo ehi:

<sup>49</sup> "Iva che renda iyavei ivi che pirunga.

¿Mbahe nungar oi vo peyapora cheu? ehi yande Yar.

¿Que vo evocoiyase che pituhu ãgua?

<sup>50</sup> Che niha opacatu co mbahe aposar aico' ehi Tûpa icuachiapri pipe" ehi mborerecuar upe Esteban.

<sup>51</sup> Ichui aipo ehi chupe: "Pe rumo ndapeyapisaca potai vahe ité peico. Oime têi pe nambi, pe piha avei, ipipe rumo ndapeicuai eté Tûpa. Peico Espiritu Santo amotarêhimbar têi inungar pe ramoi aracahe yuvirecoi.

<sup>52</sup> ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cûritei ou ndaseco marai vahe cute. Pe avei evocoiyase ahe yuca uca ãgua peporocuai. <sup>53</sup> Pe pereco têi Tûpa porocuaita acoi Tûpa rembiguai güeru vahe yuvireco; ahe rumo ndaperoyaiño ité peico" ehi Esteban opacatu mborerecuar upe.

### *Esteban mano agüer*

<sup>54</sup> Osendupase mborerecuar iñehe, omboasí iteanga yuvireco; oñeaimboterepri ité yamotarêhisave yuvireco. <sup>55</sup> Esteban rumo vireco ité Espiritu Santo oyese. Evocoiyase iva rese omahese, osepia Tûpa porañetesa. Osepia avei Jesús opûha ohã Tûpa acato coti. <sup>56</sup> Evocoiyase aipo ehi:

—¡Pesepia! Asepia inungar iva imboipri. Aheve asepia Ava Riquehir Vu acato coti ihã —ehi.

<sup>57</sup> Mborerecuareta rumo osapucui pĩrata, oyopiño oapisacuar yuvireco ichui. Ahese yuvinoña guasu yuvireco chupe. <sup>58</sup> Viraso güecua ivii yuvireco. Aheve oseyá oyeaosa Saulo pive 'tosãro' oya yuvireco chupe. Ipare oyapi-yapi ita pipe yuca yuvireco.

<sup>59</sup> Oapi-apiseve, Esteban oyerure Tûpa upe: "Che Yar Jesús, eipisi che hã" ehi. <sup>60</sup> Ipare oñenopiha, oñehe pĩrata Tûpa upe: "¡Che Yar, ndeñero co ava che amotarêhisar angaipa upe!" ehi.

Aipo ohe pare, omano.

## 8

<sup>1</sup> Iyavei Saulo, “Peyuca ité” ehi catu-catu aheve ohã.

*Saulo oseca Jesús reroyasar mocañipa ãgua oico*

Ahe ari pipeve omboipi Jesús amotarẽhimbar seroyasar reca mara-mara tẽi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. <sup>2</sup> Oime ava Tũpa mboeteisar yuvirecoi vahe, ahe víraso Esteban rehögüer ñoti yuvireco. Itĩ pare, oyasehõ iteanga yuvireco sese. <sup>3</sup> Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaẽhi ãgua viña. Yuviroiqueiqueño tẽi aipo sêta rupi cuimbahe, cuña mbotiriri senose soquenda ãgua yuvireco.

*Samaria pendar osendu ñehesa Jesucristo recocuer resendar yuvireco*

<sup>4</sup> Ava oñemosai vahecuer rumo Jerusalén sui omombehuño ité ñehesa pĩsirosa resendar que yuvirasosa rupi yuvireco. <sup>5</sup> Felipe oso Samaria rupi. Aheve omombehu ava upe: “Evocoi Jesús Tũpa Rembiporavo ava pĩsiro ãgua” ehi. <sup>6</sup> Ahese ava rehii oñemonuha Felipe ñehe rendu ãgua yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa. <sup>7</sup> Iyavei setá ava caruguar rerecosar sui omose caruguar. Osêse ava sui, sãse yuvireco. Iyavei setá ava nomii vahe, ndoguatai vahe avei ombögüera. <sup>8</sup> Evocoyase oviharete ahe tecua pipendar yuvireco.

<sup>9</sup> Aheve rumo mbia, Simón serer vahe, yipive ipaye ai oico, ombosiquiye-quiye ava Samaria pendar. “Che seco ivate vahe aico” ehi angahu ava mbopa. <sup>10</sup> Evocoyase opacatu ava, cuacua vahe iyavei chĩhivahe catu vahe oyapisaca tupri iñehe rese, aipo ehi yuvireco: “Co niha Tũpa pĩratasa tuvicha vahe” ehi oyeupe yuvireco.

<sup>11</sup> Omboyeroya pucu ité yuvireco. Esepia, opayesa pipe ava ombosiquiye etepri oico yepi. <sup>12</sup> Oyepotase rumo Felipe Samaria ve omombehu ñehesa aviye vahe Tũpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei. <sup>13</sup> Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tũpa suindar ndayasepiai vahe rese oyepihamondi.

<sup>14</sup> Jerusalén ve apóstol yuvirecoi vahe oyandu Samaria ve setá ava oipisise Tũpa Ñhengagüer yuvireco. Evocoyase omondo aheve omboetasa Pedro iyavei Juan yuvireco. <sup>15</sup> Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya. <sup>16</sup> Esepia, Espíritu Santo ndogüeyi vitei yuvireco sese; oñeapiramoño tẽi vite yande Yar Jesús rer pipe yuvireco. <sup>17</sup> Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

<sup>18</sup> Ahe osepiase, Simón omondo pota guarepochi chupe, <sup>19</sup> aipo ehi: —Cheu avei pemboumi tẽi evocoi pĩratasa, amondose che po que ava harive, togüeyi avei Espíritu Santo sese yuvireco —ehi Simón.

<sup>20</sup> Omboyevi rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tũpa ombou vahe oreu, ererocua vaherã nde guarepochi pipe viña



—ehi chupe—. <sup>21</sup> Ndeu ndiyai co nungar mbahe apo āgua. Esepia, nde pīhañemoñetasa ndahei ihīvi vahe Tūpa rovaque. <sup>22</sup> Sese epoi nde pīhañemoñeta raisa sui, eyerure Tūpa upe. Aviyeteramo iñerora ndeu —ehi—. <sup>23</sup> Aicua nde piha naporai vite iyavei nde pīhañemoñeta raisa pīpe vite ereico —ehi chupe.

<sup>24</sup> Evocoyase Simón omboyeve chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

<sup>25</sup> Yande Yar ñehesa mombehu pare ahe tecua pendar upe, apóstol omombehu-mbehu co ñehesa pīsīrosa resendar Samaria pīpendar tecua rupi yuvireco. Ēgüe ehi oyepota yuviroyevi Jerusalén ve yugüeru.

*Felipe omombehu Jesucristo recocuer Etiopía pendar upe*

<sup>26</sup> Ipare Tūpa rembiguai oyemboyecua Felipe upe aipo ehi chupe: “Epūha, eso irohī coti nde yepota āgua evocoi perī ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso. <sup>27</sup> Evocoyase opūha oso perī rupi. Aheve osovaīchi ñepeī ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbīa oso vahe Jerusalén ve Tūpa mboetei āgua. <sup>28</sup> Oyevise ocāreto pīpe, oyeroqui Tūpa ñehē mombehusar Isaías rembicuachiagüer rese ou.

<sup>29</sup> Evocoyase Espiritu aipo ehi Felipe upe: “Eyemboya cāretomi rese” ehi. <sup>30</sup> Evocoyase vīrovise ahe ava, osendu iyeroqui Isaías rembicuachiagüer pīpe oī. Ahese oporandu chupe:

—¿Eresenducua aipo Tūpa Ñehengagüer nde yeroquisa eī? —ehi chupe.

<sup>31</sup> Etiopía pendar mbīa omboyeve chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapī cohava che piri” ehi Etiopía pendar chupe. <sup>32</sup> Ahe Isaías rembicuachía oyeroqui vahe pīpe aipo ehi:

“Inungar ava vīraso ovesa yuca āgua, ěgüe ehi avei ahe mbīa seraso yuca āgua yuvireco.

Iyavei inungar ovesa nasasei eté guagüer rerocuase, ěgüe ehi avei ahe mbīa noñehēi eté.

<sup>33</sup> Osecomomini yuvireco, ndipoi ava sepisar.

Ndipoi ichuindar.

Esepia, omocañi co ivi sui yuvireco” ehi Isaías rembicuachía pīpe.

<sup>34</sup> Oyeroqui pare ahe Etiopía pendar oporandu chupe:

—Emombehumi cheu: ¿Ava rese pīha aipo Isaías oñehē: oyese ae pīha, ambuae ava rese tie? —ehi.

<sup>35</sup> Evocoyase co ñehesa sui omombehu ñehesa aviye vahe Jesús recocuer resendar Etiopía pendar upe. <sup>36</sup> Ipare oguata catuse yuvireco, Etiopía pendar osepia i. Aheve ahe aipo ehi chupe:

—Esepia co i tui. ¿Ndiyai vo cohava che āpiramomi tēi eve viña? —ehi.

<sup>37</sup> Ahese omboyeve chupe:

—Ereroya itese opacatu nde piha pīpe, iya ité ndeu —ehi.

—Aroya ité niha Jesucristo ahe Tūpa Rahir secoi —ehi.

<sup>38</sup> Evocoyase omombita uca ocāreto, ichui ogüeyi ive yuvirasos. Aheve Etiopía pendar Felipe oñapiramo. <sup>39</sup> Yuvinosese i sui, yande Yar Espiritu vīraso ahe Etiopía pendar sui. Ahese ndosepia iri; ěgüe ehiño vorivete

oso peri rupi. <sup>40</sup> Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Ēgüe ehi oyepota Cesarea ve oso.

## 9

### *Saulo ñecuñaro agüer*

<sup>1</sup> Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe, <sup>2</sup>oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohava nde rer pipe” ehi, “evocoyase eremombehura cuachiar pipe Damasco pendar tūparo rerecuar upe” ehi pahi rerecuar ivate catu vahe upe. <sup>3</sup>Ēgüe ehi yuvinose Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tēi osesape guasu iva sui chupe. <sup>4</sup>Evocoyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

<sup>5</sup>Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. <sup>6</sup>“Epūha, eique Damasco ve. Aheve amombehu ucara mbahe nde rembiapoguã ndeu” ehi chupe.

<sup>7</sup>Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiaí eté ivate oñehe vahe yuvireco. <sup>8</sup>Ipare Saulo opūha, omahe tēi; ndoicatui rumo mbahe repia. Ichui supindar oipisi iyiva rese seraso Damasco ve yuvireco. <sup>9</sup>Aheve mbosapi arí ndasesapisoí, ndocarui, ndoihui avei oico.

<sup>10</sup>Aheve mbia Jesucristo reroyasar Ananías serer vahe secói. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyeve chupe.

<sup>11</sup>Evocoyase yande Yar aipo ehi chupe: “Epūha, eso calle Ihívi serer vahe rupi. Eporandu Judas rētave Saulo, tecua Tarso pendar, rese. Ahe oyerogui cūritei. <sup>12</sup>Oquerve angahu osepia mbia Ananías serer vahe omondose opo iharive omboesapiso iri” ehi.

<sup>13</sup>Evocoyase omboyeve chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve. <sup>14</sup>Cūritei ou rutei ahe mbia pahi rerecuar porocuaíta rupi opacatu nde rer rese oyeroya vahe roquendapa āgua” ehi.

<sup>15</sup>Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaherã ava ndahei vahe judío upe iyavei serecuar guasu yuvirecoi vahe upe, judío upe avei. <sup>16</sup>Che ae amboyecua setá mbahe tēi chupe oiporara vaherã che remimbotar mboaviye āgua” ehi yande Yar chupe.

<sup>17</sup>Evocoyase oso secosave. Oiquese ahe oi pipe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri āgua. Toique avei catu Espiritu Santo nde rese —ehi Saulo upe.

<sup>18</sup>Ahese voi eté pira pírer nungar mbahe oviapipa sesa sui. Ahese voi sesapiso iri. Ichui opūha. Ipare voi Ananías oñapiramo. <sup>19</sup>Ipare

Saulo ocaruse, ipĩrata catu iri. Moviro ari tēi opĩta iri Jesús reroyasar piri Damasco ve.

*Saulo omombehu Jesús recocuer Damasco ve*

<sup>20</sup> Ipare voi oso oñehe judío tũparo yacatu rupi Damasco ve aipo ehi: “Jesús Tũpa Rahir ité secoi” ehi ahe pendar ava upe. <sup>21</sup> Ava opacatu osendu vahe iñehe,

—¿Mara ehi pĩha co? —ehi tēi yuvireco—. ¿Ndahei vo acoi co mbia Jerusalén ve Jesús reroyasar mara-mara tēi vireco vahe? ¿Ndahei vo acoi co avei ou cohave ava Jesús reroyasar ha pendar piši ãgua serasopa ãgua avei Jerusalén ve pahi rerecuar upe viña? —ehi yuvireco chupe.

<sup>22</sup> Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tũpa Rembiporavo ava pĩsiro ãgua secosa. Sese ndoicatu judío iñehe mboyevi yuvireco.

*Saulo oñemi omu sui oamotarēhise*

<sup>23</sup> Setá ari pare judío ahe pendar omboguai yuca ãgua Saulo yuvireco viña. <sup>24</sup> Ahe rumo oyandu omboguaisa judío osãrose tecua ãchisa roquendipive ari, pĩtu momba yuvireco yuca ãgua viña. <sup>25</sup> Jesús reroyasar rumo pĩtu pipe tecua tapia ãchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

*Saulo Jerusalén ve secoi*

<sup>26</sup> Coiye Saulo oyepota Jerusalén ve. Aheve oyemboya pota tēi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tēira yandeu” ehiño oyeupe yuvireco. <sup>27</sup> Ipare rumo Bernabé viraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbia Saulo osepia yande Yar peri rupi iyavei yande Yar oñehe chupe. Ichui co oñehe osiquiyeēhisa pipe Damasco ve Jesús recocuer rese” ehi. <sup>28</sup> Evocoiyase Saulo opita aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeēhisave. <sup>29</sup> Oiñehepoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. <sup>30</sup> Oicuase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

<sup>31</sup> Evocoiyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espiritu Santo oipĩtivii iyemboeta catu ãgua yuvireco.

*Eneas mbogüera agüer*

<sup>32</sup> Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar. <sup>33</sup> Aheve osepia mbia Eneas serer vahe, ahe ndoguatai vahe. Vupave tēi tui vahe ocho araviter rupi. <sup>34</sup> Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoiyase oñarapuha voi. <sup>35</sup> Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

*Dorcas cuerayevi agüer*

<sup>36</sup> Ahe araviter pipe Jope ve cuña Tabita serer vahe secói, griego ñehe pipe rumo Dorcas serer. Ahe Jesucristo reroyasar secói. Ahe secocuer aviye vahe oporopitivi yepi. <sup>37</sup> Imbaheasi guasu rumo. Coiye omano. Ipore ava sehögüer oyosei yuvireco. Ichui viroyeupi oi ivate vahesave seraso yuvireco. <sup>38</sup> Jope namobrими Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvirío mbia seru poyava água Jope ve yuvireco.

<sup>39</sup> Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivi yuvireco. Omboyecua avei oturucuar ihari pendar reseve Dorcas rembiapogüer yuvireco chupe. <sup>40</sup> Ipore Pedro omosepa rane opacatu ava ocarve. Ahese ahe ae ofienopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oi. <sup>41</sup> Ahese oipisi Tabita po rese imoñarapuha. Ipore, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. <sup>42</sup> Serãcua oyanduse opacatu Jope rupi yuvireco, setá ava yande Yar viroya yuvireco. <sup>43</sup> Evocoyase Pedro opita setá ari aheve, mbia mbahe pিরer mopitasar, Simón serer vahe, piri.

## 10

### *Pedro iyavei Cornelio*

<sup>1</sup> Tecua Cesarea ve mbia Cornelio serer vahe secói, ahe cuartel Italiano serer vahe pendar cien sundao rerecuar. <sup>2</sup> Ahe mbia ombotei Tüpa opacatu guahir, güembireco reseve yepi. Iyavei omondoño ité judío pitivi água guarepochi, oyerocu avei Tüpa upe yepi. <sup>3</sup> Ñepe ari, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!” ehi. <sup>4</sup> Omahengatuse sese, “¿Mbahe, che Yar?” ehi osiquiyepave. Tüpa rembiguai rumo omboyevi chupe: “Tüpa oipisi nde yeruresa; osepia avei nde poroparaisuerecosa” ehi chupe. <sup>5</sup> “Emondo mbia Jope ve Simón reca. Ahe serer avei acói Pedro. <sup>6</sup> Ahe secói ambuae Simón, mbahe pিরer mopitasar piri. Ahe sêta para guasu popive chini” ehi chupe.

<sup>7</sup> Osose Tüpa rembiguai ichui, Cornelio oñehe ñuvirío güembiguai upe iyavei ñepe sundao Tüpa mboeteisar upe, sese acói oyeroya vahe yepi. <sup>8</sup> Opacatu Tüpa rembiguai ñehe mombehu pare, omondo Jope ve.

<sup>9</sup> Ahere ayihive virovise Jope yuviraso, Pedro oyeupi oi ipe vahe harive mbitar ari senise oyerocu água. <sup>10</sup> Vieporêhise ocaru pota viña. Omoingatu vitesave rumo semihura yuvireco, aviyeteramo tēi osepia mbahe oquer pendar nungar: <sup>11</sup> ahese osepia iva oyemboise, ahe ichui turucuar tuvicha vahe pipe ogüeyi mbahe, ñapichimbri ipopi yacatu ou chupe. <sup>12</sup> Ahe turucuar pipe, osepia opacatu mahembiar vai, mboi, vīrai vai tēi avei. <sup>13</sup> Ahese osendu ñehesa aipo ehi vahe: “Pedro, epūha, eyuca, ichui ehu” ehi chupe.

<sup>14</sup> Pedro rumo omboyevi chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe. <sup>15</sup> Osendu iri ñehesa aipo ehi vahe chupe: “Tüpa remimbotatupri upe, ‘Ava remimbotarēhi, ndihusai vahe’ nderei chira” ehi.

<sup>16</sup> Ēgüe ehi mbosapí oyupagüer rupi chupe. Ipare turucuar oyevi ivave oso. <sup>17</sup> Pedro ipihañemoñeta vitese mbahe osepia vahecuer rese oquer nungar pipe: “¿Mbahe rese pîha co oyemboyecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rêta roquendipive yuvireco. <sup>18</sup> Oñehe pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

<sup>19</sup> Ipihañemoñeta viteseve Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapí mbîa nde reca yuvireco. <sup>20</sup> Eyemoingatu, egüeyi chupe, eso supi. ‘¿Asora pîha?’ erei rene. Esepia, che ambou evocoi mbîa nde reca” ehi Espiritu Santo Pedro upe.

<sup>21</sup> Evocoyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

<sup>22</sup> Ahe evocoyase omboyevi iñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbîa seco ïvi vahe, Tûpa mboeteisar opacatu judío osaisu, oipota rai yuvireco. Tûpa rembiguai oyocuai nde rese ereso vaherã sêtave, ahe osendu vaherã nde ñehesa —ehi yuvireco Pedro upe.

<sup>23</sup> Evocoyase omoinguepa, omombîtapa oyepiri ñepeï pîtu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

<sup>24</sup> Ahere ayihive oyepotase Cesarea ve, yuviraso sêtave. Cornelio rumo osãro opacatu omu eta rese yuvireco iyavei omborîparete güembisoho reseve avei. <sup>25</sup> Oyepotase sêtave oso, Cornelio rane osê voi, osovaïchi, oñenopîha sovai imboeteisa pipe. <sup>26</sup> Pedro rumo aipo ehi chupe:

—Epûha, che niha nde nungar avei aico —ehi chupe.

<sup>27</sup> Evocoyase ahe omoñeta seroi que seraso oi pipe. Ahave ava oñemonuha vahe setá osepia yuvireco. <sup>28</sup> Ahe ava upe aipo ehi:

—Pe peicua judío porocuita aipo ehi vahe: “Peiquei rene ndahei vahe judío piri. Aní chiaveira pemborî evocoi ava peico” ehi acoi —ehi Cornelio rêta pipendar upe—. Tûpa rumo omombehu cheu che quer nungar pipe: “ ‘Ava remimbotarêhi peico’ erei rene ambuae ava upe” ehi cheu. <sup>29</sup> Pe pemondo ava che reca. Che evocoyase nacheatêhi che yu âgua pëu. Sese che aicua pota, ¿mahera vo che reru uca peye? —ehi.

<sup>30</sup> Evocoyase Cornelio aipo ehi chupe:

—Opa co irungatu ari, caharuse co hora rupi tupri avei, che cohava che rêtave aicose, ndacarui eté che yerure âgua Tûpa upe. Aheseve oyemboyecua mbîa Tûpa rembiguai iturucuar rendí iteanga vahe cheu. <sup>31</sup> Ahe aipo ehi cheu: “Cornelio, Tûpa osendu nde yeruresa iyavei oicua avei nde poroparaisuerecosa. <sup>32</sup> Emondo nde rembiguai Jope ve Simón Pedro serer vahe reca. Ahe oicove ambuae Simón rêtave, ahe mbahe pîrer mopîtasar. Ahe sêta para guasu popive chini” ehi cheu. <sup>33</sup> Sese amondo voi eté nde reca âgua. Avîye nde ereyu cohava. Cûritei co opacatu yaico cohava Tûpa rovaque. Orosendu pota opacatu nde ñehe yande Yar nde cuai vahe nde ñehe âgua oreu —ehi Cornelio chupe.

*Pedro oñehe Cornelio rêtave*

<sup>34</sup> Evocoyase Pedro aipo ehi chupe:

—Aicua cute, supi eté Tûpa nombayahoi yande raisu. <sup>35</sup> Sese ambuae ïvi pipendar omboetei vahe Tûpa, oyapo vahe avei mbahe tupri

yuvireco, ahe oipisira Tūpa. <sup>36</sup> Aracahe Tūpa oñehe avei Israel suindar upe, omombehu ñehesa tupri yeamotarēhiēhisa resendar Jesucristo rembiaporā sui, ahe opacatu ava co ivi pipendar yuvirecoi vahe Yar. <sup>37</sup> Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. <sup>38</sup> Peicua revo Tūpa omondo Jesús Nazaret pendar upe opīratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe carugar povrive yuvirecoi vahe. Esepia, Tūpa seci sese. <sup>39</sup> Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco. <sup>40</sup> Tūpa rumo ombogüerayevi imombosapisa ari pipe. Ipare omboyecua iri oreu. <sup>41</sup> Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oihu avei ocuerayevi pare. <sup>42</sup> Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recocuer rese porandu āgua oicove vite vahe, omano vahe avei” ehi oreu. <sup>43</sup> Ahe secocuer avei opacatu Tūpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe angaipa rese yuvireco” ehi —ehi Pedro Cornelio rēta pipe yuvinoi vahe upe.

*Espíritu Santo oique ava ndahei vahe judío pīha pipe*

<sup>44</sup> Pedro oñehe viteseve, Espiritu Santo ogüeyi opacatu ava osendu vahe rese. <sup>45</sup> “¡Too! Evocoyase ndahei vahe judío upe avei Tūpa omondo Espiritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. <sup>46</sup> Esepia, osendu ahe oñehese ñehesa ndicuasai vahe pipe yuvireco Tūpa upe. <sup>47</sup> Evocoyase aipo ehi vupindar upe:

—¿Oime pīha ndoipotai vahe co ava ñeapiramo āgua yande pāhu pendar? Esepia, co oipisi Espiritu Santo yuvireco inungar yande —ehi vupindar upe.

<sup>48</sup> Sese,

—Yañapiramopa Jesucristo rer pipe yuvireco —ehi.

Ipare Cornelio rēta pipe yuvinoi vahe aipo ehi: “Epīta vitemi moviro ari ore piri” ehi yuvireco chupe.

## 11

*Pedro remimombehu Jerusalén pendar Jesús reroyasar upe*

<sup>1</sup> Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñehengagüer yuvireco. <sup>2</sup> Oyevise rumo Pedro Jerusalén ve oso, ahese setá judío Jesucristo reroyasar viroiro sovai eté yuvireco, <sup>3</sup> aipo ehi:

—¡Mahera eresño tēi eté ndahei vahe judío piri! Iyavei nde erecaruño tēi eté ipāhuve yuvireco no —ehi yuvireco chupe.

<sup>4</sup> Pedro rumo omombehu tupri yipisui opacatu mbahe güembiepia yuvireco chupe aipo ehi:

<sup>5</sup>—Che, tecua Jope ve aicose, ayerure. Ahese che quer nungarve asepia turucar tuvicha vahe nungar ipopi yacatu ñapichisa vahe ogüeyi ou che rovai iva sui. <sup>6</sup> Asepia ipipe opacatu mahembiar ihupirēhi, mbahe mimba, mboi, vīrai vai tēi avei —ehi—. <sup>7</sup> Iyavei ahese asendu ñehesa aipo ehi cheu: “Pedro, epūha, eyuca, ehū” ehi cheu. <sup>8</sup> Che rumo aipo

ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe. <sup>9</sup> Ichui asendu iri ñehesa: “Tūpa remimbocatupri upe, ‘Ava remimbotarēhi’ erei rene” ehi cheu. <sup>10</sup> Ēgüe ehi mbosapi oyupagüer rupi cheu. Ipare opacatu oyevi iri ivave oso. <sup>11</sup> Aheseve avei mbosapi mbia imboupri Cesarea sui oyepota yuvireco che recosave che reca. <sup>12</sup> Espiritu Santo che cuai che so água che atēhiēhisa pipe supi yuvireco. Co seis mbia Tūpa reroyasar, yande mu, yuviraso avei che rupi. Ipare aheve oroyepotase oroso, oroique Cornelio rētave. <sup>13</sup> Ahe omombehu oreu osepia vahecuer güētave Tūpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru água. <sup>14</sup> Ahe omombehura ndeu nde ñepisiro água iyavei opacatu nde rēta pendar ñepisiro água avei” ehi Tūpa rembiguai Cornelio upe —ehi—. <sup>15</sup> Añehe ramoseve chupe, Espiritu Santo ou sese yuvireco inungar yande rese ou aracaco. <sup>16</sup> Evocoiyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoāpiramo, pe rumo Espiritu Santo pipe peñeapiramora” ehi vahe. <sup>17</sup> Tūpa Espiritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tūpa ayamotarēhira —ehi Pedro omu upe.

<sup>18</sup> Osenduse rumo co Pedro ñehe, imu noñehe iri sese yuvireco. Ahe rumo,

—iToo, evocoiyase Tūpa ombou avei ndahei vahe judío upe secocuer recuñaro água, tecovesa apirēhi vahe rereco água! —ehi Tūpa mboeteisa pipe yuvireco.

*Ava Jesús reroyasar Antioquía ve*

<sup>19</sup> Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarēhimbar oyamotarēhi catu yuvireco. Evocoiyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. <sup>20</sup> Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. <sup>21</sup> Yande Yar pīratasa vireco yuvireco. Evocoiyase setá ava viroya; oseyá ité yipindar güembieroya yuvireco yande Yar reroya água.

<sup>22</sup> Serācua oyepotase Jesús reroyasar upe Jerusalén ve, ahese omondo Bernabé yuvireco Antioquía ve. <sup>23</sup> Oyepotase aheve, osepia Tūpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. <sup>24</sup> Bernabé aviye etepri vahe, viroya ité Espiritu Santo iyavei oyeroya ité yande Yar rese. Evocoiyase setá ava oyemboya yande Yar rese yuvireco.

<sup>25</sup> Ipare oso Tarso ve Saulo reca. <sup>26</sup> Oyosuse, güeru Antioquía ve. Aheve oyemboya yuvireco ambuae viroya vahe rese imbohe água ñepei araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipindar, “Cristo reroyasar” ehi yuvireco.

<sup>27</sup> Aheseve Tūpa ñehe mombehusar yugüeru Antioquía ve Jerusalén sui. <sup>28</sup> Ñepei ipāhu pendar, Agabo serer vahe, opūha aipo ehi Espiritu Santo pīratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose). <sup>29</sup> Evocoiyase Jesús reroyasar Antioquía pendar omondo pota voi guarepochi Jesús

reroyasar Judea pendar pĩtĩvii āgua yuvireco ocatugüer rupi. <sup>30</sup> Ēgüe ehi yande Yar reroyasar rārosar Judea pendar upe porerecosā mondo. Bernabé, Saulo ahe porerecosā viraso yuvireco.

## 12

### *Santiago mano agüer iyavei Pedro roquenda agüer*

<sup>1</sup> Ahe araviter pipe avei mborerecuar guasu Herodes omboipi Jesús reroyasar mombaraisu. <sup>2</sup> Ahese oyuca uca quise pucu pipe Santiago, ahe Juan riquehir. <sup>3</sup> Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. <sup>4</sup> Pedro roquenda pare omondo irungatu imar sui irungatu-ngatu sundao omondo sãro āgua yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña. <sup>5</sup> Evocoyase Pedro opita voquendasave sãrombri tupri chini. Jesús reroyasar rumo oyeruqui pĩrata Tũpa upe yuvireco sese.

### *Tũpa omose uca Pedro soquendasa sui*

<sup>6</sup> Ahe ari vinose potase Herodes Pedro soquendasa sui, ahe pĩtu pipe Pedro oque ñuvirio sundao guãrosar rese. Ñapichisa ñuvirio carena pipe ou, ñuvinohambe avei sãrosar soquendasa roquendipive. <sup>7</sup> Aviyeteramo tẽi Tũpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epũha poyava!” ehi chupe. Ipũhase, opa voi oyerā carena ipo sui. <sup>8</sup> Ahese Tũpa rembiguai aipo ehi chupe: “Eyemonde, emonde nde pitaqui” ehi. Evocoyase Pedro omonde. Ipare aipo ehi iri: “Emonde avei nde yeasoa, eyu che raquicuei” ehi chupe.

<sup>9</sup> Ēgüe ehi oso saquicuei. Ahe rumo ndoicuai Tũpa rembiguai oyeupe ěgüe ehise. Ndoyavii iquerve tẽi ěgüe ehi vahe chupe. <sup>10</sup> Ichui yuvinose, oñocua yipindar guãrosar yuvireco. Ipare yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvinose āgua yuvireco. Ahe oquenda oyemboi ahe ae ité chupe yuvireco. Ipare yuvinose yuviraso pucumi ocarusu rupi. Aviyeteramo tẽi Tũpa rembiguai ndoyecua iri chupe.

<sup>11</sup> Evocoyase Pedro aipo ehi oyeupe: “¡Too! Supi eté Tũpa ombou cheu güembiguai che renose āgua Herodes povri sui. Tũpa che pĩsiro judío rerecuar che yuca rãgüer sui” ehi oyeupe.

<sup>12</sup> Oyese opihañemoñeta pare, oso, oyepota Juan Marcos si María rõtave oso. Aheve setá ava oñemonuha oyeruqui yuvireco sese. <sup>13</sup> Oñehese Pedro oquenda ocar cotindarve, cuñatai, Rode serer vahe, osẽ imboi āgua chupe. <sup>14</sup> Osenduse rumo Pedro ñehe, oquenda omboi rãgüer sui, oña oi que oi pipe vorivetesave, omombehu: “Pe Pedro ihãi oquendipive” ehi oi pipendar upe. <sup>15</sup> Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tũpa rembiguai mo aipo sãrosar —ehiño yuvireco chupe.

<sup>16</sup> Aheseve Pedro oñehe viteño ité oquendipive ohã. Ichui omboise oquenda yuvireco chupe cute, oyembosiquiye iriño tẽi sepiase yuvireco. <sup>17</sup> Pedro rumo opo omopuha imonguiriri āgua. Ichui opa omombehu



yande Yar opĩsĩro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe — ehi.

Ichui oseño, ambuaeve oso.

<sup>18</sup> Cõhese sundao oyepihamondii eteanga yuvireco. “¿Que pĩha Pedro?” ehi tẽi oyeupe yuvireco. <sup>19</sup> Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuaita rupi oporandu tupri sãrosar upe: “¿Que vo secoi?” ehi tẽi chupe. Sese oyocuai ambuae sundao opacatu ahe sãrosar yucapa ãgua. Ipare Herodes osẽ Judea sui oso Cesarea ve oyemboerecua.

### *Herodes mano agüer*

<sup>20</sup> Yipĩndar rumo Herodes ndasorii eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vaheřã mborerecuar rovai. Ahe evocoyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca ãgua rese yuvireco. Esepia, Herodes porocuaita sui oipisi mbahe güemihura yuvireco. <sup>21</sup> Herodes evocoyase omombehu ari oñehe vaheřã chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive oguapi oĩ. Aheve oñehe ava rehii upe. <sup>22</sup> Evocoyase ava rehii osapucai pĩrata yuvireco aipo ehi: “¿Co mbia oñehe vahe ndahei ava tẽi, Tũpa ité!” ehi yuvireco Herodes upe imboeteisave. <sup>23</sup> Ava aipo iheseve voi, ñepeĩ Tũpa rembiguai oyapo mbaherasi guasu chupe. Ichui mbahe rasoĩ ocaru yaviter rupi yuvireco. Esepia, nomboteĩ eté Tũpa. Sese omano.

<sup>24</sup> Tũpa Ñehengagüer rumo imombehusa catu opacatu rupi.

<sup>25</sup> Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

## 13

### *Tũpa oiporavo Bernabé, Saulo oyeupe mboraviqui apo ãgua*

<sup>1</sup> Evocoyase Jesús reroyasar Antioquía pendar pãhuve oime Tũpa Ñehengagüer mombehugar, sese oporombohe vahe avei. Ahe Bernabé, Simón (chupe, “Avaũ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo. <sup>2</sup> Ñepeĩ ari opacatu Jesús reroyasar oñemonuhase yande Yar mboeteĩ ãgua, oyecuacu avei, ahese Espĩritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo ãgua” ehi Espĩritu Santo yuvireco chupe.

<sup>3</sup> Evocoyase oyerocuĩ pare, omondo opo yuvireco iporavopri ãca harive sovasa ãgua. Ipare omondo yuvireco ambuae tecua rupi Jesús recocuer mombehu ãgua.

### *Apóstol yuvirecoi Chipre rupi*

<sup>4</sup> Evocoyase Bernabé, Saulo Espĩritu Santo remimondo yuviraso Se-leucia ve. Ichui yuviraso carite pipe caha pãhu Chipre ve. <sup>5</sup> Oyepota yemboyasa Salamina ve yuviraso. Aheve omombehu Tũpa Ñehengagüer judío tũparo rupi yuvireco. Juan avei oso supi ipitĩvii ãgua.

<sup>6</sup> Opase ité oguata caha pãhu Chipre pïpe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che añehe Tūpa Ñehengagüer rese” ehi tupri tēi vahe. <sup>7</sup> Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tūpa Ñehengagüer rendu potasave oyeupe. <sup>8</sup> Ipaye vahe rer griego ñehe pïpe Elimas. Ahe ndoviroya ucai güerecuar upe ñehesa supi eté vahe. <sup>9</sup> Evocoyase Saulo, Pablo serer vahe, vireco ité vahe Espiritu Santo opïha pïpe, omahe tupri sese. <sup>10</sup> Ipare aipo ehi chupe:

—¡Nde iporombopa serai vahe ereico! ¡Ndipihai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe reroirosa sui. <sup>11</sup> Eyapisaca, cūritei yande Yar nde mombaraisura. Nande mboesapisoi chira moviro ari rupi. Ichui ndereicatu iri chietera ari rendigüer repia āgua —ehi Pablo chupe.

Aipo ehi ramoseve voi, opacatu pītumimbi chupe. Oñehe tēi ava güeraso āgua upe. <sup>12</sup> Ahe mbahe repiase, mborerecuar viroya yande Yar. Oyepihamondi porombohesa yande Yar resendar renduse.

*Pablo, Bernabé reseve yuvirecoi Antioquia ve Pisidia ivi pïpe*

<sup>13</sup> Evocoyase Pablo, supindar avei, yuviraso carite pïpe Pafos sui Panfilia rupindar Perge ve. Juan rumo oseya oyevi Jerusalén ve oso. <sup>14</sup> Perge sui yuviraso Antioquia ve, ahe namombrii Pisidia sui. Aheve, mbituhusa ari pïpe, yuviroique judío tūparove oguapï yuvinoi. <sup>15</sup> Oyerوقي pare Tūpa porocuita resendar cuachiar pïpe, Tūpa ñehe mombehusar cuachiar pïpe avei, tūparo pendar rerecuar omondo oñehe Pablo upe:

—Ore mu, perecose mbahe pemombehu vaherā co ava monguerēhi āgua, pemombehumi yandeu cūritei —ehi.

<sup>16</sup> Evocoyase Pablo opūha ohā. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pesendu che ñehe —ehi—. <sup>17</sup> Israel iguar Tūpa oiporavo yande ramoi oyeupe nara, ahe Egipto ivi pïpe omboeta secua ambuae vahe secosa pïpe. Ipare opīratasa pïpe vinosepa ahe ivi sui aracahe. <sup>18</sup> Ipare Tūpa oñemosañe yande ramoi reco ai upe cuarenta araviter rupi, oguatase yuvireco ivi iporupirēhisa rupi. <sup>19</sup> Ipare omocañi ava eta Canaán pīpendar siete tupri yuvirecoi vahe serecuar reseve-seve. Ipare omondo Canaán ivi yande ramoi upe nara. <sup>20</sup> Ēgüe ehi cuatrocientos cincuenta araviter rupi yapo yuvireco —ehi.

“Ipare Tūpa ombou ava recocuer moingatusar oporocuai vaherā. Ipa vahe ipãhu pendar serer Samuel aracahe. Ahe Tūpa ñehe mombehusar avei. <sup>21</sup> Ahese yande ramoi eta oporandu yuvireco Tūpa upe mborerecuar guasu rese. Evocoyase Tūpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico. <sup>22</sup> Ipare Tūpa virocua imborerecuasa ichui; omondo David upe yande ramoi cuai āgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe mboaviyera che porocuita’ ehi Tūpa. <sup>23</sup> Ahe David suindar sui, Tūpa ombou Jesús Israel iguar pīsiro āgua. Aracaheve Tūpa omombehu co yande ramoi upe. <sup>24</sup> Yande Yar yu

renondeve, Juan omombehu opacatu Israel iguar upe: ‘Pemboasi pe angaipa, peyevi Tūpa upe pe ñeapiramo āgua’ ehi chupe. <sup>25</sup> Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande písirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisā yora āgua ipi sui’ ehi Juan” ehi judío tūparo pendar upe imombehu.

<sup>26</sup> “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa písirosa resendar. <sup>27</sup> Jerusalén pendar rerecuar avei ndoicuai evocoi Jesús Tūpa remimbou secoise yuvireco. Iyavei ndosenducuai Tūpa ñehe mombehusar cuachiar pipe oyerouise mbituhusa ari yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehe mombehusar rembicuachiagüer pipendar yuvireco. <sup>28</sup> Yepe ndoyosui mbahe sembiapo rai yuca uca āgua yuvireco viña, ahe rumo oporanduño Pilato upe yuca uca āgua rese yuvireco” ehi. <sup>29</sup> “Ichui omboaviyese opacatu icuachiapri pipendar yuvireco, oviroyi uca curusu sui ñoti āgua yuvireco. <sup>30</sup> Tūpa rumo ombogüerayevi iri. <sup>31</sup> Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūrítei ahe ava ité omombehu Jesús recocuer ava upe yuvireco” ehi tūparo pendar upe.

<sup>32</sup> “Sese che mu eta, cūrítei oromombehu pēu evocoi ñehesa aviye vahe Tūpa omondo vahe yande ramoí upe aracahe. <sup>33</sup> Tūpa omboaviye ramo güemimombegüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tūpa chupe. <sup>34</sup> Tūpa omombehu avei güemimbogüerayevi sete tuyuēhi āgua icuachiapri pipe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye āgua’ ehi. <sup>35</sup> Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maranehi vahe rete ituyupa āgua’ ehi. <sup>36</sup> Supi eté, David omboaviye ocuaita ava rese ohañecosa pipe yepi. Ipare omano. Evocoiyase oyapocatu tuvipave imu pāhuve yuvireco. Ahe setecuer rumo opaño ité ituyu” ehi. <sup>37</sup> “Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu. <sup>38</sup> “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi pēu. Moisés porocuita sui ndipoi ñeroisa angaipa rese yande reco mohivi āgua. <sup>39</sup> Jesús recocuer sui rumo oime ñeroisa ñepeí-peí viroya vahe upe” ehi. <sup>40</sup> “Peicua catu co mbahe sui, toviapi eme pe harive acoi Tūpa ñehe mombehusar rembicuachiagüer pipe aipo ehi vahe:

<sup>41</sup> ‘Esepia, pe seroĩrosar peico vahe. Peyepihamondi, ipare pecañi tēira. Esepia, che ayapora mbahe pe recovesese. Yepe ambuae omombehu tupri itera pēu che rembiaporā viña, pe rumo ndaperoyai chietera’ ehi Tūpa” ehi Pablo tūparo pendar upe.

<sup>42</sup> Yuvínose potase tūparo sui, ombobita Pablo yuvireco: “Tere-mombehu irimi eromombehu vahe ñehesa ambuae mbituhusa ari pipe oreu” ehi yuvireco chupe. <sup>43</sup> Yuvínosese ava rehii tūparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tūpa pe rovasasa pipe” ehi ava upe yuvireco.

<sup>44</sup> Ambuae mbituhusa ari pipe seni opacatu ava ahe pendar oñemonuha yuvireco Tūpa Ñehengagüer rendu āgua. <sup>45</sup> Osepiase ava rehii, judío rerecuar oñemoiró iteanga Pablo upe, supindar upe avei yuvireco. Viroiro Pablo ñehe ava upe yuvireco. <sup>46</sup> Evocoyase Pablo, Bernabé reseve oñehe yuvireco judío upe osiquiyeēhisave:

—Tūpa ore cuai pēu rane ore ñehe āgua. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirēhi vahe. Evocoyase orosora, oroñehe ava ndahei vahe judío upe. <sup>47</sup> Esepia, yande Yar ombou ore cuaitarã co ñehesa rese arachendar aipo ehi vahe:

‘Che oroporavo tataendi nungar nde reco āgua ndahei vahe judío yuvirecoi vahe upe p̄sirosa rerogata āgua opacatu ivi rupi’ ehi.

<sup>48</sup> Ava ndahei vahe judío osenduse co ñehesa, oviharete yuvireco, omboetei avei Tūpa Ñehengagüer. Opacatu ava iporavopri tecovesa apirēhi vahe pisi āgua, ahe viroya yuvireco. <sup>49</sup> Evocoyase Tūpa Ñehengagüer omombehu opacatu ahe ivi rupi yuvireco. <sup>50</sup> Judío rumo omonguerēhi cuña imboyeroyapri Tūpa mboeteisar iyavei mbia seco ivate vahe Pablo, Bernabé mose uca āgua güecua sui yuvireco yamotarēhisave. <sup>51</sup> Ahese Pablo, Bernabé oipipete opitaqui ivi sui yuvireco ‘Tūpa toicua mbahe sembiapo ai rese yuvireco chupe’ oya. Ichui yuviraso Iconio ve. <sup>52</sup> Jesús reroyasar rumo oviharete yuvireco, vireco ité Espíritu Santo oyese yuvireco.

## 14

*Pablo, Bernabé reseve omombehu Tūpa Ñehengagüer Iconio ve yuvireco*

<sup>1</sup> Pablo, Bernabé oyepota Iconio ve yuviraso. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya iñehesa yuvireco judío, ndahei vahe avei judío. <sup>2</sup> Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua. <sup>3</sup> Ahe rumo opita pucu yuvireco Iconio ve, omombehuño yande Yar recocuer osiquiyeēhisave yuvireco. Aheve Tūpa ombou opiratas mbahe yavai vahe apo āgua chupe ‘ichui toicua yuvireco Pablo, Bernabé che poroaisusa mombehuse’ oyapave. <sup>4</sup> Ahe tecua pendar rumo ipihañemoñeta yoivi yuvireco: ñepe judío pihañemoñetasa rupindar; ambuae evocoyase apóstol pihañemoñetasa rupindar yuvireco. <sup>5</sup> Oime judío iyavei ndahei vahe judío oyemboyoya mborerecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña. <sup>6</sup> Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. <sup>7</sup> Supi omombehu ñehesa aviye vahe Jesús resendar yuvireco.

*Pablo yapí-yapisa ita pipe Listra ve*

<sup>8</sup> Listra ve yuvirecoise, oime mbia oha ramomi suive ndoguatai vahe. Ahe mbia oguapi oī <sup>9</sup> oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua. <sup>10</sup> Evocoyase aipo ehi pirata chupe:

—¡Epūha! —ehi.

Ahese opo, opūha, oguata voi. <sup>11</sup> Osepiase ava rehii mbahe sembiapo yuvireco, osapucai p̄rata Licaonia ñehe pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

<sup>12</sup> Ipíhañemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepia, Pablo oñehe vahe. <sup>13</sup> Ahese co tūpa Zeus pahi güeru tivi, mbahe potri avei. Ahe tecua tapia roquendave, ahe Zeus tūparo tecua pipe ava reiquesa rupi chini. Oyuca pota tivi Pablo, Bernabé mboetei água yuvireco viña. <sup>14</sup> Oicuase rumo Bernabé, Pablo, ahese omondo oturucuar yuvinoña ava pãhuve; oñehe pĩrata yuvireco:

<sup>15</sup> —Mbia, ¿mahera ěgüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe ěgüe ehi tēi vahe mboeteisa sui; peroya Tūpa supi eté vahe” orohe pēu. Ahe oyapo vahe iva, ivi, para guasu, opacatu ipor reseve. <sup>16</sup> Aracahe rumo Tūpa, “Ěgüe tehi oguata ndahei vahe judío opíhañemoñetas rupi yuvireco” ehi viña. <sup>17</sup> Tūpa rumo ndasesarai ava upe mbahe tupri apo água sui. Ahe ombou amar pēu mbahe miti ha aviye água yepi. Ěgüe ehi mbahe tembihu imbou iyavei viharetesa pēu —ehi ava upe yuvireco.

<sup>18</sup> Yepe aipo omombehu yuvireco chupe, ava rehi rumo seniño ité tivi oyuca yuvireco chupe imboetei água viña.

<sup>19</sup> Ahese oyepota moviro judío Antioquía sui, Iconio sui avei. Oipíhañemoñeta rerova ava rehi yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivi. Ipíhañemoñeta: “Yayuca ité” ehi yuvireco chupe viña. <sup>20</sup> Oyere tupri Pablo rese Jesús reroyasar yuvireco. Ahe rumo oñarapuha, oiñe iri oso tecua pipe. Ahere ayihive yuvinose oyevi yuviraso Bernabé reseve Derbe ve.

<sup>21</sup> Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco. <sup>22</sup> Ahe supi omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique água” ehi yuvireco Jesús reroyasar upe. <sup>23</sup> Ipare oiporavo ava Jesús reroyasar rãro água ñepei-peí ñemonuhasa rupi. Oyeroqui iyavei oyecuacu. Ipare viropovēhe yande Yar upe iporaviqui água yuvireco.

*Pablo, Bernabé oyevi yuvireco Antioquía ve Siria ivi rese*

<sup>24</sup> Ipare yuviraso Pisidia rupi, oyepota Panfilia ivi rese. <sup>25</sup> Omombehu Tūpa Ñhengagüer yuvireco Perge ve. Ipare yuviraso Atalia ve. <sup>26</sup> Ahe ichui yuviraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboraviqui apo água. Aheve tupri avei imboaviye pare oyevi yuvireco. <sup>27</sup> Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tūpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya água yuvireco” ehi yuvireco omboetasa upe. <sup>28</sup> Aheve Pablo, Bernabé opita pucu yuvireco ipiri.

## 15

*Jesús reroyasar oñemonuha Jerusalén ve yuvireco*

<sup>1</sup> Evocoyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tüpa oyocuai Moisés yande ramoi cuii água: ‘Pembocircuncida opacatu pe mu cuimbahe cheu nara’ ehi Tüpa aracahe” ehi yuvireco. “Cüritei acoi égüe ndapeyese Jesús reroyasar upe, noñepisiroi chietera yuvireco” ehi Antioquía pendar upe yuvireco. <sup>2</sup> Pablo, Bernabé reseve rumo oñehe pĩrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rãrosar upe aipo mbahe moingatu água yuvireco.

<sup>3</sup> Égüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehumbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tüpa rupi oguata água yuvireco” ehi. Ahese opacatu Jesús reroyasar oyemboviharete yuvireco senduse.

<sup>4</sup> Yuviroyepotase Jerusalén ve, apóstol, Jesús reroyasar rãrosar iyavei ambuae Jesús reroyasareta oipisi tupri yuvireco. Aheve omombehu Tüpa mbahe oyapo vahe oyese yuvireco. <sup>5</sup> Osenduse rumo, moviro Jesús reroyasar fariseo opüha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuaita mboaviye água yuvireco —ehiño ité yuvireco.

<sup>6</sup> Ahese apóstol, Jesús reroyasar rãrosar avei oñemonuha oyemomborandu água aipo mbahe rese yuvireco. <sup>7</sup> Yemomborandu viteseve, Pedro opüha ipãhuve aipo ehi:

—Che mu, peicua niha aracaco Tüpa che poravo pe pãhu sui co ñehesa poropisirosa resendar mombehu água ava ndahei vahe judío upe ‘toviroya yuvireco’ oyapave. <sup>8</sup> Tüpa oicua ité opacatu ava pihañemoñetasa. Chupe avei omondo Espiritu Santo inungar yandeu. Ipipe sui yaicua Tüpa oipisi avei ahe ava oyeupe nara —ehi—. <sup>9</sup> Evocoyase, “Judío aviye catu vahe ava ndahei vahe judío sui” ndehi Tüpa. Esepia, opacatu oyoya pãve Tüpa upe yaico. Sese omoatiro ipihañemoñeta rai sui oyese yeroyasa pipe. <sup>10</sup> ¡Pe tie pesecoãha pota Tüpa! ¡Mahera peyocuai uca pota co Jesús reroyasar mbahe yavai rai vahe apo água! Aní rumo. Esepia, yande ramoi ndoicatui Tüpa porocuaita mboaviye água yuvireco, yande avei égüe yahe —ehi—. <sup>11</sup> Co rumo, yaroyase yande Yar Jesucristo, yande pĩsirora oporoaisusa pipe, inungar co ava ndahei vahe judío yuvirecoi —ehi Pedro.

<sup>12</sup> Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoyase omombehu ndayasepiai vahe poromondiisa Tüpa oyapo uca ava ndahei vahe judío pãhuve yuvireco chupe. <sup>13</sup> Osendupase iñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese: <sup>14</sup> Simón omombehu yandeu Tüpa osaisu avei ava ndahei vahe judío. Sese oiporavo ahe ava oyeupe nara —ehi—. <sup>15</sup> Oyoya tupri Tüpa ñehe mombehusar rembicuachiagüer rese. Ñepeí ipãhu pendar oicuachía aracahe aipo ehi:

16 ‘Coiye catu ayevíra vitu. Ahese ayapo piásu irira che rêta David oyapo uca vahecuer, ahe oi imocañipirer. Ambopiasu irira oitipa vahecuer yuvireco.

17 Ēgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

18 Evocoi yande Yar rembiaporã icuapri aracahe suive’ ehi Tûpa ñehe mombehúsar aracahe.

19 “Sese chepihañemoñeta iya ndayayocuai chira Moisés porocuaíta rupi oñecuñaro vahe rã ndahei vahe judío Tûpa rupi oguata ãgua yuvireco” ehi. 20 “Aviye rumo yaicuachiase chupe co mbahe resendar güeraño: Pehui rene mbahe mímba yucapri mbahe rahanga tẽi upe seropovẽhepri iyavei ndapeaguasai chira, pehui rene mbahe mímba yucapri suvi renosepirẽhi, mbahe ruvi avei” ehi. 21 “Esepia, opacatu tecua rupi yuvirecoi ava omombehu vahe Moisés porocuaíta ñepeipei mbituhusa ari pipe judío tûparo pipe aracahe suive. Aipo rupive” ehi Santiago.

*Icuachiapri ndahei vahe judío upe nara*

22 Ahese apóstol, Jesús reroyasar rãrosar, ambuae Jesús reroyasar avei omondo pota opãhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa pãhuvé yuvireco. 23 Ahe supi aipo ehi icuachía imondo yuvireco:

“Ore apóstol, Jesús reroyasar rãrosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei. 24 Oroyandu amove ava ore pãhu pendar pe mañeco tẽi aipo oporombohesa pipe yuvireco. Ahe ava ndahei ore ocuaita pipe yuviraso pẽu pe pihañemoñeta rerova. 25 Sese oyoya orepihañemoñeta oroiporavo ñuvirío mbia ore rembiáisu ore rivri Bernabé, Pablo rupi imondo eipeve pẽu. 26 Ahe acoi oyemondo vahe mbahe-mbahe tẽi povrive yande Yar Jesucristo recocuer rese yuvireco. 27 Oromondo Judas, Silas avei pẽu: ahe teieté omombehura opacatu cuachiar pipendar pẽu yuvireco. 28 Aviye Espiritu Santo upe, oreu avei co porocuaíta güeraño oromondo vahe rese pẽu. Ndape cuaisa pota iri rumo ambuae mborocuaíta rese. 29 Pehui rene mbahe mímba yucapri seropovẽhepri mbahe rahanga tẽi upendar, ndapehui chiaveira mbahe ruvi, mbahe mímba yucapri suvi renosepirẽhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pẽu. Aipo rupive. Peico tupri” ehi.

30 “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe. 31 Ahe cuachiar rese oyoerquoise, oyemboviharete yuvireco. 32 Judas, Silas Tûpa suindar ñehesa mombehúsar avei yuvirecoi. Sese omboviharete catu iyavei omonguerẽhi catu avei ahe ava yuvireco oñehe pipe. 33 Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe. 34 Silas rumo opita potaño ité aheve. 35 Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

*Imoñuviriosa Pablo guata agüer Jesús recocuer mombehu ãgua*

36 Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pñha ahe yuvireco? —ehi.

<sup>37</sup> Ahese Bernabé vıraso pota Juan Marcos oyeupi viña. <sup>38</sup> Nomboyoyai rumo Pablo ipihañemoñeta rese. Esepia, cuese Juan Marcos oseyaño oyepotase yuvireco Panfilia ve. “Taipñiviñño iporaviquisa rese” ndehi chupe. <sup>39</sup> Nomoingatuise mbahe oyeupe yuvireco, oyepepiño yuvireco oyesui. Ahese Bernabé vıraso Marcos oyeupi carite pipe Chipre ve. <sup>40</sup> Pablo rumo oiporavo Silas oyeupi icho ñgua. Yuvınose ñgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tũpa oporoaisusa pipe” ehi yuvireco imondo. <sup>41</sup> Ipare yuvıraso Siria, Cilicia rupi Jesús reroyasar monguerẽhi catu ñgua yuvireco.

## 16

### *Timoteo oso Silas ndugüerã Pablo rupi*

<sup>1</sup> Pablo ondugüer reseve yuvıraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego. <sup>2</sup> “Evocoi Timoteo avıye etepri” ehi Jesús reroyasar Listra pendar, Iconio pendar avei yuvireco chupe. <sup>3</sup> Pablo viroguata potaño ité Timoteo oyeupi. Sese seroguata renondeve, ombocircuncida uca seroñroẽhi ñgua judío yuvirecoi vahe upe. Esepia, opacatu oicua Timoteo ru griego secose yuvireco. <sup>4</sup> Evocoiyase opacatu tecua iguatagüer rupi omombehu ahe mborocuaite apóstol, Jesús reroyasar rãrosar Jerusalén pendar ombou vahe yuvireco chupe. <sup>5</sup> Sese Jesús reroyasar ahe tecua rupindar oyemovıracua catu yuvireco Jesús reroyasa pipe iyavei oyemboeta catu yuvireco ari rupi.

### *Tũpa omondo uca Pablo Macedonia ve iquer nungar pipe*

<sup>6</sup> Espıritu Santo ndoipotai Asia rupi yuvıraso vaherã Tũpa Ñehengagüer mombehu ñgua. Sese oyahuva yuvıraso Frigia rupi, Galacia rupi avei. <sup>7</sup> Ñgüe ehi oyepota Misia popıve yuvireco. Ichui yuvıraso pota tẽi Bitinia ve. Jesús Espıritu rumo ndoipotai icho ñgua supi. <sup>8</sup> Ahese osavaviño yuvıraso Misia sui carite guasu yemboyasa Troas ve oyepota ñgua yuvireco. <sup>9</sup> Oyepotase aheve, ahe pñtu pipe Pablo oquer nungar pipe osepia mbıa, Macedonia pendar, “Ereyumira Macedonia ve ore pñtivii ñgua viña” ehi ohã chupe. <sup>10</sup> Ipare ore oroyemoingatu voi eté Macedonia ve ore so ñgua. Esepia, ore oroicua ité Tũpa aheve ore mondora ñehesa pñsirosa resendar mombehu ñgua.

### *Pablo, Silas Filipino ve yuvirecoi*

<sup>11</sup> Oroso carite pipe Troas sui oromohıviñño voi oroso evocoi ivı para guasu Samotracia ve. Ahere ayihive oroyepota Neápolis ve. <sup>12</sup> Ichui oroso ivı rupi Filipos ve, ahe tecua seroyapri catu vahe ambuae tecua sui, ahe ivı Macedonia rupindar. Aheve Roma iguar oyeyecuai, oyocuai avei opacatu tecua ivıringar ava yuvireco. Aheve movıro ari tẽi oroico. <sup>13</sup> Mbituhusa ari pipe orosẽ evocoi tecua sui iai popıve. “Aheve oñemonuhara judío oyerõqui ñgua” orohe. Aheseve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pñsirosa resendar yuvireco chupe. <sup>14</sup> Ñepeı imboetasa, Lidia serer vahe, Tiatira pendar, oyapisaca ore ñehere rese oĩ. Ahe Tũpa mboeteisar secoi, turucuar suendi vahe mbovendesar avei secoi. Yande



Yar omohivi ipihañemoñetasa iyapisaca ãgua Pablo remimombehu rese. <sup>15</sup> Sese ñapiramosa, opacatu sêta pendar reseve. Ipare ore mombita pota güêtave.

—Che reroyase peye yande Yar reroyasar che recose, pepitara che rêtave —ehi oreu.

Ëgüe ehi ore monguerêhi. Sese oropita sêtave ipiri.

<sup>16</sup> Ipare ambuae ari oroso irise oroyeroqui ãgua, cuñatai ore rovaichi, ahe cuñatai carugar pîratasa pipe mbahe mombehuser. Oicatu ava upe mbahe oime vahe rã mombehu. Omombehuse mbahe, setã oipisi sepri guarepochi güerecuar yuvirecoi vahe upe nara yepi. <sup>17</sup> Ahe cuñatai ou ore raquicuei,

—¡Co ava Tûpa ivate catu vahe upendar oporaviqui yuvireco omombehu: “Na ehira Tûpa yande písiro” ehi yuvireco! —ehi pucu-pucu ore mombehu ava upe.

<sup>18</sup> Setã ari ëgüe ehi oico oreu. Omañeco tẽise rumo Pablo, oyemboyere chupe cute, aipo ehi icarugar upe:

—Che orocuai Jesucristo rer pipe: esẽ co cuñatai sui —ehi.

Aheseve voi carugar osẽ ichui.

<sup>19</sup> Evocoiyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco. <sup>20</sup> Ipare mborerecuar yuvirecoi vahe upe aipo ehi yuvireco:

—Co ñuvirio mbia orogüeru vahe peu, judio tẽi yuvirecoi. Ayeve omboavü guasu tẽi yuvireco yande recua pipe. <sup>21</sup> Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña ãgua —ehi yuvireco mborerecuar upe.

<sup>22</sup> Evocoiyase ava eta oyamotarêhi Pablo iyavei Silas yuvireco iyavei mborerecuar, “Pesequi iturucuar ichui. Ipare peinupara ivira pipe” ehi. <sup>23</sup> Inupã iteanga pare, osoquenda yuvireco. Oyocuai pîrata soquendapri rãrosar yuvireco, “Esãro tupri” ehi yuvireco chupe. <sup>24</sup> Aipo oyeupe he ramoseve, soquendapri rãrosar omoingue Pablo, Silas oi ava nose catui vahesa pipe. Aheve omopaha cepo pipe.

<sup>25</sup> Ahe pïtu mbiter rupi rupi rumo Pablo, Silas oyeroqui, osapucái Tûpa mboeteisave yuvireco. Ambuae ava soquendapri evocoiyase osenduño tẽi yuvireco isapucái. <sup>26</sup> Ahese aviyeteramo tẽi ivi oriri eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui. <sup>27</sup> Ahese soquendapri rãrosar omahe yesapiha. Osepiase oquenda imboipri, ahese vinose oquise pucu siru sui oyeyuca ãgua viña. Esepia niha, “Opacatu ite revo soquendapri yuviraso” ehi viña. <sup>28</sup> Pablo rumo,

—¡Ereyapoi rene mbahe tẽi ndeyeupe! ¡Esepia, opacatu orocoveño cohave! —ehi pucu soquendapri rãrosar upe.

<sup>29</sup> Evocoiyase soquendapri rãrosar, “Emboumi tataendi” ehi ondugüer upe. Ichui oña oique, oriri, osiquiyepave oñenopiha Pablo, Silas rovai oso. <sup>30</sup> Vinose pare soquendasa sui oporandu chupe:

—Mbia, ¿mara ahera vo che ñepisiro ãgua vichico? —ehi chupe.

<sup>31</sup> —Eroya yande Yar Jesucristo. Ichui ahe nde písirora, nde rêta pendar avei —ehi yuvireco chupe.

<sup>32</sup> Ahese omombehu yuvireco Tûpa Ñehengagüer soquendapri rãrosar upe, opacatu sêta pendar upe avei. <sup>33</sup> Ahe pïtu pipeve avei soquendapri

rãrosar víraso oyeupi, yapichasa oyoseipa chupe. Ahese Pablo, Silas oñapiramo guãrosarer, sêta pendar avei yuvireco. <sup>34</sup> Víraso pare sãrosar güetave, ombocarú. Ahe sêta pendar avei oviharete ité yuvireco Tûpa reroyasa rese.

<sup>35</sup> Cõhese mborerecuareta omondo sundao ava rese icuaipri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi. <sup>36</sup> Ahese soquendapri rãrosar omombehu co ñehesa Pablo upe:

—Mborerecuar ombou yuvireco ñehesa cheu pe mose água. Peso tupriño peico —ehi chupe.

<sup>37</sup> Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose água —ehi soquendapri rãrosar upe.

<sup>38</sup> Ipare sundao ava rese icuaipri omombehu güerecuareta upe Pablo ñehese. Oyanduse Pablo, Silas romano secose, osiquiyé iteanga yuvireco.

<sup>39</sup> Ahese ahe teieté yuviraso Pablo, Silas oyeupe ñero água rese yuvireco: “Peso tupriño ore recua sui” ehi yuvireco chupe. <sup>40</sup> Pablo, Silas yuvinosese voquendasa sui, yuviraso iri Lidia rêtave. Oñemonuha irise ambuae Jesús reroyasar pãhuve, omonguerēhi catu yuvireco. Ipare yuviraso ichui.

## 17

*Ava yaivu guasu tēi Tesalónica ve yuvireco*

<sup>1</sup> Oguatase Pablo iyavei Silas, oñocua Anfípolis iyavei Apolonia rupi yuviraso. Ēgüe ehi oyepota tecua Tesalónica ve yuvireco. Aheve oime judío tûparo. <sup>2</sup> Secocuer rupi eté mbituhusa ari pipe Pablo oique judío tûparove, oñemoñeta ava eta upe mbosapri mbituhusa ari rupi Tûpa Ñehengagüer rese. <sup>3</sup> Omboyecua tupri imombehu Tûpa Rembiporavo ava pĩsiro água iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe pēu, ahe ité niha Tûpa Rembiporavo ava pĩsiro água —ehi.

<sup>4</sup> Amove ipãhu pendar seroyasa pipe oyemboya sese yuvireco. Setá avei ava griego yuvirecoi vahe, Tûpa mboeteisar judío aracuasa reroyasar avei. Ipãhuve setá avei cuña oyemboetei vahe oyemboya sese yuvireco. <sup>5</sup> Judío rumo ndoviroyai vahe oñemoirombave secatēhi ava rese yuvireco. Sese omonuha ava yuvireco tēi vahe, ndipihai vahe yuvireco. Imonuha pare, ahe omboaivu guasu uca tēi ahe ava upe opacatu güecua pipe yuvireco. Yuviraso Jasón rêtave Pablo, Silas reca, vinose pota ava rehii pãhuve yuvireco viña. <sup>6</sup> Ndoyosuise rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroãse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūrítei oyepotapa yuvireco cohave! <sup>7</sup> Co Jasón omombituhu güetave. ¡Opacatu co yuvirecoi vahe ndoviroyai Cesar porocuita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

<sup>8</sup> Aipo ñehesa renduse, oyepihamondi guasu ava eta, mborerecuar avei tecua pipendar yuvireco. <sup>9</sup> Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

*Pablo, Silas omombehu Tũpa Ñehengagũer Berea ve yuvireco*

<sup>10</sup> Ahe pĩtu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tũparo pipe. <sup>11</sup> Berea pendar ava aviye catu ava Tesalónica pendar sui. Ēgũe ehi ipisi ohãpisiẽhisa pipe ñehesa yuvireco iyavei ari yacatu rupi oseca Tũpa Ñehengagũer pipe ‘¿supi eté pĩha Pablo ñehesa?’ oyapave yuvireco. <sup>12</sup> Evocoyase setá avei Pablo ñehese reroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei. <sup>13</sup> Judío Tesalónica pendar rumo oyandu yuvireco Pablo porombohesa Tũpa Ñehengagũer rese Berea ve. Sese yuviraso aheve imboavũ guasu tẽi uca ãgua ava upe yuvireco. <sup>14</sup> Evocoyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opĩta viteño aheve yuvireco. <sup>15</sup> Evocoyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehese Silas upe iyavei Timoteo upe avei yuvireco yuviraso voi ãgua Pablo piri ahe tecuave yuvireco.

*Pablo Atenas ve secoi*

<sup>16</sup> Pablo osãro viteseve Silas iyavei Timoteo Atenas ve oico, ndoyembovihai osepiase opacatu rupi tũpa rahanga-anga tẽi. <sup>17</sup> Sese judío tũparo pipe omombehu Jesús recocuer judío eta upe iyavei ambuae Tũpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pipe. <sup>18</sup> Evocoyase amove mbĩa oyembohe vahe epicũreo aracuasa rese iyavei mbĩa oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroĩrosave:

—¿Mbahe rese angahu pĩha co mbĩa iñehese papa rai ava upe oico? —ehi. Ambuae aipo ehi yuvireco:

—Ndoyavi co mbĩa oñehese vahe ambuae ava Tũpa rese tẽi —ehi yuvireco.

Esepia, omombehu Jesús recocuer iyavei cuerayevĩsa resendar. <sup>19</sup> Evocoyase ahe oyembohe vahe viroyeupi Pablo Areópago serer vahe-save seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña? <sup>20</sup> Supi eté niha eremombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

<sup>21</sup> Atenas pendar iyavei yugũeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

<sup>22-23</sup> Evocoyase Pablo opũha ahe ava pãhuve aipo ehi:

“Pesendu rane Atenas iguar. Aguatase ocar rupi asepia pe tũpa eta pemboetei vahe. Ahese asepia ñepeĩ tũpa upe seropovẽhepri renda. Sese asepia icuachiapri aipo ehi oĩ: ‘Tũpa ndicuasai vahe upendar’ ehi. Evocoi Tũpa ndapeicua vitei vahe, ahe secocuer niha amombehu pẽu” ehi.

<sup>24</sup> “Evocoi Tūpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tūparo ava tēi rembiapo pipe. <sup>25</sup> Ndahei ava rembiapo pipe sui tēi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pītuhesa iyavei opacatu mbahe oime vahe ivi, ivave” ehi.

<sup>26</sup> “Tūpa oyapo opacatu-catu tēi ava ñepei ava sui ava yesu āgua opacatu ivi rupi. Omondo ivi ava yemboerecua āgua ñepei-peí upe. Ari avei omondo co ivi pipe iyemboerecua āgua yuvireco chupe. <sup>27</sup> Ēgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ēgüe ehi rumo Tūpa yande resevemi eté. <sup>28</sup> Esepia niha, Tūpa sui yaicove, ipīratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tūpa suindar’ ehi yuvireco. <sup>29</sup> Sese yande Tūpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tūpa’ ndayahei chira. Esepia, mbahe rahanga ava rembiapo tēi, ndahei Tūpa” ehi. <sup>30</sup> “Pe ramoi ndoicua tupriise yuvireco aracahe, Tūpa oñemosañō mbahe sembiapo rese chupe. Cūritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya. <sup>31</sup> Esepia, ahe oiporavo ari opacatu ava recocuer rese porandu uca āgua güecocuer ivi tupriisa pipe ñepei güembiporavo upe. Ahe ombogüerayevi güembiporavo omano vahe pāhu sui ‘toicua opacatu ava güecocuer rese iporandu āgua’ oya” ehi Atenas pendar upe.

<sup>32</sup> Osenduse yuvireco cuerayevisa resendar, ahese oime ava oyoyai catu yuvireco seroīrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

<sup>33</sup> Sese Pablo osē ipāhu sui oso. <sup>34</sup> Moviro rumo mbia oyemboya sese, viroya ité vahe iñehesa yuvireco. Ahe ipāhuve secoi mbia Dionisio serer vahe, ahe Areópago pāhu pendar iyavei cuña Dámaris serer vahe. Ambuae oime vite yuvireco seroyasar.

## 18

### *Pablo Corinto ve secoi*

<sup>1</sup> Coiye catu Pablo osē Atenas sui, oso Corinto ve. <sup>2</sup> Aheve oyoe pia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvinose ñepei tecua Italia rupindar Roma sui oyocuaise mborerecuar guasu Claudio: “Toyuvinose ité opacatu judío Roma sui” ehise. Pablo oso, <sup>3</sup> opita Aquila piri oporaviqui āgua. Esepia, Pablo, Aquila avei ahe mbahe pিরer mbovivisar pāve yuvirecoi. <sup>4</sup> Mbituhusa ari yacatu rupi Pablo omombehu Jesucristo recocuer ava upe judío tūparo pipe ‘toviroya Jesús judío iyavei ndahei vahe judío yuvireco’ oyapave.

<sup>5</sup> Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu āgua rese güerañō judío eta upe aipo ehi: “Jesús niha Tūpa Rembiporavo ava pīsiro āgua secoi” ehi. <sup>6</sup> Iñehe-ñehe tēi rumo seroīrosave yuvireco chupe. Sese Pablo oipipete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tūpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pēu. Che

rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

<sup>7</sup> Evocoyase Pablo osê judío tũparo sui, oique mbia Ticio Justo serer vahe rêtave, ahe Tũpa mboeteisar avei seci. Ahe sêta judío tũparo iqueve. <sup>8</sup> Crispo, ahe judío tũparo rerecuar viroya avei yande Yar, opacatu sêta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñeapiramopa uca yuvireco. <sup>9</sup> Ñepei pĩtu pipe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui. <sup>10</sup> Esepia, che nde reseve aico. Sese ndiyai ava upe nde momara uca ãgua. Supi eté che areco setá che rahirã co tecua pipe” ehi yande Yar chupe. <sup>11</sup> Evocoyase opita ñepei araviter yemombitesa rupi Corinto ve oico. Aheve ombohe Tũpa Ñehengagüer rese ahe pendar ava.

<sup>12</sup> Galión mborerecuar secose opacatu Acaya rupi, judío oñemonuha Pablo amotarêhisave. Ichui viraso ahe mborerecuar upe porandusa ivate catusave yuvireco, <sup>13</sup> aipo ehi yuvireco chupe:

—Co mbia oipihañemoñeta rerova tẽi ava oTũpa mboetei ãgua. Ndahei rumo Roma pendar porocuita rupi êgüe ehi yuvireco —ehi yuvireco seroĩrosave chupe.

<sup>14</sup> Oñehe pota tẽi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemongerêhira che yapisaca ãgua pe remimombehu rese viña. <sup>15</sup> Pe rumo peporandu cheu mbahe pe yembohesa resendar, pe Tũpa rer resendar iyavei pe Tũpa porocuita resendar rese tẽi. Pemoin-gatu pe ae pe recocuer; ndaipotai aipo nungar mbahe moingatu ãgua —ehi Galión ahe ava upe.

<sup>16</sup> Ipare opa omboyepipi porandusa sui. <sup>17</sup> Ahese opacatu griego oipisi judío tũparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

*Pablo yevi irisa Antioquía ve*

<sup>18</sup> Pablo seci pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboaviye ãgua. Ipare yuviraso carite pipe Siria ve. <sup>19</sup> Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tũparo pipe Jesús resendar ñehesa mombehu ãgua chupe yuvireco. <sup>20</sup> Ahe pendar omombita pota vite tẽi yuvireco viña, Pablo rumo ndopita potai aheve. <sup>21</sup> Evocoyase, “Aviye, taso rane” ehiño chupe yuvireco. “Tũpa oipotase cheu, ayevi irira vitu pe piri” ehi.

Ipare oso Efeso sui carite pipe. <sup>22</sup> Oyepotase Cesarea ve, oso Jerusalén ve “avirave” apo ãgua Jesús reroyasar upe. Ipare oso Antioquía ve. <sup>23</sup> Opita pucu pare aheve, osê, oguata iri Galacia rupi, Frigia rupi opacatu Jesús reroyasar monguerêhi catu ãgua.

*Apolos omombehu Jesús recocuer Efeso ve*

<sup>24</sup> Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tũpa Ñehengagüer. <sup>25</sup> Ahe oyembohe vahe avei yande Yar recocuer rese. Omombehu oquerêhisa pipe secocuer ava upe, oporombohe tupri ai avei sese. Ahe

rumo oicua Juan oãpiramo agüer güeraño tõi. <sup>26</sup> Ahe osiquiyeëhisave judío tũparo pipe omombehu Tũpa Ñehengagüer. Osenduse Aquila, Priscila iñehesa, omombita yuvireco oyepiri. Ahese omombehu tupri catu Tũpa recocuer chupe yuvireco. <sup>27</sup> Oso potase Apolos Acaya coti, ahese Jesús reroyasar Efeso pendar omonguerëhi catu. Oyapo cuachiar Acaya pendar upe imondo yuvireco sese hañeco tupri ãgua. Ipare oyepota oso Acaya ve. Aheve oime ava Tũpa guaisusa pipe sui viroya vahe Jesús yuvireco. Ahe ava Apolos oipitivi seroya tupri catu ãgua yuvireco. <sup>28</sup> Omboyecua opacatu rovaque judío pihañemoñetasa co coti tõi vahe. Ahese opa osecopi oñehe pipe ahe ava. Esepia, Tũpa Ñehengagüer pipe omboyecua ité: “Jesús Tũpa Rembiporavo ava pĩsiro ãgua secoi” ehi eté judío eta upe.

## 19

*Pablo omombehu Jesús recocuer Efeso ve*

<sup>1</sup> Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar. <sup>2</sup> Evocoyase oporandu ahe ava upe:

—¿Peipisi vo Espiritu Santo pe piha pipe peroyase Jesús? —ehi chupe.

—Ore ndorosendui eté aipo Espiritu Santo resendar ñehesa —ehiño yuvireco chupe.

<sup>3</sup> Ichui oporandu iri chupe:

—Evocoyase, ¿mbahe nungar vo ãpiramosa peipisi? —ehi.

—Juan poroãpiramosa oroipisi —ehi ahe ava yuvireco chupe.

<sup>4</sup> Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyevisé Tũpa upe. Ipare rumo omombehu ava upe: “Peroya ahe eté vahe ou vaheerã che raquicuei” ehi. Ahe ou vaheerã, “Jesús upe” aipo ehi —ehi Pablo chupe.

<sup>5</sup> Osenduse Pablo ñehe, opacatu oñeapiramo uca Jesucristo rer pipe yuvireco. <sup>6</sup> Omondose Pablo opo iharive yuvireco, ahese ogüeyi Espiritu Santo, oique ipiha pipe yuvireco. Ipare aviyeteramo tõi oñehe ambuae ñehesa pipe iyavei omombehu Tũpa suindar ñehesa yuvireco. <sup>7</sup> Ëgüe ehi Tũpa ahe doce mbia yuvirecoi vahe upe.

<sup>8</sup> Mbosapi yasi rupi Pablo oique omombehu Tũpa Ñehengagüer judío upe osiquiyeëhisave itũparo pipe ipihañemoñeta rerova ãgua Tũpa mborerecuasa resendar reroya ãgua rese. <sup>9</sup> Amove rumo judío ipihaviracua ité seroyaëhi ãgua yuvireco. Ipipe iñehe-ñehe tõiño co tecocuer ipiasu vahe mombehusa rese yuvireco ava rehi rovaque. Evocoyase Pablo oyepepi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi. <sup>10</sup> Ëgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. <sup>11</sup> Tũpa omondo güeco pĩratasa Pablo upe poromondiisa apo ãgua. <sup>12</sup> Sese pañueru iyavei turucuar Pablo rese imbogüera, ahe serasosa imbaheasi vahe upe imbogüera ãgua. Carugar avei opa yuvinose yuvireco ichui.

<sup>13</sup> Amove oime judío uguata vahe ocar rupi carugar mose ãgua ava sui. Sese nara oiporu pota yande Yar Jesús rer yuvireco.

<sup>14</sup> Evocoyase aipo ehi carugar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pëu” ehi. Ëgüe ehi pota avei siete Esceva rahir mbahe apo yuvireco viña. Ahe iyeyupa

judío pahi rerecuar seci. <sup>15</sup> Carugar rumo ombovevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

<sup>16</sup> Aheve ahe cuimbahe carugar vireco vahe opo ipãhuve oso. Opacatu opiratasa pipe opa ité osecopi siete mbia yuvirecoi vahe. Omomara-mara tēi oguayihisa pipe imonanipa tupri imondo. <sup>17</sup> Co mbahe sembiapo rēracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

<sup>18</sup> Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco <sup>19</sup> iyavei setá ipaye vahe Jesucristo viroyase, omonuhapa ocuachiar ombopayesa resendar sapi água opacatu ava rovaque yuvireco. Sapi pare, opa ahe cuachiar repri vinose yuvireco. Ahe seprí cincuenta mil tupri ari mboraviqui repri. <sup>20</sup> Ègüe ehi Tūpa opiratasa pipe ombouvicha oñhengagüer iyavei iñehe pīratasa oyecua catu ava rese.

<sup>21</sup> Ipare Pablo ipihañemoñeta Jerusalén ve oso água ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi. <sup>22</sup> Evocoyase omondo ñuvirío opitivisar Timoteo, Erasto Macedonia ve güenonera. Ahe rumo opita vitemi Asia rupi oico.

*Ava Efeso pendar yaivu guasu yuvireco*

<sup>23</sup> Ahe ari pipe Efeso pendar yaivu guasu yuvireco co tecocuer ipiasu vahe rese. <sup>24</sup> Aheve mbia Demetrio serer vahe seci. Ahe oyapo Artemisa rēta rahanga guarepochi apopri guarepochi pisi água. Ambuae ava mbahe rahanga aposar oipisi tupri avei oporaviqui repri ipiri yuvireco. <sup>25</sup> Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaiyu guasu uca água. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe. <sup>26</sup> “Peicua avei Pablo opa ovirova ava eta piha Artemisa mboeteisa sui ‘ndahei Tūpa ité’ ohesa pipe yande rembiapo uve. Ndahei rumo cohapeño ègüe ehi, opacatu Asia rupi ègüe ehi avei imombehu. <sup>27</sup> Aviyeteramo mbahe tēi oimera yande yande poraviquisa mocañi tēi água, tūparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroirora yande rembiapo catuprisa yuvireco” ehi.

<sup>28</sup> Osenduse aipo ihe ava yuvireco, oñemoirosa pipe virosapucái aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

<sup>29</sup> Opacatu Efeso rupi ava yaivu guasu tēi. Osapucái vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave. <sup>30</sup> Pablo oique pota tēi ava rehii pãhuve, ambuae Jesús reroyasar rumo nomoingue uca potai yuvireco. <sup>31</sup> Iyavei moviro mborerecuar imboripar Asia rupindar omondo oñeche chupe aipo ehi: “Ereiquei rene ava ñemonuhasa guasuve” ehi avei yuvireco chupe. <sup>32</sup> Ñemonuhasave amove ava osapucái pīrata ñepe mbahe rese, amove osapucái ambuae mbahe rese. Esepia, yaivu tēi yuvireco. “¿Mahera vo evocoyase yañemonuha?”

ehi tēi setá ipāhu pendar yuvireco. <sup>33</sup> Amove rumo ava rehii pāhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu āgua ava rehii rovaque yuvireco. Alejandro evocoyase omopuha tēi opo ava monguiriri āgua viña. Osepí pota omu judío ava rehii rovaque viña. <sup>34</sup> Ava rehii rumo oicuae Alejandro judío secose yuvireco. Opacatu guasu osapucaí pírata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ēgüe ehi ahe osapucaí ñuvirío hora rupi rutei yuvireco.

<sup>35</sup> Evocoyase tecua pipendar mbahe cuachiasar oicatusa ava monguiriri āgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tūparo rese yande hañecosa iyavei sahanga iva sui oviapi vahe rese avei hañecosa. <sup>36</sup> Ndipoi niha ava, ‘Aní’ ehi vaherā che remimombehu rese. Sese peyemonguiririño, peyapoi rene mbahe pe yapisacaēhisave. <sup>37</sup> Peruño tēi eté co ñuvirío mbia cohava, ndoyapoi rumo mbahe tēi Artemisa upe yuvireco. Nimondai mbahe rese itūparove, ndoviroĩroi avei serer yuvireco. <sup>38</sup> Sese Demetrio iyavei oporaviqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco. <sup>39</sup> Pemoingatu potase que ambuae mbahe, peso ranera yemomborandusave imoingatu āgua. <sup>40</sup> Mborerecar revo oyandura yande rembiapo co pipe, ‘¿Mahera peavü guasu tēi? ¿Che amotarēhimbave tie ēgüe peye?’ ehi tiētera yandeu. Oporanduse yandeu, ndayaicatui chitiētera imboyevi āgua iñehe chupe. Esepia niha, co yañemonuha yande remimbotar tēi cohava” ehi chupe. <sup>41</sup> Aipo ihe pare, omomba aheve oñemonuhasa yuvireco.

## 20

### *Pablo guata agüer Macedonia, Grecia rupi*

<sup>1</sup> Ava avü guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve. <sup>2</sup> Oguatase Macedonia rupi, omonguerēhi-rēhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso. <sup>3</sup> Aheve opita mbosapí yasi. Oso potase Siria ve carite pipe, judío ipihañemoñeta mara sereco āgua rese yuvireco. Oyanduse, carite pipe oso rāgüer sui, oyevi iri oso Macedonia ve ivi rupi. <sup>4</sup> Yuviraso moviro mbia supi, ipāhuve ñepeí Berea pendar, Pirro rahir Sópater; ñuvirío Tesalónica pendar, Aristarco, Segundo; ñepeí Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. <sup>5</sup> Evocoi mbia yuviraso Pablo renondeve sãro āgua Troas ve. <sup>6</sup> Pieta pan ndayapepoi vahe hu pare, orosē tecua Filipino sui carite pipe, cinco arí rupi oroyepota Troas ve. Ahe tecuave oropita siete arí rupi.

### *Pablo Troas ve secoi*

<sup>7</sup> Domingü pipe, ore oroñemonuha pan hu āgua. Ahese Pablo oporombohe oico pĩtu mbiter rupi. Esepia, ahe osē pota ahere ayihive voi ichui. <sup>8</sup> Ahe oi ivate vahesave ñemonuhasa pipe setá tataendi. <sup>9</sup> Mbia chihivahe, Eutico serer vahe, metanave oguapí oí. Pablo rumo oñehe pucú iteanga. Evocoyase omboopesi ahe chihivahe. Ipare oquē; aviyeteramo tēi oviapi oi ivate vahe mbosapisa sui. Ahese ava ogüeyi sehōgüer rupi ivi sui



yuvireco. <sup>10</sup> Evocoyase Pablo ogüeyi ou chupe, oñeno oso sese icuhaguã. Ìpare aipo ehi Jesús reroyasar upe:

—Pesiquiyeyi rene; nomanoi moco —ehi.

<sup>11</sup> Ìpare oyeupi iri oso ombóhi pan ñgua. Ichui oñehe pucu vite. Omomba cõhe senise; ñpare oso cute. <sup>12</sup> Evocoyase co mbia chíhivahe viroyevise secosave, opacatu oyembóvicha guasu catu yuvireco. Esepia, nomanoi eté.

*Pablo yuviraso Troas sui Mileto ve*

<sup>13</sup> Pablo oso pota ñvi rupi, ore ranengatu rumo oroso carite pipe Aso ve. Aheve oroyepota Pablo reraso ñgua semimbotar rupi. <sup>14</sup> Oroyoepiase aheve, oha carite pipe ore piri. Ichui oroso cute Mitilene ve. <sup>15</sup> Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve. <sup>16</sup> Pablo ipoyava. Esepia, oipota Jerusalén ve Pentecostés pieta pipe tupri güeco ñgua. Sese Efeso oroñacuasaño oroso.

*Pablo ñehesa Jesús reroyasar rãrosareta Efeso pendar upe*

<sup>17</sup> Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya. <sup>18</sup> Oyepotase yuvireco chupe, aipo ehi: “Peicua niha che recocuer aviye ité yipisuiwe ari che reique ramosa resendar co Asia ve. <sup>19</sup> Ari yacatu rupi aporaviqui yande Yar upe pe pãhuve vichico che reco asiẽhisave che yasehosa pipe. Yepe judío che mboguai etepri che recoãhasave pe recuave yuvireco viña, <sup>20</sup> che rumo ndaicutui ñehesa aviye vahe mombehuẽhi pẽu mbahe aviye ñgua yepi. Che opombohe ava rehii rovaque, opombohe avei ñepeï-peï pe rãta rupi yepi” ehi. <sup>21</sup> “Amombehu ñehesa judío upe, ava ndahei vahe judío upe avei aipo ahe: ‘Pemboasi pe angaipa; peyevi Tũpa upe, peroya avei yande Yar Jesús’ ahe” ehi. <sup>22</sup> “Cũritei asora Jerusalén ve vichico. Aheve che so ñgua Espĩritu che cuai che piha pipe. ‘¿Mara ehira piha yuvireco peve cheu?’ aipo ahe. <sup>23</sup> Co güeraño che aicua: opacatu tecua che sosa rupi Espĩritu Santo aipo ehi cheu che roquenda ñgua iyavei che mombaraisu ñgua yuvireco yepi” ehi. <sup>24</sup> “Ndacherecatẽhii rumo cheyese che mano ñgua. Che rumo amboaviye potaño ité che poraviquisa Tũpa upe, ahe yande Yar Jesucristo che cuai vahe co ñehesa icatupri vahe mombehu ñgua. Co Tũpa oporoaisusa pipe ombou ñepeï vahe Guahir ava piĩsiro ñgua” ehi.

<sup>25</sup> “Opa niha Tũpa mborerecuasa amombehu pẽu. Che rumo aicua ndache repia iri chira peye. <sup>26</sup> Sese tapeicua cũritei: ndayavii eté che cuaita mboaviye ñgua co tecocuer aviye vahe mombehu pipe pẽu. <sup>27</sup> Esepia, ndaicuacui eté Tũpa Ñhengagüer mombehu; che rumo amombehuño ité opacatu Tũpa recocuer pẽu. <sup>28</sup> Sese peñearo tupri, pesãro avei opacatu Jesús reroyasar Espĩritu Santo porocuita rupi. Inungar ovesa rãrosar, ñgüe peye tuprira sãro. Ahe Tũpa remimboepi yuvirecoi. Esepia, Jesús oipiyere vuvi opacatu ava angaipa repirã. <sup>29</sup> Aicua che opoeyare, oyugüerura ambuae ava mahembiar oñaro ai vahe nungar pe pãhuve opacatu Jesús reroyasar mocañipa pota ñgua. <sup>30</sup> Oime aveira que ava pe pãhu pendar pe mbopa pota aveira yuvireco pe reraso ñgua oyeupi. <sup>31</sup> Sese pemahemoha tupri peyese. Pemahenduha acoi opomboaracua tuprise mbosapi araviter rupi, piũtu, ari yacatu rupi avei che yasehosa pipe pe rereco” ehi.

<sup>32</sup> “Sese, che riviřeta, opoeyara Tũpa povriře iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pũu opacatu ambuae güembiporavo reseve. <sup>33</sup> Ndaheĩ pe guarepochi, que oro iyavei pe turucuar pota raisa pipe aso pe pãhuve. <sup>34</sup> Peicua niha acoi che po pipe ite aporaviqui che recove ãgua, che rupindar recove ãgua avei. <sup>35</sup> Ęgũe ahe amboyecua che recocuer pũu. Supi avei Ęgũe peyera; yaporaviqui tupri iparaisu vahe rese hañeco ãgua. Pepihañemoñeta acoi yande Yar Jesús remimombehu rese: ‘Sorivete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rãrosar upe.

<sup>36</sup> Oñehe pare, oñenopiha oyerure ãgua opacatu omboriřpar reseve. <sup>37-38</sup> Ndoyembovĩhai ete, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tẽi avei yuvireco saisupave. Ipare yuvirasoño ite yuvireco supi carite yemboyasave.

## 21

### *Pablo so agũer Jerusalén ve*

<sup>1</sup> Evocoyase oroseyase ore riviřeta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. <sup>2</sup> Aheve orosepia carite oso vaherã Fenicia ve, ahe ipipe oroħa, oroso. <sup>3</sup> Orosasase para guasu oroso, orosepia caha pãhu guasu Chipre serer vahe. Ahe oroñocua yande mbahe rese pocoħhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya ãgua. <sup>4</sup> Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espĩritu Santo oñehe oreu. Evocoyase eresoi rene Jerusalén ve” ehi yuvireco chupe viña, <sup>5</sup> siete ari pare rumo, orosoño ite para guasu popiře. Opacatu Jesús reroyasar yugũeru, güembireco, guahir reseve-seve ore rupi. Aheve oroñenopiħapa ore yerure ãgua. <sup>6</sup> “Aviye, toroso rane” ore he pare chupe yuvireco, oroħa carite pipe. Ahe evocoyase oyevi yuviraso güetave.

<sup>7</sup> Tiro sui oroso Tolemaida ve. Oroyepotase, oroso Jesús reroyasar repia ãgua. Aheve oropita ñepei ari. <sup>8</sup> Ahere ayihive oroso Cesarea ve. Aheve oroique, oropita Felipe rẽta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pãhuve. <sup>9</sup> Evocoi Felipe viřeco irungatu guayri ndomendai vahe. Tayri Tũpa ñehe mombehusar pãve yuvirecoi. <sup>10</sup> Oropitase setã arimi ipiri, ahese oyepota Judea sui mbia Agabo serer vahe oreu. Ahe avei Tũpa ñehe mombehusar secoi. <sup>11</sup> Ouse ore pãhuve, viřocua Pablo rumbicuasa ichui. Ipipe oñapĩchi opi, opo avei. Ahese aipo ehi oreu:

—Espĩritu Santo oicua uca cheu, na ehira judio Jerusalén pendar co tumbicuasa yar apĩchi yuvireco iyavei omondora ava ndaheĩ vahe judio upe —ehi Agabo imombehu oreu.

<sup>12</sup> Orosenduse aipo ihe, ore, evocoi Cesarea pendar avei, oromombehu Pablo upe: “Eresoi rene Jerusalén ve” orohe tẽi chupe. <sup>13</sup> Omboyevi rumo oreu:

—¡Mahera peyaseho che rese, ndache mbovĩhai peye! Che rumo ayemoingatu voi che apĩchi uca ãgua, che mano ãgua rese avei Jerusalén ve yande Yar Jesús recocuer rese —ehi oreu.

<sup>14</sup> Ndoroiatuise ipihañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

<sup>15</sup> Ipare cute oroyemoingatu ore so ãgua Jerusalén ve. <sup>16</sup> Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rêtave. Ahe oremoingue oyepiri. Ahe yipive ité viroya yande Yar oico.

### *Pablo ombori Santiago*

<sup>17</sup> Oroyepotase Jerusalén ve, ahe pendar Jesús reroyasar nihapisi ore pisi yuvireco. <sup>18</sup> Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rãrosar Jerusalén pendar. <sup>19</sup> Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tũpa mbahe oyapo uca vahe ava ndahei vahe judío pãhu rupi. <sup>20</sup> Osenduse, omboetei guasu Tũpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerẽhi vahe Moisés porocuaita aracahendar mboaviye ãgua yuvireco —ehi—. <sup>21</sup> Osendu tẽi nde rembiapo yuvireco. Omombehu tẽi avei aipo nde he yande mu ambuae tecua rupindar yuvirecoi vahe upe: “Peseya Moisés porocuaita. Pembocircuncida iri rene pe rahir. Peico iri rene yande recocuer aracahendar pipe’ aipo ehi tẽi oico” ehi nde mombehu yuvireco —ehi Pablo upe yuvireco—. <sup>22</sup> ¿Mara yahera vo? Esepia, oyandura nde yepotasa cohava yuvireco. <sup>23</sup> Aviye catu ereyapora ore porocuaita oromombehu vahe ndeu. Oime irungatu mbia ore pãhuve. Ahe mbia omboaviyera güemimombehu Tũpa upe yuvireco. <sup>24</sup> Eraso co mbia ndeyeupi, eñemoatiro supi eso, emboepi avei mbahe Tũpa upe icuavẽhepri. Ahese ahe mbia oicatura oñeapi yuvireco. Eremboaviyese evocoi mborocuaita, opacatu judío nde reroyara, oicura ava semira tẽise mbahe nde rembiapo rese yuvireco. Oicua aveira, nde ereroya vite Moisés suindar mborocuaita —ehi yuvireco chupe—. <sup>25</sup> Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tẽi upendar seropovẽhepri, pehui rene mbahe ruvi, pehui rene mbahe mimba yucapri suvi renosepirẽhi vahe iyavei peaguasai rene” orohe chupe —ehi yuvireco.

### *Judío oipisi Pablo tũparo guasu pipe yuvireco*

<sup>26</sup> Evocoiyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tũparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porerecosã Tũpa porocuaita rupi icuavẽhepirã” ehi yuvireco pahi upe.

<sup>27</sup> Opa potase evocoi siete ari, judío Asia pendar osepia Pablo tũparo pipe yuvireco. Ahese omoñemoiro uca opacatu ava rehii tũparo pendar. Ipare ipisise, <sup>28</sup> sãse yuvireco: “¡Ore mu, ore pítivii peye co mbia oroiptisi vahe rese! Esepia, uguata opacatu rupi. Oñehe tẽi yande rese, Moisés porocuaita rese, yande tũparo rese avei iyavei viroique ava ndahei vahe

judío yande tūparo pipe. Sese omonguiha tēi yande tūparo maranehi” ehi yuvireco chupe.

<sup>29</sup> Co rese aipo ehi. Esepia, cuese osepia Pablo viroguatase Tróximo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tūparo pipe’ oya yuvireco viña.

<sup>30</sup> Opacatu Jerusalén pendar ndasori yuvireco. Cūrteimi ava yuvinoña guasu tūparove. Oipisi Pablo ombotiriri senose tūparo pipe sui yuvireco. Ahese omboya voi guaquicuei tūparo roquenda yuvireco. <sup>31</sup> Oyuca potase yuvireco, ahese yaivu rēracua oyepota sundao rerecuar guasu upe. <sup>32</sup> Cūrteimi serecuar viraso sundao, yuvinoña yaivu vahe upe yuviraso. Osepiase ava sundao rerecuar guasu, isundao avei yuvireco, ndoyuvirocua iri Pablo rese yuvireco. <sup>33</sup> Ahese ahe sundao rerecuar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirío carena pipe” ehi. Evocoyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe. <sup>34</sup> Ahese amove ava ñepe mbahe rese oñehe, ambuae, ambuae mbahe rese tēi yuvireco. Evocoyase sundao rerecuar ndoicatu supi eté vahe mbahe rendu āgua yaivu guasu vahe pāhuve. Sese, “Peraso cuartelve” ehi. <sup>35</sup> Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui. <sup>36</sup> Ava rehii rumo yuvirasoño ité saquicuei, “¡Tomanol!” ehi pucu-pucu yuvireco chupe.

*Pablo oyoepi ava rehii rovaque*

<sup>37</sup> Omoingue potase Pablo cuartel pipe yuvireco, aipo ehi sundao rerecuar guasu upe:

—¿Iyacatu vo yañemoñeta raimi? —ehi.

Evocoyase, omboyevi mborerecuar chupe:

—¿Ereicua vo griego ñehe? —ehi—. <sup>38</sup> ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pāve cuatro mil tupri ivi iporupirēhisa rupi —ehi sundao rerecuar chupe.

<sup>39</sup> Evocoyase,

—Che judío, tecua Tarso pendar aico. Ahe tecua Cilicia pipendar imboeteipri vahe secui. Eyapomi mbahe icatupri vahe cheu, tañehemi rane catu ava upe —ehi.

<sup>40</sup> Evocoyase mborerecuar, “Aviye” ehi chupe. Ipare opūha yeupisa harive, omopuha opo ava eta monguiriri āgua. Ahese oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

## 22

<sup>1</sup> “Che mu eta, peyapisaca, che añehemira che yoepi āgua pēu cūrteim” ehi.

<sup>2</sup> Oñehe hebreo ñehe pipe. Sese osenduse, oyapisaca tupri catu yuvireco.

<sup>3</sup> “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerquisave. Aheve ayembohe tupri yande ramo porocuita rese. Ahe che mbohesa pipe avei ayembohe Tūpa mboetei āgua rese vichico inungar pe peico cūrteim.

<sup>4</sup> Che yipindar aseca-seca catu ava co Tecocuer Piasu rupi uguata vahe yamotarēhiseve. Supitiseve, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. <sup>5</sup> Pahi rerecuar ivate catu vahe iyavei opacatu tecua pendar rerecuar oicua che

reco yuvireco. Ichui niha aipisi cuachiar aru vaheṛā yande mu tūparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroyasar pisi āgua. Ichui tarupa cohava imombaraisu āgua’ ahe viña.

*Pablo omombehu oñecuñaro agüer*

<sup>6</sup> “Evocoyase aso Damasco ve. Ahe ipiar rupi arovise vicho mbiter ari rupi, aviyeteramo tēi osesape guasu iva sui oreu. <sup>7</sup> Ahese aviapi ivive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu. <sup>8</sup> Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu. <sup>9</sup> Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. <sup>10</sup> Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epūha, eso Damasco ve. Aheve ava opara omombehu mbahe nde rembiaporā’ ehi cheu. <sup>11</sup> Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

<sup>12</sup> “Aheve mbia, Ananías serer vahe, ou cheu. Ahe Tūpa mboyeroyasar ité, viroya tupri vahe avei iporocuaite; sese opacatu judío secua pendar: ‘Co mbia aviye vahe ité’ ehi yuvireco chupe. <sup>13</sup> Oyepotase, aipo ehi: ‘Che rivri, Saulo, esareco iri’ ehi. Aheseve iporēhi iri mbahe cheu. <sup>14</sup> Ipare aipo ehi: ‘Yande ramoi rembieroya, yande Ru Tūpa, nde poravo güemimbotar cua āgua. Oipota avei eresepia vaheṛā ichuindar ava seco ivi vahe, eresendu aveira iñehe’ ehi. <sup>15</sup> ‘Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. <sup>16</sup> ‘Evocoyase, cūritei ndiya iri eresāro’ ehi. ‘Epūha, toroāpiramo. Eporandu yande Yar upe nde reco moatiro āgua nde angaipā sui’ ehi Ananías cheu.

*“Tūpa che mondo ava ndahei vahe judío upe” ehi Pablo*

<sup>17</sup> “Coieye catu, ayevi irise Jerusalén ve, ayerure tūparo guasu pipe. Ahese che quer nungarve asepia mbahe. <sup>18</sup> Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. <sup>19</sup> Che aipo ahe chupe: ‘Che Yar, opacatu che cua nde reroyasar roquenda-quendase, ainupa-nupa ucase avei aguatase judío tūparo yacatu rupi’ ahe. <sup>20</sup> Aipo ahe avei chupe: ‘Oyucase Esteban yuvireco, ahe nde recocuer mombehusar, che ahese asepia. Chepiñañemoñeta rupi aviyeño oyucase yuvireco. Sese asāro yucasar yeosa vihā’ ahe chupe. <sup>21</sup> Che Yar rumo omboyevi cheu: ‘Eso, oromondora coi rupi ava ndahei vahe judío pāhuve’ ehi che Yar cheu” ehi Pablo ava rehii upe.

*Pablo sundao rerecuar guasu povrive secoi*

<sup>22</sup> Aipo rupi osendu iñehe yuvireco. Ahese rumo osapucaí pīrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe. <sup>23</sup> Osapuca-pucaí, osequiipa oyeaosa oñemoirombave yuvireco iyavei omombo-mombo ivi cuhi ivate coti yuvireco yamotarēhimbave. <sup>24</sup> Ahese sundao rerecuar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sāsē atī yamotarēhimbave ava yuvireco chupe” ehi osundao upe. <sup>25</sup> Oñapichise rumo inupa āgua yuvireco, Pablo omombehu ñepeí sundao rerecuar upe:

—Yepe che judío, che rumo romano avei aico. ¿Iyacatu pīha peinupara romano chupe mbahe rese poranduēhiseve? —ehi mborerecuar upe.

<sup>26</sup> Osenduse iñehe, oso voi omombehu güerecuar upe.

—Eicua catu, aipo mbia romano secoi —ehi.

<sup>27</sup> Evocoiyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

<sup>28</sup> Ahese sundao rerecuar guasu aipo ehi chupe:

—Che rumo setá guarepochi amondo romano che reco āgua —ehi.

—Che rumo che ha ramo suive, romano aico —ehiño sundao rerecuar upe.

<sup>29</sup> Ahese oinupa pota vahe osiquiyepave oyepēpi yuvireco ichui; sundao rerecuar guasu avei oicuaase Pablo romano secosa rese, osiquiye ñapichi ucase.

*Pablo oyoepi judío porandusa ivate catu vahesave*

<sup>30</sup> Ahere ayihive sundao rerecuar guasu oicua tupri pota: ¿Mbahe sui pīha judío oyamotarēhi Pablo yuvireco? Evocoiyase oyora. Ahese oyocuai porandusa pendar ivate catu vahe ahe opacatu judío pahí rerecuar, opacatu ambuae judío rerecuar iñemonuha āgua yuvireco. Ahese oviraso uca Pablo yuvireco chupe.

## 23

<sup>1</sup> Aheve Pablo omahengatu ava oñemonuha vahe rese ohā aipo ehi chupe:

—Che mu, che rembiapo mbahe tupri Tūpa rovaque areco yepi che pihañemoñeta tuprisa pipe —ehi.

<sup>2</sup> Ahese Ananías, ahe pahí rerecuar ivate catu vahe, yipi pendar uve, “Peiyurupete” ehi. <sup>3</sup> Ahese Pablo omboyēvi chupe:

—¡Tūpa nde nupara, nde aviye tupri tēi angahu vahe ereico! Nde mbahe rese porandu āgua cheu porocuaíta rupi erei. Evocoiyase, ¿mahera ereporocuai che yurupete āgua mborocuaíta mboyeroyaēhisa pipe? —ehi chupe.

<sup>4</sup> Yivirindar aipo ehi yuvireco chupe:

—¡Ereñehe rai rutei seroñrosa pipe co Tūpa rembiporavo, co yande pahí rerecuar ivate catu vahe upe! —ehi yuvireco.

<sup>5</sup> Ahese omboyēvi chupe:

—Che mu, ndaicuai co oñehe vahe pahí rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

<sup>6</sup> Ahese oicuaase oñemonuha vahe pāhuve amove oime saduceo, amove fariseo. Ahese oñehe pīrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayēvi vaherā curi. Sese revo co imboasipave oporandu mbahe rese yuvireco cheu —ehi.

<sup>7</sup> Aipo he ramoseve voi, fariseo, saduceo oñeñehēpoepi-epi yuvireco. Sese oyemboyaho yuvireco. <sup>8</sup> Esepia, saduceo ndoviroyai vahe cuerayevisa iyavei “ndipoi Tūpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. <sup>9</sup> Sese sãse guasu yuvireco. Ahese oime amove opūha vahe Moisés porocuaíta rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tūpa rembiguai revo oyemboyecua mbahe mombehu āgua chupe —ehi yuvireco.

<sup>10</sup> Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pāhu sui, pemoingue iri cuartel pipe” ehi.

<sup>11</sup> Ahe pītu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyeehisa pipe cohawe Jerusalén ve, ēgüe ere aveira che mombehu Roma ve” ehi.

### *Omboguai Pablo yuca āgua yuvireco*

<sup>12</sup> Ahere ayihive setá judío oñemonuha, omboguai Pablo yuca āgua yuvireco: “Tūpa rovaque ndayayucaise Pablo, ndayacarui chira, ndayaihui chiaveira; yayucase voi, yacarura, yaìhura” ehi yuvireco.

<sup>13</sup> Ahe ava aipo ehi vahe retacuer setá catu cuarenta sui. <sup>14</sup> Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tūpa rovaque Pablo; ndorocarui chira ndoroyucaise —ehi yuvireco chupe—. <sup>15</sup> Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

<sup>16</sup> Pablo rihir rumo oyanduse sēracua, oso cuartelve chupe imombehu. <sup>17</sup> Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

<sup>18</sup> Evocoiyase mborerecuar viraso ahe chīhivahe güerecuar upe aipo ehi: —Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

<sup>19</sup> Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

<sup>20</sup> Evocoiyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oroporandu pota iri Pablo upe sembiapo rese” aipo ehi tēira yuvireco ndeu —ehi—. <sup>21</sup> Ndereroyai chira ahe iporandusa yuvireco. Esepia, cuarenta sui setá catu ava oquētiro vaheṛā yuvireco sese. Omboguai eté yuca āgua yuvireco. Ndocarui, ndoihui chira aipo ndoyucaise yuvireco. Cūritei oyemoingatu, osāro viteño nde porocuita yuvireco —ehi mbia chīhivahe chupe.

<sup>22</sup> Ipare sundao rerecuar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

### *Pablo imondosa mborerecuar guasu Félix rovai*

<sup>23</sup> Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vaheṛā opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipare pesopara pītuse las nueve pipe” ehi. <sup>24</sup> “Pemoingatu uca avei cavayu Pablo yeupi āgua. Ēgüe

peye pesãro tuprira seraso yande rerecuar Félix upe” ehi. <sup>25</sup> Evocoiyase sundao rerecuar guasu oicuachía Félix upe imondo. Aipo ehi chupe:

<sup>26</sup> “Imboeteipri ore rerecuar Félix. Che, Claudio Lisias, amondo che mahenduhasa ndeu. <sup>27</sup> Iyavei co amombehu pota ndeu: judío oipisi co mbia yuvireco yuca água viña. Che rumo aicua romano seco rese, ahese araso sundao sepi água judío eta sui <sup>28</sup> ‘¿mbahe rese pñha ndoyambotai yuvireco?’ viya. Sese araso judío porandusa ivate catu vahe pendar upe iñemonuhasave yuvireco. <sup>29</sup> Ahese aicua yamotarēhisa judío porocuita sui tēi iyavei ndoyapoi mbahe tēi oreu. Sese ndiyai yuca água oreu, soquenda água avei. <sup>30</sup> Ayanduse rumo judío oquētiro sese yuvireco, amondo voi evocoi mbia ndeu. Ipare amombehu yamotarēhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

<sup>31</sup> Evocoiyase ahe pñtu pipe sundao viroguata Pablo ocuita rupi yuvireco, viraso Antípatris ve yuvireco. <sup>32</sup> Ahere ayihive sundao yuviraso vahe opi rese oyevi yugüeru quartelve. Sundao cavayu ari pendar güeraño rumo yuvirasoño vite. <sup>33</sup> Viroyepotase Cesarea ve, omondo cuachiar mborecuar guasu upe yuvireco. Aheseve avei Pablo omondo yuvireco chupe. <sup>34</sup> Oyerogui pare mborecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

<sup>35</sup> —Oyepotase nde amotarēhisar yuvireco, asendura nde yoepisa — ehi Félix chupe.

Evocoiyase oyocuai opñtiviisar Pablo rãro água güetave Herodes rembiapogüer pipe.

## 24

### *Pablo oyoepi mborecuar Félix rovai*

<sup>1</sup> Cinco ari pare, Ananías, ahe pahi rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pñtiviisar oñhe vaherã Pablo amotarēhi uca água, ahe serer Tértulo. Ahe yugüeru Pablo recocuer mombehu água mborecuar Félix upe. <sup>2</sup> Evocoiyase Félix güeru uca Pablo. Ahese Tértulo omboipi sese oñhe ehi Félix upe:

—Nde imboyeroyapri ereico. Aviye ndeu nde porocuai tuprisa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. <sup>3</sup> Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix. <sup>4</sup> Ndorombita pucu potai rumo che ñhe pipe. Sese eyapisaca raimi tēi catu che ñhe rese —ehi—. <sup>5</sup> Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca água, ahe Jesús, Nazaret pendar, reroyasar rerecuar —ehi—. <sup>6</sup> Viroique avei ava ndahei vahe judío ore tūparo pipe. Ēgüe ehi ore tūparo momara. Sese co oroipisi —ehi—. <sup>7</sup> Evocoi sundao rerecuar guasu Lisias rumo oyepota ore pãhuve. Ahe opñratasa pipe vinose ore po sui, <sup>8</sup> aipo ehiño oreu: “Peso, tapemombehu co mbahe sembiapo Félix upe” ehi. Nde avei epreporandura sembiapo rese mbahe sui eté vo ēgüe orohe chupe —ehi Tértulo.

<sup>9</sup> Aipo ehi tupri avei ambuae judío yugüeru vahe yuvireco supi. <sup>10</sup> Ipare Félix oyaiti Pablo upe ‘toñhe’ oyapave. Ahese oñhe:



—Aicua nde ereporocuai setá araviter ore recua rupi. Sese ayoepira nde rovaque che rorivetesá pipe —ehi Félix upe—. <sup>11</sup> Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tüpa mboetei água. <sup>12</sup> Co judío oicua yuvireco nañehengatai ava upe tüparo guasu pipe, namboáivu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. <sup>13</sup> Co mbia ndoicatui eté mbahe che rembiavi mombehu seroya tupri água yuvireco ndeu. <sup>14</sup> Co rumo amombehu vahe ndeu: che amboetei Tüpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuaita pipendar iyavei Tüpa ñehe mombehusar rembicuachiagüer avei —ehi—. <sup>15</sup> Inungar co mbia, ěgüe ahe tupri avei aicua Tüpa ombogüerayevira ava omano vahecuer seco aviye vahe, ndaseco pōrai vahe avei coiye. <sup>16</sup> Sese ayemoviracua tupri che pihañemoñetasa rereco tupri catu água yepi Tüpa rovaque, ava rovaque avei.

<sup>17</sup> “Setá araviter pare ayevi che recua Jerusalén ve ava iparaisu vahe upe porerecosa mondo água. Ahese avei mbahe mimba ayuca uca Tüpa upe seropovēhe água. <sup>18-19</sup> Evocoyase moviro judío Asia pendar che repia yuvireco Jerusalén ve tüparo pipe judío porocuaita rupi che ñemoatiro pare. Ndipoi ahese ava rehii che rupi, namboáivu guasu ucai avei ava. Ahe che repia vahe rumo iya yugüeru ndeu che mombehu, que virecose che amotarēhisa yuvireco viña. <sup>20</sup> Anise, aviyeteramo co oyepota vahe cohava yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi. <sup>21</sup> “Co rese revo oñemoiro yuvireco cheu aipo ahe pīratase ipāhuve: ‘Che aroya ava ocuerayevira coiye. Sese che reraso pe rovai co pipe che recoāha água yuvireco’ ahese” ehi Félix upe.

<sup>22</sup> Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

<sup>23</sup> Evocoyase oyocuai sundao rerecuar Pablo rāro água: “Eremondomira rumo que mbahe semimbotar apo água chupe iyavei imboripar yugüeruse, tihañecoño yuvireco sese. ěgüe ere sāro” ehi Félix sārosar upe.

<sup>24</sup> Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco. <sup>25</sup> Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tüpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri água, orogüeru uca irira —ehiño.

<sup>26</sup> Félix ipihañemoñeta yepi ‘Pablo revo omboura guarepochi cheu osē água’ oya viña. Sese osāro pucu tēi. Iyavei setá oyupagüer güeru uca oyeupe oñemoñeta água sese. <sup>27</sup> Ñuvirío araviter pare rumo, Porcio Festo oique Félix recuñara. Ahese Félix judío mboviha água, oseya Pablo soquendasave.

## 25

*Festo rovai Pablo imondosa*

<sup>1</sup>Mbosapi ari oyepotare Festo osẽ Cesarea sui, oso Jerusalén ve. <sup>2</sup>Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe. <sup>3</sup>Ipare oporandu chupe: “Emboumi uca Pablo cohava oreu” ehi yuvireco ‘yayuca peri rupive’ oyapave yuvireco viña. <sup>4</sup>Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayevi piaivira vicho aheve” ehi.

<sup>5</sup>—Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara ãgua — ehi Festo chupe.

<sup>6</sup>Evocoyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapi güendave ava reco moingatu ãgua oĩ. Ahese oyocuai Pablo reru ãgua. <sup>7</sup>Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tẽi Festo upe Pablo rembiapo yuvireco, ndoicatuí eté rumo seroya uca ãgua yuvireco. <sup>8</sup>Esepia, Pablo aipo ehi oyoepisave:

—Ndayemboangaipai judío porocuaíta rese, judío tũparo rese, yande rerecuar guasu Roma pendar Cesar rese avei — ehi.

<sup>9</sup>Festo rumo omboviha pota judío, sese oporandu Pablo upe:

—¿Ndequerẽhi vo Jerusalén ve ereso vaherã? Aheve co mbahe nde rembiapo rese aporandura ndeu — ehi chupe.

<sup>10</sup>Ahe rumo omboyevi chupe:

—Cũritei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ericua ndipoi eté mbahe tẽi ayapo judío amotarẽhisave — ehi—. <sup>11</sup>Ayapose que mbahe naporai vahe, aviyeyõ che yuca uca ãgua eve; ndayapose rumo co judío omombehu vahe yuvireco ndeu, ndiyai che mondo ãgua evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu ãgua — ehi.

<sup>12</sup>Ahese Festo oñemoñeta opitiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase — ehi chupe.

*Pablo mborerecuar Agripa rovai*

<sup>13</sup>Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo ãgua Festo upe yuvireco.

<sup>14</sup>Opitase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepeí mbia soquendapri oseya vahe Félix cheu — ehi—.

<sup>15</sup>Asose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña — ehi—. <sup>16</sup>Ahese aipo ahe yuvireco chupe: “Ndiyai eté romano mborerecuar omondo vaheve que ava uve sese oñemoñeta vahe rese mbahe moingatuẽhi renondeve. Toyoepi rane omombehusar rovai, tomombehu tupri rane opacatu güecocuer” ahe judío upe — ehi—. <sup>17</sup>Sese yugüeruse cohava yuvireco, aporandu voi pota secocuer rese chupe. Evocoyase ñepeí ari pare aguapi che rendave porandusave. Ahese ayocuai che pitiviisar evocoi mbia reru ãgua — ehi—. <sup>18</sup>Evocoyase opũha sese oñemoñeta vahe sembiapo ai mombehu ãgua. Asendu renondeve

che p̄ihañemoñeta: “Oyapo revo m̄bahe naporai vahe” ahe viña. Ndipoi eté rumo m̄bahe sembiapo —ehi—. <sup>19</sup> M̄bahe sembieroya t̄ei omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi. <sup>20</sup> “¿Mara ahera p̄iha co sembiapo moingatu?” ahe t̄ei. Sese aporandu chupe: “¿Ndequer̄ehi vo Jerusalén ve m̄bahe nde rembiapo rese porandu ãgua ndeu?” ahe chupe —ehi—. <sup>21</sup> Pablo rumo oporandu cheu Cesar upe oso ãgua. Oipota mborerecuar ivate catu vahe oyeupe m̄bahe güembiapo rese porandu ãgua. Sese asoquenda ucaño vite sereco imondo ãgua Cesar upe —ehi Agripa upe.

<sup>22</sup> Evocoiyase Agripa aipo ehi chupe:

—Asendu pota avei ahe mb̄ia ñehe —ehi.

Ahe aipo ehi chupe:

—Ayihive voi teresendu —ehi.

<sup>23</sup> Ahere ayihive, Agripa oyepota, Berenice rese yugüeru chupe inungar op̄ivondi vahe, ãgüe ehi yuv̄iroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai op̄it̄ivisar Pablo reru ãgua yuvireco, <sup>24</sup> aipo ehi:

—Ore rerecuar guasu Agripa iyavei opacatu ambuae yuv̄iroique vahe, peyapisaca: pesepia co mb̄ia. Co mb̄ia rese judío eta oñehe t̄ei yuvireco Jerusalén ve iyavei cohava Cesarea ve. Osapucui p̄irata t̄ei yuvireco ‘jtomano ité evocoi!’ oya yuvireco cheu —ehi—. <sup>25</sup> Ndayosui rumo m̄bahe sembiapo yuca uca ãgua iyavei oporandu oso ãgua mborerecuar ivate catu vahe Cesar upe. Sese che ayemoingatu ité imondo ãgua chupe. <sup>26</sup> Ndarecoi rumo m̄bahe naporai vahe aicuachía vaherã imondo ãgua chupe. Sese aru uca co mb̄ia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe m̄bahe rese porandu pare, aviyeteramo oimera m̄bahe icuachiap̄irã sesendar Cesar upe nara —ehi—. <sup>27</sup> Chep̄ihañemoñeta amondose co mb̄ia chupe, naporai cheu ndipoise m̄bahe sembiapo ai —ehi Festo Agripa upe.

## 26

*Pablo omombehu güecocuer Agripa rovai*

<sup>1</sup> Evocoiyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe ãgua aipo ehi: <sup>2</sup> “Ore rerecuar Agripa, ayoepira che ror̄ivetesave judío che rese ñemoñeta-ñeta t̄eisa sui m̄bahe che rembiapoẽhi rese nde rovai. <sup>3</sup> Esepia, ereicua tupri opacatu judío recocuer, ip̄ihañemoñetasave. Sese eyapisacami nde reco mbegüesa pipe che ñehe rese” ehi.

*Pablo omombehura güecocuer oñecuñaro viteẽhisendar*

<sup>4</sup> “Opacatu judío che cua vahe yuvireco, oicua tupri che recocuer che ch̄ihivahe suive che recuave iyavei Jerusalén ve aicose yuvireco. <sup>5</sup> Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. <sup>6</sup> Sese c̄uritei che reru nde rovai yuvireco che recocuer rese nde porandu ãgua. Esepia, aroya T̄upa remimombehugüer ore ramoi uye omombehu vahe aracahe” ehi. <sup>7</sup> “Doce ore ramoi suindar opacatu judío yuvirecoi, osãro vite evocoi T̄upa remimombehugüer aviye vahe yuvireco. Sese yuv̄iroique t̄uparove ari, p̄itu pipe avei T̄upa mboeteci

ãgua yuvireco. Ore rerecuar Agripa, eyapisaca tupri che ñehe rese. Evocoi Tũpa remimombehugüer reroyasa sui judío eta semira-mira tẽi che amotarẽhisave che rese yuvireco” ehi. <sup>8</sup> “Iyavei opacatu pe, ¿mahera pe avei ndaperoyai Tũpa porombogüerayevisa?” ehi.

*Pablo omombehu yipindar Jesús reroyasar amotarẽhi agüer*

<sup>9</sup> “Yipindar che avei che pihanemoñeta rai aracaco mbahe tẽi apo ãgua rese ava Jesús, Nazaret pendar, rer amotarẽhisave. <sup>10</sup> Ëgüe ahe Jerusalén ve. Ombouse pahi rerecuar oporocuita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voñio ité che” ehi. <sup>11</sup> “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tẽi. Ëgüe ahe aguata opacatu tũparo rupi, ambuae tecua rupi avei yamotarẽhisa pipe” ehi.

*Pablo omombehu güeco recuñaro agüer*

<sup>12</sup> “Evocoiyase aso avei Damasco ve Jesús reroyasar mombaraisu ãgua, pahi rerecuar ombouse oporocuita apo ãgua cheu” ehi. <sup>13</sup> “Mbiter ari rupi rumo, aguatase Damasco piar rupi, asepia mbahe sendí vahe iva sui. Ari sui osesape catu cheu, che rupindar upe avei. <sup>14</sup> Orovipapase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tẽi cheu? Ereyapose evocoi mbahe tẽi, nde ae ereyemombaraisu’ ehi cheu. <sup>15</sup> Evocoiyase amboyevi: ‘¿Ava vo nde ereico, mbia?’ ahe chupe. Omboyevi cheu: ‘Che Jesús aico, che niha co che amotarẽhi eve. <sup>16</sup> Epũha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaheerã chupe curi, viya ndeu’ ehi. <sup>17</sup> ‘Oropisiro ra judío sui iyavei oromondora ava ndahei vahe judío upe. Ereguatase ipãhuve, oropisiro aveira’ ehi cheu. <sup>18</sup> ‘Oromondora, tache cua yuvireco, che yapave iyavei toguata iri eme pĩtumimbi vahe nungar rupi; toguata catu tesapesa rupi yuvireco. Ipipe sui toyuvireco iri eme carugar povrive yuvireco; toguata catu Tũpa rupi; Ëgüe tehi che reroya yuvireco. Ahese oipisira ñeroisa oangaipa rese yuvireco iyavei oipisira Tũpa porrecosa oime vaheerã opacatu che rembipeha rupive’ ehi Jesús cheu” ehi Agripa upe.

*Pablo viroya mbahe güembiepia*

<sup>19</sup> “Evocoiyase, che rerecuar Agripa, che quer nungarve asepia vahe iva pendar, aroya ité. <sup>20</sup> Aipo ahe ava upe: ‘Pemboasi pe angaipa; peyevi Tũpa upe. Peicove tupri, ipipe sui toicua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. <sup>21</sup> Sese tẽi judío che pisi tũparo pipe che yuca pota yuvireco” ehi. <sup>22</sup> “Tũpa che pĩtiviisa pipe rumo aicoveño ité supi, amombehu-mbehu vite Tũpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tẽi Tũpa ñehe mombehusar iyavei Moisés, ‘Oimera mbahe aviye vahe’ ihe agüer sui. <sup>23</sup> Aracaha omombehu yuvireco: ‘Tũpa Rembiporavo Poropisiosar omano ranera’ ehi. Ahe rumo yipindar ocuerayevi vaheerã omano vahe pãhu sui. Omombehu aveira tesapesa ñepisirosa resendar ore mu judío

yuvirecoi vahe upe iyavei ava ndahei vahe judío upe avei” ehi Agripa upe.

*Pablo osecuñaro pota tēi Agripa recocuer*

<sup>24</sup> Aipo ehise Pablo oñehe oyoepisave, Festo oñehengataño chupe aipo ehi:

—¡Nande mboaracuai moco nde mbahecuva vaisa! —ehiño chupe.

<sup>25</sup> Ahe rumo omboyeví chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supí eté vahe, ndahei che aracuaēhisave —ehi Festo upe—. <sup>26</sup> Co mborerecuar revo oicua tupri avei che remimombehu. Sese ndasiquiyeyi opacatu co mbahe mombehu āgua chupe. Esepia, opacatu co mbahe yaposa vahe ndahei ñomipri tēi. <sup>27</sup> Ore rerecuar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

<sup>28</sup> Ahese Agripa omboyeví chupe:

—Moviro tēi ñehesa ipane cheu Jesús reroya āgua —ehi chupe.

<sup>29</sup> Ahe omboyeví Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ēgüe ehi tarahu Tūpa pēu viña che nungar pe reco āgua. Ndahei chira rumo soquendapirā peico —ehi.

<sup>30</sup> Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco. <sup>31</sup> Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyeupe.

<sup>32</sup> Ahese Agripa aipo ehi:

—Ahe ndoporanduse Cesar upe oso āgua rese, yamoseño itera niha viña —ehi Festo upe.

## 27

*Pablo imondosa Roma ve*

<sup>1</sup> Evocoiyase mborerecuar opihañemoñeta omboyoya yuvireco ore mondo āgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehii rerecuar secoi, ahe yuvirecoi vahe rer Mborerecuar upendar.

<sup>2</sup> Oroha carite pipe, ahe Adramitio sui yuviraso pota vahe Asia ve. Mbía Tesalónica pendar, Aristarco serer vahe, oha avei ore rupi, ahe secua Macedonia ivi rupi. <sup>3</sup> Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri āgua yuvireco” ehi chupe.

<sup>4</sup> Sidón sui orosirise, oroso Chipre ivii rupi ivitu sui ore ñemoha āgua. Oroso pota tēi ari sosa coti rupi, ndoroicatui rumo. Esepia, oipeyu pīrata ivitu icoti sui. <sup>5</sup> Evocoiyase oroguata para guasu pipe Cilicia, Panfilia ivii rupi. Ipare oroyepota tecua Mira yemboyasave, ahe Mira, Licia ivi pipe.

<sup>6</sup> Aheve sundao rerecuar oyosu carite ou vahe Alejandría sui, oso vahrā Italia ve. Evocoiyase ahe ipipe opa voi ore mboha. <sup>7</sup> Ichui oroguata mbegüe setá ari. Oroporaviquí iteanga oreypota āgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi. <sup>8</sup> Supi yavai rai

ore guata āgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

<sup>9</sup> Ore yepota āgua aheve, setá ari oromocañi. Ahese ivitu naporai catu oreu cute. Esepia, virovi ari naporai catu vahe. Sese Pablo aipo ehi carite pipendar upe:

<sup>10</sup>—Mbia, naporai iri chira revo yande guata vite āgua. Yaguata vitese, yamocañira carite, ivosiita reseve, yande avei eté aviyeteramo yacañi tēira —ehi.

<sup>11</sup> Sundao rerecuar rumo nombroyeroyai iñehe, ahe omboyeroya catu carite reroguatasa, carite yar avei. <sup>12</sup> Ahe yemboyasa naporai ivitu ai rāro āgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasāro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

*Ivitu ai para guasu pipe*

<sup>13</sup> Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota āgua” ehi yuvireco viña. Ahese orosirise ore yemboyasa sui, oroso Creta ivi rupi. <sup>14</sup> Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui. <sup>15</sup> Oyepotase oreu, ndoroicatu iri eté sovañchi. Evocoiyase, “Tayande rerasoño” orohe chupe. <sup>16</sup> Oroñocua caha pāhumi serer Cauda. Ahe oroñocuasave oroviroha sāi ore caritemi ore carite guasu pipe. <sup>17</sup> Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiētera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroguatano. <sup>18</sup> Ivitu rumo ombohitú iteanga para guasu. Sese ahere ayihive oporaviqui vahe omboipi carite vosiita mombo yuvireco. <sup>19</sup> Imombosapisa ari pipe, omombo vite mbahe carite resendar yuvireco. <sup>20</sup> Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

<sup>21</sup> Setá ari ore caruēhi pare, Pablo opūha aipo ehi carite pipendar upe:

—Mbia, ehi aici che reroya voira peye viña, nayasēise Creta sui, ahese ndipoi chira co mbahe yandeu cūrítei viña —ehi—. <sup>22</sup> Cūrítei, peyemonguerēhi catuño. Esepia, ndipoi chira yande pāhu pendar omano vahe, carite güeraño rumo ocañi tēira. <sup>23</sup> Ayihi pisa oyemoporēhi cheu Tūpa rembiguai semimbou, chupendar che aico, chupe avei aporaviqui. <sup>24</sup> Ahe aipo ehi cheu: “Pablo, eresiquiyei rene. Ereyepotano itera Cesar upe. Tūpa oipisiro aveira opacatu nde rupindar carite pipendar” ehi cheu. <sup>25</sup> Mbia, ayeroya Tūpa rese. Esepia, ahe omboaviye itera oñehesa cheu. Sese peyemonguerēhiño —ehi—. <sup>26</sup> Yande mohañira rumo imbehi coti caha pāhumi rese yande mondo —ehi.

<sup>27</sup> Ñuvirio semana ivitu ore reroguata pare ahe pītu mbiter pipe para guasu Adriático rupi orocose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. <sup>28</sup> Sese osāha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osāha iri, tipigüer veintisiete metros tēi. Ahese oicua, “Yarovi ivi” ehi yuvireco. <sup>29</sup> Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe

tēi. <sup>30</sup> Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco. <sup>31</sup> Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

<sup>32</sup> Ahese sundao eta oyasia caritemi sã oiti ive imondo yuvireco.

<sup>33</sup> Cõhe ramosẽ Pablo aipo ehi opacatu upe:

—Cũritei ñuvirio semana pemomba pecaruẽhi peico ‘¿mara yahera pãha co yaico?’ pe hesa pipe. <sup>34</sup> Evocoyase pehuñomi mbahe cute pe ñepisiro ãgua. Acoi ocañise carite, yande rumo nayacañi chira iyavei que ñepepe ha nocañi chietera —ehi Pablo.

<sup>35</sup> Aipo ehi pare, oipisi pan, “Aviye ndeu” ehi Tũpa upe ihu ãgua. Ahe imbohi pare, ohu. <sup>36</sup> Evocoyase opacatu ava oyemonguerẽhi yuvireco ocaru ãgua. <sup>37</sup> Ore retacuer doscientos setenta y seis tupri. <sup>38</sup> Ore caru pare, oporaviqui vahe opa omombo trigo carite vosita para guasu pipe iposiiẽhi ãgua yuvireco.

#### *Carite ocañi*

<sup>39</sup> Cõhese, osepiase ivi, “¿Que pãha yaico?” ehi tēi yuvireco. Oyosuse rumo yãcua vahe, ipipe oime ivi cuhi ipiru vahe. Aheve yuviroique pota tēi yuvireco viña. <sup>40</sup> Oyasia ahe carite mombitasa cuasa carite sui yuvireco, omonguhi carite mboyahvasa, osupi carite resendar turucuar imboguatasa yuvireco. Evocoyase oroique oroso yãcua vahe pipe. <sup>41</sup> Oroguatase rumo, oroyapi ivi cuhi. Aheve carite opãha itẽ sese. Ndoicatui etẽ seroyevi yuvireco iyavei carite rupita i ohitu vahe opa tupri oyoca.

<sup>42</sup> Ahese sundao eta, “Aviyeteramo soquendapri ohita tiẽtera, oñemi yuvireco. Sese yayucapa” ehi yuvireco chupe viña. <sup>43</sup> Sundao rerecuar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi. <sup>44</sup> “Ambuae evocoyase ivirape, carite yecacuer rese toyasecoño yuvinose ãgua ivi rese” ehi. Ëgũe orohe orosẽpa ivi rese oroso.

## 28

### *Caha pãhu Malta ve Pablo secoi*

<sup>1</sup> Ore ñepisiropare, ahese ramo oroicua caha pãhu rer Malta revo rahe.

<sup>2</sup> Ahe pendar ava nihapisii ore repiase yuvireco. Oquí iteanga, sõhisa avei. Ahese oyatapi guasu yuvireco, “Perio, tapeyepehemi” ehi yuvireco oreu. <sup>3</sup> Evocoyase Pablo omonuha yepaha seru, omondo potase rumo tatave, ahese osẽ aviyeteramo tēi sacucuer sui mboi ahe etẽ vahe chupe, oipomama ichuhu. <sup>4</sup> Osepiase mboi ichuhuse ahe pendar yuvireco, ahese, “Co mbia revo oporapichi vahe itẽ. Yepe oñepisiro para guasu sui viña, Tũpa rumo oichuhu uca mboi upe ‘tomano’ oya” ehi yuvireco viña.

<sup>5</sup> Ahe rumo omomboño mboi tatave imondo oyesui. Ipare nomomaraĩno itẽ. <sup>6</sup> Ahe pendar opacatu osãro tēi yuvireco, “Irirura chupe, ahese oviapira, omanora revo” ehi yuvireco chupe viña. Osãro pucu tēi yuvireco, Pablo rumo nimaraiño itẽ. Ahese, “Ndahei vo co mbia tũpa itẽ co secoi” ehi tēi yuvireco chupe.

<sup>7</sup> Evocoiyase mbia Publio serer vahe, ahe opacatu caha pāhu Malta pendar ava rerecuar seci. Ivi namombrimi ichui. Ahe nihapisi ore repia güetave iyavei ihañeco tupri ai ore rese mbosapi ari rupi. <sup>8</sup> Aheve ore recoseve Publio yesupa sohí iteanga ou, sepochiuví avei. Evocoiyase Pablo oi que chupe. Aheve oyeroqui Tūpa upe sese, omondo opo iharive. Ēgüe ehi imbogüera. <sup>9</sup> Oyanduse ahe icuera yuvireco, aheve ambuae imbaheasi vahe evocoi caha pāhu pendar yugüeru chupe, ahe ombogüerapa avei. <sup>10</sup> Ahe pendar oyemboava etepri yuvireco oreu. Ipare ore ha āgua ambuae carite pipe, opacatu mbahe ore guatasa rupi ipaneēhi āgua ogüeru yuvireco oreu.

*Pablo oyepota Roma ve*

<sup>11</sup> Co carite mbosapi yasi osāro vahe ari mbahe tēi vahe pituhu āgua. Ipipe oroso. Ahe carite yugüeru Alejandria sui. Ahe ichi rese ñuvirio itūpa rahanga yuvireco: ñepe rer Cástor, ambuae evocoiyase Pólux. <sup>12</sup> Aheve oroso oroyepota yemboyasa Siracusa ve. Aheve oropita mbosapi ari. <sup>13</sup> Ichui orosé oroso oroyepota Regio ve. Aheve ayihive ivitu oipeyu irohi coti sui. Sese oroyepota Puteoli ve ambuae ari pipeve. <sup>14</sup> Aheve orosepia ambuae Jesús reroyasar. Ore mombita güetave yuvireco ñepe semana. Ipare oroso Roma ve ivi rupi. <sup>15</sup> Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda āgua yuvireco. Sepiase, Pablo, “Aviye ndeu” ehi Tūpa upe. <sup>16</sup> Oroyepotase Roma ve, sundao rerecuar co coti omondo Pablo ñepe sundao upe sāro uca āgua.

*Pablo omombehu Roma ve Tūpa Ñehengagüer*

<sup>17</sup> Mbosapi ari pare Pablo omonuha opacatu judío rerecuar Roma pendar. Aheve oñeche chupe:

—Che mu eta, ndayapoi mbahe tēi judío Jerusalén pendar upe, narioi avei yande ramoi recouer viña. Che roquendasā rumo iyavei imondopri aico Romano sundao rerecuar povrive. <sup>18</sup> Ahe mborerecuar oporandu che recouer rese yuvireco. Oicuae che recouer, opoi pota tēi che sui yuvireco viña. Esepia, ndoyosui eté mbahe che rembiapo che yuca āgua yuvireco. <sup>19</sup> Evocoi judío rumo ndoipotaiño ité chupe. Aheve ayu pota cohava Cesar upe che yoepi āgua. Nayamotarēhi uca potai rumo che mu Jerusalén pendar Cesar upe —ehi—. <sup>20</sup> Che yoepi āgua oposoho uca. Opomofeta pota yande remiaro rese. Co Tūpa Rembiporavo ava pĩsiro āgua resendar reroyasa rese carena pipe ñapichimbri aico —ehi.

<sup>21</sup> Aheve ahe ava omboyevi yuvireco chupe:

—Ndroipisi eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recouer resendar yuvireco oreu —ehi—. <sup>22</sup> Opacatu rupi ava viroiro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

<sup>23</sup> Oiporavo ari iñehe āgua yuvireco. Osupitise ari chupe, setá catu ava oñemonuha yuvireco secosave. Aheve omombehu Tūpa mborerecuasa resendar iyavei Jesús recouer Moisés porocuita icuachiapri pipe sui iyavei Tūpa ñehe mombehusar rebicuachia pipe avei ‘toviroya yuvireco’ oyapave. Ēgüe ehi imombehu ari momba. <sup>24</sup> Amove osendu vahe viroya yuvireco, ambuae rumo ndoviroyai eté yuvireco.



<sup>25</sup> Opĩhañemoñetasa nomboyoyaise yuvireco, yuvinosepa pota. Ahese aipo ehi ahe ava upe:

—Supi eté Isaías omombehu Espíritu remimombehu pe recocuer resendar pe ramoí upe aracahe aipo ehi:

<sup>26</sup> “Eso nde mu pãhuve.

Emombehu aipo ere:

‘Yepe pesendu tẽira mbahe viña,  
ndapesenducuai chira rumo.

Iyavei pesepia tẽira mbahe viña,  
ndapemahecuai chira rumo sese’ ere chupe.

<sup>27</sup> Esepia, co ava ipĩharãtã iteanga seroyaẽhisave.

Ndoyemboapisaiño yuvireco.

Iyavei osapĩvii tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoyase ndoyevi potai cheu güecocuer moingatu yuvireco” ehi Espíritu Santo

remimombehu chupe aracahe —ehi—. <sup>28</sup> Sese tapeicua co pipe suive Tũpa omboyecua ucara oporopĩsirosa ava ndahei vahe judío upe. Ahe niha oyapisacara imombehusa rese yuvireco —ehi chupe.

<sup>29</sup> Aipo ihe pare, judío yuvinose ñehese rese oyecopi-copi yuviraso.

<sup>30</sup> Ipare Pablo opita ambuae ava rẽtave ñuvirío araviter rupi omboepi oque ãgua oico. Aheve nihapĩsii opacatu ava rese oyepĩri oyepotase yepi. <sup>31</sup> Omombehu Tũpa mborerecuasa resendar iyavei oporombohe opacatu yande Yar Jesucristo recocuer resendar osiquiyeẽhisa pipe. Ndipoi eté que ava omombituhu vahe Pablo ñehese.

## PABLO REMBICUACHIA ROMA PENDAR UPE ROMANOS

*Pablo mahenduhasa Roma pendar Jesús reroyasar upe*

<sup>1</sup> Che Pablo, Jesucristo rembiguai, aicuachía co che ñehe pëu. Tüpa che poravo apóstol che reco água ñehesa poropísirosa resendar mombehu água.

<sup>2</sup> Tüpa niha yipisuiwe omombehu uca co ñehesa ava oñehe mombehusar upe icuachiapri maranehi pipe aracahe. <sup>3</sup> Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; <sup>4</sup> ocuerayevise oespíritu maranehi pipe, aheso opíratasa pipe omboyecua tupri ité Tüpa Rahir güecosa. Ahe niha yande Yar Jesucristo.

<sup>5</sup> Ahe ichui Tüpa ombou cheu oporopítiviisa apóstol che reco água, che cuai avei ava ndahei vahe judío upe Guahir recocuier mombehu água opacatu ivi rupi sese yeroya uca água 'ipipe sui toviroya che Rahir yuvireco' oya. <sup>6-7</sup> Pe Roma pendar peico vahe, pe avei senoipri ipähuve peico Jesucristo rese peico vaherã. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tuprisa yande Ru Tüpa suindar, yande Yar Jesucristo suindar avei.

*Pablo oso pota Jesús reroyasar repia Roma ve*

<sup>8</sup> Che yipindar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa. <sup>9</sup> Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico. <sup>10</sup> Aporanduño ité semimbotar rupi pe piri che so água rese chupe yepi. <sup>11</sup> Esepia, che aso pota ité Espíritu suindar mbahecuaa mondo pëu pe pítivií água 'toyemoviracua tupri catu Cristo rese yuvireco' che yapave. <sup>12</sup> Che aipota ité yande ñepeipei yañepítivií catu água Cristo rese yande yeroyasa yareco vahe pipe.

<sup>13</sup> Che rivireta, che aipota peicua setá rupi che so pota tēisa pe piri yepi. Cūrítei rumo ndaicatuiño vite ité. Che rumo aipota, "Toime que che poraviquisa sui Cristo rese oyemoviracua catu vahe yuvireco ipähuve" ahe pëu, inungar opacatu ambuae ivi rupi ēgüe ahe ava ndahei vahe judío upe vichico. <sup>14</sup> Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vitei vahe upe, imbahecua vahe upe, nimbahecuai vahe upe avei no. <sup>15</sup> Sese pe Roma ve peico vahe upe avei ayemonguerēhi voi eté co ñehesa pīsirosa resendar mombehu água.

*Ñehesa pīsirosa resendar pīratasa*

<sup>16</sup> Che nachī eté co ñehesa pīsirosa resendar aviye vahe sui. Esepia, ahe Tüpa pīratasa opacatu viroyasar pīsiro água, judío rane yipindar, ipare opacatu ambuae ava-ava tēi avei. <sup>17</sup> Supi eté co ñehesa omboyecua Tüpa ava reco mbocatuprisa. Oyese yande yeroyasa pipeño ité ēgüe ehi yandeu. Esepia, icuachiapri aracahendar aipo ehi: "Acoi ava seco catupri vahe Tüpa rese oyeroyasa pipe sui oicoveño itera apirēhi" ehi.

*Opacatu ava rembiavi resendar*

<sup>18</sup> Supi eté niha yande Aposar oñemoirosa ipĩrata vahe ombou itera iva sui opacatu ava viroyasarẽhi upe, ndaseco pōrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco. <sup>19</sup> Ahe oicua tupri tẽi mbahe Tũpa suindar yuvireco. Esepia, Tũpa ité niha omboyecua chupe. <sup>20</sup> Ēgũe ehi eté Tũpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tũpa ité secoi iyavei ipĩratasa apĩrẽhi vahe. Sese ava angaipa viyar ndiyai, “Eñemosañõ tẽi rane oreu” ehi vaherã yuvireco chupe. <sup>21</sup> Esepia, yepe ahe oicua tẽi Tũpa yuvireco viña, nomboetei rumo Tũpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe ěgũe ehi tẽi vahe rese. Ipipe sui mbahe ndosenducua catu iri eté yuvireco. <sup>22</sup> Yepe, “Ore mbahecua vai” ehi tẽi viña, ndoicuai eté rumo mbahe ipipe yuvireco. <sup>23</sup> Esepia, ahe Tũpa nomanoi vahe seco porañete vahe mboetei rãgũer sui, omboetei ava ocañi tẽi vaherã rahanga yuvireco iyavei vírai, opacatu mbahe mĩmba, mboi tẽi avei omboetei yuvireco.

<sup>24</sup> Sese Tũpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiẽhisa pipe yuvireco. <sup>25</sup> Esepia, mbahe supi vahe reroya rãgũer sui temira tẽi viroya catu yuvireco. Iyavei Tũpa ité mboyeroia rãgũer sui omboetei catu mbahe sembiapocuer tẽi yuvireco. Yaposar ité ru timboeteisa catu yepi.

<sup>26</sup> Sese Tũpa opoi eté ichui, “Toyapoño poromochisa mbahe tẽi güemimbotarai pipe yuvireco” ehi chupe. Evocoiyase cuña avei cuimbahe rese güeco rãgũer sui yuvirecoi oyese ae. <sup>27</sup> Cuimbahe avei cuña rese güeco rãgũer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

<sup>28</sup> Iyavei, “Tũpa supi eté vahe” ndehise seroyaẽhisa pipe yuvireco, Tũpa evocoiyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe. <sup>29</sup> Ahe evocoiyase yuvirecoi opacatu mbahe-mbahe tẽi pipe; oyemboaguasa-guasa tẽi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tẽi ava upe. Ahe oñemoiro ambuae ava mbahe pota raisave tẽi, oporapichi, ivava serai, iporombopa serai, ipihañemoñeta ava reco momara ãgua tẽi iyavei imahechiroi ai ipipe yuvireco. <sup>30</sup> Iyavei ambuae ava cupe cotive mara ehi-ehi tẽi vahe, ahe Tũpa amotarẽhisar yuvirecoi, viroĩro avei ava, oyemboivate ai, oyecomboivate ai tẽi avei oñehe pipe yepi, oseca-seca tẽi mbahe naporai vahe güembiaporã, nomboyeroia avei oyesupa yuvireco, <sup>31</sup> ndoyapisaca potai eté Tũpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. <sup>32</sup> Oicua tẽi Tũpa “oimera evocoi nungar aposar upe cañisa” ehi vahe, oyapo viteño rumo mbahe tẽi yuvireco iyavei ambuae ava oyapose mbahe tẽi, ovihareteño sepiase yuvireco.

**2***Tũpa omondo ava upe sembiapogũer rupi tupri ité*

<sup>1</sup> Oimese que pe pãhu pendar ‘co oyapo mbahe tẽi; tocañi’ ohesave ambuae upe, ahese ahe ae oyemocañi tẽi uca. Esepia, ahe inungar tupri avei. <sup>2</sup> Yaicua rumo Tũpa omocañise evocoi nungar mbahe tẽi aposar

recocuer, ahe evocoiyase oyapo mbahe supi tupri vahe. <sup>3</sup> Pe opase ava recocuer pesenoi, pe avei rumo ěgüe peye tupri peico. Pe avei eté evocoiyase ndapeñemi chietera Tūpa ñemoirosa sui. <sup>4</sup> ¿Peroĩro tie Tūpa oyapo vitesse mbahe aviye vahe oñemosase, seco mbegüe tupri ai vitesse avei pēu? ‘Tosecuñaro güecocuer yuvireco’ oyapave rumo ěgüe ehi pēu. <sup>5</sup> Pe rumo pepiharāta viteño ité Tūpa upe pe yevei potaēhi āgua. Sese pereco catu viteño ité Tūpa ñemoirosa peyese, acoi ari oyepotase Tūpa güeco tuprisa pipe yande renoipara yande mocañi āgua, anise yande pĩsiro āgua curi. <sup>6</sup> Ahese opara omboepi ñepepepe yande rembiapogüer rupi yandeu. <sup>7</sup> Omboura tecovesa apirēhi vahe yandeu yasecase teco ori, Tūpa suindar poromboeteisa iyavei mbahe apirēhi vahe yande mbahe tupri aposa pipe. <sup>8</sup> Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rāgüer sui viroya vahe mbahe tēi. <sup>9</sup> Judío opacatu mbahe-mbahe tēi aposar ranengatu oiporarara mbahe rasicuer yuvireco, iparera ndahei vahe avei judío. <sup>10</sup> Tūpa rumo opacatu seco catupri vahe upe omondora imboetei āgua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

<sup>11</sup> Esepia, Tūpa ndayande mboyoaviratii yande rereco. <sup>12</sup> ěgüe ehi eté, opacatu oyemboangaipa vahe Moisés porocuaita porēhi oyemocañi tēira yuvireco. Acoi oyemboangaipa vahe Moisés porocuaita rereco pipe yuvireco, ahe porocuaita pipe avei opara ocañi tēi porandusave yuvireco coiye. <sup>13</sup> Esepia, osenduño tēi vahe porocuaita ndahei seco catupri vahe yuvireco. Viroya vahe ité rumo porocuaita, ahe seco catupri vahe yuvirecoi. <sup>14</sup> Supi eté acoi ndahei vahe judío yuvirecoi vahe yepe ndovirecoi co porocuaita yuvireco viña, ahe rumo co porocuaita rupi tupri oyapose mbahe, ahe evocoiyase inungar porocuaita vireco vahe yuvireco. <sup>15</sup> Esepia, güembiapo catupri pipe omboyecua porocuaita virecose opiha pipe. Opihañemoñeta pipe avei oyandu porocuaita mboaviyasa. Ahe ipipe avei oyandu mbahe güembiavi, ichui avei oye-monguerēhi mbahe aviye vahe apose. <sup>16</sup> Ahe ari cañi pipe Tūpa oyocuai ucara opacatu ava rembiapo cuaēhisa repri pisi āgua Jesucristo upe, co ñehesa pĩsirosa resendar amombehu vahecuer rupi tupri ěgüe ehira curi.

*Ñehesa judío resendar, Moisés porocuaita resendar avei*

<sup>17</sup> Pe rumo, “Judío aico” peye vahe, peyeroya opacatu Moisés porocuaita mboaviyasa pipe pe reco catupri āgua Tūpa rovaque viña. Iyavei ipipe peyecomboivate ai Tūpa rese peicose. <sup>18</sup> Peicua semimbotar. Ahe porocuaita pe mbohe avei mbahe aviye catu vahe poravo āgua. <sup>19</sup> Pe, “Aicatu ité ndasesapisoi vahe nungar ava ndayaracuai vahe mboaracua iyavei ava angaipa viyar pītumimbi vahe nungarsave tēi resape āgua” peye tēi. <sup>20</sup> “Aicatu avei ava mbahe ndosenducuai vahe mboaracua iyavei ava chihivahemi nungar mbohe āgua. Esepia, areco co mborocuaita vireco vahe opacatu mbahecuaa iyavei mbahe supi tupri vahe ité” peye tēi avei. <sup>21</sup> Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi āgua, ¿mahera ru pe ae avei pemonda no? <sup>22</sup> Pe, “Ndiyai pe aguasa” peye; pe teieté avei rumo ěgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itūparo pipe sui. <sup>23</sup> Peyeecomboivate ai co mborocuaita rerecoa rese; ndapemboetei

rumo Tūpa ipipe ahe mborocuita mboaviyeēhi pipe. <sup>24</sup> Supi eté icuachiapri aracahendar pipe aipo ehi: “Pe sui tēi ava ndoicuai vahe Tūpa iñeheñehe tēi serer maranehi rese yuvireco” ehi.

<sup>25</sup> Supi eté co tecocuer cuaca circuncisión resendar ahe aviye angara pēu, pero ya tupri itese Moisés porocuita viña. Ndaperoya tupriise rumo, pe evocoyase inungar ndapeyembocircuncidai vahe peico. <sup>26</sup> Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi. <sup>27</sup> Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi āgua yuvireco. Esepia, yepe pereco Tūpa porocuita viña, pe rumo ndapemboaviyei eté. <sup>28</sup> Judío supi eté vahe yaicose, ndahei yande yesupa judío recocuer rupi güeraño ēgüe yahera. Iyavei circuncisión supi eté vahe ndahei yande retocuer rese güeraño tēi avei no. <sup>29</sup> Judío ete ité rumo opihá pipe ité viroya Tūpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboetisa Tūpa suindar ité, ndahei ava tēi suindar.

### 3

<sup>1</sup> Evocoyase, ¿mbahe vo co aviye judío yande reco āgua? ¿Yande yembocircuncidasa piha aviye? <sup>2</sup> Supi eté. Esepia, yipindar Tūpa omondo oñehe judío eta upe imboaviye āgua. <sup>3</sup> Amove yepe ipāhu pendar nomboaviyeise ocuita viña, ¿Tūpa avei tie ēgüe ehira? <sup>4</sup> ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri aracahendar pipe aipo ehi: “Supi tupri vahe Tūpa’ ehira nde ñehe rese yuvireco.

Sese ereiquesa ava porandusave, eresē tupriñora eso ichui” ehi.

<sup>5</sup> Yande reco rai pipe tēi amboyecuase Tūpa reco tupriisa, ¿mara yahera vo evocoyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.) <sup>6</sup> ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri āgua chupe viña.

<sup>7</sup> Aviyeteramo oimera ava aipo ehi vahe: “Yande remira pipe sui tēi ava omboetesi catusa Tūpa supi eté vahe, ¿mahera piha evocoyase angaipa viyar nungar yande rerecora viña?” ehi. <sup>8</sup> “Yayapora ayase mbahe naporai vahe mbahe tupri reime āgua” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

#### *Opacatu yande angaipa viyar yaico*

<sup>9</sup> ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei. <sup>10</sup> Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepe angara viña!

<sup>11</sup> Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

<sup>12</sup> Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepe angara viña!

<sup>13</sup> Iñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

<sup>14</sup> Ipipe oñeheserai opihavĩracuá iteangasa pipe yuvireco.

<sup>15</sup> Ndayipitii oporapichi ãgua yuvireco.

<sup>16</sup> Setá ava omomara, omombaraisu avei oguatasa rupi yuvireco.

<sup>17</sup> Iyavei ndoicuai eté güeco tupri ãgua yuvireco.

<sup>18</sup> Ndipihañemoñetai eté Tũpa sui osiquiye ãgua yuvireco” ehi.

<sup>19</sup> Yande niha opa yaicua opacatu co mbahe omombehu vahe mborocuaita aracadendar pipe, omombehu co porocuaita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tũpa ñemoirosa pisi ãgua yuvireco’ ohesave aipo ehi. <sup>20</sup> Esepia, ndipoi chietera que ñepi seco aviye vahe Tũpa rovaque co porocuaita mboaviye pipe. Ahe mborocuaita rumo oicua uca yande angaipa viyar yande reco.

*Cristo rese yande yeroya pipe Tũpa yande pĩsira*

<sup>21-22</sup> Cũritei rumo Tũpa oicua uca yandeu ndahe iri mborocuaita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri secoi porocuaita aracadendar pipe, iñeheserai mombehusareta rembicuachiagüer pipe avei. <sup>23</sup> Supi eté yande opacatu yayapo angaipa, ndayasupitii eté Tũpa reco porañetesa. <sup>24</sup> Ahe rumo oporoaisusa pipe, “Ereyavi mbahe che ñemoirosa pisi ãgua” ndehi iri yandeu. Esepia, ahe yande pĩsira uca Guahir Jesucristo upe. Yande rumo ndayamboepii eté yande raisusa chupe. <sup>25-26</sup> Tũpa rumo ombou Guahir Cristo oipiyere vaheerã vuvu yande angaipa rese ñero ãgua. Sese yande yeroya pipe oime ñeroisa yandeu. Ipipe omboyecua güeco ñvi tupriisa. Yipisuive rumo güeco asiñehisa pipe oñemosañe aracadendar ava angaipa upe; cũritei rumo omboyecua ité güeco ñvisa yandeu, seco ñviño ité seco catupri vahe yande rerecose Tahir rese yande yeroya pipe.

<sup>27</sup> Evocoyase ndiyai eté yande yeecomboivate ai ãgua sovaque! Esepia, ndahei porocuaita mboaviye rese egüe ehi, ahe rumo Cristo rese yande yeroya pipe egüe ehi yandeu. <sup>28</sup> Sese yaicua Tũpa, “Ereyavi mbahe che ñemoirosa pisi ãgua” ndehi iri Cristo rese yande yeroyase yandeu, ndahei mborocuaita mboaviyesa sui tēi.

<sup>29</sup> Tũpa niha opacatu ité ava Tũpa, ndahei ore judío oroico vahe Tũpa güeraño! <sup>30</sup> ¡Supi eté ñepeño ité secoi: sese yayeroyase Cristo rese, oyoya guasño ité, “Ereyavi mbahe che ñemoirosa pisi ãgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! <sup>31</sup> Ndahei rumo, “Egüe ehi tēi vahe” yahe evocoi mborocuaita upe Jesucristo reroyasa pipe. Ipipe rumo yamboyecua evocoi mborocuaita egüe ndehi tēi vahe.

## 4

*Abraham recocuer sui yembohesa*

<sup>1</sup> Iyavei, ¿mara ehi piha yande ramoi Abraham recocuer aracahe? <sup>2</sup> Acoi mbahe güembiapo pipe sui tēi oipisise güeco tupri ãgua Tũpa sui, oyemboivate aira oico ipipe viña. Ndiyai eté rumo egüe ehi Tũpa rovaque.

<sup>3</sup> Esepia, icuachiapri aracahendar pipe aipo ehi: “Abraham oyeroya ité Tūpa rese. Sese Tūpa, ‘Co seco catupri vahe’ ehi chupe” ehi. <sup>4</sup> Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui repri ité yaipisi. <sup>5</sup> Yande rumo, yayeroyase Tūpa rese, Tūpa evocoyase yande pisira, ‘co seco catupri vahe’ ohesave. Esepia, ahe ěgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. <sup>6</sup> David mborerecuar aracahendar avei oñehe ava rorivetesese rese Tūpa seco catupri vahe nungar pisisa rese. Ahe rumo ndahei mbahe sembiapogüer rese tēi oipisi. <sup>7</sup> Ahe aipo ehi aracahe:

“¡Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

<sup>8</sup> ¡Sorivete avei ava, ‘Nde angaipa viyar ereico’ ndehi irise Tūpa chupe!” ehi.

<sup>9</sup> Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese. <sup>10</sup> ¿Marase pñha oipisi oyeupe nara sereco? ¿Oyembocircuncida renondeve pñha, anise ipare tie? Yipive ité. <sup>11</sup> “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secoi. ěgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. ěgüe ehi Tūpa, “Co seco catupri vahe yuvirecoi” ehi avei ahe ava upe. <sup>12</sup> Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircuncida viteiseve.

*Tūpa remimombehu imboaviyesara sese yeroyasa pipe*

<sup>13</sup> Esepia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pipe ěgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave. <sup>14</sup> Supi etese co mborocuita mboyeroyasar güeraño oipisise co mbahe oime vaherã chupe viña, evocoyase yande yeroyasa Tūpa rese ěgüe ehi tēi etera, Tūpa remimombehugüer evocoyase ěgüe ehi tēi vahe aveira viña no. <sup>15</sup> Esepia, co mborocuita mboaviyeñhisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyañhisa.

<sup>16</sup> Sese mbahe Tūpa remimombehugüer porerecosa yaipisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoyase ahe opacatu yande ramoi secoi. <sup>17</sup> Icuachiapri aracahendar pipe aipo ehi: “Orombou ava eta ivi rupindar ramoirã” ehi. Co Tūpa niña Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

<sup>18</sup> Yepe yavai eté seroya ãgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehes: “Setá oimera ava nde suindar” ehi vahe rupi tupri ité. <sup>19</sup> Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi ãgua yuvireco viña. <sup>20</sup> Ndopoi eté Tūpa oyeupe ñehesa reroyasa sui. Ahe

rumo oyeroya catu ité sese iyavei omboetei eté. <sup>21</sup> “Supi eté Tūpa vireco opīratasa opacatu oñehengagüer mboaviye āgua” ehiño ité opiha pipe. <sup>22</sup> Sese Tūpa, “Co seco catupri vahe secoi” ehi iyeroyasa rese chupe.

<sup>23</sup> Co ñehesa ndahei Abraham upe güeraño. <sup>24</sup> Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. <sup>25</sup> Esepia, ahe imondopri secoi yande angaipa repirã. Ipare Tūpa ombogüerayevi yande pisi āgua seco catupri vahe nungar oyeupe.

## 5

*Tūpa, “Peyavi mbahe” ndehi iri*

<sup>1</sup> Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe. <sup>2</sup> Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tūpa piri yande reco āgua imborerecuasave. <sup>3</sup> Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosa āgua, <sup>4</sup> iyavei yañemosañose, yasē tupri yande recoāhasa sui, ahese yaicua yaipisi vahe rã mbahe aviye vahe Tūpa suindar yepi. <sup>5</sup> Iyavei ahe yande remiario nayamoha tēi chira sereco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

<sup>6</sup> Yande ae ndayaicatui yande ñepisiro āgua yande recocuerai sui, Cristo rumo osupitise ari chupe, omano opacatu yande angaipa rese. <sup>7</sup> Aviyeteramo oimera que ñepi ava omano vahe rã ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirã” ehi vahe rã chupe. <sup>8</sup> Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano āgua yande angaipa repirã. <sup>9</sup> Ipipe sui cūritei, “Peyavi mbahe” ndehi iri chira. Sese nomboui chietera oñemoirosa yandeu. <sup>10</sup> Esepia, yamotarēhimbar yaico vitesse, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoyase oicatu ité yande pisi. <sup>11</sup> Ndahei co reseño ěgüe yahera, yaviha catu aveira Tūpa rese, yande Yar Jesucristo rese avei. Ichui niha ndipo iri mbahe Tūpa rovaque yande rese.

*Adán iyavei Cristo resendar ñehesa*

<sup>12</sup> Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco. <sup>13</sup> Ndipo viteise Moisés porocuita, oime voi eté angaipa co ivi pipe. Yepe tie ndicuaa vitei angaipa porocuita ndipoise viña, <sup>14</sup> Adán reco sui tupri ité rumo ava omanoño ité oangaipa pipe yuvireco. ěgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuita mboaviyeēhisa resendar rese viña. Ahe Adán rese omboyecua mbia ou vahe rã.

<sup>15</sup> Tūpa pororecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tūpa ombou opororecosa poropisirosa yandeu. Ahe rumo aviye catu vahe ava eta upe nara. <sup>16</sup> Ahe ñepi ava angaipa rumo ndoyoyai eté Tūpa poropisirosa ombou vahe rese yandeu. Esepia, ñepi



ava angaipa sui ou Tūpa ñemoirosa; oporerecosa rumo Tūpa ombouño ité ava eta mbahe oyavi ati vahe upe nara yangaipa mocañi āgua. <sup>17</sup> Supi eté ñepei ava angaipa sui oimeño ité manosa opacatu yandeu. Yande rumo yaipisi mbahe ipirata catu vahe ichui, ahe Tūpa porovasasa tuvichá vahe ité iyavei iporerecosa, “Peyavi mbahe” iheēhisa resendar. Sese yareco ité tecovesa apirēhi vahe yandeyeupe nara ñepei ava sui, ahe Jesucristo.

<sup>18</sup> Evocoiyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiēhi āgua ‘tovireco tecovesa apirēhi yuvireco’ oya. <sup>19</sup> Esepia, ñepei ava Tūpa reroyaēhisa sui setá oime ava angaipa viyar; ēgüe ehi aveira ñepei ava mboyeroyasa sui setá aveira ava vireco güeco catuprisa Tūpa rese yuvireco.

<sup>20</sup> Supi eté porocuita ouse aracahe, ahese angaipa yaposa catu ité. Yepe ēgüe ehi viña, Tūpa porovasasa rumo ivate catu ité ichui. <sup>21</sup> Evocoiyase inungar angaipa ipirata yandeu yande mano āgua viña, ēgüe ehi avei rumo Tūpa oporovasasa ipirata vahe pipe yande pisi seco catupri vahe nungar yande rereco ‘toipisi tecovesa apirēhi vahe che Rahir Jesucristo rembiapo sui’ oya.

## 6

*Angaipa upe omano vahe nungar yaico; Cristo rese yaicose rumo oicove vahe ité yaico*

<sup>1</sup> Evocoiyase, ¿iya iri pīha yayapo vite angaipa yaico Tūpa yandeu oporovasasa mboyecua catu āgua? <sup>2</sup> ¡Aní chietera! Esepia, yande niha senosepri angaipa sui. Evocoiyase ndiya iri eté yayapo viteño angaipa yaico. <sup>3</sup> ¿Ndapeicuai vo pe yañeapiramose Jesucristo rer pipe, ndoyavii yamano vahe ité sese? <sup>4</sup> Yande ñeapiramose, aviye acoi ñotimbrī yaico Cristo rupive yande mbogüerayevi iri āgua iyavei yande recocuer mopiasu āgua avei, inungar acoi Cristo ocuerayevi Vu reco pīratasa pipe.

<sup>5</sup> Yande omano vahe nungar yaicose supive, ēgüe yahe aveira yande yacuerayevi supi. <sup>6</sup> Yaicua avei niha yipindar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoēhi āgua. <sup>7</sup> Esepia, acoi omano vahe ndoyapo iri angaipa yuvireco. <sup>8</sup> Yande avei niha omano vahe nungar Cristo rese yaico. Evocoiyase yayeroya avei yaicove vaherã sese. <sup>9</sup> Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe. <sup>10</sup> Supi eté omanose Cristo, omano ñepei reseve opacatu angaipa mocañi āgua; cūritei rumo oicove Tūpa upe nara. <sup>11</sup> Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

<sup>12</sup> Sese aní peico vite angaipa pīratasavrive pe cuai āgua pe remimbotarai mboyeroyasa pipe. <sup>13</sup> Aní peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo āgua. <sup>14</sup> Evocoiyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

*Yembohesa mbiguai tēi recocuer sui*

<sup>15</sup> Ndayaico iri mborocuaíta pipe tēi, yaico rumo Tūpa porovasasa pipe. Evocoiyase, ¿“Tayapo vite angaipa” yahera pīha? ¡Aní chietera!  
<sup>16</sup> Pe niha peicua que ava pemboyeroyase, ipovri pendar evocoiyase peico. Pemboyeroyase Carugar angaipa apo āgua, ahe evocoiyase pe reco mocañi tēira. Tūpa pemboyeroyase rumo, ahe evocoiyase pe reco mohivira. <sup>17</sup> Aviye Tūpa upe. Esepia, pe yipindar mbiguai tēi nungar peico angaipa pipe viña, cūrítei rumo pemboyeroya pe pihave ité porombohesa peipisi vahe. <sup>18</sup> Ñepeí reseve pe angaipa sui Tūpa pe renosese, pe evocoiyase mbiguai nungar mbahe supi tupri vahe apo āgua peico. <sup>19</sup> (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri āgua.) Yipindar pe retecuer pereco mbahe tēi pipe mbahe naporai vahe apo āgua. Ēgüe peye rumo pe cūrítei pe reco mohivi āgua peico mbahe tupri pipe ñepeí reseve Tūpa upe pe reco āgua.

<sup>20</sup> Pe peico vitesse mbiguai tēi nungar pe angaipa pipe, ahese ndapeyapo vitei mbahe supi tupri vahe; <sup>21</sup> cūrítei rumo pechī tēi ichui, ahe niha ndape pītivi eté pe recocuer rese, iyavei pe reraso pota manosa apirēhi vahesave yepi. <sup>22</sup> Cūrítei rumo angaipa sui senosepri peico Tūpa povri ve pe reco āgua. Ichui mbahe tupri oime pēu. Ahe niha ombou oyeupe nara ité pe reco tupri āgua. Ipipe sui peicora apirēhi vahe rā. <sup>23</sup> Angaipa niha ombou manosa tēi yandeu, Tūpa rumo oporerecosa ombou tecovesa apirēhi vahe yandeu yande Yar Jesucristo rese yande recose.

## 7

### *Mendasa sui yembohesa*

<sup>1</sup> Che rivireta, pe niha peicua tupri mborocuaíta, peicua avei ahe porocuaíta povri veño ité opacatu yaico yaicove vitesse co ivi pipe. <sup>2</sup> Esepia, inungar cuña omenda vahe, imer oicove vitesse, iporocuaítavri ve viteño ité secoi yepi. Omanose rumo imer ichui, ahe cuña ndahe iri omer porocuaítavri ve secoi. <sup>3</sup> Acoi cuña omer recove vitesseve, virecose ambuae cuimbahe, oyemboaguasa tēi evocoiyase; acoi omanose rumo imer ichui, ndaseco iri ipovri ve. Ahe iyacatu ité omenda yupagüe iri; ahese ndahei yaguasa tēi cute.

<sup>4</sup> Che rivireta, pe niha ēgüe peye avei Cristo rese peico vahe; Cristo manosa sui ndahe iri Moisés porocuaítavri ve peico Cristo rese peico āgua. Ahe niha acoi ocuerayevi vahe. Sese yande recocuer ēgüe ndehi tēi vahe Tūpa upe. <sup>5</sup> Esepia, yande yaicove vitesse yande reco ai pipe, ahe porocuaíta renduse, yaipota catu mbahe tēi pipe yande reco āgua. Ipare rumo ahe manosave tēi yande reraso ucara viña. <sup>6</sup> Cūrítei rumo yande omano vahe nungar yaico acoi porocuaíta pipe yaico vahecuer sui. Ēgüe yahe, yasē ichui Tūpa upe mbahe apo āgua Espiritu sui yande reco piasu pipe. Ndahe iri mborocuaíta icuachiapri yipindar vahe pipe yaico.

### *Angaipa oime vahe yande rese*

<sup>7</sup> ¿“Tūpa porocuaíta angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuaíta ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuaíta pipe, ahese ndaicuai chiaveira che mbahe pota raisa viña. <sup>8</sup> Aicuase mborocuaíta, ahese angaipa ipirata catu

cheu. Ahe mborocuaita apo potaēhisa pipe che querēhi catu opacatu che remimbotarai tēi apo āgua. Esepia, mborocuaita porēhi angaipa aviye ndipoi vahe viña. <sup>9</sup> Yipindar Tūpa porocuaita ndaicua viteise, ndoyavii aviye vahe ité che reco areco viña. Porocuaita aicuase rumo, aipota rai angaipa apo āgua. <sup>10</sup> Che evocoyase acañi tēi vaherā aico ipipe viña. Ahe porocuaita che recove apirēhi āgua mbou rāgüer sui, che mondo ucaño itera manosa apirēhi vahe pipe tēi viña. <sup>11</sup> Esepia, angaipa ahe porocuaita pipe che mbopa ité. Ahe ipipe avei che mocañi tēira viña.

<sup>12</sup> Evocoyase co porocuaita ndaseco marai vahe ité, supi tupri vahe ité, aviye vahe avei. <sup>13</sup> ¿Co porocuaita aviye vahe pīha che rereco che mano āgua tēi? ¡Aní eté! Angaipa tēi rumo ēgüe ehi che rereco. Evocoyase co porocuaita cuasa sui oipota catu uca mbahe tēi apo āgua cheu. Ipipe aicua angaipa oime vahe che rese. Ēgüe ehi avei ahe porocuaita omboye-cua tupri ité angaipa mbahe tēi vahe yandeu.

<sup>14</sup> Yaicua niha porocuaita Tūpa suindar, che tēi rumo imondopri aico angaipa mboyeroa āgua. <sup>15</sup> Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo. <sup>16</sup> Che rumo ayapose mbahe ndayapo potai vahe, ahese aicua co porocuaita aviye vahe. <sup>17</sup> Evocoyase ndahei cheye-sui eté ēgüe ahe, angaipa tēi rumo ēgüe ehi che mbohe uca. <sup>18-19</sup> Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicutui eté rumo yapo. Iyavei yepe ndayapo potai mbahe tēi viña, che rumo ayapoño ité. <sup>20</sup> Sese ayapo viteño itese mbahe ndayapo potai vahe, ndahei rumo che ité ayapo, che piha pipe angaipa oime vahe, ahe tēi rumo oyapo uca cheu.

<sup>21</sup> Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi. <sup>22</sup> Che piha pipe rumo Tūpa porocuaita aipotá iteanga tēi, <sup>23</sup> che rumo aicua che piha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

<sup>24</sup> “¡Che paraísu ité!, ndaicutu iri eté, ¿uma pīha co mbahe tēi sui che renosera viña?” ahe cheyeupe vichico. <sup>25</sup> Tūpaño ité oicatu Guahír Jesucristo rese. “Aviye” yande Ru Tūpa upe. Ēgüe ehi ahese mbahe cheu; Tūpa porocuaita amboaviye pota viña, che remimbotarai tēi rumo che rereco uca angaipa povri ve.

## 8

### *Yaico vaherā Tūpa Espíritu rese*

<sup>1</sup> Cūrítei rumo ndipo iri Tūpa ñemoirosa yandeu Jesucristo rese yaicose. <sup>2</sup> Esepia niha, Jesucristo rese yaicose, yande cuaisar Espíritu tecovesa mondosar yande renose angaipa povri sui, manosa sui avei. <sup>3</sup> Esepia, yande remimbotarai rese ndayaicutui Moisés porocuaita mboyeroa āgua, ahe avei evocoyase ndoicutui eté yande reco moingatu. Tūpa rumo oicatuño ité. Esepia, Guahír ombou yande nungar tupri ité ‘toyemondo ava angaipa repirā’ oya. Ēgüe ehi imocañi opacatu yande angaipa yande sui, yande remimbotarai avei. <sup>4</sup> Ahe ēgüe ehi yande yamboaviye vaherā mborocuaita. Esepia, ndayaico iri yande remimbotar tēi pipe. Yaico rumo Espíritu aviye vahe rese.

<sup>5</sup> Esepia, acoi yuvirecoi vahe rumo güemimbotar tēi pipe, güecocueraí reseño tēi ipihañemoñeta yuvireco; Espíritu rese yuvirecoi vahe rumo semimbotar rese ipihañemoñeta catu yuvireco. <sup>6</sup> Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espíritu suindar mbahe rese, virecora tecovesa apirēhi vahe mbahe tupri pipe yuvireco. <sup>7</sup> Esepia, acoi güecocueraí reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuita mboyeroya āgua yuvireco. <sup>8</sup> Ēgüe ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo āgua yuvireco.

<sup>9</sup> Pe rumo ndapeico iri pe remimbotarai pipe. Peico rumo Tūpa Espíritu rese, ahe perecose peyese. Acoi ndovirecoi vahe rumo Espíritu Cristo suindar, ndahei eté chupendar. <sup>10</sup> Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu. <sup>11</sup> Acoi Tūpa Espíritu secoise pe rese, Tūpa evocoyase omondora tecovesa piasu pe retecuer upe oEspíritu pe rese seci vahe pīratasa pipe. Esepia niha, ipipe ité ombogüerayeví Guahír Jesucristo.

<sup>12</sup> Ēgüe ehi che rivireta, yareco yande cuaita, ndahei rumo yande remimbotarai pipe yande reco āgua. <sup>13</sup> Esepia, pe peicoño itese pe remimbotarai pipe, ahese pecañi tēira; pemombopase rumo Espíritu pipe peyese, ahese peicovera apirēhi vaherā.

<sup>14</sup> Esepia, opacatu Tūpa Espíritu ombohe vahe, Tūpa rahír ité yuvirecoi. <sup>15</sup> Supi eté pe Espíritu peipisi vahe ndapembosiquiye uca iri pe rereco, ahe rumo pemoingo Tūpa rahír ité pe reco āgua. Ahe avei, “¡Che Ru!” pe mbohe uca chupe. <sup>16</sup> Co Espíritu avei oicua uca yande espíritu upe Tūpa rahír yande recose. <sup>17</sup> Evocoyase yaipisi aveira mbahe yande Ru Tūpa ombou vaherā yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaherā teco porañetesa ipiri curi.

### *Teco porañetesa ou vaherā curi*

<sup>18</sup> Cūritei rumo yande paraisusa ndoyoyai eté teco porañetesa yande rese ou vaherā rese. <sup>19</sup> Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahír yuvirecoi vahe rese. <sup>20</sup> Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa reprí ava upe. Mbahe sembiapocuer rumo osāroño ité <sup>21</sup> güeco opa tēi vaherā sui ñepisiro āgua teco porañete vahe Tūpa rahír vireco vahe rupití āgua curi. <sup>22</sup> Yande niha yaicua aracahe suive opacatu mbahe Tūpa rembiapo oiporara mbaherasicuer yuvireco cuña imembi rasi vahe nungar. <sup>23</sup> Ndahei rumo ahe güeraño ēgüe ehi yuvireco, yande avei ēgüe yahe. Yande yareco ité Espíritu, ahe yipindar vahe yaipisi vaherā ichui curi. Yayemombaraisu, yasāro vite yande querēhisa pipe Tūpa guahír ité yande rereco āgua, yande retecuer recuñaro āgua avei. <sup>24</sup> Esepia, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasāro iri. Ndipoi ava osāro vite tēi vahe mbahe güembiepia. <sup>25</sup> Acoi mbahe yande remiaro ndayasepia viteise rumo, yasāro vite yande ñemosasa pipe sereco.

<sup>26</sup> Ëgüe ehi avei Espíritu yande pítivii ndayaicatu irise. Esepia, ndayaicuai eté mara yahera yayeroquí, co Espíritu Santo rumo oporandu ité Tūpa upe yande rese oyemopoasesa pipe. <sup>27</sup> Iyavei Tūpa, ahe oicua vahe opacatu yande pihañemoñetasa, oicuaño ité Espíritu mbahe omombehu pota vahe oyeupe. Esepia, Espíritu oporandu chupe semimbotar rupi yande seroyasar yaico vahe rese.

*Yasecopipa itera mbahe tēi*

<sup>28</sup> Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime āgua yande raisusave. <sup>29</sup> Esepia, yipive Tūpa yande cua, yande poravo Guahir Jesucristo nungar ité yande reco āgua ‘ahe che Rahir tenonde catu vahe tasecoi opacatu ambuae che rahir sui’ oya. <sup>30</sup> Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco āgua. Ipare, “Co seco catupri vahe” ehi chupe; ahe chupe avei omondo teco porañetesa.

<sup>31</sup> ¿Mara yahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco! <sup>32</sup> Tūpa niha ombou ité Guahir imano āgua opacatu yande rese. Sese yaicua ombou aveira opacatu mbahe yandeu yande pítivii āgua Tahir rese yande recose. <sup>33-34</sup> Sese ndiyai eté ava upe, “Pecañi tēira, peyavi pe recocuer” ihe āgua yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose sepirā, iyavei ocuerayevise. Cūrítei Cristo Vu acato coti, “Co cheundar ité yuvirecoi” ehi yande rese oyerure yepi. <sup>35</sup> ¿Mbahe pīha yande mboyepepira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipoise, que mbahe tēise yandeu, yande yuca potase tie yuvireco? <sup>36</sup> Inungar icuachiapri aracahendar pipe aipo ehi:

“Oyemoingatu voi ari rupi yande yuca āgua yuvireco ndeundar yaicose, ovesa yucapirā nungar tēi yande rereco yuvireco” ehi aracahe.

<sup>37</sup> Opacatu rumo co mbahe oimese yandeu, yasecopipa ité ahe yande raisusar recocuer pipe sui. <sup>38</sup> Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove vites. Ndayande mboyepepi chiaveira ichui que Tūpa rembiguai, que seco ivate vahe, seco pīrata vahe ndayasepiai vahe, que cūrítei mbahe oime vahe yandeu, anise que mbahe oime vaherā curi. <sup>39</sup> ¡Ndayande mboyepepi chiaveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

## 9

*Tūpa oiporavo Israel oyeupe nara aracahe*

<sup>1</sup> Che Cristo reroyasar che reco pipe supi eté añehe, ndopombopai. Tūpa Espíritu oicua ité che pihañemoñetasa supi vahe. <sup>2</sup> Ndavihai eté che pīha pipe; oime mbahe tasi vahe cheu yepi. <sup>3</sup> Che aipota tēi opacatu che mu judío ñepisiro āgua yuvireco viña. “Tacañi tēi Cristo porēhi icañi tēiēhi āgua yuvireco” ahera viña. <sup>4</sup> Ahe niha Israel suindar yuvirecoi, aracahe Tūpa oiporavo vahe guahirguā. Ahe ipāhuve avei secoi güendigüer porañetesa pipe, iyavei omondo ité oñehe güemimbotar, oporocuaita avei

chupe nara viña ‘tache mboetei oyeruresa pipe che rêtave yuvireco’ oya, iyavei, “Amboaviye itera che ñehe pe rese” ehi yuvireco chupe. <sup>5</sup> Ahe avei niha yande ramoi yipindar vahe suindar yuvirecoi, Tūpa Rembiporavo Poropisirosar avei ahe ichuindar oyesu vahe. Ahe Poropisirosar niha Tūpa ité, ivate catu vahe seci opacatu sui. Sese, ¡timboeteisa catu yepi! ¡Ēgüe tehi apirēhi!

<sup>6</sup> “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. <sup>7</sup> Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe. <sup>8</sup> Co rumo osenducua uca yandeu ndahei Abraham suindar yuvinose vaheño ité Tūpa rahir yuvirecoi, Tūpa remimombehu rupi yuviroha vahe güeraño rumo ichuindar ité yuvirecoi. <sup>9</sup> Esepia, Tūpa Abraham upe aipo ehi aracahe: “Co ari rupi avei ayevira curi, ahese oimera Sara membri ndeu” ehi.

<sup>10</sup> Ndahei rumo co reseño, tahir Isaac rese avei. Esepia, ocuacuase sembireco Rebeca imembi cōi, ahe icōi vahe yesupa rumo ñepeño ité. <sup>11-13</sup> Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

<sup>14</sup> ¿Sese pīha Tūpa upe, “Ndaseco tupri vahe” yahera? ¡Aní eté! <sup>15</sup> Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi. <sup>16</sup> Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisuerecosa pipe mbahe oyapo yandeu. <sup>17</sup> Supi eté Tūpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco āgua che pīratasa mboyecua āgua nde sui, che rer mboetei āgua avei opacatu ava upe co ivi pipe” ehi. <sup>18</sup> Ēgüe ehi oporoparaisuereco güemimbotar rupi. Güemimbotar rupi avei omboavai viroya āgua ava upe.

<sup>19</sup> Aviyeteramo oimera que amove pe pāhu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he āgua yandeu. Esepia, ndipoi eté niha ava, ¡Aní! ehi vaherā Tūpa remimbotar upe” ehira. <sup>20</sup> “Ndiyai eté rumo Tūpa poepi āgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tēi eve?” ihe āgua ooposar upe. <sup>21</sup> Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirā tēi apo āgua.

<sup>22</sup> Tūpa rumo oñemosa pare iya ité oñemoirora, opīratasa mboyecua āgua ocañi tēi vaherā upe. <sup>23</sup> Ēgüe ehi avei yapo güemimbotar rupi güeco porañetesa ivate vahe mboyecua āgua yandeu. Esepia, yande paraisuereco iyavei yipisuiwe teco ori porañetesa omoingatu yandeu aheve yande reique āgua. <sup>24</sup> Yande avei yande renoi oyeupe, que judío, anise que ndahei vahe judío yande recose. <sup>25</sup> Esepia, Oseas rembicuachiagüer pipe aipo ehi:

“Acoi ava ndahei vahe cheundar, chupe,

‘Cheundar ité’ ahera, iyavei acoi ava ndahei vahe saísupri yuvirecoi, chupe, ‘Che rembiaisu ité’ ahera” ehi.

<sup>26</sup> “ ‘Pe ndahei vahe cheundar peico’ ehi vahesave, ahe chupe, ‘Tūpa oicove vahe rahir ité’ hesara” ehi.

<sup>27</sup> Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tēi rumo oñepisirora yuvireco. <sup>28</sup> Esepia, yande Yar omboaviye voira oñehe ava viroyasarēhi mocañi āgua co ivi pipe” ehi. <sup>29</sup> Oyoya avei ambuae Isaías remimombehugüer yipindar vahe rese:

“Yande Yar seco pĩrata catu vahe noipisiroise que moviro yande ramo yandeu, yacañipa tēira viña inungar tecua guasu Sodoma, Gomorra reseve yuvireco” ehi.

### *Judío yuvirecoi vahe iyavei ñehesa pĩsirosa resendar*

<sup>30</sup> ¿Mara yahera vo evocoiyase? Yaicua ava ndahei vahe judío, yepe ndahei osecá vahe güeco catupri āgua yuvireco viña, Cristo rese oyeroyasa pipe rumo vireco ité güeco catupri Tūpa rovaque. <sup>31</sup> Judío yuvirecoi vahe rumo oipota tēi güeco tupri āgua ité Tūpa porocuaita mboyeroya pipe viña, ndoicatui eté rumo supiti yuvireco. <sup>32</sup> Esepia niha, ndahei oyeroyasa pipe ité osecá oñepisiro āgua, ahe rumo co mborocuaita mboyeroyasa sui tēi Tūpa rese yuvirecoi pota viña. Ahe evocoiyase ndoyavii oyeipi vahe “ita yepiapisa” rese yuvireco. <sup>33</sup> Aipo ehi tupri icuachiapri aracahendar pipe:

“Che amondo Sión ve ñepe ita yepiapisa, ahe oporoieiti vahe.

Acoi sese oyeroyá vahe rumo, nomochi ucai chietera oyesui” ehi Jesús recocuer upe.

## 10

<sup>1</sup> Che rivireta, che aipota che piha pipe ité iyavei ayerure Tūpa upe che mu judío recocuer rese ‘toñepisiro yuvireco’ che yapave. <sup>2</sup> Supi eté iquerēhi ité Tūpa upe mboraviqui apo āgua yuvireco viña. Oquerēhisa sui rumo oyavi senducuaēhisa pipe yuvireco. <sup>3</sup> Esepia, ndoicua potai mara ehi Tūpa ava pisi oyeupe. Sese oyesui tēi osecá güecocuer tupri pipe ‘tomoingatu Tūpa opiha yande pisi āgua’ ohesave yuvireco viña. Ipípe sui nomboyeroyai eté Tūpa remimbotar güeco mbocatupri āgua ité yuvireco. <sup>4</sup> Esepia, Cristo recocuer pipe imboaviyasa tupri Moisés porocuaita, “Peyavi mbahe che ñemoirosa pisi āgua” ehiēhi āgua Tūpa oyese oyeroya vahe upe.

<sup>5</sup> Co yande reco catupri āgua porocuaita pipe sui, Moisés aipo ehi icuachía: “Acoi ava omboaviye tupri vahe opacatu co mborocuaita, ipípe sui yuvirecovera” ehi. <sup>6</sup> Tūpa, “Peyavi mbahe che ñemoirosa pisi āgua” heēhi āgua rumo yande yeroyasa pipe, “Ava vo oyeupira ivave Tūpa Rembiporavo reroyi āgua” ndapeyei chira. <sup>7</sup> Iyavei, “Ava vo ogüeyira omano vahe pāhuve Tūpa Rembiporavo mboyeupi uca āgua” ndapeyei chiaveira. <sup>8</sup> ¿Mara peyera evocoiyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera. <sup>9</sup> “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipĩsiropri peicora. <sup>10</sup> Esepia, yande piha pipe yayeroya Jesús rese. Ahese Tūpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipĩsiropri yaicora.

<sup>11</sup> Esepia, icuachiapri aracahendar pipe Tūpa aipo ehi: “Acoi sese oyeroyá vahe rumo, nomochi ucai chietera oyesui” ehi. <sup>12</sup> Sese oyoya tupri judío ndahei vahe judío recocuer rese. Esepia, ñepeño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. <sup>13</sup> Esepia, icuachiapri aracahendar pipe aipo ehi: “Acoi opacatu osenoi vahe yande Yar rer, ipĩsiropri yuvirecoira” ehi. <sup>14</sup> Ava rumo ndoporandui chira pĩsirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduise yuvireco. Iyavei ndosendui chira ndipoise ñehesa mombehusar yuvireco chupe. <sup>15</sup> Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: “¡Aviye ai eté acoi ava güeru vahe ñehesa aviye vahe pĩsirosa resendar!” ehi.

<sup>16</sup> Ndahei rumo opacatu che mu judío viroya co ñehesa pĩsirosa resendar yuvireco. Isaías niha aipo ehi avei aracahe: “Che Yar, ¿uma pĩha viroya ore ñehe yuvireco?” ehi. <sup>17</sup> Sese yayeroya Jesucristo rese co ñehesa pĩsirosa rendusa pipe.

<sup>18</sup> ¿Osendu pĩha judío co ñehesa yuvireco? ¿Osendu ité! Esepia, aipo ehi avei acoi icuachiapri aracahendar pipe: “Sendusa niha opacatú ivi rupi iñehe” ehi.

<sup>19</sup> Iyavei, ¿osenducua pĩha yuvireco? ¿Osenducuaño ité! Esepia, yipindar Moisés omombehu icuachiapri pipe aipo ehi:

“Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

<sup>20</sup> Ipare omombehu tupri ité Isaías osiquiyeēhisave Tūpa ñehe aipo ehi vahe:

“Acoi ava ndache recaí vahe, ahe che pisi ité yuvireco.

Iyavei ayemboyecua acoi ava che rese ndoporandui vahe upe” ehi.

<sup>21</sup> Judío recocuer rese avei rumo aipo ehi: “Ari rupi añehe tēi ava che reroyasarēhi ndiporeroyai vahe upe vichico” ehi aracahe.

## 11

*Moviŕo tēi ava Israel pendar Tūpa oiporavo oyeupe nara*

<sup>1</sup> Evocoiyase, ¿omombo pĩha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamín suindar avei aico. <sup>2</sup> Yipisuive ité niha Tūpa, “Co ava cheundar ité” ehi ore ramoí israelita upe. Sese cūritei ndore momboí eté oyesui. Peicua niha acoi Elías resendar icuachiapri aracahendar oyerocuí tēise omu israelita rese aipo ehise Tūpa upe: <sup>3</sup> “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemí nde reroyasar. Che yuca potaño avei eté rumo yuvireco” ehi. <sup>4</sup> Tūpa rumo omboyeví chupe: “Aipeha rumo siete mil tupri ava che mboyeroyasar cheyeupe nara noñenopiñhai vahe Baal rahanga rovai yuvireco” ehi. <sup>5</sup> Ēgüe ehi avei cūritei opita viteño moviŕo judío, ahe niha Tūpa oiporavo oporoaisusa pipe. <sup>6</sup> Ipipe ité niha ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

<sup>7</sup> Evocoiyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae



upe rumo Tūpa omboavai catu viroya āgua. <sup>8</sup> Icuachiapri pīpe aipo ehi aracahe: “Tūpa nomboyecua uca iri mbahe secocuer pīpe. Cūritei ēgūe ehiñi vite ité yuvireco. Omondo tēi sesarā; ipīpe rumo ndosepia ucai mbahe chupe. Omondo tēi avei yapisaguā; ipīpe ndosenducua ucai mbahe chupe” ehi. <sup>9</sup> Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipīpe sui toyuviroha mbahe tēi pīpe yuvireco, toyemombaraisu uca avei ipīpe yuvireco.

<sup>10</sup> Toicua eme mbahe inungar ndasesapisoi vahe yuvireco.

Icuhapri nungar ayase toyuvirecoi apirēhi vahe rā” ehi.

*Ndahei vahe judío ñepisiro agüer*

<sup>11</sup> Evocoyase areco iri che porandusa pēu: ¿Apirēhi vahe rā ité pīha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo ēgūe ehi ava ndahei vahe judío pīsirosa pisi āgua yuvireco. Ipīpe sui oyemonguerēhi catura judío ipisi āgua yuvireco curi.

<sup>12</sup> Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

<sup>13</sup> Che rumo areco che ñehesa pēu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi. <sup>14</sup> Sendusa sui aviyeteramo oimera ipāhuve oyemonguerēhi vahe pīsirosa Tūpa suindar pisi āgua oyeupe nara yuvireco. <sup>15</sup> Esepia, judío mombosa pīpe sui Tūpa omoime ñerosa opacatu ava co ivi pīpendar upe. ¿Mara ehira pīha evocoyase Tūpa ipisise? Ahese oipisira tecovesa apirēhi vahe yuvireco, evocoyase ndoyuvireco iri chira omano vahe nungar Tūpa upe. <sup>16</sup> Esepia, yipindar panguā sui yapopri seropovēhese Tūpa upe, opacatu panvi evocoyase sovasapri avei ichui. Iyavei inungar ivira rapo seropovēhese Tūpa upe viña, sāca avei evocoyase opacatu ēgūe ehi aveira viña.

<sup>17</sup> Amove che mu judío inungar Olivo rāca yasiapri. Pe evocoyase ndahei vahe judío ivira caha pīpendar rāca nungar peico vahe, peso yasiapri rendagüerve, ipīpe sui peipisi vīracuasa pe recove āgua. <sup>18</sup> Aní chira rumo, “Yande aviye catu vahe yaico ivira rāca nungar yipindar yuvirecoi vahe sui” peye pe yeecomboivate aisa pīpe. Esepia, ndahei pe sui judío oipisi oyemoviracua āgua yuvireco, pe rumo yipindar ichui eté peipisi pe yemoviracua āgua.

<sup>19</sup> Iyavei, “Co judío rumo imombosa ité ivira rāca asiapri nungar yande sendagüerve yapita vahe rā” peye revo. <sup>20</sup> Supi eté, co rumo Tūpa reroyaēhi pīpe ahe imombosa ichui yuvireco, pe rumo seroya pīpe suiñi ité pepita sendagüerve. Sese peicua catu, aní chira peyemboivate ai ipīpe. <sup>21</sup> Esepia, Tūpa oiporavo co judío oyeupe nara ité viña, ndoviroyaise rumo, ndoipisii eté. Pēu avei ēgūe ehira ndapemboyeroyaise. <sup>22</sup> Peyapisaca tupri, Tūpa niha aviye vahe ité. Seco pīrata vahe avei rumo ava viroyaēhisar upe. Pēu rumo aviye ité. Peicoño catu iporoaisusa pīpe; aviyeteramo ndapeicoise supi, pe avei yasiapri nungar tēi peicora. <sup>23</sup> Opoipase rumo judío eta Cristo reroyaēhisa sui, Tūpa evocoyase viroyevi irira oyeupe nara. Esepia, chupe iya ité ipisi iri āgua. <sup>24</sup> Pe ndahei vahe judío ivira caha pīpendar rāca yasiapri nungar peico, Tūpa rumo pe mondo ivira aviye vahe nungar rese. ¡Evocoyase judío ete

ité inungar ahe ivira aviye vahe rāca yasiapri, ahe ivate catu oipisi irira oyeupe nara!

*Ipa vahe judío ñepisiro agüer*

<sup>25</sup> Che rivireta, che aipota, “Toicua Tüpa remimbotar icuapirēhi oyemboivate aiēhi āgua yuvireco” ahe pēu. Esepia, amove Tüpa judío upe omboavai viroya āgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pēu, <sup>26</sup> ahese ramo opacatu ava judío yuvirecoi vahe Tüpa oipisirora. Esepia, icuachiapri aracahendar pipe aipo ehi:

“Oura ava Pīsirosar judío recua Sión pāhu sui, ahe oipehara mbahe naporai vahe opacatu judío sui.

<sup>27</sup> Evocoi niha che remimbotar chupe nara, amocañise yangaipagüer yuvireco ichui” ehi.

<sup>28</sup> Ēgüe ehi cūrteitei judío eta ndosendu potai ñehesa pīsirosa re-sendar yuvireco. Sese Tüpa amotarēhisar yuvirecoi. Pēu mbahe tupri āgua rumo ēgüe ehi. Tüpa rumo osaisu vite. Esepia, yipive ité oiporavo tamoí eta oyeupe. <sup>29</sup> Supi eté, Tüpa ndoviroyevi iri eté mbahe güemimondo iyavei ndovirova-rova tēi vahe opihañemoñetasa güembiporavo sui. <sup>30</sup> Yipindar niha pe ndapemboyeroyai eté Tüpa. Cūrteitei rumo judío eta ndoviroyaise yuvireco, pe paraisuereco Tüpa. <sup>31</sup> Ēgüe ehi avei judío eta cūrteitei ndoviroyai yuvireco. Tüpa pe paraisuereco uca āgua rumo ēgüe ehi yuvireco. Coiye inungar pe, judío avei osupitira Tüpa poroparaisuerecosa yuvireco. <sup>32</sup> Esepia, Tüpa ité, “Opacatu oyavi mbahe che reroyaēhisa pipe” ehi ‘oicuase mbahe güembiavi, tiquerēhi opacatu che poroparaisuerecosa pisi āgua yuvireco’ oya.

<sup>33</sup> ¿Mara ehi rutei Tüpa aracuasa, imbahecuaasa avei? Ndipoi chitera que ava yaracuasa mombehu tupri āgua. Ndayaicatui avei secocuer cuapa tupri āgua. <sup>34</sup> Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no. <sup>35</sup> Ndipoi que ava mbahe omondo vahe yande Yar upe ‘tomboyevi cheu’ ohesave. <sup>36</sup> Esepia, Tüpa suiño ité niha opacatu mbahe oime, oyeupe nara avei mbahe oyapo opiratasa pipe. ¡Sese imboeteipri ité Tüpa tasecoi yepil! Ēgüe tehi apirēhi.

## 12

*Yande recocuer imondopri Tüpa upe nara*

<sup>1</sup> Sese che rivireta, che Tüpa poroparaisuerecosa pipe aipota pe yemondo ité pe recovesave chupe nara, inungar mbahe Tüpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vaherā chupe. <sup>2</sup> Peico iri eme co ivi pipendar pihañemoñetasa tēi rupi. Iyacatu rumo pesecuñaro pe pihañemoñetasa. Ipipe sui opacatu pe recocuer oñecuñarora. Ēgüe peyese, peicuara Tüpa remimbotar ahe mbahe aviye vahe, semimbotar supi tupri vahe ité.

<sup>3</sup> Tüpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyeseendar Tüpa pēu mbahe imbougüer rupi sese pe yeroyasa pipe. <sup>4</sup> Inungar yande rete ñepeño ité, sesendar rumo setá, iyavei ndahoyoyai mbahe sembiapo. <sup>5</sup> Ēgüe yahe avei yande,

yepe que yande retara viña, Cristo rese yayemboyase rumo, ñepeí vahe nungar yaico. Evocoyase yande ñepeí-peí opacatu upendar yaico.

<sup>6</sup> Tūpa niha omboyeavirati mbahecuasa imbou oporoaisusa pipe ñepeí-peí upe. Evocoyase Tūpa ombouse oñehe mombehu água yandeu, yamombehura ñepeí-peí iñehe sese yande yeryogüer rupi. <sup>7</sup> Que ombouse mbahecuasa ambuae ava pítivii água yandeu, yaipítivii tupri aveira. Ombouse yande porombohe água, yaporombohe tupriño itera. <sup>8</sup> Iyavei ombouse yandeu ambuae ava monguerēhi água, yaporomonguerēhiño itera. Ombouse yande poropítivii água ava mbahe ndovirecoi vahe upe, yamondoño itera mbahe chupe yande recatēhiēhisave. Acoi oporocuai vahe, toyapoño oquerēhisa pipe; iparaisu vahe pítiviisar, toipítiviño avei vorivetesa pipe.

### *Cristo reroyasar cuaita*

<sup>9</sup> Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe. <sup>10</sup> Peyeaisu catu ñepeí-peí oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

<sup>11</sup> Peyemonguerēhi, aní ndapequerēhii chira iyavei peyapo yande Yar upe mbahe opacatu pe recoete pipe.

<sup>12</sup> Peicoño pe viharetasave mbahe iva péndar rārosa pipe; peñemosañó mbahe rasicuer peiporarase iyavei aní chira peseya pe yeruresa yepi.

<sup>13</sup> Peipítivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

<sup>14</sup> Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

<sup>15</sup> Peyemboiha acoi ava oyemboiha vahe rupive; peyaseho avei ava oyaseho vahe rupive.

<sup>16</sup> Peico tupri oyoya guasu ñepeí-peí oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori água. Aní peñemoha imbahecuava vahe nungar.

<sup>17</sup> Aní pēu mbahe tēi aposar upe pemboeyira mbahe tēi avei. Peyapo catu mbahe tupri opacatu ava rembiepiave. <sup>18</sup> Peicatu vahe rupi peseca pe reco tupri água opacatu ava upe. <sup>19</sup> Che rivireta, aní pe ae pemboeyi mbahe tēi pipe pe rereco momarasar upe. Peseyaño Tūpa upe. Ahe oicuara chupe. Esepia, icuachiapri pipe aipo ehi: “Che ité aicuara ava mbahe tēi aposar upe. Che amboepira” ehi yande Yar. <sup>20</sup> Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochīra pe sui” ehi. <sup>21</sup> Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

## 13

<sup>1</sup> Opacatu mborerecurar yuvirecoi vahe pemboyeroyara. Esepia, ndipoi mborerecurar ndovirecoi vahe ocuaita Tūpa suindar. Co oime vahe rumo semimbou ité. <sup>2</sup> Sese acoi mborerecurar upe que mara ehi vahe, Tūpa porocuita reroyaēhisar yuvirecoi. Ēgüe ehi vahe inupambri yuvirecoira. <sup>3</sup> Esepia, mborerecurar yuvirecoi vahe ndahei ava seco tupri vahe mbosiquiye água yuvirecoi, ahe rumo yuvirecoi ava mbahe tēi aposar mbosiquiye água. Ndayasiquiye potaise mborerecurar sui,

iya yaicora mbahe tupri pipe. Mborerecuar evocoiyase, “Aviye” ehira yande reco catupriisa rese yandeu. <sup>4</sup>Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahese mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco. <sup>5</sup>Sese iya yamboyeroya ité mborerecuar; ndahei rumo ahe yande nupaēhi āgua reseño, yande pihañemoñetasa momaraēhi āgua rese avei. <sup>6</sup>Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tūpa rembiguai yuvirecoi. Evocoiyase aheño ité iporaviquisa yuvireco.

<sup>7</sup>Yamondo ñepeipei ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

<sup>8</sup>Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuita. <sup>9</sup>Aipo ehi acoi Tūpa porocuita: “Ndapeyemboaguasai chira, ndapeporoyucaí chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuita sendusa tupri ité co ambuae ñehesa rese: “Pesaisu ava pe yeaisu nungar” ehi. <sup>10</sup>Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuita.

<sup>11</sup>Iyavei peicua tupri co mbahe oime vahe yandeu. Cūritei ari osupiti ité yandeu yande yemopoase āgua. Esepia, yande Yar yevi āgua cōimi catu yandeu iñehengagüer yipindar seroyasa sui. <sup>12</sup>Supi eté osupiti senimi ari yandeu; sese iyacatu yapoi pitumimbi vahe nungar mbahe-mbahe tēi aposa sui mbahe icatupri vahe pipe yande reco āgua. Evocoiyase tayaico sundao oyoepisa omonde vahe nungar. <sup>13</sup>Yande catu yaguata yande reco ñvi tupriisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no. <sup>14</sup>Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo āgua yande remimbotarai pipe.

## 14

### *Aní peroñero ambuae Jesús reroyasar*

<sup>1</sup>Acoi ava ndoyeroya tupri vitei vahe yande Yar rese que oiquese pe piri, peipisi tupriira; aní peñehepoepira ipihañemoñetasa ndahoyoyaise pe pihañemoñeta rese. <sup>2</sup>Esepia, amove evocoi nungar ava ihupri pāve tēi yuvirohu, oime rumo amove ava ipihañemoñeta opacatu mbahe hu āgua rese. <sup>3</sup>Acoi ava opacatu mbahe ohu vahe, toviroñero eme amove ndohui vahe mbahe iyavei acoi amove ndohui vahe mbahe, toviroñero eme acoi ohu vahe opacatu mbahe. Esepia, evocoi nungar ava Tūpa oipisi ité. <sup>4</sup>Supi eté pe ndiyai eté peroñero vaherā ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, serecuar ité oicuara chupe. Esepia, yande Yar opñratasa pipe osecomoingatuño itera.

<sup>5</sup> Oime avei amove ava ñepeí ari omboeteí catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepeí-peí opihañemoñeta rupi, “Co supi tupri vahe” ehira opiha pipe yuvireco. <sup>6</sup> Acoi que ñepeí ari ava omboeteí vahe, yande Yar mboeteisa pipe rumo ãgüe ehi. Iyavei ohu vahe opacatu mbahe, Yar mboeteisave avei ãgüe ehi. Esepia, ahe güembiapo rese, “Aviye ndeu” ehi Tüpa upe; iyavei acoi amove ndohui vahe mbahe, Yar mboeteisave ãgüe ehi, iyavei, “Aviye ndeu” ehi avei Tüpa upe.

<sup>7</sup> Esepia, yande ñepeí-peí ndayaicoi yandeyeupe nara tõi, ndayamanoí avei yandeyeupe nara. <sup>8</sup> Esepia, yaicove vïtese, yaico yande Yar upe nara; yamanose, yamano yande Yar upe nara avei. ãgüe yahe yande yaicove vïtese, anise yamanose, opacatu chupe nara ité yaico. <sup>9</sup> Sese niha Cristo omano, ipare ocuerayevi opacatu ava Yar güeco ãgua que omano vahe, anise que oicove vite vahe upe avei.

<sup>10</sup> ¿Mahera evocoyase peroïro pe mboetasa Cristo reroyasar iyavei mahera ndapesepia potai? Esepia, supi eté niha yande opacatu yasora Tüpa rovai. Ahe evocoyase opara oporandu yande recocuer rese yandeu. <sup>11</sup> Esepia, icuachiapri aracahendar pipe omombehu: “Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

<sup>12</sup> Evocoyase yande ñepeí-peí yamombehura yande recocuer Tüpa upe.

*Aní pe rivireta mbahe tõi pipe pereco uca*

<sup>13</sup> Sese yande ndiyai yañeroiro. Iyacatu rumo ñepeí reseve pereco tupri ambuae pe rivri, angaipá pipe sereco ucañhi ãgua, iyeroyasa momarañhi ãgua avei. <sup>14</sup> Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe tõi co tembihu, ndiyai yahu” ehise, ahe chupe evocoyase mbahe tõi, ndiyai eté ihu ãgua. <sup>15</sup> Iyavei yande que mbahe yahuse, ipipe yamomara tõeise yande rivri pihañemoñetasa Tüpa rese, ndahei evocoyase yande poroaisusa pipe ité ãgüe yahe. ¡Aní ahe yamocañi tõi uca Cristo sui evocoi nungar mbahe yahu vahesa pipe! Esepia, secocuer rese Cristo omano. <sup>16</sup> Yepe que mbahe aviýera yandeu viña, ndayayapoi chira rumo evocoi nungar yande rembiapo rese ava ñehe-ñehe tõiñhi ãgua. <sup>17</sup> Esepia, ndahei ivate catu vahe Tüpa upe yande carusa, yande igua avei ipovrive yande recose. ãgüe ehi rumo co ivate catu vahe chupe yande recocuer mohivisa, yande reco tuprisa ambuae Tüpa reroyasar pâhuve iyavei yande rorivetesá yareco vahe Espiritu Santo sui. <sup>18</sup> ãgüe yahese Cristo mboeteisave, aviye aira Tüpa upe iyavei opacatu ava rembiepiave avei no.

<sup>19</sup> Sese opacatu yande recoeté pipe yasecara yaico tupri vaherã yandeyeupe. Ipipe sui yande yaicatura yañepitivií yande yemoviracua tupri ãgua yande Yar rese. <sup>20</sup> Aní pemocañi uca tõi ava recocuer Tüpa remipisiro tembihu sui tõi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara ãgua. <sup>21</sup> Aviye catu ndayahuisse mbahe roho, que ndayahuisse uva ricuer iyavei que ambuae mbahe ndayayapoise, ambuae ava Cristo reroyasar angaipá pipe seiti uca iriñhi ãgua. <sup>22</sup> Yande pihañemoñetasa yareco vahe rumo yarecoño itera yandeyeupe ité Tüpa rovaque. ¡Aviye ai catuño ité ava acoi, “Aviye yayapose evocoi nungar

mbahe” he pare, “¿Mara ehi pīha?” ndehi irise opīhañemoñetasa pipe!<sup>23</sup> Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoiyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi vitese que mbahe upe, ipare oyapose ité, ahe angaipa.

## 15

*Yambovihara ava yande cotindar, ndahei chira yande ae tēi yayembovihara*

<sup>1</sup> Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipīhañemoñeta tupri vitei vahe rese. Ndahei chira rumo yande ae tēi yayemboviha.<sup>2</sup> Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opīhañemoñeta pipe Tūpa rese yuvireco’ yande yapave. <sup>3</sup> Esepia, Cristo ndahei ahe ae oyemohapisi, ahe rumo oyapo mbahe, icuachiapri mombhusa rupi tupri ité acoi omombehu vahe: “Nde rese ñehe-ñehe tēi opa aipisi” ehi. <sup>4</sup> Supi eté co opacatu omombehu vahe aracahe opa icuachiasa yande mbohe āgua, yande yasāro vaheṛā Tūpa reco porañetesa yande ñemosasa pipe iyavei yande pīhamonguerēhisa pipe avei ahe yareco vahe ichuindar. <sup>5</sup> Tūpa, acoi ombou vahe yande ñemosasa, yande pīhamonguerēhisa avei yandeu, tape pītivii oyoya guasu pe reco tupri āgua ñepeī-peī peyese Jesucristo recocuer rupi. <sup>6</sup> Ipipe sui pe opacatu oyoya guasu ñepeī pe pīhanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

*Ñehesa pīsirosa resendar imombhusa ava eta ndahei vahe judío upe*

<sup>7</sup> Peyepisi tupri ñepeī-peī, inungar Cristo pe pisi tupri oyeupe nara Vu mboetei āgua. <sup>8</sup> Che rumo aipo ahe pēu: Jesucristo ou judío pītivii Tūpa remimombhugüer mboaviye āgua judío ramoī aracahendar upe. Ēgüe ehi Tūpa oñehe mboaviyesa mboyecua<sup>9</sup> ‘tomboetei ava ndahei vahe judío yuvirecoi vahe che Ru Tūpa iporoparaisuerecosa rese yuvireco’ oyapave. Ahe ēgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pipe” ehi.

<sup>10</sup> Iyavei acoi ambuae icuachiapri pipe omombehu avei no:

“¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

<sup>11</sup> Ambuae pipe avei aipo ehi no:

“Pe opacatu ivi pīpendar ava, ¡pembotei yande Yar!” ehi.

<sup>12</sup> Isaías avei aipo ehi icuachía:

“Oimera niha ava Isaí suindar, opacatu ava rerecuarā secoira.

Ava ndahei vahe judío seseño ité oyeroyara yuvireco” ehi.

<sup>13</sup> Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tupri tayareco sese yeroyasa pipe. Ipipe sui tombou yasāro vaheṛā ahe mbahe aviye vahe Espiritu Santo pīratasa pipe.

<sup>14</sup> Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepeī-peī peyeupe pe yemboaracua āgua.

<sup>15</sup> Co tecocuer rese rumo aicuachía opacatu che siquiyeēhisa pipe pēu

pe resaraiēhi āgua ichui. Esepia, ayapo Tūpa che cuaita ombou vahe che raisusa pīpe cheu <sup>16</sup> Jesucristo rese che poraviqui āgua ava ndahei vahe judío recocuer aviye āgua. Evocoyase judío pahī nungar che cuaisa pīpe amombehu co ñehesa Tūpa ombou vahe pīsīrosa resendar yuvireco chupe imoporēhi āgua Tūpa rovai inungar vahe seropovēhepri aviye vahe Tūpa upe Espīritu Santo pīpe yepi.

<sup>17</sup> Supi eté che Jesucristo reroyasar che recosa pīpe aviharete Tūpa che cuaita rese. <sup>18</sup> Esepia, cheu ndiyai añehe vaheṛā que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaheṛā. Esepia, amonguerēhi Tūpa reroya āgua yuvireco che ñehe rese, che rembiapo sui avei. <sup>19</sup> Ēgüe ahe poromondiisa mbahe yavai vahe apo Tūpa pīratasa pīpe. Ahe ayapo Espīritu Tūpa suindar pīratasa pīpe. Ipīpe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. <sup>20</sup> Chequerēhi avei co ñehesa pīsīrosa resendar mombehu āgua ava Cristo recocuer ndosendui vahe upe yepi. Ndahei rumo ambuae ava imboaracua pare tēi, <sup>21</sup> che rumo ayapo inungar icuachiapri pīpe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

*Pablo ipihañemoñeta Roma ve oso āgua*

<sup>22</sup> Co rese tēi che ndaicutui aso pe pīri, yepe setá rupi aso pota tēi viña. <sup>23</sup> Cūritei rumo opa amboaviye che poraviqui co ivi rupi, iyavei opa tēi setá araviter pe pīri che sosa rāgüer. <sup>24</sup> España ve che soseve, apita pucumira vicho pe pīri yande yemboviha āgua. Iyavei pe sui che sē potase, che pītivimira peye aheve che so āgua. <sup>25</sup> Cūritei rumo che asora Jerusalén ve. Arasora porerecosa ahe pendar yande mboetasa Jesús reroyasar pītivii āgua. <sup>26</sup> Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pītivii āgua yuvireco. <sup>27</sup> Ahe ēgüe ehi güemimbotar rupi yuvireco iyavei iya ité imboyevi āgua yuvireco chupe ahe mbahe tupri oyeupe apo agüer rese. Esepia, yipindar Jesús reroyasar judío yuvirecoi vahe oicua uca co tecocuer Tūpa suindar ahe ava ndahei vahe judío yuvirecoi vahe upe. Sese iya ité imboyevi āgua co ivi pipendar porerecosa chupe. <sup>28</sup> Opase che co porerecosa amondo yuvireco chupe, España ve che sose, ahesa apitara vicho pe pīri. <sup>29</sup> Che amoha voi eté asose eipeve, tuvichá omboura Cristo oporovasasa yandeu.

<sup>30</sup> Che rivireta, yande Yar Jesucristo rer pīpe iyavei yeaisusa Espīritu ombou vahe pīpe avei aporandu pēu opacatu che rese peyeroqui pīrata vaheṛā Tūpa upe che pītivii āgua co mboraviqui rese. <sup>31</sup> Peporandu Tūpa upe, tache repi ava Jesús reroyasarēhi sui ivi Judea ve, iyavei Jerusalén pendar yande rivireta co porerecosa pīsī tupri āgua avei. <sup>32</sup> Ahese Tūpa oipotase, che aviharetera ayepotase pe repia, iyavei toime pituhusa yandeu che pe pīri che sose. <sup>33</sup> Ēgüe tehi Tūpa güeco tupriisa pīpe tasecoi opacatu pe rese.

## 16

*Pablo mahenduhasa ñepeipei ava upe*

<sup>1</sup> Co yande reindri Febe serer vahe, ahe oipitivi tecua Cencrea pendar Cristo reroyasar oico. <sup>2</sup> Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipitiviño que mbahe chupe ipane vahe rese. Esepia, ahe setá ité oporopitivi iyavei che avei eté che pitivi no.

<sup>3</sup> Pemombehu che mahenduha Prisca upe, Aquila upe avei, ahe niha che pitivi mboraviqui Jesucristo recocuer resendar rese yuvireco. <sup>4</sup> Ahe avei niha mbahe tēi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. <sup>5</sup> Pemombehu avei che mahenduha sêtave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. <sup>6</sup> Pemombehu avei che mahenduha María upe. Ahe niha oporaviqui iteanga vahe pe recocuer rese. <sup>7</sup> Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroa yuvirecoi, ahe rane avei yipindar Cristo reroyasar yuvirecoi che sui.

<sup>8</sup> Pemombehu avei che mahenduha che rembiaisu Ampliato upe yande Yar rese secosa pipe. <sup>9</sup> Pemombehu avei che mahenduha Urbano upe. Ahe niha yande ndugüer oporaviqui vahe Cristo recocuer rese, che mboripar Estaquis upe avei. <sup>10</sup> Pemombehu avei che mahenduha Apeles upe. Ahe niha güecoñhasa sui osê tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rêta pipendar yuvirecoi vahe upe avei. <sup>11</sup> Pemombehu avei che mahenduha che mu Herodión upe, ava Narciso rêta pipendar yande Yar reroyasar upe avei. <sup>12</sup> Pemombehu avei che mahenduha Trifena upe iyavei Trifosa upe. Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara. <sup>13</sup> Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. <sup>14</sup> Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. <sup>15</sup> Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpás upe, opacatu yande rivri yande Yar rese yuvirecoi vahe ipirindar upe avei.

<sup>16</sup> Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohava omondo avei omahenduhasa yuvireco pēu.

<sup>17</sup> Che rivireta, peicua catu pe pāhu pendar omboyaho pota serai vahe sui. Oime ava ěgüe ehi vahe, oiti uca vahe ava mbahe tēi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera. <sup>18</sup> Esepia, ahe ava ndahei yande Yar Jesucristo upe nara oyapo mbahe yuvireco. ěgüe ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tupri vahe; oñehe tupri ai angahu oporomohapisi aisa pipe tēi yuvireco. <sup>19</sup> Opacatu ité icuasa pe poreroyasa. Sese che aviharete vichico. Che rumo aipota pemboyecua vaherã pe mbahecuasa mbahe aviye vahe apo āgua, ndahei mbahe tēi apo āgua. <sup>20</sup> Evocoiyase Tūpa güeco



tupriŕisa pipe pihaivi Carugar osecopiŕa tupri itera. Pe avei evocoyase pesecoreroyira. Yande Yar Jesucristo tape rovasa.

<sup>21</sup> Omondo avei omahenduhasa Timoteo pẽu. Ahe che pĩtivi che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

<sup>22</sup> Che, Tercio, aicuachía vahe co ñehesa pẽu, che avei che mahenduhasa amondo yande Yar reroyasa pipe pẽu.

<sup>23</sup> Omondo avei omahenduhasa Gayo pẽu. Ahe sètave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pẽu, ahe tecua mbahe guarepochi apocatusar. Yande rivri Cuarto avei omondo omahenduhasa pẽu.

<sup>24</sup> Aviye, yande Yar Jesucristo tape rovasa opacatu.

*Pablo omboetei Tũpa*

<sup>25</sup> ¡Yamboetei Tũpa! Ahe niha oicatu pe moviracua co ñehesa ñepisirosa resendar amombehua vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tũpa omboyecua ramo vahe cheu co ivi apoẽhi suive mbahe ndicuasai vahe rese. <sup>26</sup> Cũritei rumo oyecua uca oñehe mombehusar rembicuachía pipe Tũpa apirẽhi vahe porocuita rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

<sup>27</sup> ¡Tũpa güeraño imbahecuá vahe yepi, ãgüe tehi ahe yande Yar Jesucristo rer pipe imboeteipri tasecoi!

## YIPĪNDAR PABLO REMBICUACHIA CORINTO PENDAR UPE CORINTIOS

*Pablo mahenduhasa Jesús reroyasar Corinto pendar upe*

<sup>1</sup> Che Pablo, yande rivri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco água. <sup>2</sup> Aicuachía co che ñehe pëu, pe Jesús reroyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri água, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. <sup>3</sup> Yande Ru Tüpa, yande Yar Jesucristo tape rovasa pe reco tupri água.

*Jesucristo suindar porovasasa seroyasar upe*

<sup>4</sup> Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose. <sup>5</sup> Ëgüe ehi secocuer pipe sui Tüpa ombou opacatu pe reco tupri catu água, pemombehu tupri vaheñā imbahecuasa, opacatu mbahe supi eté vahe cua tupri água avei. <sup>6</sup> Esepia niha, ore co ñehesa Jesucristo resendar pëu imombehusa pipe sui pe recuñaro uca ité. <sup>7</sup> Sese ndipoi eté que porovasasa Tüpa Espiritu suindar ipane vahe pëu yande Yar Jesucristo yevi água pesārose. <sup>8</sup> Tüpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave. <sup>9</sup> Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco água.

*Jesús reroyasar pihanemoñetasa ndahoyoyai vahe resendar*

<sup>10-11</sup> Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoñeroiro yuvireco oyeupe ae” ehi. Sese aipo ahe pëu: pemboyoya catu pe pihanemoñetasa, ndapeyemboyahoi chira peyesui. Peico catu pe yeaisusa pipe. Ichui tahoyoya pe pihanemoñetasa, tahoyoya avei mbahe pe remimbotar. <sup>12</sup> Supi eté amove aipo, “Ore Pablo rupindar oroico” peye tēi; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tēi aipo peico. <sup>13</sup> ¡Cristo rumo vireco porombohesa ndoyaho-yaho tēi vahe! ¿Che tie amano curusu rese pe angaipa repirā? anise, ¿che rer pipe tie peñeapiramo uca peico? <sup>14</sup> ¡Aviye Tüpa upe che ndopoāpiramoise! Crispo iyavei Gayo, ahe güeraño rumo añapiramo yuvireco cuese. <sup>15</sup> Sese ndipoi chira “serer pipe ñapiramosa” ehi vahe yuvireco cheu. <sup>16</sup> Estéfnas rēta pendar avei añapiramo yuvireco, ipare ndipo iri revo ambuae ava añapiramo vahecuer. <sup>17</sup> Cristo niha nomombehui che poroāpiramo água. Ëgüe ehi rumo che cuaita ñehesa ñepisirosa resendar mombehu água tēi. Iyavei ndahei ñehesa yavai catu vahe aiporu. Esepia, nañomi potai eté que chíhi co ñehesa pīratagüer Jesucristo curusu rese imano agüer resendar ava sui.

*Cristo Tüpa pīratasa, imbahecuasa avei*

<sup>18</sup> Esepia, acoi ava ocañi tēi vaherã upe co ñehesa curusu rese Cristo manosa resendar aviye ãgüe ehi tēi vahe viña. Yande ipĩsiropri yaico vaherã upe rumo co ñehesa vireco ité Tũpa pĩratasa, <sup>19</sup> inungar Isaías rembicuachiagüer pipe aipo ehi:

“Amocañira co ivi pipendar ava tēi mbahecuasa iyavei arocuara ava yaracua vai tēi vahe sui yaracuasa” ehi.

<sup>20</sup> ¿Mara ehi evocoyase co ivi pipendar ava imbahecua vai vahe, ava-ava tēi aracuasa cuapar avei, iyavei ñehe cua tupri ai vahe co ivi pipendar mbahe rese yuvireco? ¡Tũpa niha osecuñaro evocoi nungar mbahecuasa ãgüe ehi tēi vahe pipe! <sup>21</sup> ãgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ãgüe ehi tēi vahe” ehi tēi ava yuvireco chupe viña, Tũpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

<sup>22</sup> Che mu judío osepia pota tēi mbahe poromondiisa ipĩratá vahe iva pendar yuvireco. Griego evocoyase osendu pota tēi ñehesa aracuasa resendar yuvireco no. <sup>23</sup> Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye acoi ãgüe ehi tēi vahe yuvireco chupe. <sup>24</sup> Yande rumo, Tũpa rembiporavo yaico vahe, que judío, anise que griego avei, yandeu co ñehesa Tũpa Rembiporavo Cristo resendar Tũpa pĩratasa ité, imbahecuasa avei. <sup>25</sup> Esepia niha, ava upe, Tũpa suindar mbahe aviye acoi ãgüe ehi tēi vahe viña. Co Tũpa suindar rumo mbahecuasa aviye catu vahe ité ava tēi mbahecuasa sui iyavei acoi mbahe Tũpa suindar aviye nipiratai vahe ava upe viña, ahe rumo ipĩrata catu ité opacatu ava tēi pĩratasa sui. <sup>26</sup> Che rivireta, peyemomahenduha catu co rese: Tũpa pe poravo, yepe pe pãhu pendar ndasetaimi imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no. <sup>27</sup> Evocoi ava, “Ndoicuai vahe mbahe yuvireco” ehi yuvireco pëu viña. Tũpa rumo pe poravo evocoi ava imbahecua vai vahe mochi ãgua. Iyavei oiporavo ava pe pãhu pendar ndoicatu tuprii vahe yuvireco ava ipĩrata vahe Tũpa cuaparëhi mochi ãgua. <sup>28</sup> Oiporavo avei co ivi pipe ava remieroïro seco mbegüemi vahe, ava seco ivi coti catu vahe pe pãhu pendar co ava seco ivaté vahe reroyi ãgua <sup>29</sup> ‘toyemboivate ai eme que ava che rovaque yuvireco’ oya. <sup>30</sup> Tũpa ité rumo yande mboyemboya Guahir Jesucristo rese, ahe avei ombou Guahir yande mboaracua ãgua, yande reco mohivi ãgua avei ‘toyuvirecoi cheu nara’ ohesave iyavei ‘ipĩsiropri toyuvirecoi’ oya yandeu. <sup>31</sup> Sese inungar aipo ehi ñehesa icuachiapri aracahendar pipe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

## 2

*Pablo omombehu curusu rese Cristo mano agüer*

<sup>1</sup> Iyavei, che rivireta, che asose cuese, añehese pëu Tũpa suindar ñehesa supi eté vahe yipindar ndicuasai vahe pipe, nañehei co ivi pipendar tēi ava mbahecuasa pipe, ñehesa ivate ai vahe pipe avei. <sup>2</sup> Esepia, acoi aicose pe pãhuvē cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico. <sup>3</sup> Iyavei ndachepĩratai, aririñ avei che siquiypave pëu che sose.

<sup>4</sup> Iyavei acoi añehese ñehesa pĩsirosa resendar rese pẽu, ndaiporui eté rumo ñehesa ivate ai vahe pe pĩhañemoñetasa rerova ãgua. Che rumo Tũpa Espĩritu pĩratasa pipe añehese pẽu <sup>5</sup> ‘toyeroya catu Tũpa pĩratasa rese yuvireco’ che yapave pe yeroyaẽhi ãgua ava tẽi mbahecuasa rese.

*Tũpa oEspĩritu pipe oicua uca mbahe yandeu*

<sup>6</sup> Ore rumo oromombehuño ité aracuasa pẽu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tẽi, ndahei avei ava mborerecuar co ivi pipendar tẽi aracuasa nungar. Esepia, ahe imborerecuasa ocañi tẽi vaheã. <sup>7</sup> Oroñehese catu aracuasa Tũpa suindar ndicuasai vahe rese, ahe yipive vireco vahe ivi apoẽhi viteseve, ahe co omboyecua ramo vahe yandeu yaico vaheã teco ori apirẽhi vahesave. <sup>8</sup> Co ivi pipendar ava mborerecuareta rumo ndosenducuai eté co ñehesa. Osenducua rese rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña. <sup>9</sup> Icuachiapri aracahendar pipe aipo ehi:

“Tũpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetami eté sese yuvireco no” ehi aracahe.

<sup>10</sup> Tũpa rumo oicua uca Espĩritu pipe yandeu cute. Esepia, Espĩritu oicua tupri catu ité opacatu secocuer oico.

<sup>11</sup> Ëgũe ehi eté, inungar opacatu ava pãhuve ndipoi eté que ñepeĩ ava pĩhañemoñetasa oicua vahe, iespĩritu güeraño ité oicua mbahe oime vahe ipiha pipe. Ëgũe ehi avei Tũpa Espĩritu güeraño ité oicua Tũpa pĩhañemoñetasa. <sup>12</sup> Yande evocoyase ndahei co ivi pipendar tẽi espĩritu yaipisi, Ëgũe ehi rumo Espĩritu Tũpa suindar yaipisi yaicua vaheã iporerocosa oporoaisusa pipe ombou vahe yandeu. <sup>13</sup> Ahe niha oromombehu Tũpa Espĩritu ore mbohe vahe, ndahei ñehesa ava tẽi aracuasa sui. Ëgũe orohe co supi eté vahe ñehesa Espĩritu suindar oromombehu Espĩritu rese yuvirecoi vahe upe yepi.

<sup>14</sup> Acoi ava ndovirecoi vahe rumo Tũpa Espĩritu opiha pipe, ndoipisi eté mbahe Tũpa Espĩritu suindar yuvireco. Esepia, chupe evocoi mbahe aviye Ëgũe ehi tẽi vahe, iyavei ndosenducua catui eté yuvireco. Esepia, evocoi nungar mbahe senducua Espĩritu pipeño ité. <sup>15</sup> Acoi ava vireco vahe rumo Tũpa Espĩritu opiha pipe oicatu opacatu mbahe cua ãgua. Ndipoi chira rumo ambuae ava ndovirecoi vahe Espĩritu opiha pipe ahe ava recocuer cua tupri ãgua. <sup>16</sup> Esepia, icuachiapri aracahendar pipe aipo ehi: “¿Ava vo oicua tẽira yande Yar pĩhañemoñetasa viña? ¿Ava vo ombohe tẽira viña?” ehi. Yande rumo yareco yande Yar Cristo pĩhañemoñetasa.

### 3

*Pablo iyavei Apolos Tũpa upe oporaviqui vahe yuvirecoi*

<sup>1</sup> Che rivireta, ndapeguata tupri Espĩritu reroyasa pipe; pe rumo peguataño vite ava tẽi pĩhañemoñetasa rupi peico. Sese namombehu catui ñehesa yavai vahe Espĩritu suindar pẽu. Esepia, pe pĩtanimi nungar vite tẽi pe pĩhañemoñetasa Cristo rese. <sup>2</sup> Sese che opombohe mbahe ndayavaimi vahe rese. Esepia, pĩtanimi ndoicatu viteĩ ocaru. Sese ocambu viteño tẽi. Cũritei rumo Ëgũe peye vite ité. Esepia, pe ndapesenducua catu viteĩ eté Tũpa Ñehengagũer yavai vahe. <sup>3</sup> Peguata viteño co ivi pipendar

pihañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoyase peyapo ava ndoicuai vahe Tūpa rembiapo nungar. <sup>4</sup>Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pāhuve inungar ava Tūpa ndoicuai vahe pihañemoñetasa.

<sup>5</sup> Pesendu che ñehe: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepe-pe mboraviqui yandeu chupe yayapo vahe rā. Tūpa upe ore poraviquisa pipe sui niha peroya yande Yar peico: <sup>6</sup> che rane inungar añoti vahe mbahe rāhi pe piha pipe; Apolos evocoyase inungar imboihusar; Tūpa rumo inungar omboori vahe pēu. <sup>7</sup> Evocoyase ndiyai peyeroya mbahe tīsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco. <sup>8</sup> Ore rumo oyoya tupri oroyapo mbahe pēu nara. Sese ñepe-pe Tūpa omboura porerecosa pe rese ore poraviquigüer rupi oreu. <sup>9</sup> Ore oroporaviqui vahe Tūpa upe. Pe evocoyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico. <sup>10-12</sup> Che inungar oi apo cuapar oyapo rane vahe oi vīracua āgua, ēgüe ahe imombehu Cristo resendar ñehesa pēu seroya tupri āgua. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoyase inungar oi aposar omopuha vahe ivīracuasa harive, ēgüe ehi ahe pe monguerēhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopii vahe mbahe que ivirape tēi, capih, anise tacuar tēi oiguā yuvireco. Ēgüe ehi aveira pe mbohesar yuvireco. Ahe ñepe-pe rumo iya oicua tuprira pe mbohe āgua yuvireco. <sup>13</sup> Ahe iporaviqui agüer rumo ari cañise icuasa tuprira ñepe-pe yuvireco. Esepia, ahe ari pipe yande Yar oura tata reseve ñepe-pe pe mbohesar poraviqui agüer cua āgua. <sup>14</sup> Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri; <sup>15</sup> ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sāira tata guasu sui.

<sup>16</sup> ¿Ndapeicuai vo pe yande Jesús reroyasar Tūpa rēta nungar yaico? IEspiritu niha secoi eté yande piha pipe. <sup>17</sup> Oimese que ava yande pāhuve omomara vahe Tūpa rēta, Tūpa evocoyase omboura oñemoirosa ahe ava upe. Esepia, Tūpa rēta nimarai vahe ité, yande teieté niha Tūpa rēta yaico.

<sup>18</sup> Peyembopa eme catu pe ae. Oimese que pe pāhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua āgua. <sup>19</sup> Esepia, ava tēi aracuasa Tūpa upe ēgüe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tūpa upe yuvireco” ehi. <sup>20</sup> Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ēgüe ehi tēi vahe” ehi. <sup>21</sup> Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ité: <sup>22</sup> Ēgüe ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vahe rā, ahe niha opacatu pēu nara, <sup>23</sup> pe niha Cristo upendar, Cristo evocoyase Tūpa upendar secoi.

## 4

*Apóstol yuvirecoi vahe poraviqui agüer*

<sup>1</sup> Iya aipo peye: “Co mbia Cristo povri pendar yuvirecoi, icuaita ité niha Tüpa suindar ñehesa oyecua ramo vahe rese iporombohe água” peyera oreu viña. <sup>2</sup> Acoi vireco vahe ocuaitarã, iya ité omboyecua ocuaita mboaviye tuprisa. <sup>3</sup> Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu água yuvireco. Che avei ndaicuai eté che recocuer cuapa tupri. <sup>4</sup> Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vahe rã pēu. Yande Yar rumo oicua. <sup>5</sup> Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesãro ranera rumo yande Yar yevi água. Ahe niha omboyecua opacatu mbahe ndoyecuai vahe, iyavei omboyecuapara ñepeipei yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepeipei yandeu.

<sup>6</sup> Che rivireta, che añehe cheyese ae, Apolos rese avei pēu mbahe tupri água rese ‘ore recocuer sui toyembohe yuvireco Tüpa remimbotar icuachiapri rupi tupri yuvirecoi água’ ore yapave pēu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. <sup>7</sup> ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tüpa suindar. ¿Sese ndiyai peyecomboivate etepri co mbahe pereco vahe rese! ¿Aviye opacatu mbahe peyesui tēi pe reco vahe viña!

<sup>8</sup> Ndoyavi pereco ité vahe opacatu mbahe pe remimbotar viña, ndoyavi avei nipanei vahe ité Tüpa suindar mbahe pēu. Peyeupe revo ndoyavi mborerecuar guasu peico ore sui viña. ¿Ēgüe peye itera tarahu viña! Ahese, ore avei mborerecuar oroicora pe pãhuve viña. <sup>9</sup> Ore rumo apóstol oroico vahe ndoyavi cheu Tüpa ore renoi ipa tēi vahe ore mano tēi água. Sese seroïrombri oroico inungar ava imboguai pri yucapirã. Ēgüe orohe oroico opacatu ava rovaque, Tüpa rembiguai eta iva pendar rovaque avei. <sup>10</sup> Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavi ndaseco pĩratai vahe oroico ava rembiepiave; aheseve avei rumo peyecomomirata tēi peico. Ore seroïrombri tēi oroico, pe evocoyase ava pe mboetei guasu pe rereco yuvireco. <sup>11</sup> Cũritei ore oroicove vite ité ore rieporehi pipe, ore husei tēi iyavei ndore turucuai eté. Ava rumo evocoyase maramara tēi ore rereco yuvireco. Iyavei ndorovirecoi ore rēta ité. <sup>12</sup> Ore oroporaviquiño ité, oroyembogüerai tēi ipipe. Ava rumo iñehe maramara tēi eté yuvireco oreu; ore evocoyase oromboyeviño iñehe mbahe tupri pipe chupe. Ore reca-reca catuño ité ore momara água yuvireco; ore rumo oroñemosañiño ité yuvireco chupe. <sup>13</sup> Iñehe-ñehe tēi ore rese yuvireco; ore rumo saisusa pipe oromboyevi iñehe yuvireco chupe. Ore rereco iti nungar tēi iyavei ore rereco inungar ava Ēgüe ehi tēi vahe yuvireco. Cũritei Ēgüe ehi viteño ité yuvireco oreu.

<sup>14</sup> Ndahei pe mochí água aipo ahe icuachía pēu, Ēgüe ehi rumo pe mboaracua água tēi. Inungar che rahir ité, che rembiaisu opovireco.

<sup>15</sup> Esepia, yepe pereco ati pe p̄t̄iv̄iisar Cristo rese pe reco āgua viña, ndaperecoi rumo setá pe yesupa. Esepia, che amombehuse niha ñehesa p̄s̄irosa resendar p̄u, ahese ramo peroya Jesucristo. Seroyasa p̄ipe evocoiyase che inungar pe yesupa ité aico p̄u. <sup>16</sup> Sese che aipotata ité che recocuer moña peye.

<sup>17</sup> Sese che amondo che rembiaisu Timoteo p̄u, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi. <sup>18</sup> Amove oime pe p̄ahuve oyecomboivate ai vahe. “Ndou iri chietera revo cohava yande repia” ehi yuvireco cheu viña; <sup>19</sup> aso p̄ihaiviño itera rumo pe repia yande Yar oipotase cheu. Ahese aicua tuprira oyecomboivate ai vahe reco p̄iratasa yuvireco. Ndahei chira iñehe güeraño t̄ei aicuara. <sup>20</sup> Esepia, T̄upa omborerecuasave, ndahei oñehe p̄ipe t̄ei oporocuai, op̄iratasa p̄ipe rumo ěgüe ehi. <sup>21</sup> ¿Mbahe p̄iha peipota peico? ¿Peipota p̄iha che aso vaherã p̄u che ñehe p̄irata pe mboaracua āgua mbahe pe rembiavi rese? Anise, pemoincatu rane pe recocuer, ahese asora mbahe tupri p̄ipe pe p̄iri.

## 5

*Pablo oñehe ñepei Jesús reroyasar p̄ahu pendar oyemboaguasa vahe rese*

<sup>1</sup> Ambuae mbahe, oroyandu ñepei mbahe t̄ei pe p̄ahu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. T̄upa reroyasar̄ehi ité ndoyapoi evocoi nungar mbahe t̄ei yuvireco. <sup>2</sup> ¡Pe rumo peyecomboivate ai peico! ¡Iyacatu rumo ndapeyemboivhai chira evocoi nungar mbahe t̄ei repiase viña! Evocoi nungar ava iyacatu ité pemboyepep̄ira pe p̄ahu sui. <sup>3</sup> Yepe niha che teieté ndaicoi pe p̄ahuve viña, pe rese che mahenduhasa p̄ipe rumo aicove ité pe p̄ahuve iyavei aicua voi eté aipo oyapo vahe mbahe t̄ei recocuer inungar-ra aico vahe ité pe p̄ahuve viña. <sup>4</sup> Acoi peñemonuhase, che avei niha aicora pe p̄ahuve che mahenduhasa p̄ipe, yande Yar Jesucristo p̄iratasa avei secoira pe rese. <sup>5</sup> Evocoiyase ahe ava timondosa Carugar povr̄ive secocuerai mocañi āgua. Ip̄ipe sui iesp̄iritu oñep̄is̄irora yande Yar Jesucristo yevise curi.

<sup>6</sup> Ndapeyecomboivate ai chira peico co mbahe t̄ei oimese pe p̄ahuve. Esepia, peicua niha co ñehesa aipo ehi vahe: “Yepe ch̄ihimi imondosa pan mboapeposa panguã rese viña, ahe rumo oi quepa tupri panguã rese” ehi. <sup>7</sup> Evocoi ava rembiapo ai inungar pan mboapeposa pe p̄ahuve. Sese pemombopa pe p̄ahu sui peicoēhi āgua angaipa p̄ipe peico vaherã inungar panguã ip̄iasu vahe ndov̄irecoi vahe omboapeposa oyese. ěgüe peye ité niha. Esepia, yande Yar Jesucristo iparaisu omano yande rep̄irã. ěgüe ehi ahe inungar ovesa yucapri angaipa mocañi āgua judío pieta Pascua p̄ipe yepi. <sup>8</sup> Sese inungar judío omboetei vahe Pascua pieta yuvireco yepi omombopaño pan mboapeposa cuacua vahe oyesui pan ip̄iasu, ndayapepoi vahe rereco āgua, ěgüe vahe aveira yaico yande reco p̄iasu supi eté vahe p̄ipe; yamombopara yande recocuerai yandeyesui, ahe ava reco momara-mara t̄eisa, mbahe naporai vahe avei.

<sup>9-10</sup> Ambuae aicuachía vahe p̄ipe aipo ahe p̄u: “Ndapembor̄i chira ava oyemboaguasa-guasa t̄ei vahe, acoi ava oipotata rai vahe ambuae ava mbahe, imonda rai vahe, iyavei vahe mbahe rahanga upe t̄ei oyerure vahe” ahe. Co che ñehesa rumo ndahei T̄upa ndoicua vitei vahe upendar. Esepia niha, pe yepepi āgua ñepei reseve evocoi nungar ava sui, pesē itera

co ivi pipe sui viña. <sup>11</sup> Che niha aipo ahe icuachía pëu: ndapemborîi chira que ava acoi “che Jesucristo reroyasar aico” ehi angahu tēi vahe, que oyemboaguasase, anise oipota raise que ambuae ava mbahe, oyerogui tēi vahe que mbahe rahanga upe, iyavei imahechiroi ai vahe, caguar tēi vahe, anise imonda rai vahe. Evocoi nungar ava piri ñepeï yepe ndapecarui chietera. <sup>12-13</sup> Cheu ndiyai eté ava ndoyuvirecoi vahe Tūpa rese recocuer rese porandu āgua. Tūpa ahe ava yuvirecoi vahe recocuer opara oicua coiye. Pe rumo pe cuaita ité Tūpa rese yuvirecoi vahe upe pe porandu āgua secocuer rese. ¡Sese pemboyepepiño ité osi recoyar rese secoi vahe pe pāhu sui!

## 6

*Ndiyai Jesús reroyasar serasosa ndahei vahe Jesús reroyasar mborerecuar rovai*

<sup>1</sup> Ambuae mbahe no: Oime pe pāhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mbia rembiapo ai rese porandu āgua! Iyacatu rumo Tūpa reroyasareta upe perasora secocuer moingatu āgua yuvireco viña. <sup>2</sup> Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoiyase, ¿ndapeicatuï pīha co tecocuer mbahemi tēi moingatu peico? <sup>3</sup> ¿Ndapeicuai vo yande avei yaporandura Tūpa rembiguai recocuer rese curi? Evocoiyase, ¡peporandu catu itera co ivi pipendar tecocuer rese peyeupe yepi! <sup>4</sup> Perecose evocoi nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu āgua! <sup>5</sup> Che aipo ahe ité pëu pe chī āgua: ¿Ndipoimi eté vo pe pāhuve que ñepeï yaracua vahe oicatu vahe que mbahe tēi peyeupendar moingatu āgua? <sup>6</sup> ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar viraso ambuae omboetasa mborerecuar Tūpa reroyasarēhi upe tēi mbahe moingatu āgua!

<sup>7</sup> Supi eté evocoiya pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñoñiño yuvireco” peyera chupe pe raso rāgüer sui Tūpa reroyasarēhi mborerecuar upe viña. <sup>8</sup> Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

<sup>9-10</sup> ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasa-guasa tēi vahe, mbahe rahanga upe tēi oyerogui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava virocua yesapiñaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi. <sup>11</sup> Oime avei niha acoi pe pāhu pendar yipindar ēgüe ehi vahe yuvireco viña, cūrtei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pëu yande Yar Jesucristo rer pipe iyavei yande Ru Tūpa Espiritu pīratasa pipe avei no.

*Yande rete ipehapri Tūpa upe nara yaguasaēhi āgua*

<sup>12</sup> Iyavei ambuae mbahe: Supi eté niha “aviye que mbahe che remimbotar ayapo vaherā” ehi vahe. Amove rumo co mbahe ndahei aviye vahe



yandeu iyavei yandeu ndiyai evocoi nungar mbahe povrîve nara tēi yande reco āgua. <sup>13</sup> Supi eté niha aipo ehi vahe: “Yande rembihu yande aviter upe nara, yande aviter evocoyase yande rembihu upe nara” ehi. Coiye rumo Tūpa opara omocañi evocoi nungar mbahe. Yande reteducer rumo ndicuitai yaguasa tēi vaheṛā, ahe rumo yande Yar upe nara. Yande Yar evocoyase yande reteducer upe nara secoci. <sup>14</sup> Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiye.

<sup>15</sup> Peicua niha yande rete Jesucristo upendar ité. Ndiyai eté evocoyase Jesucristo upendar yande rete mondo āgua cuña güeteducer omondo-mondo tēi vahe upe. <sup>16</sup> Peicua niha pe aipo nungar cuña ndipihai vahe rese peicose, pe reteducer evocoyase ñepeï vahe nungar ité pereco. Esepia, icuachiapri aracahendar pipe aipo ehi yandeu: “Yepe ñuvirîo ava yuvirecoi vahe viña, ñepeï vahe nungar ité rumo secocuer yuvireco” ehi. <sup>17</sup> Acoi ava secoci vahe rumo yande Yar rese, ahe secocuer evocoyase ñepeïno ité.

<sup>18</sup> Peyepipi voiño catu ava yemboaguasa-guasa tēisa sui. Opatatu ambuae angaipa ndahei yande reteducer rese nara ité. Acoi ava rumo oyapo tēi vahe mbahe cuña rese, güeteducer ae evocoyase omomara catu güembiapo pipe sui tēi. <sup>19</sup> ¿Ndapeicuai vo pe reteducer Espiritu Santo upendar ité secoci, iyavei ahe Espiritu Tūpa remimbou pe rese ité secoci? Sese pe reteducer ndahei pēundar ité. <sup>20</sup> Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe reteducer pipe Tūpa mboetei āgua.

## 7

### *Poromboaracuasa mendasa resendar*

<sup>1</sup> Cūritei amboveyira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. <sup>2</sup> Pe aguada-guasa tēiēhi āgua rumo peyacatu perecora pe rembireco, cuña avei evocoyase tovireco oyacatu omer yuvireco. <sup>3</sup> Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase. <sup>4</sup> Esepia, cuña omenda vahe güeteducer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahe avei güeteducer oyeupe nara vireco, ahe rumo güembireco upe nara ité vireco. <sup>5</sup> Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe aviyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Carugar pe ātoi tiētera.

<sup>6</sup> Ndahei che opocuai ‘tomenda yuvireco’ viya pēu. <sup>7</sup> Che rumo aipota che nungar pe mendaēhi āgua viña. Tūpa rumo ombou yande yacatu yande recorā.

<sup>8</sup> Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. <sup>9</sup> Ndapeicatuise rumo pe ñemosā āgua, pemendaño. Esepia, aviye catu itera pemenda poropota rai rāgüer sui.

<sup>10</sup> Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocuita ité.

11 Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

12 Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoyase ahe topoi eme ité güembireco sui. 13 Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoyase ahe cuña topoi eme ité ichui. 14 Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tüpa rovaque. Ëgüe ehi aveira cuimbahe Jesús reroyasar virecose güembireco Jesús reroyasarëhi. Ëgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tüpa upendar yuvirecoira. 15-16 Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tüpa oipota mbahe tupri pipe yande reco água.

17 Co rumo mbahe: peicoveño yipindar pëu Tüpa ombou vahe rese seroyaëhi vitesendar pipe. Ahe aporocuai opacatu Cristo upendar ñemonuhasa rupi yepi. 18 Acoi Tüpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco água. 19 Esepia, ndahei chira que judío, anise que ndahei vahe judío yaicose aviye catura yaico. Co rumo Tüpa oipota catu, “Tomboaviye opacatu che porocuaita amondo vahe chupe yuvireco” ehi yandeu. 20 Sese peicoveño peyacatu pe recocuer pëu Tüpa ombou vahe rese pe renoiëhi vitesese. 21 Pe mbiguai tēi peico vahe pe renoise Tüpa, pepihañemoñeta etepri eme evocoyia pe recosa sui pesē vaherã rese. Peicatuse rumo, peyepipiño itera ichui. 22 Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe ëgüe peye viña, peroyase rumo Cristo, ahese sembiguai peico. 23 Tüpa upe rumo perepí iteanga, sese ndiyai eté ambuae ava povrive tēi peico. 24 Sese, che rivireta, peicoveño itera pe recocuer pipe inungar yipindar Tüpa pe renoise.

25 Cuñatai ndomenda vitei vahe resendar rese rumo ndarecoi Yar suindar che ñehe água. Che rumo amondora che pihañemoñetasa yuvireco chupe. Esepia, yande Yar che paraisuerecosa pipe imboyeroyapri aico. 26 Cheu aviye catuño ité ndomendai vahe ëgüe ehiño tēise yuvireco viña. Esepia niha, tecocuer yavaí eteanga cūritei. 27 Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. 28 Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavaí catura co ivi pipe yuvireco chupe. Sese che ndaipotai evocoi nungar mbahe pipe yuvireco vaherã.

29 Che rivireta, aipo mbahe amombehu pota pëu: ndipucuvei co ari naporai vahe yepota água yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihañemoñetasa

pipe. <sup>30</sup> Acoi ndoviñhai vahe, toyuvirecoi eme oviharēhisa pipe iyavei acoi ovihareta vahe, ahe toyuvirecoi eme avei oviharetesa pipe, iyavei virocua vahe mbahe omahera, toyuvirecoi inungar mbahe ndovirocua vahe omahera viña yande Yar rese opihañemoñetasa pipe. <sup>31</sup> Acoi ava ipihañemoñeta catu vahe co ivi pipendar mbahe poru āgua, tipihañemoñeta eme evocoi nungar mbahe tēi rese yuvireco. Esepia, co ivi pipendar mbahe yasepia vahe, ocañi tēira.

<sup>32</sup> Che ndaipotai co ivi pipendar recocuer rese tēi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imboviha āgua; <sup>33</sup> omenda vahe rumo ipihañemoñeta avei co ivi pipendar recocuer rese tēi, güembireco mboviha āgua rese avei.

<sup>34</sup> Evocoiyase ndahei ñepe opihañemoñetasa vireco. Ēgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri āgua Tūpa upe. Cuña omenda vahe rumo ipihañemoñeta co ivi pipendar recocuer rese tēi omer mboviha āgua oico.

<sup>35</sup> Che aipo ahe pēu ‘mbahe tupri pipe toyuvirecoi’ viya, ndahei mbahe yavai vahe pipe pe reco āgua. Che aipota ité pe reco catuprisa pipe yande Yar upeño ité mbahe peyapo vaheṛā pe recoeté pipe peico.

<sup>36</sup> Acoi ava ipihañemoñeta vahe güembirecovi rese omenda āgua, “Aviyeteramo ayavira mbahe ichui iyavei niha osupiti ité imenda āgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa. <sup>37</sup> Acoi mbia rumo ndovirecoise que ocuaita omenda āgua iyavei oicatu ité güemimbotar apo, ipihañemoñetase ñepe reseve güembirecovi rese omen-daēhi āgua, ahe aviyeño ité. <sup>38</sup> Evocoiyase acoi omenda vahe aviyeño; acoi ndomendai vahe rumo, aviye catuño ité.

<sup>39</sup> Iyavei acoi cuña omenda vahe, ahe ndiyai eté iyepepi āgua omer sui imanoēhi viteseve. Omanose rumo ichui, ahese ramo ahe cuña upe aviyeño imenda iri āgua güemimbotar rupi. Yande Yar reroyasar rese avei rumo omendara. <sup>40</sup> Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tūpa Espiritu suindar.

## 8

### *Pablo oñehe tembihu mbahe rahanga upe tēi seropovēhepri rese*

<sup>1</sup> Cūrítei ambuae mbahe amombehura pēu mbahe rahanga upe mbahe mimba yucapri seropovēhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayeecomboivate ai tēi! Yayeaisuse rumo, ahese yañepitivii catu Cristo reroya tupri āgua. <sup>2</sup> Supi eté yande, “Che aicua ité co mbahe” yahe tēise que mbahe upe, ipane vite ité rumo icua tupri āgua yandeu. <sup>3</sup> Yande rumo yasaaisuse Tūpa, ahese Tūpa, “Co ava cheundar ité secoi” ehira yandeu.

<sup>4</sup> Evocoiyase co mbahe rahanga upe tēi seropovēhepri mbahe mimba yucapri hu āgua rese añehe. Yande niha yaicua co mbahe rahanga ēgüe ehi tēi vahe co ivi pipe, iyavei oime ñepe güeraño ité Tūpa. <sup>5</sup> Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei). <sup>6</sup> Yande rumo yaicua ñepeño ité Tūpa oime, ahe niha yande Ru opacatu mbahe aposar. ¡Evocoiyase yande chupe

nara ité yaico! Oime avei yande Yar ñepe vahe, ahe Jesucristo. Ahe ichui oime opacatu mbahe, ichui avei yaicove.

<sup>7</sup> Ndahei rumo opacatu oicua aipo mbahe yuvireco. Amove Jesús reroyasar yipindar güecocuer víreco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovêhepri, ipihañemoñeta, “Co mbahe roho tûpa rahanga upe seropovêhepri” ehi viteño yuvireco oyeupe. Ipipe sui omomara uca Tûpa rese opihañemoñetasa yuvireco. <sup>8</sup> Supi eté tembihu ndayande pîtivîi Tûpa rese yaico vaherã. Ndahei mbahe roho husa pipe sui tēi aviye catura yaico iyavei ndayahuse, ndahei chira mbahe tēi catu yaico. <sup>9</sup> Pēu niha aviyeño pehu viña; peicua catura rumo, avieteramo que Jesús reroyasar ndoicatu tupri vitei vahe pemboangaipa ucara. <sup>10</sup> Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, avieteramo pemonguerēhi aveira ihu uca água chupe. <sup>11</sup> Evocoyase co pe mbahecuasa pipe pemocañi uca yande rivri Tûpa rese noviracua tupri vitei vahe peico. ¡Cristo rumo omano ipisiro água! <sup>12</sup> Esepia, pemomarse Tûpa rese ipihañemoñetasa, ahese pe ae peyemboangaipa uca Cristo amotarēhisa pipe peico. <sup>13</sup> Sese yande mbahe roho husa pipe sui yamboangaipa ucasa yande rivri viña, ndayahu iri chietera evocoi mbahe roho yande rivri mboangaipa ucaēhi água.

## 9

*Apóstol Pablo ndoporandu potai oyeupe nara apóstol upendar mbahe rese ava upe*

<sup>1</sup> Supi eté che aicatu avei apóstol upendar mbahe pisi água viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico. <sup>2</sup> Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pēu.

<sup>3</sup> Ahe ñehesa amboyevi tupri ava che recoãha potasar upe yuvireco yepi. <sup>4</sup> Iya ité che remihura pisi, che iguarã avei pe sui viña. <sup>5</sup> Iyavei inungar ambuae apóstol viraso ité güembireco oyeupi yuvireco yepi, Jesús rivireta avei êgüe ehi yuvireco, êgüe ehi avei Pedro, êgüe ahe aveira niha che viña. <sup>6</sup> ¿Ore güeraño tie Bernabé rese oroporaviquira ambuae mbahe rese ore recove água? <sup>7</sup> Esepia, sundao nomboepi sundao güeco água, ahe rumo oporaviquisa reprim oipisiño. Iyavei ava uva tîsar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua. <sup>8</sup> Che ndahei cheyesui tēi aipo ahe pēu. Esepia niha, Moisés porocuita pipe avei aipo ehi yandeu: <sup>9</sup> “Pemondo eme tivi yuru rese mbahe icaruēhisa mbahe rãhi oicambese yuvireco pēu” ehi. Supi eté co Tûpa aipo ehi vahe ndahei tivi upeño. <sup>10</sup> Yande reco tupri água rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhi, oyoya osãro mbahe oipisi vahe rã oporaviquisa sui oyeupe nara yuvireco yepi. <sup>11</sup> Evocoyase ore avei oroñoti Tûpa Ñehengagüer pe piha pipe ore pe mbohese. Sese aviyeño aveira oropisise mbahe pe sui oreyeupe nara viña. <sup>12</sup> Esepia, ambuae oicatu mbahe pisi água oyeupe nara yuvireco pe sui. Evocoyase ore avei niha oroicatu mbahe pisi água pe sui ore poraviquisa pipe viña.

Ore rumo ěgüe ndorohei eté. Esepia, ore oroñemosañó ité ‘tiñhe mara eme co ñehesa Cristo resendar rese yuvireco’ ore yapave. <sup>13</sup> Pe niha peicua ité acoi oporaviqui vahe judío tũparove, ichui ocaru yuvireco. Esepia, yuvirohu mbahe roho Tũpa upe seropovēhepri tũparo rocarve yuvireco yepi. <sup>14</sup> Ęgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu. <sup>15</sup> Che rumo ndaporandui eté mbahe pe rembiereco rese vichico pēu yepi. Ndahei ‘tombou mbahe yuvireco cheu’ che yapave aipo aicuachía imondo pēu. Che rumo evocoi nungar mbahe rese ayembovishaño ité. ¡Yepe che yucapri tēira tieporēhi viña, ndaporandui chietera rumo mbahe rese pēu! Esepia, namocañi potai eté co che yembovisha cheyesui.

<sup>16</sup> Che rumo amombehuse co ñehesa p̄sirosa resendar ava upe, ndiyai ayeecomboivate ai ipipe. Esepia niha, che cuaita ité yapo āgua iyavei, ¡cheparaisu itera ndamombehuse ava upe co ñehesa viña! <sup>17</sup> Tũpa ndache cuaise oñhehe mombehu āgua viña, che rumo che querēhisa pipe amombehuse, ahese aipisira Tũpa suindar porerecosa. Ęgüe ndahei rumo. Esepia, Tũpa che cuaisa pipe niha amombehu. <sup>18</sup> Ndaporanduisse mbahe rese pēu amombehuse co ñehesa p̄sirosa resendar, ipipe ayembovisha ahe che vihasa porerecosa nungar cheu. Yepe aicatu mbahe rese che porandu āgua viña, che rumo ěgüe ndahei eté.

<sup>19</sup> Yepe che ndahei ava povrive tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerēhi vahe Cristo roroya āgua’ che yapave. <sup>20</sup> Esepia, aicose judío pāhuve, secocuer rupi aicoveño Yar upe imonguerēhi catu āgua yuvireco. Ęgüe ahe ité, aicose ava Moisés porocuita povrive yuvirecoi vahe pāhuve, che avei eté mborocuitavrive nungar aico. Ndahei rumo Moisés porocuita povrive ité aico imboavive āgua. <sup>21</sup> Iyavei ava ndoyuvirecoi vahe Moisés porocuita povrive, ipāhuve aicose, inungar ahe yuvirecoi, ěgüe ahe tupri avei imonguerēhi āgua yande Yar upe vichico. Ndahei rumo Tũpa porocuita mboyeroyaēhisa pipe aico. Esepia, Cristo porocuitavrive che recocuer. <sup>22</sup> Iyavei no, aicose ava yande Yar ndoviroya tupri vitei vahe pāhuve, secocuer nungar tupri avei aico Yar upe imonguerēhi catu āgua. Ęgüe ahe opacatu ava upe ‘toñepisiro catu ahe avei yuvireco’ viya. <sup>23</sup> Che ayapo co opacatu mbahe ‘taseta catu co ñehesa p̄sirosa reroyasar yuvireco’ che hesa pipe, ‘taipisi avei co porovasasa oime vahe co ñehesa reroyasa pipe’ che yapave avei.

<sup>24</sup> Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, ěgüe peye avei pe recocuer pipe Tũpa porerecosa p̄si āgua peico. <sup>25</sup> Iyavei opacatu oyemoingatu vahe oguayī āgua oñearo tupri opacatu mbahe tēi sui oyemomaraēhi āgua yuvireco. Ahe ěgüe ehi porerecosa ndipocopiī vahe p̄si āgua tēi yuvireco. Yande rumo yayemomborarara porerecosa apirēhi vahe p̄si āgua yaico. <sup>26</sup> Evocoyase che avei, ndahei ava oyahuva-huva tēi vahe nungar aico Tũpa remimbotar apo āgua iyavei che ndaicoi ava iguayī tēi vahe nungar. <sup>27</sup> Che rumo mbiguai nungar che retecuer areco, amboyeroya uca p̄ihañemoñeta tuprisa upe. Esepia, ndaipotai ambuae ava mbohe pare imombopri tēi nungar guayisa sui che yereco āgua.

## 10

*Ndiyai aracahendar ava recocuerai rupi yaguata*

<sup>1</sup> Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe p̄itu Tūpa imboguata agüer rese. Iyavei para guasu P̄ira vahe avei osasa opacatu yuvireco aracahe. <sup>2</sup> Ēgüe ehi eté opacatu oguatase mbahe p̄ituvri rupi iyavei para guasu osasase yuvireco, ndoyav̄i ñapiramombri yuvirecoi Moisés recocuer rupi uguata água aracahe. <sup>3</sup> Iyavei oyoya guasu yuvirohu tembihu Tūpa ombou vahe chupe nara yuvireco, <sup>4</sup> opacatu guasu avei oihu ita sui Tūpa ombou vahe ihiguarã yuvireco. Ahe ita rumo inungar Cristo seci opacatu iguatasa rupi yuvireco. <sup>5</sup> Yepe Ēgüe ehi Tūpa opacatu yande ramoi judío upe viña, setá iteanga rumo ava ip̄ahu pendar ndahei aviye vahe ip̄iha rupi yuvireco. Ipipe sui opa omano iv̄i iporupir̄ehisa rupi aracahe.

<sup>6</sup> Co opacatu mbahe sembiapogüer yuvireco ahe yande mbohe água ‘toipota rai eme mbahe-mbahe t̄ei inungar ahe ava yuvirecoi’ oyapave yandeu. <sup>7</sup> Sese yande ndayamboetei chira mbahe rahanga t̄ei, inungar ahe ip̄ahu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuvirop̄uha, oyembov̄ihaño pieta apo yuvireco” ehi. <sup>8</sup> Ndayayemboaguasa-guasa t̄ei chiaveira inungar ahe amove Ēgüe ehi yuvireco. Ipipe sui t̄ei ñepe i ari pipe ahe opa omano veintitrés mil tupri yuvireco aracahe. <sup>9</sup> Ndayasecoãha-ãha t̄ei chiaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco. <sup>10</sup> Iyavei ndayande ñehe mara-mara t̄ei chira yande Aposar rese, inungar ahe Ēgüe ehi yuvireco. Ipipe sui Tūpa ombou güembiguai ava yucasar iva sui ahe ava yucapa água aracahe.

<sup>11</sup> Co opacatu yande ramoi upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he água yandeu. <sup>12</sup> Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe t̄ei pipe. <sup>13</sup> Pe recoãhasa rumo oyoya tupri ité ambuae ava recoãhasa rese. Pe rumo peyeroña itera Tūpa rese, ahe niha oicua pe yemoviracuasa, noñocuai chira tecoãhasa imbou p̄eu. Acoi mbahe t̄ei oimese pe recoãhase, Tūpa ombou voiñora p̄ratasa evocoi mbahe t̄ei sui pe s̄e água, chupe pe ñemos a água.

<sup>14</sup> Sese che rivireta, che rembiaisu, peyep̄epi mbahe rahanga mboeteisa sui. <sup>15</sup> Ava niha peico pesenducua vahe r̄ã mbahe, evocoiyase peporandu co che remimombehugüer rese peyeupe icua tupri água. <sup>16</sup> Yaihuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara. <sup>17</sup> Yepe yande reta yaico viña, opacatu rumo yahu ñepe i pan sui. Sese yande ñepe i vahe ité yaico.

<sup>18</sup> Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropov̄eh̄epri, ahe evocoiyase chupendar ité yuvirecoi. <sup>19</sup> Che rumo, “Mbahe rahanga aviye vahe ité” ndahei, iyavei, “Mbahe roho icuav̄eh̄epri mbahe rahanga upe, aviye catu ité” ndahei avei. <sup>20</sup> Co rumo, acoi ava ndoicuai vahe Tūpa oicuv̄eh̄e

mbahe caruguar upe tēi yuvireco yepi. Ndahei rumo Tūpa upe nara ité ěgüe ehi yuvireco. Che evocoiyase ndaipotai eté caruguar upe nara tēi ěgüe peye vaheerā peico. <sup>21</sup> Peihuse rumo yande Yar upendar igua, ndiyai peihu avei caruguar upendar igua; iyavei pehuse yande Yar upendar mbahe, ndiyai avei pehu caruguar upendar mbahe.

<sup>22</sup> ¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

*Yande renosesa mbiguai tēi nungar yande recosa sui mbahe tupri apo āgua*

<sup>23</sup> Amove ava, “Aviyeño opacatu mbahe yayapo yande remimbotar rupi” ehi yuvireco viña. ěgüe ehi eté niha, ndahei rumo opacatu aviye, ndahei avei co opacatu mbahe yande pītivii catu Cristo rese yande reco āgua. <sup>24</sup> Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

<sup>25</sup> Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pīhañemoñetasa momaraēhi āgua. <sup>26</sup> Esepia, ivi opacatu ipor reseve, ahe yande Yar upendar.

<sup>27</sup> Acoi Tūpa reroyasarēhi pe soho ucase oyepiri pe mbocarū āgua, peso potase ipiri, pehuñora mbahe imboupri pēu. Ndapeporandui chira rumo sese chupe Tūpa rese pe pīhañemoñetasa momaraēhi āgua. <sup>28</sup> Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. ěgüe peyera pēu imombehusar rereco meguāēhi āgua, ava pīhañemoñetasa momaraēhi āgua avei. <sup>29</sup> Supi eté che añehe co ambuae ava pīhañemoñetasa rese, ndahei pe pīhañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava pīha rupi?” ehi vahe. <sup>30</sup> Iyavei aipo ehira no: “Aviye ndeu’ ahese Tūpa upe mbahe ahu vahe rese, ¿mahera pīha che rohoira yuvireco ahuse viña?” ehira. <sup>31</sup> Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pipe. <sup>32</sup> Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. <sup>33</sup> Che opacatu che rembiapo pipe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro āgua yuvireco.

## 11

<sup>1</sup> Che raquicue moñá catu peye inungar che asaquicue moña Cristo vichico.

*Mara ehira cuña Jesús reroyasar ñemonuhasave yuvireco yepi*

<sup>2</sup> Che rivireta, che, “Aviye ité yuvirecoi” ahe pēu yepi che rese pema-henduha vitesse iyavei peguataño vitesse che opombohe vahe agüer rupi. <sup>3</sup> Che rumo aicua uca tupri pota pēu, Cristo niha secoi ñepeipei cuimbahe cuaisar, cuimbahe evocoiyase güembireco cuaisar secoi. ěgüe ehi avei Tūpa Guahir Cristo upe. <sup>4</sup> Acoi cuimbahe Cristo upe ñemonuhasave oāca ndiru ndosequiise oyerure āgua, anise Tūpa Ñhengagüer mombehu āgua, ahe ěgüe ehi güerecuar Cristo mboeteiēhisa pipe. <sup>5</sup> Iyavei acoi cuña ndoyopiise oāca oyerocu āgua, anise Tūpa Ñhengagüer mombehu āgua,

ahe ěgũe ehi omer mboyeroyaẽhisa pipe. Ahe cuña evocoiyase ndoyavii oñeapipa tupri vahe. <sup>6</sup> Acoi cuña ndoyopi potaise oãca, tayapecãraisa tupri. Ochĩse rumo oapecãrai ãgua, evocoiyase toyopiño oãca sereco. <sup>7</sup> Cuimbahe rumo ndoyopi chira oãca sereco. Esepia, ahe Tũpa rahanga itẽ secõi iyavei iporañetesa omboyecua itẽ oyese. Cuña rumo omboyecua omer recocuer oyese yuvireco. <sup>8</sup> Esepia, Tũpa oyapose cuimbahe, ndahei cuña sui vĩnose, cuimbahe sui niha cuña oyapo. <sup>9</sup> Iyavei ndahei cuña upe nara Tũpa oyapo cuimbahe, ahe rumo oyapo cuña cuimbahe upe nara. <sup>10</sup> Co rese cuña virecora oãcapisa omer mboyero yasa mboyecua ãgua omahese Tũpa rembiguai eta yuvireco sese. <sup>11</sup> Yande, yande Yar reroyasar yaico vahe co tecocuer rese, yañepitĩvii oyoya yaico. Evocoiyase cuimbahe ndoicatui cuña porẽhi; cuña avei ndoicatui cuimbahe porẽhi yuvireco. <sup>12</sup> Esepia, yepẽ supi etẽ cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tũpa suindar yuvirecoi.

<sup>13</sup> Evocoiyase peyapĩsaca tupri co rese: ¿Iya pĩha cuña noñeacapi vahe oyerure Tũpa upe? <sup>14</sup> Yande itẽ yaicua yemochisa cuimbahe oyemboha vucuse. <sup>15</sup> Cuña rumo ovĩharete oha vucu porañetesa rese. Esepia, chupe imondopri itẽ ñacapi ãgua. <sup>16</sup> Acoi ava iñehe-ñehe tẽi pota vahe co tecocuer rese, toĩcua ore ndoroicoi ambuae reco pipe. Iyavei opacatu ambuae Jesús reroyasar ěgũe ehi avei yuvireco.

*Yande Yar rese yemomahenduha raisa*

<sup>17</sup> Co ambuae mbahe rese rumo ndaicaatui etẽ, “Aviye tupri yuvirecoi” che he ãgua pẽu. Esepia, aipo pe ñemonuhasave, mbahe tẽi etẽ aipo peyapo. <sup>18</sup> Esepia, yipĩndar che ayandu peñemonuhapase aipo oyese yande Yar mboetei ãgua pe pihañemoñetasa ndahoyoyai pipe peico. Amove ayanduse pe rerãcua, aroya itẽ. <sup>19</sup> ¿Iya itẽ revo pihañemoñetasa ndahoyoyai vahe reime ãgua pe pãhuve Jesús reroyasar supi tupri vahe cua tupri ãgua! <sup>20</sup> Peñemonuhase pe pihañemoñetasa ndahoyoyai vahe pipe pe caru ãgua, ndahei yande Yar rese pe yemomahenduhaseve ěgũe peye. <sup>21</sup> Espia, aipo pecaruse, pe rane aipo pepoyava pecaru. Ambuae aipo evocoiyase ndasĩepoi tẽi yuvireco; ambuae rumo pe pãhu pendar aipo oyembosavaipoño yuvireco. <sup>22</sup> Percõ niha pe rẽta aheve pe caru ãgua iyavei pe ihu ãgua. Pe rumo pe reco pipe opa peroĩro ambuae Jesús reroyasareta peico. Ipipe avei pemochi ava ndovirecoi vahe mbahe. ¿Che evocoiyase, “Aviye yuvireco” ndahei chietera co mbahe pe rembiapo ai rese pẽu!

*Yande Yar rese yemomahenduhasa supi itẽ vahe resendar*

<sup>23</sup> Co ñehesa aipisi vahe yande Yar suindar amombehu vahe pẽu: ahe pĩtu pipe acoi Jesús mboguaisar opisi ãgua renonde, ahe oipisi pan. <sup>24</sup> “Aviye ndeu” ohe pare Vu upe, ombohi-mbohi, ahese aipo ehi gũemimbohe eta upe: “Co che rete amondo vahe manosave mbahe tupri pe reco ãgua. ěgũe peyera che rese pe mahenduhasa pipe peico” ehi. <sup>25</sup> ěgũe ehi avei ocarure yuvireco, ahe oipisi igua rĩru aipo ehi: “Co uva ricuer omboyecua pẽu Tũpa oyapora mbahe ipiasu vahe pe recorã. Che ruvi pipe rumo yaposara. Evocoiyase co ari pipe suive peihuse co, peyemomahenduhara che rese yepi” ehi. <sup>26</sup> Esepia, acoi pehuse co, peihuse avei, peyemomahenduhara, pemombehu aveira yande Yar mano agũer opacatu ava upe peico. ěgũe peyera iyevi rãro peico.



*Mara yahera yande Yar rese yayemomahenduhase*

<sup>27</sup> Evocoyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoyase nomboetei yuvireco yande Yar rembiapocuer omondose güetecuer, iyavei oipiyerese vuvi. <sup>28</sup> Sese tipihañemoñeta rane oyacatu güecocuer rese ava co pan hu āgua renonde, oihu āgua renonde avei co uva ricuer yuvireco. <sup>29</sup> Esepia, acoi pe yemomahenduhaēhisave co setecuer rese pehuse iyavei peihuse, ahese mbahe naporai vahe peseca peyeupe nara peico. <sup>30</sup> Ichui niha setá pemaheasi, oime setá nipirata iri vahe avei pe pāhuve, oime avei omano vahe pe pāhu pendar. <sup>31</sup> Yande pihañemoñeta tuprise rumo yande reco āgua rese, yande Yar evocoyase nomoime chira mbahe tēi yandeu evocoyia yande recosa pipe. <sup>32</sup> Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri āgua rumo ēgüe ehi yandeu, ndahei yande cañi āgua opacatu ava viroyasarēhi reseve.

<sup>33</sup> Sese, che rivireta, acoi peñemonuhase pe yemomahenduha āgua yande Yar rese, peñearo ranera oyoya guasu pe caru āgua. <sup>34</sup> Acoi ava ndasiepoise yuvireco, tocaru rane güētave. Ahese yuvirasose ñemonuhase, ndipoi chira mbahe chupe. Iyavei che asose eipeve pe repia, opara ambuae mbahe amoingatu vicho pēu.

## 12

*Mbahecuasa Tūpa Espiritu suindar*

<sup>1</sup> Che rivireta, che aicua uca pota pēu co mbahecuasa resendar ñepeipei pēu Espiritu omondo vahe.

<sup>2</sup> Pe niha cūrítei peicua tupri ité yipindar Tūpa rese peicoēhi vitese, peyembopa uca mbahe rahanga ēgüe ehi tēi, noñehei vahe upe peico. <sup>3</sup> Sese, che aipota peicua acoi ava iñehe mara Jesús upe ndahei Tūpa Espiritu pīratasa pipe ēgüe ehi. Iyavei ava ndoicatui chira, “¡Jesús che Yar secoi!” ohe āgua opiha pipe Espiritu Santo ndovirecoise.

<sup>4</sup> Oime setá ambuae-ae tēi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeño ité imondosar secoi. <sup>5</sup> Setá mbahe avei oime mbahe yayapo vaherā yande Yar upe. Ahe yande Yar rumo ñepeño ité secoi. <sup>6</sup> Iyavei setá oime ambuae mbahe Tūpa oyapo vahe yande rese opīratasa pipe, Tūpa rumo ñepeño ité secoi. Ahe oyapo opacatu co mbahe ñepeipei yande rese. <sup>7</sup> Ahe omboyecua yande Espiritu rerecosa ñepeipei yandeu opacatu yande reco tupri āgua. <sup>8</sup> Espiritu pīratasa pipe Tūpa omondo ñepe viroyasar upe iñehe āgua aracuasa rese iyavei ambuae upe omondo iporombohe tupri catu āgua ombahecuasa pipe. <sup>9</sup> Ambuae upe evocoyase omondo oyese yeroya tupri catu āgua oEspiritu pipe sui avei. Iyavei ambuae upe omondo opīratasa imbaheasi vahe mbogüera āgua. <sup>10</sup> Ambuae oipisi pīratasa mbahe poromondisa oyapo vaherā yuvireco. Ahe ichui avei vireco ambuae ava omombehu vaherā ñehesa Tūpa suindar yuvireco. Ambuae upe Tūpa omondo mbahecuasa espiritu naporai vahe iyavei Espiritu supi tupri vahe cua tupri āgua. Ambuae evocoyase ichui avei oicatu ñehesa ndicuasai vahe Tūpa suindar pipe oñehe āgua. Ahe ichui avei ambuae oicatu ahe ñehesa ndicuasai vahe mombehu tupri āgua ava upe. <sup>11</sup> Ēgüe ehi Espiritu ñepeño ité güemimbotar rupi omondo ñepeipei yande Jesús reroyasar yaico vahe upe co mbahecuasa.

*Opacatu Cristo rese yaico vahe ñepeño ité yande recocuer*

<sup>12</sup> Inungar yande retecuer resendar setá mbahe oime viña, ahe rumo ñepeño ité; ěgüe ehi avei Cristo. <sup>13</sup> ěgüe yahe avei opacatu, yepe yande pãhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepe vahe nungar yande reco água Espíritu ñepe vahe pipe. Ahe ñepe Espíritu avei opa yaipisi.

<sup>14</sup> Supi eté yande rete resendar ndahei ñepe mbahe, setá rumo mbahe. <sup>15</sup> Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tẽi ndaseco iri chira yande rete rese. <sup>16</sup> Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tẽi ndaseco iri chira yande rete rese! <sup>17</sup> Esepia, opacatu tupri yande rete sesa pãve tẽise, ndayasendui chietera evocoyase mbahe viña. Anise, yande rete yapisacuar pãve tẽise, ndayasẽtui chietera evocoyase mbahe viña. <sup>18</sup> Tũpa rumo ñepe-pe yande rese mbahe omondo senara rupi tupri güemimbotar rupi. <sup>19</sup> Yande opacatu ñepe ava rete resendar nungar pãve tẽise, ndahei evocoyase opacatu tupri ava rete nungar yaico. <sup>20</sup> Supi eté yepe setá mbahe yande rete rese, ñepeño ité rumo yande rete.

<sup>21</sup> Iyavei que yande resa ndiyai aipo ehira yande po upe: “¡Nde ěgüe ere tẽi vahe eico!”; anise que yande áca avei, “¡Nde ěgüe ere tẽi vahe eico!” ndehi chira yande pi upe. <sup>22</sup> Esepia, yande rete resendar mbahe aviye nipiratai vahe yandeu, ahe sese rumo yayeroya catu. <sup>23</sup> Iyavei yande rete rese mbahe ndayasaisu tuprii vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco. <sup>24</sup> Oime rumo ambuae yande rete resendar ndayayopii vaheerã. ěgüe ehi Tũpa yande rete resendar mbahe imoingatu tupri. Evocoyase yande rete resendar mbahe ndayasaisu tuprii vahe imboeteipri catu secoi. <sup>25</sup> Tipo eme pihañemoñetasa ndoyoyai vahe pe pãhuve. Oyoya pehañeco tupri ñepe-pe peyese peico. <sup>26</sup> Evocoyase que ñepe yande pãhu pendar upe mbahe tasise, opacatu ambuae upe avei tasi; anise que ñepe imboyeroyapri secoise, ambuae avei opacatu oyemboviha yuvireco sese.

<sup>27</sup> Supi eté pe inungar Cristo rete peico. ěgüe peye ité ñepe-pe chupendar ité peico. <sup>28</sup> ěgüe ehi Tũpa iporavo viroyasar pãhuve, “Toime rane yipindar apóstol; ipare toime ava che ñehengagüer mombehu água, ichui ambuae upe iporombohe água, ipare ambuae mbahe ndayasepiái vahe apo água, iyavei ambuae ava imbaheasi vahe mbogüera água, ambuae ava pitivisar tasecoi, ambuae ava recocuer reroguata tupri água tasecoi, ambuae ava evocoyase toñehe ñehesa ndicuasai vahe pipe” ehi. <sup>29</sup> Ndahei rumo opacatu ava apóstol yuvirecoi, iyavei ndahei opacatu Tũpa ñehe mombehusar yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiái vahe yuvireco, <sup>30</sup> ndahei opacatu vireco pĩratasa oporombogüera água yuvireco, iyavei ndahei opacatu ndicuasai vahe ñehesa Espíritu suindar pipe oñehe yuvireco, ndaopacatui avei oicua evocoi ñehesa renducua uca água ambuae ava upe yuvireco. <sup>31</sup> Peseca ru Espíritu suindar mbahecuasa aviye catu vahe peyeupe nara.

*Yembohesa yande poroaisu água resendar*  
Che rumo amombehura tecocuer aviye catu vahe pëu.

## 13

<sup>1</sup> Yepe yande yañeheño tēise ambuae ava ñehe ndayaicuai vahe pipe, iyavei Tūpa rembiguai ñehe pipe avei viña, ndayasaisuisse rumo ava ipipe, yande evocoyase êgüe yahe tupri tēi inungar mbahe guarepochi apopri siapu iteanga vahe, iyavei inungar acoi platillo siapú rai tēi vahe, êgüe yahe tēi yaico. <sup>2</sup> Iyavei yepe yamombehuño tēise Tūpa suindar ñehesa ou vahe yandeu viña, iyavei yepe yaicua mbahe opacatu icuapirēhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pipe yarosirira ivitri guasu senda sui viña, ndayasaisuisse rumo ava ipipe, yande evocoyase êgüe yahe tupri tēira yaico. <sup>3</sup> Iyavei yande mbahe opacatu yareco vahe yamboyaho-yaho tupri tēise ava iparaisu vahe upe viña, iyavei yayoapí ucapa tupri tēise viña, ndayasaisuisse rumo ava ipipe yaico, ndayande pítivii eté evocoyi yande reco agüer.

<sup>4</sup> Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté, <sup>5</sup> ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. <sup>6</sup> Ndahei mbahe tēi rese oyemboviha; ahe rumo oyemboviha mbahe supí tupri vahe rese. <sup>7</sup> Oporoaisusa virecose oñemosañe opacatu uve, oyeroya vite sese, osãro vite mbahe tupri ichui, iyavei seco mbegüe viteño chupe.

<sup>8</sup> Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tūpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa. <sup>9</sup> Esepia niha, yaicua raimi tēi mbahe iyavei chīhi raimi tēi yamombehu Tūpa Ñehengagüer. <sup>10</sup> Acoi ouse rumo oicuapa tupri vahe mbahe, ahese ndahei iri chira yaicua raimi tēi vahe yaiporura.

<sup>11</sup> Esepia niha, chīhivahe vite yande recose, yañehe, yandepihañemoñeta, yasenducua mbahe chīhivahe nungar; yacuacuase ité rumo cute, yaseyapa chīhivahe yande reco agüer. <sup>12</sup> Cūritei yande ndayasenducua tuprii Tūpa resendar mbahe, inungar acoi yepiasa pipe yasepia hāvomi tēi que mbahe; oyeovai eté yaicose rumo, yasenducua tupri catu itera mbahe evocoyase. Cūritei rumo yaicua raimi tēi mbahe Tūpa suindar yaico; coiye rumo yaicua tupri catu itera, inungar ahe oicua tupri ité yande recocuer.

<sup>13</sup> Co oime mbosapí mbahe ndopai vaherã, ahe: Tūpa rese yande yeroyasa, mbahe yande remiaro ivave oime vahe iyavei yande yeaisusa; co imombosapisa rumo aviye catú vahe ité ambuae sui yandeu, ahe yeaisusa.

## 14

*Yaseca catura Tūpa suindar ñehesa mombehu água*

<sup>1</sup> Peseca catu pe yeaisu tupri água peico; aheseve avei peipotara mbahecuasa Tūpa Espiritu remimbou. Ichuindar ñehesa mombehu água rese catu ité rumo peicora. <sup>2</sup> Esepia, acoi ava oñehe vahe ñehesa ndayaicuai vahe pipe, Tūpa upe ité evocoyase oñehe; ndahei ava upe tēi oñehe.

Esepia, ndipoi eté ava ñehe renducupar. Ahe rumo ñehe mbahe ndicuasai vahe rese oespíritu pipe. <sup>3</sup> Acoi ava omombehu vahe rumo Tūpa suindar ñehesa yasenducua vahe pipe, ahe oipitívii ambuae ava Tūpa rese iyeroya água, oporomonguerēhi catu, oporomboviha catu avei. <sup>4</sup> Acoi ava ñehe vahe rumo ñehesa ndayaicuai vahe pipe, ahe ae tēi vireco catu Tūpa rese opihañemoñetasa. Acoi ava omombehu vahe rumo Tūpa suindar ñehesa icuapri ité, ahe ombopihañemoñetá catu Tūpa rese Cristo reroyasar yuvirecoi vahe.

<sup>5</sup> Yepe aipotara opacatu pe ñehe água ñehesa ndayaicuai vahe pipe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri água, ahese aviyeño ñehe Jesús reroyasar rovaque. Ipipe sui ipihañemoñeta catura Tūpa rese yuvireco. <sup>6</sup> Sese, che rivireta, asose pe repia, añehese co ñehesa ndayaicuai vahe pipe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuaasa supi tupri vahe resendar, anise que ñehesa Tūpa suindar, anise que ambuae porombohesa, ahese pesenducua vahe viña.

<sup>7</sup> Mbahe yande remimombehu rumo inungar acoi mbahe porasei recasar imoñehēpri viña, inungar mimbí, arpa avei. Esepia, ndoyoya tupriise ñehēgüer yuvireco, ndayasenducuai eté evocoyase mbahe-mbahe sapucaisa osãha yuvireco. <sup>8</sup> Anise co inungar mimbí nomoñehe tupriise vavasave nara yuvireco viña, ndipoi chietera que ava oyemoin-gatu voi vahe rã ovava água viña. <sup>9</sup> Ēgüe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tēi, ndosenducuai eté rumo pe ñehe yuvireco. ¡Evocoyase peñehēño tēi eté! <sup>10</sup> Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa. <sup>11</sup> Acoi ndayasenducuaise rumo ambuae ava ñehe, yande evocoyase inungar ambuae tecua pendar tēi yaico vahe chupe; yandeu avei evocoyase ahe ava inungar ambuae tecua pendar tēi yuvirecoi vahe. <sup>12</sup> Pe niha peipota ité pereco vahe rã mbahecuaasa Tūpa Espiritu suindar yepi. Sese peporandu catu mbahecuaasa Espiritu suindar rese opacatu Jesús reroyasar pītívii água Tūpa rese yuvirecoi tupri catu vahe rã.

<sup>13</sup> Sese acoi ava ñehe vahe ñehesa ndayaicuai vahe pipe, toporandu rane Tūpa upe ambuae ava upe senducua uca tupri água rese. <sup>14</sup> Esepia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui. <sup>15</sup> ¿Mara yahera vo evocoyase? Yayeroquira yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no. <sup>16</sup> Esepia, acoi Tūpa upe, “Aviye ndeu” yahese yande espíritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. <sup>17</sup> “Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipitívii chietera Tūpa rese imbopihañemoñeta catu água senducuaēhi pipe. <sup>18</sup> “Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui. <sup>19</sup> Jesús reroyasar ñemonuhasave rumo aipota catu amombehu vahe rã moviromi tēi ñehesa

yasenducua vahe ava mbohe āgua setá ñehesa ndicuasai vahe pipe che ñehe rāgüer sui.

<sup>20</sup> Che rivireta, pepihañemoñeta eme chíhivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi āgua. <sup>21</sup> Porocuita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. <sup>22</sup> Evocoyase co ñehesa ndayaicuai vahe pipe oñehese ava Tūpa pīratasa pipe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he āgua. Ndahei rumo ava Jesús reroyasar yuvirecoi vahe upendar. Ñehesa Tūpa suindar senducupri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar. <sup>23</sup> Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiquese pe pāhuve Jesús reroyasarēhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu. <sup>24</sup> Opacatu rumo peñehese Tūpa suindar ñehesa yasenducua vahe pipe, yuviroiquese evocoi nungar ava yuviraso pe pāhuve, ahe ae evocoyase, “Supi eté ayavi che recocuer Tūpa rovaque” ehira pe ñehe renduse yuvireco. <sup>25</sup> Ēgüe ehira opihañemoñeta rai ndoyecuai vahe imboporēhīpa uca oyeupe pe ñehe rendu ramosē yuvireco. Ipipe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

*Yayapora mbahe opacatu yande cuaita rupi ñemonuhasave*

<sup>26</sup> Sese che rivireta, peñemonuhase, oime pe pāhu pendar osapucai pota vahe sapucaisa Tūpa upendar, ambuae evocoyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu āgua yuvireco. <sup>27</sup> Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapi ñepeipei rupi; ñepeipei evocoyase osenducua ucara iñehe ava upe oico. <sup>28</sup> Acoi ndipoise ité rumo ambuae ava ahe ñehesa ndayaicuai vahe renducua uca āgua, ndiyai ahe oñehera yuvireco pe ñemonuhasave; oyeupeñomi evocoyase ahe oñehera ipipe yuvireco Tūpa upe. <sup>29</sup> Ēgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoyase pe pāhu pendar oyapisaca tuprira sese yuvireco ‘¿supi eté pīha?’ ohesave. <sup>30</sup> Que ñepeipei oñehe vitese Tūpa oicua ucase mbahe ambuae ava upe, topituhuño yipindar oñehe vahe, ambuae evocoyase toñehe pēu. <sup>31</sup> Evocoyase ēgüe peyera peñehe ñepeipei opacatu ambuae osendu vahe mbohe āgua iyavei imonguerēhi catu āgua. <sup>32</sup> Acoi omombehu vahe ñehesa Tūpa suindar, ahe oicatu oñehe mombituhu āgua. <sup>33-34</sup> Esepia, Tūpa seci mbahe aviye vahe aposar, ndahei ndoyembohe catui vahe.

Ndiyai cuña upe iñehe āgua pe ñemonuhasave. Esepia, ēgüe ehi avei opacatu ambuae Jesús reroyasar ñemonuhasa rupi yuvireco. Evocoyase

ndiyai eté aheve ñehe ãgua yuvireco chupe. Iyacatu rumo ahe imboyeroyapri yuvirecoira omer upe Tũpa porocuita rupi. <sup>35</sup> Oicua potase que mbahe, iya omer upe oporandura güetave yuvireco. Esepia, cuña upe ndiyai eté iporandu ãgua mbahe rese pe ñemonuhasave.

<sup>36</sup> Peyapisaca catu co ñehesa rese. Ndahei niha pe rane pemombehu Tũpa Ñehengagüer ava upe peico, ndahei avei pẽuñomi ou Tũpa suindar ñehesa. <sup>37</sup> Acoi que pe pãhuve oimese “che Tũpa Ñehengagüer mombehusar aico” ehiño tẽi vahe, anise que “aicua Espĩritu suindar mbahe” ehi vahe, iya rumo oicua tupri co aicuachía vahe imondo pẽu, ahe yande Yar porocuita resendar. <sup>38</sup> Ahe ndoyapisaca potaise rumo che ñehe rese, ñehe rese evocoyase ndapeyapisacai chira.

<sup>39</sup> Sese, che rivireta, peyemonguerẽhi catu Tũpa suindar ñehesa icuapri vahe mombehu ãgua peico. Ndiyai rumo ndapeipotai ambuae ava upe ñehesa ndayaicuai vahe pipe ñehe ãgua. <sup>40</sup> Peyapora rumo opacatu mbahe ñepeipei pe cuaita rupi mbahe tupri pipe.

## 15

### *Cristo cuerayevi agüer*

<sup>1</sup> Che rivireta, che aipota peyemomahenduha acoi ñehesa pĩsirosa resendar pẽu mombehu vahecuer rese. Co ñehesa niha peipisi. Ipipe sui avei niha peyemoviracua peyese. <sup>2</sup> Seroya pipe niha peñepisiro peico peyemoviracuase sese. Ëgüe ndapeyese rumo, peroya tupri tẽi.

<sup>3</sup> Acoi ñehesa aipisi vahe, opa uca aicua pẽu. Esepia, ahe aviye catu vahe: Cristo omano yande angaipa repirã Tũpa Ñehengagüer icuachiapri rupi eté <sup>4</sup> iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei. <sup>5</sup> Ichui oyemboyecua Pedro upe. Ipare voi oyemboyecua apóstol yuvirecoi vahe upe. <sup>6</sup> Ichui oyemboyecua quiniento sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cüritei; amove rumo ambuae opa omano yuvireco. <sup>7</sup> Coiye oyemoporẽhi Santiago upe. Ipare opacatu apóstol once yuvirecoi vahe upe.

<sup>8</sup> Cheu avei ipa ité oyemboyecua cute, aviye evocoyase che ipá oha vahe aico seroya ãgua. <sup>9</sup> Esepia, che seco ivi coti catu vahe opacatu ambuae apóstol sui aico. Iyavei ndacheãroi eté apóstol che reco ãgua viña. Esepia, che yipindar seroyasar aseca-seca catu vahe mara-mara tẽi sereco ãgua. <sup>10</sup> Che rumo apóstol ité aico. Esepia, Tũpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tẽi Ëgüe ahe vichico, Tũpa rumo oporovasasa pipe secoi che rupi. <sup>11</sup> Ndapepahañemoñetai chira rumo acoi oporaviqui catu vahe rese tẽi. Co ñehesa Cristo recocuer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

### *Ava omano vahe cuerayevisa*

<sup>12</sup> Oromombehu ité niha Cristo cuerayevi agüer resendar pẽu. Oime rumo amove pe pãhu pendar, “¿Mahera aipo ocuerayevira omano vahe yuvireco viña?” ehiño yuvireco. <sup>13</sup> Ndocuerayeviise ité rumo ava omano vahe viña, Cristo avei evocoyase ndocuerayevii chietera viña; <sup>14</sup> iyavei Cristo ndocuerayeviise viña, ore secocuer oromombehu vahe evocoyase Ëgüe ehi tẽi etera viña. Iyavei pe yeroyasa Cristo rese

ĕgũe ehi tẽi aveira viña. <sup>15</sup> Acoi ĕgũe ehise ité rumo viña, ore avei evocoyase oroñehẽño tẽi etera Tũpa resendar ñehesa rese oroico viña. Esepia, “Tũpa Cristo ombogũerayevi” orohe ité imombehu ava upe oroico. Ndocuerayeviise ité rumo omano vahe yuvireco viña, ahese Tũpa nombogũerayevii chiaveira Cristo viña. <sup>16</sup> Ēgũe ehi eté, acoi omano vahe ndocuerayeviiise yuvireco viña, Cristo avei evocoyase ndocuerayevii chietera viña; <sup>17</sup> Tũpa rese pe yeroyasa evocoyase ĕgũe ehi tẽi vahe itera viña; angaipa pipe viteño tẽi evocoyase pe recocuer viña. <sup>18</sup> Iyavei acoi ĕgũe ehise ité viña, evocoyase omano vahe Cristo reroyasar, ahe avei ocañi tẽira viña. <sup>19</sup> Ndipoise yasãro vaherã Cristo suindar mbahe yamanose, yande evocoyase imbopapri tẽi catu itera yaico opacatu ambuae ava sui yuvireco viña.

<sup>20</sup> Cristo rumo supi eté ocuerayevi omano vahe pãhu sui; ahe rane yipindar ocuerayevi vahe. <sup>21</sup> Esepia, ñepeĩ ava rembiapo sui oime manosa yandeu. Evocoyase ñepeĩ ava rembiapo sui avei yacuerayevira. <sup>22</sup> Esepia, inungar acoi Adán rembiapo ai sui ava opacatu omano yuvireco, ĕgũe ehi aveira Cristo rembiapo sui opacatu ava sese yuvirecoi vahe virecora tecovesa yuvireco. <sup>23</sup> Ñepeĩ-peĩ yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevise curi. <sup>24</sup> Ahese oura ari ipa vahe cute. Yipindar rumo Cristo omocañipara opacatu seco pĩrata ĕgũe ehi tẽi vahe. Ipare omondora opovri pendar Vu Tũpa upe. <sup>25</sup> Ahe rane ité rumo opacatu oporocuiraira oico acoi Tu opase voi eté omondo opacatu yamotarẽhimbar ipovrive. <sup>26</sup> Ahese ipa manosa opa itera. <sup>27</sup> Esepia, Tũpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tũpa avei secopi ipovrive. Esepia, Tu ité opacatu mbahe osecopi imondo ipovrive. <sup>28</sup> Evocoyase, opase mbahe imondosa ipovrive, ahe ae evocoyase oyemondora Vu Tũpa povrive. Tu evocoyase secoira ivate catu vahe opacatu mbahe sui.

<sup>29</sup> Ndipoise omano vahe cuerayevi ĕgua yuvireco viña, ĕmbahe rese pĩha evocoyase omanose ava, amove chupe nara tẽi ambuae oñeapiramo uca yuvireco? Esepia, omano vahe ndocuerayeviiise yuvireco viña, ĕmahera ru evocoyase ahe ava oñeapiramo uca chupe yuvireco? <sup>30</sup> Iyavei ore no, ĕmahera ru evocoyase oroyemondora mbahe tẽi upe ari rupi viña? <sup>31</sup> Supi eté, che rivireta, ari yacatu avĩye che amano vaherã opacatu co mbahe tẽi sui. Ahe pipeve avei rumo che areco ité che viharetesa pe rese yande Yar Jesucristo rese che recose. <sup>32</sup> Oime mbia Efeso pendar mbahe tẽi eté oyapo yuvireco cheu. Avĩye acoi mahembiar oñaro ai vahe rese avava vahe vichico. Acoi omano vahe ndocuerayeviiise rumo yuvireco viña, evocoyase ichui ndipoi chietera mbahe avĩye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

<sup>33</sup> Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase virovara pe reco tuprisa” ehi vahe. <sup>34</sup> Pepihañemoñeta tupri iri, peyemboangaipa uca iri eme. Esepia, amove pe pãhu pendar oime ndoicuai vahe ité Tũpa yuvireco. Che aipo ahe ité pẽu ‘toyuvinochi che ñehẽ osenduse yuvireco’ viya.

*Yande retecuer cuerayevisa resendar*

<sup>35</sup> Aviyeteramo pe pãhu pendar oimera oporandu vahe: “¿Mara ehira pãha omano vahe ocuerayevî irise yuvîreco coie? ¿Mara ehi angahura pãha setecuer ahese yuvîreco?” ehira yuvîreco oyeupe. <sup>36</sup> ¡Pe aipo peyepeye tēi peico! Esepia, mbahe rãhii yañotise, ituyu rane itē sorî ãgua. <sup>37</sup> Yañotise mbahe, sãhii rane itē yañoti; ndahei ihî opacatu rese yañoti. <sup>38</sup> Ipare rumo Tũpa omondo ahe mbahe rãhii upe ihiguã güemimbotar rupi, iyavei ambuae mbahe rãhii yacatu omondo ihiguã. <sup>39</sup> Ndahoyoyai rumo que ñepeî mbahe miti hi ambuae mbahe miti hi rese. Êgüe yahe avei yande yaico vahe ambuae itē yande rete mbahe mimba sui; vîrai rete ambuae itē iyavei pira rete ambuae tēi no. <sup>40</sup> Êgüe ehi avei niha, oime ìva pendar rete, ìvîve ava yuvîrecoi vahe rete avei no. Ìva pendar rete catuprigüer rumo ndahoyoyai etē ìvî pipendar rete rese. <sup>41</sup> Ari rendigüer avei ndahoyoyai yasî rendigüer rese, yasitata rendigüer rese avei. Ñepeî yasitata ambuae yasitata rese ndahoyoyai avei sendigüer yuvîreco.

<sup>42</sup> Êgüe ehi aveira niha omano vahe cuerayevîsa; yañotise sehögüer, ahe ituyu vahe rã. Ocuerayevise rumo ndituyu iri chietera; apîrêhî vahe rã itē secoira. <sup>43</sup> Tehögüer ñotimbri nimomburusai vahe; coie ocuerayevise rumo, imboeteipri itē secoi. Acoi ava rehögüer oñoti vahe yuvîreco, nipirata iri etē oico, coie ocuerayevise rumo, ipirata itera. <sup>44</sup> Supi etē, acoi ava rehögüer ñotisa vahe, ahe co ìvî pipendar tēi setecuer. Ocuerayevise rumo, setecuer ìva pendar secoira. Esepia, oime itē ìvî pendar setecuer, oime avei ìva pendar setecuer.

<sup>45</sup> Supi etē aipo ehi icuachiapri arachendar pipe: “Yipîndar ava Adán serer vahe. Ahe sete upe ombou Tũpa secove ãgua co ìvî pipe” ehi. Ichui rumo ambuae itē ìpa Adán nungar ou vahe, ahe rumo vîreco itē tecovesa ìva pendar ava upe imbou ãgua. <sup>46</sup> Yipîndar oime co ìvî pipendar tecovesa. Ipare rumo oime co tecovesa ìva pendar yandeu. <sup>47</sup> Êgüe ehi yipîndar ava ìvî sui yapopri, ìvî rese nara itē icuaita oico; coie catu ava ou vahe evocoyase ìva pendar. <sup>48</sup> Inungar yipîndar ava ìvî suindar, êgüe ehi avei opacatu ava ìvî suindar tecovesa rereco yuvîreco. Iyavei inungar Jesús ìva suindar, êgüe ehi aveira opacatu ìva suindar tecovesa vîreco vahe yuvîreco.

<sup>49</sup> Iyavei inungar cûritei Adán nungar tupri yaico; êgüe yahe aveira yande Jesucristo ìva pendar nungar tupri yaico curi.

<sup>50</sup> Che rivireta, co mbahe amombehu potami pëu: acoi ava upe güetecuer reseve, ndiyai etē seique ãgua ìvave Tũpa mborerecuasave. Esepia, co yande rete ocañi tēi vahe rã, ndoipisii chira tecocuer apîrêhî vahe. <sup>51</sup> Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi etē secuñarosapara. <sup>52</sup> Mimbî moñehese voi yande resapîhara inungar yande resapîqui vahe, êgüe ehira secuñarosapa yande rete. Aheseve avei omano vahe ocuerayevîpara apîrêhî vahe rã itē yuvîreco; yande evocoyase nayamano vîtei vahe, opaño tēira yande rete secuñarosa. <sup>53</sup> Esepia, co yande rete ocañi tēi vahe rã, ahe yande rete niha opara oñecuñaro apîrêhî vahe rã yuvîreco. <sup>54</sup> Êgüe ehise yandeu, ahese ramo osupitîra Tũpa ñehe icuachiapri pipe imombehupri yandeu curi: “Manosa opara imocañisa” ehi vahe. <sup>55</sup> Iyavei aipo ehi: “Ndayasiquiye iri chira yande mano ãgua. Esepia, manosa ndovîreco iri chira oyeroyasa oyese inungar acoi cau copiar opa vahe serocuasa ichui” ehi. <sup>56</sup> Angaipa niha inungar mbahe



popiar omoime vahe manosa yandeu. Moisés porocuita aracahendar evocoyase ombou pīratasa angaipa upe angaipa aposar mocañi uca āgua. <sup>57</sup> Che rumo, “¡Aviye ndeu!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.

<sup>58</sup> Sese, che rivieta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ēgüe ehi tēi vahe.

## 16

### *Porerecosa Jesús reroyasar pītivīi āgua resendar*

<sup>1</sup> Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe. <sup>2</sup> Domingu yacatu iya pe avei peipeha voimi guarepochi peico pe poraviqui reprimi sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico. <sup>3</sup> Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso āgua yuvireco ahe pendar yuvirecoi vahe upe. <sup>4</sup> Aviyeteramo, iyase cheu, che avei asora aheve. Evocoyase ahe yuvirasora che rupi.

### *Pablo ipihañemoñeta oguata āgua rese*

<sup>5</sup> Che sose, asora ivi Macedonia rupi, ipare asora pe repia Corinto ve. <sup>6</sup> Aviyeteramo apita pucumira pe piri, anise aviyeteramo pe piri ve ité mbahe porañehi che mombitañora. Ipare pe che pītivīiñomira peye eipeve sui ambuae tecuave che so āgua rese. <sup>7</sup> Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri. <sup>8</sup> Che rumo cūrteit apitañi vitera cohava Efeso ve, asepiā ranera Pentecostés pieta. <sup>9</sup> Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

<sup>10</sup> Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar. <sup>11</sup> Tipo eme ñepe yepe sepia potañehisar yuvireco, iya rumo peipītivīi catura che piri iyepota tupri āgua rese. Esepia, che iyavei ambuae Jesús reroyasar rese orosāro ité iyepota āgua oroico.

<sup>12</sup> Yande rivri Apolos upe, “Eso ambuae Jesús reroyasar piri Corinto ve” ahe tēi. Cūrteit rumo niqerēhii oso pe repia; iyase chupe, ahese osora pe piri.

### *Pablo mahenduhasa ipa vahe*

<sup>13</sup> Pemahemoha peyese; peyemoviracua avei Jesús rese pe yeroyasa pipe. Peñemosañi catu pe cuaita upe. Peicoveño itera Tūpa pīratasa pipe. <sup>14</sup> Opacatu mbahe peyapo pota vahe, peyapora pe poroaisusa pipe ité.

<sup>15</sup> Che rivieta, pe peicua Estēfanos opacatu güēta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri āgua yuvireco no. <sup>16</sup> Evocoyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

<sup>17</sup> Pe pãhu pendar Estéfanos, Fortunato iyavei Acaico cohave oyepotase che mboviha yuvireco. Esepia, ahe oyapo ité pe ndapeicatu tuprii vahe apo yuvireco. <sup>18</sup> Ahe che monguerêhi catu yuvireco, êgüe ehi avei revo pẽu no. Pemboeteira evocoi nungar ava peico.

<sup>19</sup> Jesús reroyasar Asia pendar opacatu ombou omahenduhasa yuvireco pẽu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sêtave yuvireco, ahe avei ombou omahenduhasa yande Yar rer pipe yuvireco pẽu. <sup>20</sup> Opacatu Jesús reroyasar coha pendar avei omondo omahenduhasa yuvireco pẽu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

<sup>21</sup> Che Pablo, che po pipe ité aicuachía co che mahenduhasa imondo pẽu.

<sup>22</sup> Acoi ava ndosaisui vahe yande Yar Jesucristo, ahe tocañi mbahe tẽi pipe. ¡Toyevi pihaivi voi yande Yar ou!

<sup>23</sup> Yande Yar Jesucristo tape rovasa ité yepi. <sup>24</sup> Pẽu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pẽu.

## IMOÑUVIRIOSA PABLO REMBICUACHIA CORINTO PENDAR UPE CORINTIOS

*Pablo mahenduhasa Jesús reroyasar Corinto pendar upe*

<sup>1</sup> Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu. <sup>2</sup> Tapeipisi catu yande Ru Tūpa, yande Yar Jesucristo porovasasa avei pe reco tupri āgua.

*Pablo paraisu agüer resendar*

<sup>3</sup> Yamboeteiño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mbovîha āgua yepi. <sup>4</sup> Ahe niha yande mbovîhaño opacatu yande paraísusa pipe, yande avei evocoyase yaicatura ava iparaisu vahe mbovîha āgua yuvireco. Ēgüe ehi eté Tūpa imbou vîhasa yandeu, ahe avei yande yamondora yuvireco chupe. <sup>5</sup> Esepia, inungar Cristo imombaraisupri secoi, Ēgüe yahe aveira imombaraisupri yaico yaicose sese. Cristo sui avei rumo oime itera vîhasa yandeu. <sup>6</sup> Ore paraisu pe mbovîha āgua ‘toñepisiro yuvireco’ ore yapave. Iyavei Tūpa ore mbovîha pe mbovîha āgua avei. Supi evocoyase pe peñemosañora mbegüe rupi ore paraisu agüer nungar tupri pe recose. <sup>7</sup> Ore oroyeroya ité Tūpa pe pîtivî āgua rese. Esepia, oroicua ore paraisu agüer nungar tupri peico, Ēgüe peye avei peipisi ore vîhasa Tūpa suindar.

<sup>8</sup> Che rivireta, opomomahenduha pota mara orohé oroico ivi Asia rupi. Ore recoāhasa yavai vahe ité oime aheve oreu. Ndorocatu iri eté oroñemosa ore pîratañhise chupe, seni orepihañemoñeta: “Yamanoño itera co mbahe-mbahe tēi pipe” orohé viña. <sup>9</sup> Supi eté oromoha ore cañi tēi āgua viña, Ēgüe ehi rumo oreu oroyeroya catu āgua Tūpa rese, ndahei oreyses tēi. Esepia, ahe oporombogüerayevi vahe secoi. <sup>10</sup> Ahe niha ore repi ore mano rāgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, <sup>11</sup> pe ore pîtivîise peye pe yeroqui pipe. Ahese setá, “Aviye ndeu” ehira yuvireco Tūpa oporopîtivîisa ombou vahe rese oreu setá yeroquisa sui.

*Mbahe sui Pablo ndosoi Corinto ve*

<sup>12</sup> Oime mbahe ore mbovîharete vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha Ēgüe orohé, ndahei ava co ivi pipendar mbahecuaasa pipe tēi. <sup>13-14</sup> Esepia, che ñehe aicuachía vahe imondo pëu, aicuachía ñepeí reseve pe yeroqui tupri āgua, pe senducua tupri āgua avei no. Iyavei ore cua revo chîhi peye cute. Acoi yande Yar Jesús yevise curi, ahese peyembovîhara ore rese, inungar ore oroyembovîhara pe rese.

<sup>15-16</sup> Sese yipindar supi eté che pihañemoñeta aso vaheñã ñuvirío yupagüer pe repia, pe mbovîha catu āgua viña. Ēgüe ahe ité, che pihañemoñeta pe piri rane che so āgua che guatasa rupi Macedonia ve.

Ichui ayeví pota iri pe piri viña, ipare pe che pítivimira peye ivi Judea rupi che so água rese viña. <sup>17</sup> Ndachepihañemoñeta voiño tēi che so água, ndahei iporombopa serai vahe aico “che co mbahe ayapora” ehi tēi vahe, ipare rumo nombóaviyei eté. <sup>18</sup> Tūpa rumo oicua ore ndahei, “Aviye” ore he voisa pēu, ahe pipeve avei, “Aní” ore hesa. <sup>19</sup> Esepia, Tūpa Rahir Jesucristo avei ñepeí reseve vahe ité yayeroyá vahe sese. Ahe secocuer niha oromombehu oroico pēu, che, Silvano, Timoteo avei. <sup>20</sup> Esepia, opacatu Tūpa remimombehugüer imboaviyesa sese. Sese niha serer pipe, “Ēgüe tehi” yahe Tūpa upe imboeteisave. <sup>21</sup> Tūpa niha opacatu yande momirata seseño ité yande reco água, yande poravo avei. <sup>22</sup> Güerer omondo yande rese ‘cheu nara’ oyapave. Ombou avei oEspíritu yande piha pipe ‘ipipe toicua che remimombehugüer rupi tupri ité mbahe amondora chupe yuvireco curi’ oyapave.

<sup>23</sup> Tūpa niha oicua acoi ndayevisse Corinto ve pe piri, ēgüe ahe pēu mbahe aviye água rese. <sup>24</sup> Ndahei opocuai pota mbahe pe rembieroyará rese. Esepia, pe Tūpa rese pe yeroyasa pipe peyemoviracuaño ité Cristo rese. Ore rumo oroipota pe pítivisa pe yemboviha água.

## 2

<sup>1-2</sup> Co rese ndaso catu iri pe piri. Esepia, che aso irise pe piri ndopomboviha catui chira viña, ¿ava vo evocoiyase che mbovihara viña? Pe ité niha che mbovihasar peico. <sup>3</sup> Sese che aicuachía ñehesa ipírata vahe pēu cuese. Esepia, ndaipotai eipeve che sose, che mbovihaēhi água peye. Pe rumo iya ité che mboviha catura peye viña. Che ayeroya ité opacatu pe rese aviharetese, pe avei evocoiyase opacatu peviharetera che rese. <sup>4</sup> Supi eté che aicuachiasse che ñehe pēu, che ae ayepihamboasi ité, ayaseho avei. Esepia, aicuachía vahe pēu ndahei pe mbovihaēhi água, che rumo aicuachía ‘toicua che gúaisu eteprisa yuvireco’ che yapave pēu.

### *Oime ñerosa ava upe mbahe sembiavi rese*

<sup>5</sup> Acoi yande rivri omoime uca vahe viharēhisa co mbahe tēi apo pipe, ndahei che güeraño ndache mbovihai, pe avei rumo seni opacatu ēgüe peye. Che, “Seni” aipo ahe ité pēu. Esepia, ndaipotai che ñehe rasi água. <sup>6</sup> Co mbia upe setá mbahe peiporara uca ité, evocoi rupive iya ēgüe peye chupe. <sup>7</sup> Co suive ité rumo peñerora chupe, peipítivii aveira. Esepia, aviyeteramo oviharēhisa pipe oyemocañi tēira. <sup>8</sup> Sese cūrítei opomonguerēhi ité pe mboyecua iri água pe poroaisusa chupe. <sup>9</sup> Cuese ambuae che ñehe aicuachía co che pe mbohesa resendar pēu pe recoña água, “¿Oyapo itera piha che remimombehu yuvireco?” ahe pēu. <sup>10</sup> Cūrítei cheñero avei que ava upe peñero vahecuer upe. Esepia, oimese que mbahe rese che ñero água, Cristo rovaque ēgüe ahe pe raisusave <sup>11</sup> Carugar yande mbopaēhi água. Esepia, yande yaicua tupri ité iporombopasa.

### *Tecua Troas ve Pablo nombohe catui opihañemoñetasa*

<sup>12</sup> Ayepotase tecua Troas ve Cristo recocuer mombehu água, oime ité yande Yar upe nara aheve che poraviqui água viña. <sup>13</sup> Nambohe catui rumo che pihañemoñetasa. Esepia, ndasepiai eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

### *Cristo rese yaicose, yaicatu mbahe tēi recopi*

<sup>14</sup> Aviye yande Ru Tūpa upe. Esepia, yande Cristo rese yaico vahe yande renose oamotarēhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe siacua vahe yasētu vahe opacatu rupi. <sup>15</sup> Esepia, inungar itaisi siacua vahe opacatu rupi, ēgüe yahe avei yande Tūpa upe Cristo yande reropovēhese yaico ava ipiširopirā upe, ava ocañi tēi vahe rā upe avei. <sup>16</sup> Ahe ava ocañi tēi vahe rā upe evocoi ñehesa yaru vahe inungar cañi tēisa resendar; ava ipiširopirā yuvirecoi vahe upe rumo evocoi ñehesa ombou tecovesa. Yande ae tēi rumo ndayaicatu evocoi nungar mbahe apo. <sup>17</sup> Ore rumo ndahei setá ambuae ava nungar tēi oroico. Esepia, oromombehuse Tūpa Ñehengagüer, ndahei mbahe pisi āgua tēi rese ēgüe orohe, ore rumo ore pihañemoñeta tupri pīpe oromombehu co ñehesa Tūpa rovaque Cristo rese ore recosa pīpe. Esepia niha, ore semimondo oroico.

### 3

#### *Ñehesa Tūpa remimbotar ipiasu vahe resendar*

<sup>1</sup> Ore aipo orohese, aviyeteramo pēu ndoyavii oroyecomboivate ai pota iri viña, ēgüe ndorohei rumo iyavei ndorosecai icuachía āgua ava ñehesa aviye vahe ore recocuer resendar oromondo vahe rā pēu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. <sup>2</sup> Esepia, pe ité inungar ore rembicuachía ore recocuer resendar ore oroipota vahe, ēgüe peye peico ore pīha pīpe. Esepia, opacatu ava pe reco tupri repiase, oicua ore poraviqui tupri pe pāhuve yuvireco. <sup>3</sup> Pe niha pemboyecua pe reco tupri pīpe ore rembiapo Cristo porocuaita pīpe pe pāhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pīpe ité icuachiapri itape rese, Espíritu Tūpa oicove vahe suindar pīpe rumo yapopri ava pīha pīpe.

<sup>4</sup> Oroyeroya ité co rese Tūpa rese ore yeroyasa pīpe. Cristo niha ēgüe ehi oreu. <sup>5</sup> Ndahei oreyesui tēi oroicatu co mbahe apo. Tūpa rumo ombou oreu opacatu co mbahe apo āgua. <sup>6</sup> Ahe niha ombou opīratasa oreu güemimbotar ipiasu vahe rese poraviqui āgua, ndahei Moisés rembicuachiagüer rupi oroporaviqui. Esepia, ahe imboaviyeēhisa pīpe yamano tēira viña. Ahe rumo Espíritu Tūpa suindar pīpe oroporaviqui. Esepia, ahe ombou tecovesa yandeu.

<sup>7</sup> Co Moisés recosendar porocuaita icuachiasa ité itape rese, iyavei Tūpa reco porañetesa pīpe ou. Israelita evocoyase Moisés rova rese nomahe catui eté yuvireco. Esepia, sendí iteanga, yepe sendigüer ogüe mbegüeño oso viña. Ahe Moisés recosendar porocuaita ava upe manosa tēi güeru vahe iporañete ai eté yipindar oico viña. <sup>8</sup> ¡Cūrítei rumo iporañeté catu ité ñehesa Tūpa remimbotar ipiasu vahe resendar Espíritu Santo ombou vahe yandeu! <sup>9</sup> Supi eté yepe iporañete ai eté Moisés porocuaita acoi güeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui! <sup>10</sup> Esepia, co yipindar porañete vahe ndahoyoyai ñehesa cūríteindar porañete catu vahe rese. <sup>11</sup> Acoi mborocuaita yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

12 Ore oroyeroya ité co ñehesa ipocopi vahe rese. Sese oroñehe ava upe ore siquiyeēhisa pipe ité. 13 Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaēhi āgua ndogüe viteise sendigüer ichui aracahe. 14 Ēgüe ehi ahe ndosenducua ucai eté ndoyavii sovapisa vite vahe cūritei, Ēgüe ehi vite oyeroquise Moisés porocuaita icuachiapri yipindar vahe pipe yuvireco. Ñomipri vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe. 15 Ēgüe ehi vite cūritei, senducuaēhi pipe Moisés porocuaita pipe oyeroqui viteño tēi eté yuvireco inungar sovapisa vite vahe. 16 Supi eté que ava oyevise yande Yar upe, ahese ramo serocuasa sovapisa nungar ichui senducua tupri āgua. 17 Esepia niha, yande Yar Espiritu secoi. Ahe Espiritu ava rese secoise, ndahe iri mbiguai nungar yuvirecoi. 18 Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, Ēgüe yahese, yareco catu-catu iri seco porañetesa yandeyese. Yande Yar rumo acco Espiritu secoi vahe Ēgüe ehi yandeu.

#### 4

1 Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poraviqui āgua co ñehesa rese. 2 Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñehengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ēgüe orohe opacatu ava upe Tūpa rovai ‘Supi eté, tehi yuvireco opiha pipe’ ore yapave. 3 Yavaise co ñehesa pīsirosa resendar ore remimombehu renducua āgua, ahe Ēgüe ehi ava ocañi tēi vaherā upe. Ahe aviye oyeovapi vite vahe. 4 Esepia, supi eté carugar rerecuar inungar nomboesapiso vahe ahe ava yuvireco, sese ndosenducua ucai chupe ‘toviroya eme ñehesa Poropīsirosar Cristo resendar porañete vahe’ oyapave. Ahe niha Tūpa recocuer mboyecuar secoi. 5 Esepia, oromombehuse ñehesa pēu, ndahei ore yese tēi. Ore rumo, “Jesucristo yande Yar secoi” orohe oroico. Ore evocoyase mbiguai nungar tēi oroico pēu Jesús raisupave. 6 Esepia, Tūpa aipo ehi aracahe: “Toime tesapesa pītumimbi vahe resape āgua” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

#### *Yaicora Cristo rese yande yeroyasa pipe ité*

7 Co tesapesa nungar porañete vahe Tūpa suindar rumo yareco yande retocuer pipe, inungar-ra que mbahe sepirusu vahe yapocatupri ivi mbahemoinda ndipocopi vahe pipe tēi viña. Ipape toicua opacatu ava yuvireco co pīratasa Tūpa suindar, ndahei ore yesuindar tēi. 8 Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndoromocañi eté ore yesui. 9 Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté

rumo. <sup>10</sup> Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua ore yese, “Toyecua avei secocuer ore rese” ore hesave. <sup>11</sup> Esepia, ore recove vitesese imboguapri oroico ore mano āgua Jesús rese. Ēgüe orohe secocuer mboyecua āgua ore retecuer ndipocopi vahe rese. <sup>12</sup> Evocoyase co ñehesa mombehu pipe ore manosa ore ropeña, ipipe sui rumo pesopeña tecovesa apirēhi vahe peico seroyasa pipe.

<sup>13</sup> Icuachiapri arachendar pipe niha aipo ehi: “Ayeroya ité Tūpa rese, ipipe sui añehe” ehi; Ēgüe orohe avei ore, sese oroyeroya ité, ichui oroñehe. <sup>14</sup> Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora. <sup>15</sup> Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipipe sui, Aviye ndeu, tehi setá catu ava imboetisave yuvireco chupe’ ore yapave.

<sup>16</sup> Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi. <sup>17</sup> Esepia, co mbahe oroiporara vahe co ivi pipe, ahe Ēgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vahe. <sup>18</sup> Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe ivave pendar ndayasepiai vahe rese. Esepia, co mbahe yasepia vahe, ahe Ēgüe ehi raimi tēi vahe; co mbahe rumo ndayasepiai vahe, apirēhi vahe ité.

## 5

<sup>1</sup> Yaicua niha yande retecuer ndipocopi vahe, inungar oi ndipocopi vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi. <sup>2</sup> Supi eté yaicove vitesese co yande rete ndipocopi vahe rese, yande poāsesa pipe yaipota ité yande rete ivave pendar. <sup>3</sup> Aheve yande rete ipiasu vahe yarecove, aheve ndahei chira yande hā nani tupri vahe nungar yuvirecoira. <sup>4</sup> Ēgüe ehi eté yande retecuer pipe vite yaicove, yande poāse yande viharēhisa pipe. Esepia, ndayaipotai yande hā nani tupri vahe nungar seco āgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tēi vahe yande resendar tecovesa piasu, ndopai vahe rereco āgua” vahe. <sup>5</sup> Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

<sup>6</sup> Sese niha yayeroyaño ité yepi; iyavei yaicuaño yande yaicove vitesese yande rete rese, ndayaico vitei eté ivave yande Yar piri. <sup>7</sup> Esepia, cūrtei yande Yar rese yeroyasa pipe ité yaguata, ndahei mbahe yande rembiepia pipe. <sup>8</sup> Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivave. <sup>9</sup> Sese yaseca yande Yar mbovīha āgua yepi, que yaicove vitesese yande rete rese, anise que yasēse ichui. <sup>10</sup> Esepia, yande opacatu yañecuavēhera Cristo rovai iporandusave yaipisi vahe ñepei-pepei mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesese.

*Ñehesa yande reco moingatusa resendar*

<sup>11</sup> Ore niha oroicua yande Yar sui ore siquiye água imboyeroy-asave. Sese orosáha ava pihañemoñeta rerova Tüpa rese ipihañemoñeta água yuvireco. Tüpa niha ore cua tupri, tapeicua avei ru ore recocuer. <sup>12</sup> Ndorofnehei pëu ore yemboivate ai água tëi. Ore rumo oroñehe pëu ‘toviharete catu ore rese yuvireco’ ore yapave. Ipipe sui peicatura ava güembiepia rese tëi oyemboivate ai vahe upe iñehe mboyevi água. Esepia, ahe ndahei ava piha pipendar rese oyemboiha yuvireco. <sup>13</sup> Ndayaracuai vahe nungar ore rerecose amove pe pãhu pendar yuvireco. Tüpa upe rumo êgüe orohe oroico. Yaracua vahe nungar rumo, ore rerecose peye, pëu mbahe aviye água rese êgüe orohe. <sup>14</sup> Cristo poroaisusa, ahe ité ore reroguata catu. Esepia, supi eté ahe omano opacatu ava repirã, ipipe sui yaicua opacatu ava ocañi tëi vaherã yuvireco viña. <sup>15</sup> Cristo niha omano opacatu yande repirã. Yande yaicove vite vahe evocoyase ndahe iri yandeyeupe nara tëi yaico; yande rumo yaico chupe nara ité. Esepia, ahe omano, ocuerayevi yande rese. <sup>16</sup> Sese, iya ité oreu ore pihañemoñetañi iri água que ava rese, ava tëi pihañemoñetas rupi. Yepe yipindar inungar ava ivi pipendar tëi êgüe orohe ore Cristo rese ore pihañemoñeta oroico viña, cūritei rumo êgüe ndorohe iri orepihañemoñeta sese. <sup>17</sup> Evocoyase acoi ava Cristo rese ité secoci vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyembopiasu iri.

<sup>18</sup> Co mbahe opacatu Tüpa oyapo yandeu, ahe niha Cristo rembiapo sui yande recocuer moingatu oyeupe nara. Ipare oreu avei ombou co ñehesa mombehu água ambuae ava upe secocuer moingatu água avei. <sup>19</sup> Aipo oyapave aipo ehi: Tüpa ombou Guahir Cristo co ivi pipe ava recocuer moingatu água ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoyase ore cuai ahe ñehesa ava recocuer moingatusa resendar mombehu água ava upe. <sup>20</sup> Ore evocoyase Cristo porocuita rupi oroñehe vahe oroico, inungar Tüpa ité oñehera pëu viña. Sese, “Peyevi Tüpa upe, ahe pe recocuer moingatura oyeupe nara” orohe Cristo rer pipe pëu. <sup>21</sup> Yepe Cristo ndoyapoi eté angaipa, Tüpa rumo vireco uca angaipa viyar nungar yande repirã yande reco ivi água Cristo rupi yande guatase.

## 6

<sup>1</sup> Ore pe mboetasa co Tüpa upendar mboraviqui resendar ore recosa pipe: “Peicua catu, pemocañi tëi rene Tüpa porovasasa peipisi vahe” orohe pëu. <sup>2</sup> Esepia, Tüpa aipo ehi icuachiapri aracahendar pipe: “Acoi ari aviye vahe pipe niha che asendu pe yeruresa; iyavei ahe ari poropisirosa pipe opopitivi” ehi.

¡Ahe ari oyepota cute! iyavei oime ité cūritei ñepisirosa.

<sup>3</sup> Ore niha ndoromboyecuai ore reco ai ava pãhufe. Esepia, ndoroipotai que ava Tüpa upe ore poraviquisa rese iñehe rai água yuvireco. <sup>4</sup> Ore rumo oromboyecua ité Tüpa rembiguai ore recosa. Esepia, ore reco mbegüesa pipe oroñemosañi mbahe-mbahe tëi upe yepe ipane mbahe oreu viña, iyavei mbahe yavaise; <sup>5</sup> êgüe orohe avei ore nupa-nupase, ore roquendase avei iyavei omonguerêhise ava rehii ore amotarêhi água yuvireco. Oroypao avei mboraviqui ipirata vahe; amove ndoroquei eté, setã rupi ndoreriepoi tëi avei. <sup>6</sup> Oromboyecua avei



ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. Ëgüe orohe ité niha Espiritu Santo pīratasa pipe, ore poroaisusa supi eté vahe pipe avei. <sup>7</sup> Ore remimombehu supi eté vahe pipe iyavei Tūpa pīratasa pipe avei oroico. Ore niha ore reco tupri pipe orosecopi mbahe-mbahe tēi. Ipipe avei oroyoepe. <sup>8</sup> Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipare rumo iñehe-ñehe tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña. <sup>9</sup> Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, oroicoveño ité rumo; iyavei amove ore mobaraisusa catu tēi, ndore yucaí eté rumo ipipe yuvireco. <sup>10</sup> Amove ndoyavii ndorovihai vahe yuvireco chupe, ore rumo orovihaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

<sup>11</sup> Che riviřeta Corinto pendar, ore ñehesa pipe opacatu mbahe oromboyecua pēu iyavei pe raisu āgua orovireco ore piha pipe tuvichá pe rese. <sup>12</sup> Ndorehāpisii pe rese pe raisu āgua; pe rumo ēgüe ndapeyei ore rese. <sup>13</sup> Che niha opovireco che rahir nungar; pemboyeve avei catu ore pe raisusa oreu.

#### *Tūpa oicove vahe rēta nungar ité yaico*

<sup>14</sup> Ndapeyovaichoi chira ava Tūpa ndoviroyai vahe rese. Esepia, ndoyoyai eté pe pihañemoñetasa. Ëgüe ehi eté teco ñvisa ndoyoyai teco rai rese inungar tesapesa ndoyoyai pītumimbi vahe rese. <sup>15</sup> Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa reroyasar Tūpa reroyasarēhi rese yuvireco? ¡Aní eté! <sup>16</sup> ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe: “Che aicovera seseve iyavei aguatarā ipāhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

<sup>17</sup> Iyavei aipo ehi:

“Sese peyepēpi evocoi nungar ava naporai vahe sui; peyemboyai rene que mbahe naporai vahe rese.

Ahese che opořisira.

<sup>18</sup> Che aicora pe yesupa; pe evocoyase peicora che rahir, che rayri avei’ aipo ehi yande Yar güeco pīratasa pipe” ehi.

## 7

<sup>1</sup> Che riviřeta, che rembiaisu, co Tūpa remimombehu imboaviyepirā yandeu. Sese yande yamoingatu tupriřa yande recocuer chupe yarecoēhi āgua yande retecuer iyavei yande espīritu mbahe tēi pipe. Iyavei Tūpa mboeteisa pipe yasecara yande reco catupri āgua chupe nara güeraño ité.

#### *Corinto pendar ava recocuer recuñarosa resendar*

<sup>2</sup> ¡Che piři peye pe piha pipe! Ndoroyapoi niha mbahe tēi que ava upe, ndoromomarai eté que ava recocuer, ndoroporombopai avei. <sup>3</sup> Ndahei pe recocuer rese che ñehe raisave aipo ahe pēu. Supi eté yipindar, “Che pihave ité opoaisu, pēu nara avei aicove, amano aveira pēu” ahe acoi pēu

cuese. <sup>4</sup> Ayeroya ité pe rese, pe rese avei aviharete. Che paraisu pãhuve ayemonguerêhi iyavei ayembovihareteño.

<sup>5</sup> Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarêhimbar iyavei oime ore yepihamondiisa. <sup>6</sup> Tũpa rumo, ava ndoyemonguerêhii vahe, omonguerêhi iri yepi. Ahe ore monguerêhi catu iri Tito yepotase. <sup>7</sup> Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharêhi agüer cheu, pemahenduhãño ité aipo che rese pe che raisusave yepi. Aipo nungar renduse ayembovihã catu.

<sup>8</sup> Yepe che ñehe aicuachía vahecuer imondo pēu ndape mbovihai viña, cheu rumo aviyeño cūrítei. Yipindar rumo ayepihamboasi aicuase che ñehe tasí iteanga vahe pēu; chĩhi rupi tēi rumo ndapevihai peyeroqui pare sese. <sup>9</sup> Cūrítei che avihareté. Ndahei rumo pe viharêhisa rese êgüe ahe. Esepia, co pe viharêhisa sui pemboasi pe angaipa Tũpa upe pe yevi ãgua, evocoi nungar Tũpa oipota. Evocoiyase ore ñehe ndoyapoi mbahe naporai vahe pēu. <sup>10</sup> Esepia, co nungar viharêhisa Tũpa oipota vahe yande angaipa mboasi uca, chupe yande yevi ãgua. Ipipe sui niha yañepisiro yande pihañemoñeta rerovaêhisa pipe. Co ivi pipendar tēi viharêhisa rumo manosa tēi vireco yandeu. <sup>11</sup> Pe rumo peñemosañño pe viharêhisa upe; ahe aviye Tũpa upe. ¡Pesepia ru co mbahe aviye vahe pe recocuer pipe oime vahe evocoi Tũpa remimbou pe viharêhisa sui cute! Supi eté rumo, peyapisaca iyavei pe querêhisa pipe peyoepi, pemboasi pe piha pipe ité co mbahe tēi oimese pe pãhuve, iyavei peyembosiquiye peico. Ichui che repia pota ité peye, iyavei pequerêhi ité mbahe moingatu ãgua. Sese pemboyepipi ité evocoi mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese. <sup>12</sup> Cuese aicuachiasse evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tũpa rovaque. <sup>13</sup> Co rese ore oroyemboviharete.

Iyavei oroviha catu Tito yembovihasa repiase. Esepia, pe avei niha opacatu pemboviha catu ité pe recocuer pipe. <sup>14</sup> “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachí eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. <sup>15</sup> Iyavei cūrítei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboetisave sereco. <sup>16</sup> ¡Ayeroya ité pe rese, sese aviha ité!

## 8

### *Ava querêhisa porerecosa mondo ãgua Jerusalén pendar upe*

<sup>1</sup> Che rivireta, cūrítei che amombehu potami pēu mara ehi mbahe tupri apo Tũpa ava viroyasar upe ivi Macedonia rupi. <sup>2</sup> Yepe ahe ava recocuer yavai eté yuvireco chupe secoãhasa pipe viña, ovihareteño rumo ipipe yuvireco; yepe iparaisu vahe pãve tēi, iporererecoño ité rumo yuvireco. <sup>3</sup> Supi eté oquerêhisa pipe omondo ité ocatugüer rupi; amove oseca iri mbahe güemimbotar rupi yuvireco. <sup>4</sup> Ahe, “Ore avei catu toroipãtivii ambuae Tũpa reroyasar” ehi yuvireco. <sup>5</sup> Ahe rumo oñocua iri ore

pihañemoñetasa yuvireco. Yande Yar upe rane oyemondo. Ipare Tūpa remimbotar rupi ēgüe ehi avei oreu yuvireco. <sup>6</sup> Evocoiyase ore aipo orohe Tito upe pēu: “Tomboyeapi iri co porerecosa monuha āgua ava upe” orohe. Esepia, yipindar ahe osose pe pāhuve, ahe pe pītivi imboipi āgua. <sup>7</sup> Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecuasa, pequerēhi ité Tūpa upe mbahe apo āgua iyavei ore raisu ité peye. Evocoiyase ēgüe peye aveira co nungar poroaisusa apo.

<sup>8</sup> Ndahei pe cuaisa pipe aipo ahe pēu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicuara, supi eté vahe pīha pe poroaisusa. <sup>9</sup> Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

<sup>10</sup> Pēu mbahe aviye āgua che ñehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo. <sup>11</sup> Cūritei pemboaviye catu pe porerecosa pe querēhisa yipindar pe reco vahe pipe; pemondoñora mbahe peicatugüer rupi. <sup>12</sup> Esepia, acoi que ava omondo pota vahe mbahe, Tūpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

<sup>13</sup> “Toyemombaraisu ava pītiviisa pipe yuvireco” ndahei rumo pēu. <sup>14</sup> Cūritei mbahe pe rembiereco eta pipe peipītivi catu ambuae ava ipane vahe mbahe yuvireco chupe. Virecomise mbahe, ahe avei pe pītivira yuvireco pēu mbahe ipanese. Evocoiyase pe recocuer oyoya tupri itera. <sup>15</sup> Inungar Tūpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

*Pablo omondo Tito indugüer reseve Corinto ve*

<sup>16</sup> Aviye Tūpa upe ombopihañemoñeta Tito pe rese inungar che pihañemoñetasa pe rese yepi. <sup>17</sup> Ahe viroya ité che ñehe. Güemimbotar rupi eté rumo iquerēhi oso āgua pe repia.

<sup>18</sup> Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa pīsirosa rese yuvireco. <sup>19</sup> Sese opacatu oiporavo yuvireco ore rupi iguata āgua ore pītivi vaherā avei co porerecosa reraso āgua. Ore ēgüe orohe oroico yande Yar mboetei āgua rese ‘toicua ore querēhisa pipe ité oroporopītivi yuvireco’ ore yapave. <sup>20</sup> Ore ndoropotai que ava ñehe tēira ore rese yuvireco co porerecosa monuhasa pipe sui. <sup>21</sup> Esepia, ore oroyapo pota mbahe aviye vahe, ndahei Tūpa rovaque güeraño, opacatu ava rembiepiave avei.

<sup>22</sup> Supi avei oromondo ambuae yande rivri. Ahe omboyecua ité oreu oquerēhisa opacatu mbahe güembiapo pipe. Ahe cūritei iquerēhi catu ité. Esepia, oyeroya ité pe rese. <sup>23</sup> Acoi oporanduse que ava Tito rese yuvireco pēu, “Ahe oyoya Pablo rese oporaviqui vahe pe pītivi āgua” peyeñora. Acoi oporanduse avei ambuae yande rivri rese yuvireco pēu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe. <sup>24</sup> Sese, pe recocuer cua āgua, pemboyecua catu pe poroaisusa supi eté vahe chupe yuvireco.

Evocoiyase toviroya ité che ayeroyase iyavei ayembovihase pe recocuer rese yuvireco.

## 9

### *Porrecosa imonuhapri Jesús reroyasar upe*

<sup>1</sup> Porrecosa imonuhapri Jesús reroyasar upe nara rese rumo ñañehe iri pëu. <sup>2</sup> Esepia, che aicua pequerêhi ité ipítivii ãgua. Evocoiyase che viharetesa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pítivii ãgua cuese ambuae araviter suive yuvireco” ahe yuvireco chupe. Evocoiyase pequerêhise ité ipítivii ãgua, ahese setaño ité oyemonguerêhi yuvireco. <sup>3</sup> Che rumo amondo co yande rivri yuvireco pëu cûritei ‘Ëgüe tehi tēi eme che ñehesa aviye vahe sesendar yuvireco’ viya pëu. Pe yemoingatu tupri ãgua ité aipo ahe pëu; <sup>4</sup> aní acoi arasose Macedonia pendar cheyeupi, sembiepiave ndapeyemoingatu vitei chira peico. Ëgüe peyese ore mochi guasu uca tiêtera peye. Esepia, che ayeroya ité pe rese. Pe avei evocoiyase pechîra. <sup>5</sup> Sese che pihañemoñeta yipindar añehe co mbosapi yande rivri upe yuvireco, ahe ranei ore renonde yuviraso ãgua pe piri pe pítivii ãgua co porrecosa aviye vahe monuha ãgua rese, acoi cuese pe remimombehugüer rupi. Evocoiyase ahe pe porrecosa pe remimonuha opara pemoingatu tupri ité pe avagüer mboyecua ãgua, ndahei chira rumo pe recatêhisa pipe.

<sup>6</sup> Peyemomahenduha co rese: acoi noñoti atimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá catu avei iha chupe. <sup>7</sup> Ñepeipei iya opihañemoñetasa rupi omondora oporrecosa Tüpa upe yuvireco, ndahei chira opiha víracuasa pipe tēi iyavei ndahei chiaveira ambuae ava ocuai pîratasa pipe tēi. Esepia, Tüpa osaisu ava oviharetesa pipe omondo vahe oporrecosa chupe. <sup>8</sup> Tüpa niha oicatu opacatu mbahe aviye vahe mondo ãgua pëu ari yacatu rupi pereco vahe rã opacatu mbahe ipane vahe pëu iyavei sumbirer pipe opacatu ambuae mbahe aviye vahe rese pe poropítivii ãgua. <sup>9</sup> Inungar icuachiapri pipe aipo ehi:

“Ahe iporereco ai iparaisu vahe rese yepi. Ahe mbahe aviye vahe sembiapo nocañi chietera” ehi.

<sup>10</sup> Tüpa niha ombou mbahe rãhi ava remitîra, mbahe semihura avei. Sese ombou catura mbahe pëu iyavei ombouvicha catura pe rembiapo aviye vahe ava pítivii ãgua. <sup>11</sup> Tüpa ombou catura opacatu mbahe pe rembiarecorã ava upe imondo catu ãgua pe avasa pipe. Ore orovirasose porrecosa pe remimbu yande rivireta upe, ahe evocoiyase, “Aviye ndeu” ehira Tüpa upe yuvireco. <sup>12</sup> Esepia, co pemondo vahe yande rivireta pítivii ãgua, ndahei peipítivii mbahe ipane vahe rese güeraño, ichui avei niha, “Aviye Tüpa upe” ehira yuvireco. <sup>13</sup> Ahe evocoiyase omboeteira Tüpa yuvireco. Esepia, co pe poropítivii isa pipe pemboyecua itera pe Cristo ñehe reroyasa peico. Ahe avei omboeteira Tüpa yuvireco. Esepia, pe pemondoño itera mbahe pe porrecosa chupe iyavei opacatu ambuae ava upe. <sup>14</sup> Evocoiyase ahe oyoquirã pe rese iyavei pe raisu etepirã yuvireco. Esepia, Tüpa pe pítivii eté oporvasasa pipe. <sup>15</sup> ¡Aviye Tüpa upe! ¡Esepia, ahe ombou mbahe tuvichã vahe aviye catu vahe yandeu, ndayaicatui vahe mombehu tupri ãgua!

## 10

*Pablo cuaita apóstol seco ãgua*

<sup>1</sup> Che Pablo añehe Cristo poroaisusa, seco asiñehisa pipe avei pëu. Amove ava pe pãhu pendar, “Seco mbegüemi tõi yande pãhuve oicose, amombri güecose rumo oñehe pĩratá iteanga” aipo ehi tõi yuvireco cheu viña. <sup>2</sup> Che rumo asose pe repia, ndaipotai che pĩratasa mboyecua ãgua pe pãhu pendar upe. Amove rumo ava pe pãhu pendar ipihañemoñeta: “Oyapo mbahe co ivi pipendar pihañemoñetasa rupi tõi” ehi yuvireco cheu. Sese che ayemoingatufio ité evocoi nungar ava upe añehe pĩrata vaheerã. <sup>3</sup> Supi eté, yepe co ivi pipe oroicove viña, ore rumo ndoroyapoi mbahe ava co ivi pipendar rembiapo nungar. <sup>4</sup> Esepia, ore yoepisa ndahei ava co ivi pipendar yoepisa nungar; orovireco rumo Tũpa pĩratasa mbahe tõi seco pĩrata vahe recopi ãgua ava aracuasa tõi recopi ãgua avei. <sup>5</sup> Ahe ipipe ore opa orosecopi yepoepi-episa iyavei opacatu semira-mira tõi vahe güeco ivate aisa pipe ndoicua uca potai vahe Tũpa recocuer ava upe. Iyavei opacatu ava pihañemoñeta raisa orosecopi Cristo reroya tupri ãgua yuvireco. <sup>6</sup> Iyavei ore oroyemoingatu ité opacatu ndiporeroyai vahe recocuer reroyi ãgua. Pe rane rumo peroya tupri.

<sup>7</sup> Pe rumo pemaheño tõi ahe recocuer rese. Acoi ava pe pãhu pendar oicua vahe Cristo rese güecosa, toicua tupri avei ore Cristo rese ore recosa yuvireco. <sup>8</sup> Yepe ayecomboivate che mborerecuasa rese pëu viña, ipipe rumo nachi eté. Esepia, yande Yar ombou mborerecuasa cheu pe recocuer moviracua tupri ãgua, ndahei rumo pe recocuer momara ãgua. <sup>9</sup> Aní chira, “Pablo yande mbosiquiye pota güembicuachía pipe” peye cheu. <sup>10</sup> Esepia, amove ava pe pãhu pendar, “Oñehe oicuachía vahe ombou yandeu, ahe ipĩratá, yavai avei yandeu; ahe ité rumo aní angai vahe secoi yande pãhuve iyavei iñehe ãgüe ehi tõi vahe” ehi yuvireco cheu. <sup>11</sup> Toicua catu ru yuvireco: eipeve oroso irise, inungar amombehu che rembicuachía pipe amombri che recose, ãgüe ahe tupri aveira yapo pe pãhuve.

<sup>12</sup> Ndoromboyoyai eté ore recocuer ava oyese tõi oñehe vahe recocuer rese. Esepia, omboyoyase oyese, ndoyapisacai eté yuvireco. <sup>13</sup> Ore rumo ore remimombehu pipe ndoroyapĩrasai chietera ore cuaita ore yeecomboivatesa pipe. Tũpa rumo güemimbotar rupi ombou ore poraviqui ãgua oreu, eipeve pe rese ore poraviqui ãgua avei. <sup>14</sup> Ore rumo ndoroyapĩrasai ore cuaita mombehusa icuachía pëu. Esepia, supi eté ore ranei eté oroico pe pãhuve, ore ranei avei oroviraso Cristo resendar ñehesa imombehu pëu. <sup>15</sup> Ndoroyapĩrasai avei ore ñehe pipe ambuae ava poraviquisa sui tõi. Ore rumo, orosãro ore oroporaviqui catu vaheerã pe pãhuve Tũpa rese pe yeroyasa rupi. Ndoroyapĩrasai avei rumo ore cuaita. <sup>16</sup> Iyavei orosãro ñehesa pĩsirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tõi oroyecomboivate oroico.

<sup>17</sup> Acoi ava oyecomboivate pota vahe, toyecomboivate catu yande Yar rese. <sup>18</sup> Esepia, acoi ava “che aico tupri” ehi vahe ndahei ahe osẽ tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osẽ tupri güecoãhasa sui.

## 11

*Pablo iyavei apóstol angahu tēi yuvirecoi vahe*

<sup>1</sup> ¡Peñemosá iriñomi tēira cheu co che ñehe ndayaracuái vahe nungar pipe che ñehese! <sup>2</sup> Esepia, che cherecatēhi ité pe rese, ahe tecatēhisa ou cheu Tūpa sui. Che aipota Cristo upe opomondo vaheṙā pe reco maranehisa pipe, inungar cuñatai ndaseco marai vahe imondopri cuimbahe upe imenda āgua. <sup>3</sup> Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pihañemoñetasa rerova āgua Cristo mboeteisa supi eté vahe sui. <sup>4</sup> Esepia, peñemosá ava oñehe vahe pēu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahecuer sui. Iyavei ambuae ñehesa pīsirosa resendar peipisi avei ndoyoyai vahe ore pēu oromombehu vahe rese. <sup>5</sup> Che rumo namohai eté ivi coti catu tēi aicora evocoi supi peguata vahe apóstol yemboivate ai tēi vahe sui. <sup>6</sup> Yepe ndayembohei che ñehe tupri āgua ité, che rumo areco che mbahecuaa, ahe oromboyecuaño ité opacatu ore rembiapo pipe pe rembiepiave.

<sup>7</sup> Ndamombehui eté niha ñehesa pīsirosa resendar pe cheu imboepi āgua; pe recocuer mboivate catu āgua rumo Tūpa rovaque ēgüe ahe che reco yemominisa pipe. ¿Mbahe tēi pīha ayapo ēgüe ahese pēu? <sup>8</sup> Aipisi ambuae ava Jesús reroyasar sui guarepochi, pe recocuer rese che poraviqui āgua. <sup>9</sup> Iyavei acoi aicose pe pāhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. Ēgüe ahe che pepoisupave pe mañecoēhi vichico. Ndopomañecoi chietera niha mbahe ipanese cheu. <sup>10</sup> Supi eté aicua supi tupri vahe mbahe Cristo suindar. Evocoiyase supi eté avei che aicua ndipoi chietera que ava ivi Acaya rupi virocua vaheṙā co che viharetesa che sui yuvireco. <sup>11</sup> ¿Mbahe rese pīha aipo ahe pēu? ¿Pe raisuēhisave pīha? ¡Tūpa rumo oicua che pe raisusa!

<sup>12</sup> Ayapoño itera rumo co mboraviqui cheu imboepiēhisa pipe vichico co ambuae pe pāhu pendar ava pe mbopaēhi āgua yuvireco. Esepia, che nungar yuvirecoi pota tēi viña. <sup>13</sup> Ahe rumo ndahei apóstol supi tupri vahe yuvirecoi, ahe oporombopa tēi, “Ore apóstol oroico” ehi tupri tēi yuvireco. <sup>14</sup> Yaicua niha Carugar rerecuar oporombopa. Esepia, oyeapo inungar Tūpa rembiguai amove. <sup>15</sup> Sese yaicua avei Carugar povri pendar oporombopasa pipe oyeapo inungar Tūpa ñehe mombehusar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

*Pablo oiporara mbahe-mbahe tēi apóstol güecosa pipe*

<sup>16</sup> Aipo ahe iri pēu: tipo eme ava “ndayaracuái” ehi vahe cheu. Acoi, “Ēgüe ehi oico” peyese cheu, tañeheño ayase ndayaracuái vahe nungar, che avei evocoiyase tayeecomboivateño vichico. <sup>17</sup> Ndahei rumo yande Yar che cuaisa pipe aipo ahe, che aracuaēhisa nungar pipe rumo aipo ahe che yemboivate aisa pipe. <sup>18</sup> Esepia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatera. <sup>19</sup> Esepia, yepe pe imbahecua vai vahe nungar peico, pemboyoyá catu pe querēhisa pipe ava ndayaracuái vahe. <sup>20</sup> Pe niha pemboyoyaño acoi que mbiguai tēi nungar pe rerecuo vahe, que mbahe pe rembiereco sui tēi oicove vahe, que pe mbopa tēisar, pe reroirosar, que

pe rova pete-petesar avei. <sup>21</sup> Che ch̄isa pipe aipo ahe co imombehu, jore reco mbegüe etepri evocoi nungar apo āgua p̄u!

Acoi oñehese ambuae ava oyeupendar mbahe rese oyemboivate aisa pipe, che avei evocoiyase ēgüe ahera. Aipo ahese rumo aviye ndayaracuai vahe nungar aico. <sup>22</sup> Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. <sup>23</sup> “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri t̄i aico yuvireco ichui, inupambri catu aico ichui yuvireco, setá rupi avei seniseni che yuca uca che mombaraisusa pipe yuvireco. <sup>24</sup> Cinco yupagüer judío che nupá iteanga treinta y nueve tupri tucumbo pipe yuvireco. <sup>25</sup> Mbosapi yupagüer che nupasa ivira pipe, ñepe ruپی evocoiyase che api-apisa ita pipe. Mbosapi yupagüer avei oñeapiv̄i iar ipive che guatasa rupi cheu, ñepe p̄itu, ñepe ari avei avevui t̄i para guasu aviter rupi vichico. <sup>26</sup> Setá aguata opacatu rupi, iyavei iai rupi mbahe-mbahe t̄i oime cheu, aico avei imonda rai vahe p̄ahuve; che mu judío mbahe t̄i vahe p̄ahuve avei aico iyavei ndahei vahe che mu p̄ahuve no. Aico avei tecua guasu pipe mbahe t̄isave, amombri vahesa rupi iyavei para guasu pipe, iyavei mbahe-mbahe t̄isave Jesús reroyasar angahu t̄i p̄ahuve aico. <sup>27</sup> Aporaviqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tiepor̄hi iyavei husei; setá rupi ndacarui; s̄ohisagüer avei aiporara, ndacheturucuai avei vichico.

<sup>28</sup> Ndahei co opacatu mbahe güeraño aiporara, ari yacatu rupi che mahenduhāño ité avei opacatu tecua rupindar Jesús reroyasar rese. <sup>29</sup> Oimese que oiporara vahe mbaheras̄icuer, che avei ayandu co mbaheras̄isa. Acoi que oimese oyavi uca vahe mbahe, che moñemoiro uca. <sup>30</sup> Iyase che yeecomboivate ai āgua cheu, co mbahe omboyecua vahe che p̄iratāehisa rese ayeecomboivate aiño itera. <sup>31</sup> Yande Yar Jesucristo Ru T̄upa, ahe imboeteipri apir̄hi secoi vahe, ahe oicua aipo che hesa supi tupri vahe. <sup>32</sup> Tecua Damasco ve aicose, mborerrecuar guasu Aretas povri pendar mborerrecuar oyocuai osundao co tecua roquendipive che rese osareco vāherā che roquenda āgua yuvireco viña; <sup>33</sup> oime rumo ava iruova guasu pipe che mogüeyi vahe tecua āchisa metana rupi yuvireco. Ēgüe ahe añemi ichui yuvireco.

## 12

### *T̄upa omboyecua Pablo upe mbahe queraisa nungar pipe*

<sup>1</sup> Ndipoi eté que ava mbahe oipisi vahe ahe ae t̄i oyemboeteisa pipe. Che rumo amombehuño itera mbahe asepiā vahe che quer nungar pipe iyavei yande Yar remimboyecua che aipisi vahe ichui. <sup>2</sup> Che aicua mbia Cristo reroyasar, omomba cūritei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihā güeraño tie revo. T̄upa rumo oicua. <sup>3-4</sup> Che rumo, “Ēgüe ehi tie revo oico” ahe aipo mbia upe, T̄upa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava t̄i upe ndipotasai imombehu āgua yuvireco. <sup>5</sup> Evocoi nungar mbia rese ayeecomboivatera; cheyese ité rumo ndayecomboivate ai chira. Che recocer nipiratai vahe reseño ēgüe ahera vichico. <sup>6</sup> Yepe che añehe tupri aira cheyese

viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombehugüer rese avei yuvireco che querve nungar mbahe mombehu rägüer sui’ viya. <sup>7</sup> Sese che yemboivate aiêhi âgua che quer nungar mbahe che pihamondii vahe rembiepiagüer rese Tûpa ombou teco asisa cheu. Ahe aviye yu che cutu guasu vahe, ndoyavii avei Caruguar mara-mara têi che rereco vahe. <sup>8</sup> Mbosapî yupagüer yande Yar upe aporandu ité teco asisa che sui serocua âgua rese viña. <sup>9</sup> Ahe rumo aipo ehi cheu: “Che porovasasa ndeu ambou vahe iyara nde ñemosa âgua. Esepia, che pîratasa oyecua catu ité ava nipiratai vahe recocuer rese” ehi. Evocoiyase che ayemboviha catuño itera che reco nipiratai vahe rese. Êgüe ehira Jesucristo pîratasa oyecua che rese. <sup>10</sup> Sese Cristo rese che recosa pipe aviyeño ité ndache pîratase, que ambuae ava oñehe raise che rese, que mbahe ipanese cheu, ambuae che reca-reca têise che reco momara âgua yuvireco iyavei que mbahe yavai vahe aiporase Cristo sui. Esepia, ayanduse che pîrataêhisa, ahese che pîrata catu.

*Pablo ipihañemoñeta ité Jesús reroyasareta Corinto pendar rese*

<sup>11</sup> Che ndayaracuai vahe nungar aico pëu, pe rese têi rumo êgüe ahe. Iya rumo peñehe tuprîra che rese viña. Esepia, yepe ndahei seco ivate vahe aico viña, co apóstol angahu têi rumo pe supi peguata vahe ndahei ivate catu vahe che sui yuvireco. <sup>12</sup> Che ñemosa tupri pipe mboraviqui ayapo pe pâhuve. Ayapo mbahe poromondiisa mbahe pesepia yesapiha rai vahe imboyecua âgua che supi eté vahe apóstol che recosa. <sup>13</sup> Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vaherã rese. ¿Ayavi tie che cuaita, êgüe ahese pëu? ¡Peñero sese cheu!

<sup>14</sup> Cûritei che ayemoingatu imombosapîsa rupi che so âgua pe piri. Iyavei ndopomañecoi chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepi omonuha guarepochi guahir upe, ndahei tahir têi êgüe ehi oyepi upe yepi. <sup>15</sup> Evocoiyase che querêhisa pipe amondora opacatu che mbahe areco vahe pe pîvivi âgua iyavei opacatu che recocuer rese ayemondo pëu pe reco tupri âgua. Che rumo opoaisu ité, pe tie revo ndache raisu tupri eté peye.

<sup>16</sup> Cheu mbahe ipanese, ndaporandui eté mbahe pereco vahe rese pëu. Amove rumo ava, “Yande mbopa âgua têi êgüe ehi Pablo yandeu” ehi têi yuvireco. <sup>17</sup> ¿Opombopa uca tie ava pëu che remimondo pipe? <sup>18</sup> Che Tito upe, “Eresora ipiri yuvireco” ahe. Supi avei ambuae yande rivri Tûpa reroyasar amondo. ¿Pembopa tie Tito? Oyoya tupri mbahe oroyapo Tûpa upe ñepi ore pihañemoñetasa pipe.

<sup>19</sup> Che rivireta, che rembiaisu, pe revo pepihañemoñeta ore oroicuachía co pëu, ore yoepi âgua têi. Êgüe ndorohei eté rumo. Ore rumo Cristo rese ore reco pipe oroñehe Tûpa rovaque. Opacatu ité niha mbahe oroyapo pe recocuer moviracua catu âgua. <sup>20</sup> Che asiquiye asose eipeve pe repia, aviyeteramo ndahei chira che piha rupi pe recocuer. Iyavei pe aviyeteramo êgüe peye aveira che repiase. Che asiquiye ité, oime revo pe pâhuve yepoepi-episa, pe pihañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pâhuve ava



oyeupeño tēi mbahe oipota vahe, imahechiroi ai vahe iyavei oñehe-ñehe tēi vahe ambuae ava rese, seco ivate ai vahe iyavei ndiporoviroyai vahe. <sup>21</sup> Asiquiye avei aso irise pe repia, omboura Tūpa pe sui che chī āgua, che mboyaseho uca tiētera peye setá pe cueseve peyemboangaipa vahe rese iyavei ndapemboasii etese mbahe tēi, yemboaguasa-guasa tēisa iyavei que mbahe pe remimbotarai peyapo vahecuer.

## 13

### *Poromboaracuasa iyavei mahenduhasa*

<sup>1</sup> Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapi oicua vahe sembiapo ai. <sup>2</sup> Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cūritei amombri aico pe sui, amombehu irira rumo co pēu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pāhuve, ndopoparaisuereco iri chira. <sup>3</sup> Esepia, pe peipota ité che recoāha āgua ‘¿Cristo ité pīha omoñehe uca?’ pe yapave cheu. Cristo ndaseco mbegüemi pēu mbahe apo oico. Ahe rumo omboyecua opīratasa pēu. <sup>4</sup> Supi eté niha ahe yaticasa, inungar ava nipiratai vahe. Cūritei rumo ahe oicove Tūpa pīratasa pipe. Ēgüe orohe avei ore seco pīrataēhisa sereco. Oroicose rumo sese oroico Tūpa pīratasa pipe pe rese hañeco āgua.

<sup>5</sup> Pemahecua tupri catu pe recocuer rese: ¿peico ité pīha pe Cristo rese yeroyasa pipe? ¿Ndapeicuai vo Jesucristo secoise pe rese, pesēse pe recoāhasa sui? <sup>6</sup> Pe revo peicuara ore ndorocañi tēi vahe oroico ore recoāhasa pipe. <sup>7</sup> Iyavei oroyerure pe rese Tūpa upe ‘toyapo eme mbahe tēi yuvireco’ ore hesave. Ndahei rumo ore ivate catu vahe mbahe tēi rasa pare mboyecuasave ēgüe orohe; co catu ‘toyapo mbahe aviye vahe yuvireco’ ore yapave, yepe pēu ndoyavii orocañi tēi vahe oroico viña. <sup>8</sup> Esepia, ndiyai mbahe supi tupri vahe amotarēhi āgua oreu; ēgüe ehi rumo sese catu ité oroñehe. <sup>9</sup> Sese orovihano ité norepīratase, ore rumo oroipota ité pe momirata; iyavei ore oroyerure catuño itera pe recocuer catupri catu āgua rese. <sup>10</sup> Aicuachía co che ñehe imondo pēu pe piri che so āgua renonde. Acoi asose, namboyecua pīratatai chira che mborerecuasa eipeve. Ahe niha yande Yar ombou vahe cheu pe reco momirata catu āgua, ndahei pe reco momara āgua.

<sup>11</sup> Imomba āgua, che rivireta, aipota peviharetera peico. Peseca avei pe reco tupri catu āgua peyeupe, peyemonguerēhi catu, oyoya guasu peico tupri avei peyese mbahe tupri pipe. Evocoiyase Tūpa oporoaisusa pipe, güeco tuprisa pipe avei secoira pe rese. <sup>12</sup> Pemombehu che mahenduhasa ñepepei-peyeupe pe yeovaupitesa pipe. <sup>13</sup> Opacatu ambuae yande rivri, Tūpa reroyasar avei omondo omahenduhasa yuvireco pēu.

<sup>14</sup> Peipisi yande Yar Jesucristo porovasasa, Tūpa poroaisusa iyavei Espiritu Santo tasecoi opacatu pe rese. Aipo rupive che ñehe pēu.

## PABLO REMBICUACHIA GALACIA PENDAR UPE GALATAS

*Pablo mahenduhasa Jesús reroyasar Galacia pendar upe*

<sup>1</sup> Che, Pablo, imondopri aico apóstol che reco ãgua. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. <sup>2</sup> Che, Pablo, iyavei opacatu Jesús reroyasar yuvirecoi vahe cohawe oroicuachia co ore ñehe pēu, pe opacatu Jesús reroyasar Galacia pipe peico vahe. <sup>3</sup> Tapeipisi yande Ru Tūpa, yande Yar Jesucristo porovasasa pe reco tupri ãgua. <sup>4</sup> Ahe acoi oyemondo vahe omano ãgua yande angaipá repirã. Ëgüe ehi cūrítei yande renose co ivi pipe mbahe-mbahe tēi sui yande Ru Tūpa remimbotar rupi. <sup>5</sup> ¡Imboeteipri apirēhi Tu tasecoi!

*Ndipoi ambuae ñehesa poropisirosa resendar*

<sup>6</sup> Che pihamondii etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro ãgua peico viña. <sup>7</sup> Supi eté ndipoi ambuae ñehesa pisirosa resendar. Ëgüe ehi rumo, oime ava pe mañeco tēi vahe pe mbopa ãgua ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. <sup>8</sup> Oimese rumo que ambuae ava oñehe vahe poropisirosa angahu tēi rese ndoyoyai vahe che ñehesa rese pesendu vahe yipisuive, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai iba pendar avei no. <sup>9</sup> Amboyupagüe iri, “Evocoi nungar ava upe toime ité Tūpa ñemoirosa” ahe.

<sup>10</sup> Aipo che he pipe, ndasecai ava tēi, “Co mbia aviye vahe” he ãgua cheu, Tūpa rumo aseca cheu aipo he ãgua. Esepia, java remimbotar rupi tēi mbahe ayapo vitesse, evocoyase ndahei chietera Cristo rembiguai aico viña!

*Mara ehi Pablo apóstol güeco ãgua*

<sup>11</sup> Che rivireta, tapeicua co ñehesa poropisirosa resendar amombehu vahe ava upe ndahei ava tēi pihañemoñetas. <sup>12</sup> Ndahei avei ava tēi che mbohe; Jesucristo ité niha oicua uca cheu.

<sup>13</sup> Pe niha pesendu yipindar che recocuer resendar, che mu juicio yembohesa rupi aguata vitesse aracaco. Che pīratasa pipe tēi aseca opacatu Tūpa rembiporavo Jesús reroyasar momara ãgua. <sup>14</sup> Ëgüe ahe che ayemboivate ai catu che mboetasa eta sui juicio yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico. <sup>15</sup> Tūpa rumo yipive che ha viteñiseve che poravo oyeupe nara. Iyavei oporoaisusa pipe che renoi güemimbotar rupi. <sup>16</sup> Ëgüe ehi ahe oicua uca Guahir cheu, che imombehu ãgua co ñehesa Tahir recocuer resendar ava ndahei vahe juicio upe. Ndasoi rumo ava tēi upe icua ãgua; <sup>17</sup> ndasoi avei Jerusalén ve yipive apóstol yuvirecoi vahe repia ãgua. Che rumo aso voi eté ivi Arabia ve. Coiyé ayevei tecua Damasco ve vitu.

<sup>18</sup> Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince arí rupi güerañomi tēi.

<sup>19</sup> Ndasepiai eté rumo ambuae apóstol. Yande Yar rivri Santiago güeraño asepia. <sup>20</sup> Tüpa oicua co mbahe aicuachía vahe pëu, supí tupri vahe ité.

<sup>21</sup> Ipare aso ivi Siria ve, Cilicia ve avei no. <sup>22</sup> Yande Yar reroyasar rumo oñemonuha vahe ivi Judea ve ndache cuai eté yuvireco. <sup>23</sup> Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo água, cūrítei omombehu Jesucristo reroya água oico” ehi, “Ahe acoi yipindar yande mocañi pota rai vahe oico” ehi yuvireco cheu. <sup>24</sup> Ahese, “Imboeteipri Tüpa tasecoi” ehi yuvireco che recocuer rese.

## 2

*Ambuae apóstol, “Aviye ité Pablo porombohesa” ehi yuvireco*

<sup>1-2</sup> Coiye catorce araviter pare, Tüpa omboyecua cheu Jerusalén ve che yevi água. Evocoyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opítara égüe ehi tēi vaherã. Evocoyase amombehu co ñehesa poropísirosa resendar chupe yuvireco acoi amombehu vahe ava eta ndahei vahe judío pãhuve. <sup>3-4</sup> Oime rumo amove yande rivri angahu tēi, ahe yuviroique mbegüe vahe ore pãhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore reroeyvi iri Moisés porocuitavri tēi yuvireco viña. Ahese che nduguer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi. <sup>5</sup> Ore rumo ndoroipotai eté semimbotar apo água yuvireco chupe. Esepia, ‘tovireco viteño oyese co ñehesa písirosa resendar supi tupri vahe yuvireco’ ore yapave pëu.

<sup>6</sup> Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuaita virecora ivate yuvireco viña. Che rumo nañecuñaroi chietera che recocuer sui. Esepia niha, Tüpa ndahei ava rete tēi osepia.) <sup>7</sup> Ahe rumo oicua yuvireco Tüpa che cuai oñehengagüer poropísirosa resendar mombehu água ndahei vahe judío yuvirecoi vahe upe, inungar omondo Pedro oñehengagüer poropísirosa resendar mombehu água judío upe. <sup>8</sup> Esepia, inungar Tüpa omondo Pedro upe apóstol seco água ava judío upe nara, égüe ehi avei imbou apóstol che reco água ava ndahei vahe judío upe nara.

<sup>9</sup> Sese Santiago, Pedro iyavei Juan, ahe chupe, “Oyemoviracua vahe Jesús reroyasar pãhuve” ehi yuvireco, ahe oicua yuvireco Tüpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei égüe ehi yuvireco. Iyavei ipiha rupi eté ore oroporaviqui vaherã ava ndahei vahe judío pãhuve oroico, inungar ahe oporaviqui judío pãhuve yuvireco. <sup>10</sup> Co reseño oporandu yuvireco oreu: “Peyemomahenduhami ava iparaisu vahe pítivi água rese” ehi. Yipive ité rumo che égüe ahe pota vichico yepi.

*Pablo oñehe pĩrata Pedro upe sembiavi rese Antioquía ve*

<sup>11</sup> Iyavei osose Pedro tecua Antioquía ve. Aheve oyavi güecocuer. Evocoyase añehe pĩrata sovai eté chupe mbahe sembiavi rese. <sup>12</sup> Esepia, yipindar ahe ocaru ndahei vahe judío piri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro

osiriño ichui osiquiyepave. Iyavei ndocaru iri ipiri. Esepia, ahe Jesús reroyasar judío yugüeru vahe “judío recocuer rupi yaguatara yande ñepisiro água” ehi vahe ité yuvireco viña. <sup>13</sup> Evocoiyase ambuae Jesús reroyasar judío avei osiripaño tēi supive yuvireco. Bernabé avei eté supive ēgüe ehiño tēi. <sup>14</sup> Che asepiase rumo, ndahoyoyai secocuer yuvireco co ñehesa poropĩsirosa resendar supi tupri vahe rese. Ichui Pedro upe añehe opacatu Jesús reroyasar rovaque: “Nde niha judío, ereico rumo inungar ndahei vahe judío. Cūritei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca água” ahe chupe.

*Judío, ndahei vahe judío oyoya oñepisiro yuvireco Cristo rese oyeroyasa pipe*

<sup>15</sup> Yande niha judío yande hasa suive yaico, ndahei ava ndahei vahe judío nungar yangaipa vahe yaico. <sup>16</sup> Cūritei rumo yaicua, ndipoi eté que ava seco catupri vahe Tūpa rovaque Moisés porocuita mboaviyesa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, “Co seco catupri vahe” Tūpa he água yandeu. Ēgüe ehi eté seroya pipe, ndahei acoi porocuita tēi reroyasa pipe. Esepia, ndipoi chietera que ñepeí ava seco catupri vahe Tūpa rovaque evocoi porocuita tēi aposa pipe.

<sup>17</sup> Yasecase yande reco catupri água Cristo rese yande yeroyasa pipe, ipipe yaicuae angaipa viyar yande reco, ¿Cristo pīha evocoiyase yande mboangaipa? ¡Aní eté! <sup>18</sup> Che amocañise mbahe, ipare rumo amopuha irise, che evocoiyase ayemboangaipa ipipe. <sup>19</sup> Esepia, ndaicatuisse Moisés porocuita reroya tupri che ñepisiro água, ahese ocañi tēi vahe aico ipipe. Ichui rumo Jesucristo reroyasa pipe asupiti Tūpa upe nara che recove água. Esepia, che aviye yaticapri aico Cristo rese. <sup>20</sup> Sese ndahe iri che ité aicove; Tūpa Rahir Cristo rumo che rese secoi. Sese ité ayeroya che retocuer pipe che recove água. Ahe niha oyemondo omano água che raisupave. <sup>21</sup> Naroiroi eté co Tūpa porovasasa. Esepia, ava seco catupri Tūpa rovaque porocuita tēi reroya pipe viña, evocoiyase Cristo mano agüer ēgüe ehi tēi etera viña.

### 3

#### *Porocuita iyavei yeroyasa*

<sup>1</sup> ¡Ndapembahecuai eté pe Galacia pendar! Pe ndoyavi ipaye vahe remimbopa peico. Oromombehu tupri niha pe rovai eté acoi Jesucristo curusu rese yatica agüer pēu. <sup>2</sup> ¡Pemboyecua co che porandusa cheu! ¿Moisés porocuita mboyeroya pipe pīha peipisi Espiritu Tūpa suindar, co ñehesa pesendu vahecuer reroya pipe tie? <sup>3</sup> ¡Ndapembahecuai eté! Yipindar Espiritu pipe pemboipi Cristo rupi pe guata água. ¿Ēgüe peye aveira pīha pe pĩratasa pipe tēi pe guata tupri água Cristo rupi cūritei? <sup>4</sup> ¡Ndape pĩtivimi eté vo acoi opacatu pe paradisusa Cristo recocuer rese? ¡Pe pĩtivimira tarahu viña! <sup>5</sup> Tūpa niha omondo oEspiritu pe rese iyavei oyapo poromondiisa pe pāhuve. ¿Mahera pīha oyapo? Esepia, co ñehesa pesendu vahe peroya ité, sese ēgüe ehi pēu ndahei Moisés porocuita tēi reroya pipe.

<sup>6</sup> Esepia, aracahe Abraham oyeroya ité Tūpa rese, ipipe sui Tūpa oipisi seco catupri vahe nungar oyeupe nara. <sup>7</sup> Sese iya ité peicuara opacatu

acoi oyeroya vahe Tūpa rese yuvireco, ahe Abraham suindar supi tupri vahe. <sup>8</sup> Iyavei Tūpa Ñehengagüer icuachiapri pipe omombehu ité senondeve Tūpa oipisi aveira opacatu oyese oyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasapri yuvireco nde sui” ehi. <sup>9</sup> Evocoyase Tūpa osovasara cūrteindar oyese yeroyasareta inungar Abraham aracahe.

<sup>10</sup> Acoi seco catupri pota vahe Moisés porocuita pipe tēi yuvirecoi vahe, ahe Tūpa ñemoirosavrive tēi yuvirecoira. Esepia, icuachiapri arachendar pipe aipo ehi: “Opacatu ava nomboaviyei vahe ité opacatu Tūpa porocuita icuachiapri pipe yepi, ahe ñemoirosavrive tēi yuvirecoira” ehi. <sup>11</sup> Sese, co omboyecua tupri yandeu ndahei Moisés porocuita reroyasa pipe tēi Tūpa, “Co seco catupri vahe” ehi ava upe. Esepia, icuachiapri arachendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi. <sup>12</sup> Moisés porocuita ndahoyoyai Cristo rese yeroyasa rese. Esepia, ahe porocuita aipo ehi: “Acoi ava oico pota vahe co porocuita pipe, tomboaviye tupri ité opacatu porocuita güecove āgua” ehi.

<sup>13</sup> Moisés porocuita mboaviyeēhisa pipe yacañi tēira viña. Cristo rumo yande renose yande cañi tēi rāgüer sui. Ahe ae opa oipisi ñemoirosa yande repirā. Esepia, icuachiapri arachendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. <sup>14</sup> Ēgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipipe sui yande opacatu yaipisi Espiritu imombepri yayeroyase Cristo rese cūrteitei.

### *Porocuita iyavei Tūpa güemimombegüer omboaviye vaherā*

<sup>15</sup> Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeí reseve oicuachise güemimbotar omombehu vahe, ahese ndipoi que ambuae ava omboyeho vaherā iyavei ndipoi que ambuae ava omboyepi iri vaherā. <sup>16</sup> Ēgüe ehi avei Tūpa remimombegüer Abraham upe aracahe. Esepia, oñehe ñepeí reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehii upe viña. Ēgüe ehi rumo, “Nde suindar upe ité” ehi ‘ñepeí ava’ ohesa pipe, ahe Tūpa Rembiporavo Jesucristo. <sup>17</sup> Co mbahe amombehu pota pēu: evocoi porocuita Tūpa ombou vahecuer cuatrocientos treinta araviter pare, ndoicatui chietera Tūpa ñepeí reseve Abraham upe omombehu vahecuer iyavei oñehe omboaviye vaherā mboyeho āgua. <sup>18</sup> Supi eté acoi Tūpa suindar ou vaherā porerecosa Moisés porocuita mboaviyesa pipe suise viña, ahese ndahei chiaveira Tūpa remimombegüer sui. Ahe rumo ñepeí reseve Tūpa remimombegüer rupi Abraham upendar porerecosa.

<sup>19</sup> ¿Mahera pñha evocoyase aviye Moisés porocuita? Esepia, ava poreroyaēhisa cua āgua Tūpa ombou oporocuita Moisés upe aracahe. Co porocuitavrive rumo ava yuvirecoi acoi oyepotase voi Abraham suindar Jesús Tūpa remimombegüer rupi. Yipindar rumo Tūpa oyocuai güembigui iva pendar oporocuita mombehu āgua Moisés upe aracahe

‘tomombehu evocoyase Moisés che porocuita opacatu ava upe’ oya-pave. <sup>20</sup> Ñepei ava rese oñemoñetase, ndipotasai ambuae imoingatu ãgua. Tũpa niha ñepei vahe secoi.

*Mbahe sui Tũpa ombou oporocuita*

<sup>21</sup> “Moisés porocuita co coti tẽi Tũpa remimombehugũer imboaviyepirã sui” aipo ndahei eté pẽu. Esepia, acoi Tũpa omondose que porocuita ombou vaheã tecovesa apirẽhi ava upe imboaviyesa pipe, evocoyase porocuita reroya pipe yande reco catuprira Tũpa rovaque viña. <sup>22</sup> Icuachiapri aracahendar pipe rumo omombehu ité co: opacatu ava inungar mbiguai tẽi oangaipa pipe yuvirecoi. Evocoi ãgũe ehi, Jesucristo rese yande yeroyasa pipe yasẽ vaheã ichui mbahe imombepri pisi ãgua.

<sup>23</sup> Yipindar rumo mbiguai nungar yaico Tũpa nomboyecua viteise Guahir rese yande yeroya ãgua. <sup>24</sup> Inungar chĩhivahemi tẽi, ãgũe yahe porocuitavrive yaico yipindar. Ahe porocuita rumo yande mbohe Cristo yu ãgua ‘toyeroya Cristo rese güeco catupri ãgua curi’ oya yandeu. <sup>25</sup> Cũritei rumo oime Jesucristo rese yeroya ãgua cute. Evocoyase ndahe iri ahe porocuitavrive yaico. <sup>26</sup> Pe niha opacatu Tũpa rahir peico Jesucristo rese yeroya pipe. <sup>27</sup> Opacatu pe ñapiramombri peico vahe Jesucristo rupi pe guata ãgua, secocuer avei pereco. <sup>28</sup> Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepei vahe nungar ité yaico Cristo rese. <sup>29</sup> Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tũpa remimombehu porerecosa yandeundar.

## 4

<sup>1</sup> Amboyoapi vitera co che ñehesa pẽu: inungar que ava omanose, oseyá ombahe eta guahir upe chĩhivahemise. Yepe ahe tahir opacatu mbahe yar secoira viña, ahe rumo inungar tupri mbiguai tẽi secoi vahe yepi. <sup>2</sup> Esepia, ahe guãrosar povrive secoi imboyeroya ãgua. Ocuacuase voi eté, opoira tu remimombehugũer rupi ichui. <sup>3</sup> ãgũe ehi avei yandeu. Yande chĩhivahemise, evocoyase mbiguai nungar yipindar vahe co ivi pipendar porocuitavrive yaico. <sup>4</sup> Oyepotase rumo ari imombepri, Tũpa ombou Guahir, ahe oha cuña sui; evocoyase ahe Moisés porocuitavrive secoi. <sup>5</sup> ãgũe ehi ou opacatu yande renose ãgua evocoi mborocuitavri sui Tũpa rahir ité yande reco ãgua. <sup>6</sup> Evocoyase Tũpa omboyecua Guahir yande recose ombouse Guahir Espiritu yande piha pipe, “¡Che Ru!” yande he ãgua chupe. <sup>7</sup> Sese yande Tũpa rahir ité yaico, ndahe iri cũritei mbiguai tẽi nungar. Tũpa rahir yande reco pipe ahe ombou aveira oporerecosa yande mahera.

*Pablo ipihañemoñetaño ité Jesús reroyasar rese oico*

<sup>8</sup> Yipindar tũpa angahu rembiguai tẽi peico Tũpa ité cuaẽhi pipe. <sup>9</sup> Cũritei rumo peicua Tũpa, ãgũe ehi rumo Tũpa ité oicua pe recocuer. Sese niha aipo ahe cheyeupe: “¿Mara ehi piha oyevi iri mborocuita tẽi pipe mbiguai tẽi güeco iri ãgua yuvireco?” ahe pẽu. <sup>10</sup> Esepia, pemboetei vite ari, yasi, araviter pieta eta tẽi peico. <sup>11</sup> ¡Che ayembosiquiye pe rese, “Che porombohesa revo ãgũe ehi tẽi vahe ipãhuve yuvireco chupe” ahe pẽu!

<sup>12</sup> Iyavei che rívíreta, aipota che recocuer moña peye. Esepia, cuese che asē Moisés porocuaíta povri sui inungar pe yípíndar ěgüe ahe vichico pe pãhuve. Ahe se ndapeyapoi eté mbahe cheu. <sup>13</sup> Peicua niha che yípíndar chembaheasise vichico, ahe se amombehu co ñehesa písírosa resendar pëu. <sup>14</sup> Yepe co che mbahearasísa yavai etepri pëu viña, pe rumo ndache roeroi eté peye iyavei ndache momboi peye. ěgüe ehi rumo aviye acoi Tũpa rembiguai eté che rereco peye viña iyavei aviye Jesucristo itera aico pëu viña no. <sup>15</sup> ¡Mahera ru cũritei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña. <sup>16</sup> ¡Evocoyase cũritei che amotarēhi tie peye acoi pëu mbahe supi tupri vahe mombehusa sui tēi!

<sup>17</sup> Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepēpi āgua tēi ore sui yuvireco pe querēhi āgua supi. <sup>18</sup> Aviye ité niha yande querēhise mbahe apo ambuae ava upe, mbahe aviye vahe apo āgua rumo. Ndahei chira pe pãhuve che recoseño pereco pe querēhisa. Iyacatu rumo pequerēhiño itera yepi. <sup>19</sup> Che rahireta, che ayembopiharasí ité vichico pe rese. Inungar cuña imembírasí vahe; ěgüe aheño itera ayemombaraisu vichico ‘toico rane ité Cristo sese yuvireco’ che yapave pëu. <sup>20</sup> Cũritei rāgüer opoepiara viña añehe tupri catu āgua pe rese. Esepia, “¿Mara ahera revo sereco yuvireco?” ahe pëu.

#### *Agar, Sara recocuer resendar yembohesa*

<sup>21</sup> Pe peroya pota vahe Moisés porocuaíta pe reco catupri āgua, pemombehumí cheu: ¿Ndapesenducuai tie co mborocuaíta aipo ehi vahe? <sup>22</sup> Esepia, aipo ehi: Abraham aipo víreco ñuvirío guahir, ñepei tahir aipo sembiguai Agar membri, ambuae tahir evocoyase sembireco Sara membri. <sup>23</sup> Evocoi sembiguai membri oha que ava tēi yesu nungar; sembireco membri rumo oha Tũpa remimombehugüer rupi eté. <sup>24-25</sup> Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tũpa remimbotar rese. Yípíndar sembiguai Agar omboyecua evocoi porocuaíta imondopri Arabia pípendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuaítavri ve yuvirecoi. ěgüe ehi avei opacatu Moisés porocuaíta pípendar, yuviroha mbiguai nungar güeco āgua, opacatu ichuindar ěgüe ehi vite yuvireco. <sup>26</sup> Yande rumo inungar-ra que Jerusalén íva pendar suindar yaico viña ěgüe yahe yaico mbiguaiēhi. <sup>27</sup> Esepia, icuachiapri arachendar pipe aipo ehi: “Eyembovihareté, cuña nimembí vahe; esapucái nde rorívetesa pipe, nde ndereiporarai vahe nde membri rasicuer. Esepia, acoi cuña seyapri imembí atí catura cuña omer víreco vahe sui” ehi.

<sup>28</sup> Che rívíreta, inungar Sara membri Isaac, ěgüe yahe avei tahir ité yaico Tũpa remimombehugüer rupi. <sup>29</sup> Co rumo aracahe sembiguai membri oha vahe ava tēi yesu nungar, ahe ndoyambotai sembireco membri acoi Espíritu píratasa pipe sui oha vahe; cũritei ěgüe ehi tupri avei. <sup>30</sup> ¿Mara ehi icuachiapri arachendar pipe? “Pemboyepēpi pe rēta sui cuña mbiguai tēi imembí reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe písí āgua yuvireco” ehi. <sup>31</sup> Sese, che rívíreta, yande ndahei sembiguai tēi membri

nungar yaico, yande rumo sembireco membri nungar yaico. Esepia, ahe ndahei mbiguai.

## 5

*Peyemoviracuaño ité Moisés porocuita pipe pe recoēhi āgua*

<sup>1</sup> Jesucristo niha ombou yandeu mbiguai tēi nungar sui yande sē āgua. Sese peyemoviracua mbiguai tēi pe reco iriēhi āgua.

<sup>2</sup> Pesendu che ñehe. Che, Pablo, aipo ahe pēu: acoi peyembocircuncida ucase, ahese ēgüe ehi tēi vahe Cristo pereco. <sup>3</sup> Che amombehu pota irimi pēu, que ava oyembocircuncida uca vahe, vireco niha ocuita opacatu Moisés porocuita mboyeroya āgua. <sup>4</sup> Pe pereco catupri pota tēi vahe Tūpa rovaque evocoi porocuita tēi reroya pipe, peyepēi ité Cristo sui. Evocoyase Tūpa porovasasa avei pemocañi tēi peyesui. <sup>5</sup> Yande rumo yande querēhisa pipe yayeroya yande reco catupri āgua rese. Ēgüe yahe Espiritu yande pītiviisa pipe iyavei Jesús rese yeroyasa pipe avei. <sup>6</sup> Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pītivi eté yande reco catupri āgua Tūpa rovaque. Co güeraño rumo yande pītivi Jesús rese yande yeroyasa. Ahe niha yande mboyeaisu uca.

<sup>7</sup> Peico tupri niha yipindar viña. ¡Ava ru ndoviroya uca iri mbahe supi tupri vahe pēu! <sup>8</sup> Ndahei eté rumo pe poravosar Tūpa ēgüe ehi pēu. <sup>9</sup> ¿Ndapeicuai vo acoi aipo ehi vahe: “Chíhimi pan mboapeposa oso panguā rese opacatu rupi oicahopa tupri yepi” ehi? <sup>10</sup> Che rumo ayeroya yande Yar rese pe pihañemoñeta āgua che pihañemoñetasa rupi. Tūpa rumo omboura oñemoirosa que ava pe mbopihañemoñeta yoavirati uca vahe upe.

<sup>11</sup> Che rumo, che rivireta, “Iya yayembocircuncida yande reco catupri āgua” ahe vitesse Jesús reroyasar upe viña, ahese revo ndipoi chira che amotarēhisar judío pāhuve, ahese avei ndipoi chira ñehesa curusu rese Jesús manosa resendar amotarēhimbar ipāhuve viña. <sup>12</sup> Evocoi ava pe mbopihañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepeí reseve yuvireco!

<sup>13</sup> Esepia, pe ore rivireta, Tūpa niha pe renoi mbiguai tēi nungar pe recosa sui pe renose āgua. Ndahei chira rumo pe remimbotarai tēi apo āgua, iyacatu rumo peñepitiviira pe yeaisusa pipe. <sup>14</sup> Esepia, opacatu evocoi mborocuita imboaviyesa yamboaviyese co ñehesa aipo ehi vahe: “Esaisu ambuae ava nde yeaisu nungar” ehi vahe. <sup>15</sup> Peyeseño tetei rene catu; peicua catu, aviyeteramo ēgüe peyese, pe recocuer pemomarapa tiētera.

*Yaguatara Espiritu remimbotar rupi, ndahei yande remimbotar tēi rupi*

<sup>16</sup> Pesendu che ñehe: Espiritu pīratasa pipe catu peico yepi. Iyavei peyapoi rene mbahe pe remimbotarai. <sup>17</sup> Esepia, co pe remimbotarai ndahoyoyai eté Tūpa Espiritu remimbotar rese. Ndoymbohe catui eté. Sese ndapeyapo ucai mbahe pe remimbotar aviye vahe peyeupe. <sup>18</sup> Acoi Espiritu ité pe rorogatase, ahese ndahe iri chiaveira Moisés porocuitavrive peico.

<sup>19</sup> Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa; <sup>20</sup> mbahe rahanga upe yerure tēisa, yembopayesa, ñeroirosa, ñehepoepi-episa iyavei



ambuae ava mbahe pota raisa; ñemoiro seraisa, yemboyaho-yahosa, pihañemoñeta yoyaēhisa, <sup>21</sup> iyavei ambuae ava mbahe pota raisa rese ñemoirosa, savaiposa, yembopieta tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tūpa mborecuasave yuvireco curi.

<sup>22</sup> Yayapose rumo Espiritu remimbotar, yande evocoiyase yayeaisura, yande rorivetera, yaicora mbahe tupri pipe, yande reco mbegüera, yaporoaicura yande reco aviyesa pipe, yamboycuara yande cuaita mboaviyesa, <sup>23</sup> yayemominiñora iyavei yande recorā rese yañearo tuprira. Evocoi nungar yayapose, ndipoi eté que mborocuita pipe yande yeamotarēhi āgua. <sup>24</sup> Jesucristo rese ité yuvirecoi vahe rumo, opa ité omombo güecocuera co ivi pipendar tēi oyesui yuvireco, güemimbotarai, opihañemoñeta raisa avei no. <sup>25</sup> Yande yaicose Espiritu pīratasa rese, ahese Espiritu rupi eté yaguarata.

<sup>26</sup> Ndayayemboivate ai chira. Esepia, ipipe sui yayeamotarēhi, yaipota rai avei yande mboetasa recocuer nungar yande reco āgua.

## 6

### *Peñepitiviñ ñepepepe*

<sup>1</sup> Che rivireta, acoi que Jesús reroyasar pe pāhu pendar oyavise güecocuer, pe peico vahe Espiritu rese, peipitiviñ secocuer moingatu āgua pe recocuer mbegüemisa pipe. Peicua catura rumo, avieteramo oyoya voi peyemboangaipa uca tiētera. <sup>2</sup> Peñepitivi-tiviñ catu que mbahe yavai rai vahe rese. Ēgüe peyese, Jesucristo porocuita pemboaviyera.

<sup>3</sup> Amove ava, “Che ivate catu vahe aico” ehi tēi. Ēgüe ehi rumo ahe ae oyembopa aipo ohesa pipe oico. <sup>4</sup> Sese niha ñepepepe eté yaicua tuprira yande recocuer. Aviyesa, evocoiyase sese yaviharetera. Ndahei acoi ambuae ava recocuer rese tēi yamboyyara yande recocuer. <sup>5</sup> Esepia, ñepepepe eté yande yacatu yareco yande cuaita imboaviye āgua.

<sup>6</sup> Acoi oyembohe vahe Tūpa ñehe pīsirosa resendar rese, tomondo ombohesar upe mbahe güembiereco ipitiviñ āgua.

<sup>7</sup> Peyembopa eme catu pe ae. Ndipoi chietera que ava viroiro vahe Tūpa ñemoirosa piñehisa pipe. Ēgüe ehi eté: yañotise mbahe, ichui avei mbahe yaipisira. <sup>8</sup> Acoi ava rumo oyapo vahe mbahe güemimbotarai pipe, ahe oipisira cañisa apirēhi vahe. Acoi oyapo vahe mbahe Espiritu remimbotar rupi, ahe oipisira tecovesa apirēhi vahe yuvireco. <sup>9</sup> Evocoiyase tayandecuera eme mbahe tupri aposa pipe. Esepia, acoi ndayandecueraise, yaipisira mbahe tupri apo repri. <sup>10</sup> Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

*Pablo, “Peicua catu pe mbocircuncida pota vahe sui” ehi iyavei ñehesa ipa vahe*

<sup>11</sup> ¡Pesepe co ñehesa ipa vahe che pove ité aicuachía tuvicha vahe pēu! <sup>12</sup> Acoi judío Jesús reroyasar pe mbocircuncida uca potaño tēi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pipe tēi ēgüe ehi yuvireco viña. Esepia, ndoipotai evocoi judío oamotarēhi co ñehesa Cristo atica agüer mombehu pipe yuvireco. <sup>13</sup> Acoi oyemboircuncida uca tēi vahe avei rumo nomboaviyei eté opacatu mborocuita yuvireco. Oipotata rumo pe mbocircuncida ucara

oyemboivate ai água pe cuaise evocoi nungar apo yuvireco. <sup>14</sup> Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoyase inungar omano vahe aico chupe. <sup>15</sup> Yepe que yayembocircuncidase revo, anise que ndayayembocircuncidaise viña, ndayande pítivii eté Cristo rese yaico tupri água. Co rumo aviye vahe ité yandeu: Tüpa yande recocuer mbopiasuse. <sup>16</sup> Opacatu yuvirecoi vahe co ñehesa che remimombhugüer rupi iyavei opacatu Tüpa upendar supi eté vahe toipisi Tüpa suindar tecó tuprisa iyavei iporoparisuerecosa yuvireco.

<sup>17</sup> Aviye, co pipe suive ndaipota iri que ava che mañeco tēi vaherã. Esepia, che areco che retecuer rese che apicha-picha agüer. Ahe omboye-cua Jesús rembiguai che recosa.

<sup>18</sup> Che rivireta, yande Yar Jesucristo tape rovasa opacatu. Aipo rupive.

## PABLO REMBICUACHIA EFESO PENDAR UPE EFESIOS

*Pablo mahenduhasa Jesús reroyasar Efeso pendar upe*

<sup>1</sup> Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pendar, Tūpa upendar Jesucristo reroyasar peico vahe. <sup>2</sup> Yande Ru Tūpa iyavei yande Yar Jesucristo tombou oporovasasa pe reco tupri āgua pēu.

*Cristo suindar porovasasa*

<sup>3</sup> Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. <sup>4</sup> Sese niha Tūpa yande poravo yipivé ité ivi apoēhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe. <sup>5</sup> Ipipe avei yipisuive yande pisi guahirguā Jesucristo yande písirosa pipe güemimbotar rupi. <sup>6</sup> Sese yande yasapucái chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. <sup>7</sup> Tūpa yande raisu eteprisa pipe yande písiro Guahir ruvi piyeresa pipe yande angaipa rese ñero āgua. <sup>8</sup> Yande raisu pipe avei ombou opacatu yande aracua āgua iyavei yande yapisaca āgua avei yandeu, <sup>9</sup> iyavei oicua uca güemimbotar yipisuive ndicuasai vahe yandeu co güembiaporā mboaviye āgua. <sup>10</sup> Oyepotase ahe ari imboaviye āgua, Tūpa opacatu mbahe iva pendar, co ivi pipendar avei opara omoingue ñepei reseve Guahir Cristo povriye.

<sup>11</sup> Cristo rese yaicose, Tūpa yande poravo yipisuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicua ité güemimbotar apo āgua <sup>12</sup> ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu. <sup>13</sup> Pe avei niha, pesenduse co ñehesa supi eté vahe písirosa resendar, Cristo peroya pe piha pipe sese peico vaherā. Tūpa ombou güemimombehugüer Espíritu Santo pe piha pipe ‘cheundar ité yuvirecoi’ oya. <sup>14</sup> Ipisisa pipe niha yaicua yande yaipisi vaherā yandeundar mbahe imoingatupri, acoi Tūpa opase oipísiro ava oyeupendar ‘ipipe sui tomboetei che reco ivatesa ava yuvireco’ oya.

*Pablo oporandu Tūpa upe mbahecuasa Jesús reroyasareta upe mondo āgua*

<sup>15</sup> Ayandu peyeroya tupri yande Yar Jesús rese iyavei pesaisu ité ava opacatu Tūpa upendar. <sup>16</sup> Sese ndapoi eté Tūpa upe, “Aviye ndeu” che hesa sui chemahenduhase pe rese che yeruresa pipe. <sup>17</sup> Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipipe peicua tupri catura semimboyecua iyavei peicua tupri catura yande Yar. <sup>18</sup> Ēgüe ahe ité aporandu Tūpa upe pe piha resape āgua rese. Ipipe peicua catura co pesāro vahe ivave pe reique āgua; chupe nara ité Tūpa pe peha. Iyavei peicuara co mbahe imondopirā iva pendar iporañete vahe Tūpa upendar yuvirecoi vahe upe. <sup>19-20</sup> Ipipe sui peicua tupri aveira Tūpa pīratasa ndopai vahe yande seroyasar yaico vahe rese. Co pīratasa ivaté vahe ité. Ahe pīratasa Tūpa omboyecua, ombogüerayevise Guahir Cristo omano vahe pāhu sui, iyavei omboguapise oacato coti

ivave. <sup>21</sup> Osecomboivate catu opacatu iva pendar, ivi pendar seco ivate vahe mborerecua-recuar tēi pīratasa sui iyavei opacatu cūruteindar sui, que oime vaheṛā sui avei. <sup>22</sup> Opacatu mbahe omondo Guahīr Cristo povrive, Tahīr upe avei ombou mborerecuar ivate catu vahe seco āgua opacatu viroyasar upe. <sup>23</sup> Opacatu yande seroyasar yaico vahe recocuer rese Cristo secoi. Evocoyase yande setecuer nungar yaico. Ahe opacatu rupi secoi.

## 2

### *Tūpa oporovasasa pipe yande pīsiro*

<sup>1</sup> Pe rumo, yīpīndar angaipa pipe peicose, inungar omano vahe peico Tūpa upe. <sup>2</sup> Co ivi pīpendar pīhañemoñetas rupi tēi peico iyavei ivate rupindar carugar rerecuar porocuita tēi avei peroya, ahe Jesús reroyasarēhi ombohe vahe. <sup>3</sup> Yīpīndar opacatu yande avei yaguata yande remimbotar rupi tēi yande recocuerai pipe. Yande pīhañemoñeta raisa rupi tēi avei yayapo mbahe. Sese Tūpa ñemoirosa yaipisira opacatu ambuae ava rupive viña. <sup>4</sup> Tūpa rumo yande paraisuereco ité, yande raisu etepri avei. <sup>5</sup> Yepe angaipa pipe yaico omano vahe nungar viña, ahe rumo ombou Guahīr yande recove āgua. Ahe oporovasasa pipe yande pīsiro. <sup>6</sup> Yande mbogüerayevi iri avei niha sese. Ipare seseve yande moingue oyepiri ivave <sup>7</sup> ‘tamboyecua opacatu iva pendar upe che porovasasa iyavei che poroaisusa tuvicha vahe che Rahīr rembiapo pipe sui curi’ oya. <sup>8</sup> Esepia, oporovasasa pipe pe pīsiro Jesús rese peyeroyase. Ndahei rumo pe recocuer sui tēi peñepīsiro, ahe rumo ombou porerecosa pēu. <sup>9</sup> Ndahei avei ava rembiapo sui tēi ou vahe. Evocoyase ndiyai chira yayemboivate ai ipipe. <sup>10</sup> Tūpa niha yande recocuer mohivi Jesucristo rese yande reco āgua mbahe icatupri vahe apo āgua. Ahe mbahe icatupri vahe yīpisuive Tūpa omoime yande rembiaporā.

### *Cristo ombou yande reco tupri āgua*

<sup>11</sup> Evocoyase peyemomahenduha yīpīndar pe recocuer rese. Ndahei rumo judío suindar peico: “Co ndoicuai vahe Tūpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tūpa rembiporavo imbocircuncidapri yaico” ehi yuvireco). <sup>12</sup> Peyemomahenduha yīpīndar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remimbotar semimombehu avei ombou vahe judío upe ipītivii āgua; ndaperecoi Tūpa iyavei ndaperecoi sārosa pe ñepīsiro āgua co ivi pipe viña. <sup>13</sup> Esepia, ahese amombri Tūpa sui peico. Cūritei rumo Jesucristo rese peico. Esepia, ahe vuvi pipe pe reru Vu Tūpa upe. <sup>14</sup> Ahe avei niha teco tupri yandeu. Esepia, ahe yande mboyesaha judío, ndahei vahe judío ñepi vahe nungar yande yeamotarēhiēhi iri āgua oyeupe. Yande ñemoirosa niha opa omocañi yande sui güetecuer mondose pipe. <sup>15</sup> Cristo omomba opacatu Moisés porocuita. Ahe oipota ñepi ava nungar teco piasu pipe yande reco āgua, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri āgua. <sup>16</sup> Evocoyase ahe ae omanose curusu rese, ombou yandeu yandeyeupe ñero āgua judío, ndahei vahe judío ñepi ava nungar Tūpa rupi yande reco āgua.

<sup>17</sup> Ahe ou omombehu co tecocuer piasu pëu pe amombri Tüpa sui peico vahe, omombehu avei ore namombri vahe judío oroico vahe upe ‘tiñero yuvireco oyeupe’ oya. <sup>18</sup> Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vaherã Tüpa rese Espíritu ñepei vahe pipe. <sup>19</sup> Sese pe ambuae ivi pendar peico vahe, ndahe iri amombri Tüpa sui peico cute. Cüritei rumo Tüpa upendar ité peico opacatu ambuae seroyasar reseve. Yande evocoyase ñepei reseve oñemu guasu vahe nungar yaico. <sup>20</sup> Pe inungar tūparo maranehi imopuhambri ihivipirã hari pendar peico; apóstol iyavei Tüpa ñehe mombehusar evocoyase inungar ihivipi yuvirecoi tūparo moviracua água. Jesucristo rumo inungar ita yipindar vahe imohivisa yandeu. <sup>21</sup> Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguã, ãgüe yahe ipehapi yaico yande Yar upe nara sese ité yande reco água. <sup>22</sup> Sese niha, Cristo rese peicose, pe ambuae viroyasar rese avei sētarã nungar peico. Ipipe Tüpa, oEspíritu pipe, secoira.

### 3

*Pablo cuaita ñehesa pīsirosa resendar mombehu água ava ndahei vahe judío upe*

<sup>1</sup> Sese, che Pablo, soquendapri aico cohabe Jesucristo recocuer mombehusa sui tēi. Ndahei vahe judío peico vahe pe recocuer aviyé água rese ãgüe ahe. <sup>2</sup> Peicua tupri revo co che poraviquisa Tüpa ombou vahe cheu oporovasasa mombehu água pëu nara. <sup>3</sup> Co ñehesa yipindar ndicuasai vahe güemimbotar resendar Tüpa omboyecua uca vahe cheu, ahe niha aicuachía chīhi pëu. <sup>4</sup> Co rese peyeroquise peicua tupri catura co che aracuasa Cristo recocuer resendar oyecua ramo vahe. <sup>5</sup> Co ñehesa icatupri vahe ndoicuai eté ava yuvireco aracahe. Cüritei rumo Tüpa oEspíritu pipe omboyecua güembipeha yuvirecoi vahe upe. Ahe sembipeha apóstol, iñehe mombehusar avei yuvirecoi. <sup>6</sup> Evocoi oyecua ramo vahe, ahe co: pe ndahei vahe judío upe avei Tüpa omboura judío upendar nungar tupri porovasasa co ñehesa poropīsirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pëu nara avei Tüpa remimombehugüer aracahendar peyeroyase Jesucristo rese.

<sup>7</sup> Yepe ndiyai cheu viña, Tüpa rumo che moingo opīratasa pipe ñehesa pīsirosa resendar mombehu água. <sup>8</sup> Che recocuer niha ivi coti catu opacatu ambuae Tüpa reroyasar sui viña, ahe rumo ombou oporovasasa co mboraviquisa ñehesa aviyé vahe Cristo recocuer resendar mombehu água ava ndahei vahe judío upe nara cheu. <sup>9</sup> Iyavei ombou che cuaitarã amombehu tupri vaherã opacatu ava upe opacatu mbahe Aposar pīhañemoñetasa yipindar ndicuasai vahe. <sup>10</sup> Ëgüe ehi cüritei oyesuindar aracuasa cua uca água viroyasareta recocuer rese opacatu mborerecuar guasu, seco pīrata vahe iva pendar upe. <sup>11</sup> Ëgüe ehi, Tüpa opīhañemoñeta ndopai vahe mboaviyé Guahir, yande Yar Jesucristo rese. <sup>12</sup> Sese yande yeroyasa suiño ité yaicatu yande yemboya água Tüpa rese yande siquiyeñhisa pipe. <sup>13</sup> Sese aní chira, ndapequerēhi iri Cristo rupi pe guata água, pe recocuer rese che yemombaraisusa sui. Iyacatu rumo che paradisusa pereco pe yemboviha água.

### *Cristo poroaisusa*

<sup>14</sup> Sese añenopiha yande Ru Tūpa rovaque. <sup>15</sup> Ichui serer pãve vireco yuvireco, opacatu seroyasareta iva pendar, ivi pendar avei ñepeí oñemu yuvirecoi vahe nungar. <sup>16</sup> Che aporandu chupe ‘tombou güeco porañetesa sui opĩratasa yuvireco chupe oEspĩritu pipe imoviracua ãgua’ viya pẽu. <sup>17</sup> Ēgũe ahe ayeroqui pe rese pe piha pipe Cristo rereco ãgua sese pe yeroyasa pipe. Iyavei pe poroaisusa pipe pe yemoviracua catu ãgua peyese <sup>18</sup> ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu ãgua yuvireco’ viya pẽu. <sup>19</sup> Che ayeroqui ahe poroaisusa peicua tupri catu ãgua rese (yepẽ ndayaicatui icuapa tupri ãgua yaico viña). Ipipe sui Tūpa tasecoi pe rese.

<sup>20</sup> Cũritei yamboetei yande Ru Tūpa. Esepia niha, ahe opĩratasa pipe ombouvicha catu itera mbahe yande porandusa sui, yande pihañemoñetasa sui avei yandeu. Esepia, opĩratasa pipe oporaviqui yande rese. <sup>21</sup> ¡Sese Ēgũe tehi imboeteipri Tūpa tasecoi seroyasareta recocuer sui, Jesucristo sui avei apirẽhi vaherã!

## 4

### *Ava Espĩritu rese oyoya guasu yuvirecoi vahe*

<sup>1</sup> Sese Cristo recocuer mombehusa sui che roquendasa pipe, “Peico tuprira pe cuaita rupi Tūpa pe renoisa pipe” ahe pẽu. <sup>2</sup> Peyemominira peico pe reco aviyesa pipe, pe reco mbegũesa pipe aveira iyavei peñemosañõ pe yeaisusa pipe peyeupe. <sup>3</sup> Peyapo opacatu pe recocuer pipe peico tupri vite ãgua peyepãhuve Espĩritu Santo pe pĩtiviisa pipe, pe reco tupriisa pipe avei. <sup>4</sup> Yaico ñepeí nungar Cristo rese iyavei yareco ñepeí Espĩritu. Ēgũe ehi avei Tūpa yande poravo ñepeí guãrosa rereco ãgua. <sup>5</sup> Oime ñepeí yande Yar, ñepeí yande yeroyasa, oime avei ñepeí poroãpiramosa. <sup>6</sup> Oime ñepeí Tūpa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

<sup>7</sup> Iyavei Cristo niha yande yacatu ñepeí-peí mbahecuasa ombou. <sup>8</sup> Sese aipo ehi icuachiapri aracahendar pipe: “Oso ivave, viraso secopipireta oyeupi; omondo avei porerecosa ava upe” ehi.

<sup>9</sup> ¿Mara oya aipo ehi: “Oso ivave”? Yipindar ogũeyi co ivi pipe. <sup>10</sup> Acoi ogũeyi vahe co ivi pipe oso ivate catusave ‘taico opacatu rupi’ oya. <sup>11</sup> Ahe niha ombou amove apóstol seco ãgua, ambuae upe ombou Vu ñehe mombehu ãgua, ambuae upe ombou ñehesa pĩsirosa mombehu ãgua, ombou avei ambuae upe viroyasar rãro ãgua iyavei iporombohe ãgua. <sup>12</sup> Ēgũe ehi ava viroyasar mbohe oyeupe mboraviqui apo ambuae viroyasar moviracua tupri catu ãgua. <sup>13</sup> Opacatu yaico tupri rane itera oyese Jesús rese yeroyasa pipe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. <sup>14</sup> Evocoyase ndahe iri chira chíhivahe tẽi nungar ova-ova tẽi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tẽi oporombohe vahe upe, que yande rerova pota vahe upe mbahe tẽi pipe. <sup>15</sup> Yande rumo evocoyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rereciar secoi. <sup>16</sup> Esepia, ahe yande mboya tupri oyese,

yande moenda tupri avei yande rereco, êgüe ehi ahe yande mboyemboya oyese ñepepe vahe nungar. Ñepepepe yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

*Cristo yande recocuer mbopiasu*

<sup>17</sup> Che aipo ahe Tüpa rer pipe pëu che pe cuaisa pipe: peico iri eme ava Tüpa cuaparëhi nungar. Ahe yuvirecoi vahe ité opihañemoñeta raisa pipe, <sup>18</sup> ndoicatui mbahe renducua tupri ägua iyavei ndovirecoi tecovesa Tüpa suindar oyese yuvireco. Esepia, ndoicuai Tüpa ñehe opihañemoñetaëhisa pipe yuvireco. <sup>19</sup> Ndoyuvinochi iri mbahe tëi apo ägua iyavei oyemondo ité mbahe tëi pipe. Ndosiquiyei eté opacatu güemimbotarai apo ägua yuvireco. <sup>20</sup> Pe rumo ndapeyembohei eté evocoi nungar mbahe rese Cristo rese peicose, <sup>21</sup> supi eté pesenduse porombohesa supi tupri vahe Jesucristo resendar iyavei peyembohesa secocuer rese. <sup>22</sup> Ahe yande mbohe yande recocuerai yipindar vahe reya ägua. Esepia, ahe naporai vahe yande mbopa tëi yande pihañemoñeta rai apo ägua. <sup>23</sup> Pesecuñaro catu pe yapisacasa. <sup>24</sup> Peicoño ité avei pe recocuer piasu pipe. Sese niha Tüpa yande apo yande reco ïvi tupri ägua yande reco maranehi vaherä supi tupri vahe pipe, inungar ahe.

<sup>25</sup> Sese ndaperemira iri chira, iya rumo peñehe ñepepepe mbahe supi tupri vahe rese peyeupe. Esepia niha, yande opacatu ñepepepe ava rete resendar nungar yaico.

<sup>26</sup> Peyemboangapai rene peñemoirose, iyavei ndiyai peñemoiro ari momba peico. <sup>27</sup> Peipota ucai rene Carugar upe peyeupe mbahe apo ägua.

<sup>28</sup> Acoi imonda rai vahe, timonda iri eme; toporaviquiño ava iparaisu vahe pitivii ägua.

<sup>29</sup> Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerëhi catu ägua yuvireco yande Yar rese. <sup>30</sup> Peyapoi rene mbahe Espiritu Santo mbovihaëhi ägua. Ahe niha Tüpa ombou yandeu 'toicua ava co cheundar oipisira ari ipa vahe pipe poropisirosa ñepepe reseve vahe yuvireco' oya.

<sup>31</sup> Peyepipi co nungar mbahe sui: pihaviracuasa, mbahe mboasi pīratasa, ñemoirosa, pe rãse aisa, opacatu pe ñehe rai, opacatu ambuae mbahe-mbahe tëi sui avei. <sup>32</sup> Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tüpa iñero Guahir Cristo rese pëu.

## 5

*Mara ehira ava Tüpa rahir yuvireco*

<sup>1</sup> Pe niha Tüpa rahir sembiaisu peico. Sese peyemonguerëhi catu secocuer moña ägua. <sup>2</sup> Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovëhepri Tüpa uve. Ahe aviye ité inungar mbahe siacua vahe chupe.

<sup>3</sup> Pe niha Tüpa upendar ité peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese. <sup>4</sup> Ndapeñehe rai chira que poromochisa rese, que êgüe ehi tëi vahe rese, anise que co coti-coti tëi vahe rese. Esepia, evocoi nungar ndahei mbahe aviye vahe. "Aviye ndeu" peye catuñora rumo Tüpa upe peico. <sup>5</sup> Peicua niha acoi oyemboaguasa vahe, oyapo

vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tūpa povrive iyavei Tahir Cristo povrive. <sup>6</sup> Ndapeyembopa ucai chira evocoi nungar ñehesa tecocuer ĕgüe ehi tēi vahe upe. Esepia, evocoi nungar mbahe apo pipe sui ou Tūpa ñemoirosa ava seroyasarēhi upe. <sup>7</sup> Sese ndapeyemboyai chira evocoi nungar ava rese.

<sup>8</sup> Peicua niha yipindar peico pītumimbisa nungar mbahe-mbahe tēi pipe. Cūritei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe. <sup>9</sup> Esepia, poroesapesa pipe yande recose, yayapo opacatu mbahe tupri ava upe yande reco ivi tuprisave, mbahe supi tupri vahe pipe. <sup>10</sup> Sese peyembohe catu mbahe Tūpa piha rupindar apo āgua rese. <sup>11</sup> Peyepēpi ité opacatu pītumimbisa nungar ava rembiapo ai, ĕgüe ehi tēi vahe sui. Iya peicua uca vaira co nungar mbahe. <sup>12</sup> Esepia, ahe sembiapo yemochīsa ñomipri tēi vireco yuvireco. <sup>13</sup> Acoi yamboyecua ucasa rumo evocoi nungar mbahe tesapesa nungar pipe, ahese oyecua tupri secocuer naporai vahe. <sup>14</sup> Esepia, co tesapesa omboyecua tupri opacatu mbahe recocuer yandeu. Sese aipo ehi:

“Peyemopoāse pe oque vahe nungar, peyepēpi omano vahe nungar pāhu sui.  
Ahese niha Cristo pe recocuer resapera” ehi.

<sup>15</sup> Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. <sup>16</sup> Peiporu catu ñepeipei ari yande Yar upe nara pe recovesese. Esepia, cūritei tecocuer co ivi pipe mbahe tēi. <sup>17</sup> Sese peico eme ndoyemboaracuai vahe; iya rumo peyembohe catu yande Yar remimbotar apo āgua. <sup>18</sup> Ndahei chira caguar tēi peico, evocoi mbahe ndoporopoisui mbahe tēi apo uca āgua. Peico catura rumo Espiritu Santo pe mbohesa pipe. <sup>19</sup> Peñehe catu Salmo pipe, opacatu Tūpa upendar sapucaisa pipe avei peyeupe; pesapucai, pemboetei avei opacatu pe piha pipe yande Yar. <sup>20</sup> “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

*Omenda vahe cuaitarā mbiguai reseve*

<sup>21</sup> Peyemboyeroya catu ambuae rese Cristo mboeteisa pipe peico.

<sup>22</sup> Cuña tomboyeroya omer, inungar yande Yar omboyeroya yuvireco. <sup>23</sup> Esepia, imer güembireco cuai āgua secoi, ĕgüe ehi avei niha Cristo viroyasar cuai āgua oico. Viroyasar Pīsīrosar avei secoi, inungar güetecuer ité sereco. <sup>24</sup> Evocoiyase inungar seroyasar omboyeroya Cristo yuvireco, cuña avei niha ĕgüe ehira opacatu omer mboyeroya yuvireco.

<sup>25</sup> Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara. <sup>26</sup> ĕgüe ehi yande recocuer moatiro yande angaipa sui i pipe Tūpa Ñhengagüer reroyasave. <sup>27</sup> Iyavei oyeupe yande rerecora yande reco catuprisa pipe iyavei yande reco quihaēhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. <sup>28</sup> ĕgüe ehi aveira ava güembireco raisu inungar ahe oyeaisu. Acoi ava osaisu yande güembireco, oyeaisu ité ahe ae. <sup>29</sup> Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua āgua, oñearo tupri avei. ĕgüe ehi avei Cristo opacatu viroyasar upe. <sup>30</sup> Esepia, chupendar ité



yaico setecuer nungar. <sup>31</sup> “Sese ava oseyara vu, osi güembireco rese güeco água; ñuvirío yuvirecoira ñepeí ava nungar.” <sup>32</sup> Ahe ñehesa pìpe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. <sup>33</sup> Ègüe ehi eté ñepeí-peí pesaisu pe rembireco pe yeaisu nungar. Iyavei cuña tomboetei tupri omer yuvireco.

## 6

<sup>1</sup> Chìhivahe, pemboyeroya pe yesupa, pe si avei yande Yar raisu pìpe. Esepia, ahe niha pe cuaita. <sup>2</sup> Co porocuita yipìndar omombehu vahe porovasasa pìsi água imboaviyesa pìpe aipo ehi: “Pemboeteira pe ru, pe si avei. <sup>3</sup> Ègüe peyese, pe rorivetera iyavei pe reco pãhumbucu catura co ivi pìpe” ehi.

<sup>4</sup> Iyavei pe iyésupa, pemoñemoiro ucai rene pe rahir. Iyacatu rumo pemboacua imboaracuasa tupri pìpe, imbohesave avei yande Yar upe saísusa pìpe.

<sup>5</sup> Pe avei no mbiguai, pemboyeroya catura pe rerecuar co ivi pìpe imboeteisave. Ichui pe siquiypave avei mbahe tupri pìpe mbahe peyapora inungar-ra Jesucristo upe ité mbahe peyapo vahe rã viña. <sup>6-7</sup> Pepraviqui tupri catu chupe nara, ndahei chira rumo pe repiaseño imboviha água tēi; pepraviquira rumo pe querēhisa pìpe Cristo rembiguai pe recosa pìpe opacatu pe rorivetesave yande Yar upe pe cuaita mboaviye tupri água. <sup>8</sup> Esepia, peicua Tūpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

<sup>9</sup> Iyavei pe serecuar, peico tupri aveira pe rembiguai upe pe recoasiēhisa pìpe. Peicua niha pe opacatu Tūpa pe rerecuar ivave chini vahe povrive peicose. Ahe niha ndayande raisu yoaviratí yande rereco.

### *Ava Cristo rese yuvirecoi vahe yoepisa resendar*

<sup>10</sup> Sese peyemoviracua catu yande Yar rese, ipĩratasa rese avei. <sup>11</sup> Peñearo tupri catu Tūpa pĩratasa pìpe pe yemoviracua água Carugar pe mbopa tēiēhi água. <sup>12</sup> Esepia, yande ndahei ava ité amotarēhisave yayepihamoviracua. Yande rumo yayepihamoviracua espíritu naporai vahe ndoyecuai vahe upe iyavei co ivi pìpendar Carugar ipĩrata vahe pĩtumimbisa pendar reroyaēhi água. <sup>13</sup> Sese peipisi catu opacatu mbahe Tūpa ombou vahe pēu pe yoepi água. Evocoyase yepe oime tēira mbahe tēi pēu viña, peyemoviracuaño itera rumo chupe.

<sup>14</sup> Ègüe peye aveira peyemoviracua catu ñehesa supi tupri vahe pìpe. Iyavei peyoepira pe reco ivi tuprisa pìpe. <sup>15</sup> Peyemoingatu voi Tūpa Ñehengagüer ñeroisa resendar mombehu água yepi. <sup>16</sup> Iyavei pereco catu Tūpa rese pe yeroyasa peyese. Ahe inungar sundao yoepisa. Ipipe peyoepira carugar uhu tata resendar nungar pe ãtoisa sui. <sup>17</sup> Poropĩsirosa inungar sundao ãca ndiru, ipipe tapeyoepi; peiporu avei Tūpa Ñehengagüer, ahe niha inungar quise pucu Espíritu vireco vahe. <sup>18</sup> Peyeroqui catu Espíritu pĩratasa pìpe ari yacatu rupi Tūpa upe opacatu yeruresa pìpe. Pemahemoha catuño ité pe yeruresa pìpe. Peyeroquiño ité avei opacatu ava Tūpa reroyasar rese yepi. <sup>19</sup> Peyeroqui avei che rese. Evocoyase Tūpa tombou che ñehes água cheu che siquiyeēhisa pìpe ñehesa ñepisirosa icuapi ramo vahe cua uca água ava eta upe. <sup>20</sup> Tūpa niha che cuai co ñehesa mombehu água. Ichui tēi cūritei soquendapri aico. Peyeroqui catu che rese che siquiyeēhisa pìpe co ñehesa mombehu água.

*Ñehesa ipa vahe*

<sup>21</sup> Yande rĩvri Tĩquico, yande rembiaĩsu, che pĩtivĩisar omboavĩye vahe ocuaita yande Yar upe mboravĩquisa rese, ahe omombehura opacatu che recocuer, mbahe che rembiapo avei pẽu. <sup>22</sup> Sese amondo eipeve pẽu ore recocuer mombehu ãgua ‘ĩpipe toyemonguerẽhi catu yuvĩreco’ viya.

<sup>23</sup> Yande Ru Tũpa iyavei yande Yar Jesucristo tomondo opacatu viroyasar upe teco catupri ãgua, iporoaisu ãgua, oyese yeroya ãgua avei. <sup>24</sup> Tũpa tosovasa opacatu yande Yar Jesucristo raisupar saĩsusa ñepi reseve vahe pipe. Aipo rupive.

## PABLO REMBICUACHIA FILIPO PENDAR UPE FILIPENSES

### *Pablo mahenduhasa Jesús reroyasar Filipo pendar upe*

<sup>1</sup> Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tüpa upendar Jesucristo rese peico vahe tecua Filipo ve, Jesús reroyasar rãrosar uve, seroyasar rese ihañeco vahe upe avei. <sup>2</sup> Yande Ru Tüpa, yande Yar Jesucristo tape rovasa pe reco tupri água.

### *Pablo yeruresa Jesús reroyasar rese*

<sup>3</sup> Pe rese che mahenduhasa pipe, “Aviye ndeu” ahe Tüpa upe yepi. <sup>4</sup> Iyavei che ayeruresa, ari rupi ayeroqui opacatu pe rese Tüpa upe che viharetosa pipe yepi. <sup>5</sup> Esepia, oyoya yañepitivii Jesucristo resendar ñehesa icatupri vahe rese, acoi pe seroya ramo suive. <sup>6</sup> Che aicua co Tüpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevise yande Yar Jesucristo.

<sup>7</sup> Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tüpa porovasasa yepe co che roquendasave aï, anise que co coti rupi aico mborerecuar rovai co ñehesa pĩsirosa resendar repi água iyavei amboyecua vaheerã ahe ñehesa supi tupri vahe yuvireco chupe. <sup>8</sup> Tüpa oicua ité che opoaisu etepri opacatu. Esepia, Jesucristo niha pe raisu uca cheu. <sup>9</sup> Che aporandu vite Tüpa upe che yeruresa pipe: “Toicua tupri oaracuasa pipe oyeaisu catu-catu iri água yuvireco” ahe pëu. <sup>10</sup> Ipipe sui peicuara mbahe aviye catu vahe poravo água yepi; ëgüe peye aveira pe recocuer moatiro água peico. Evocoyase ndipoi chira angaipa pe rese acoi Jesucristo ouse curi. <sup>11</sup> Perecora pe recocuer aviye vahe ité Jesucristo ombou vahe pëu Tüpa mboetei água.

### *Cristo Pablo recovesa ité secoi*

<sup>12</sup> Che rivireta, aipota peicuara co mbahe tõi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco. <sup>13</sup> Evocoyase opacatu mborerecuar guasu poraviquisa pendar iyavei opacatu ambuae ava oicuapa che roquendasu Jesucristo rupi che guata sui tõi yuvireco. <sup>14</sup> Iyavei setá etepri yande rivri che repiase soquendapri che recose yuvireco, oyemonguerëhi catu Tüpa Ñehengagüer mombehu água osiquiyeëhisa pipe. Yande Yar rese evocoyase oyeroyá catu yuvireco.

<sup>15</sup> Supi eté oime ava oñehe angahu tõi vahe Jesucristo rese che reroirosa pipe tõi. Oime rumo amove ava oñehe tupri Jesucristo rese opihañemoñeta tuprisa pipe. <sup>16</sup> Evocoi ava oñehe tupri oporoaisusa pipe, ahe oicua cohava che roquendase yuvireco, “Co ñehesa Tüpa ñehe pĩsirosa resendar, ahe supi eté vahe, ndahei temira tõi” ahese. <sup>17</sup> Evocoi ambuae ava Cristo rese oñehe angahu tõi vahe oyeupe nara tõi oipota mbahe. Ahe che reco momara pota catu co che roquendasave che rõi viteseve. <sup>18</sup> Mara etemo che areco aipo mbahe-mbahe tõi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira. <sup>19</sup> Esepia, che aicua co opacatu mbahe-mbahe tēi sui añepisiora pe yeruresa pipe iyavei che pītivira Jesucristo Espiritu. <sup>20</sup> Che aipota ité, asāro avei opacatu che recocuer sui che chīēhi āgua añehe vaheṛā opacatu che siquiyeēhisa pipe. Evocoyase yepe amanora, anise aicovera, tomboetei catu ava Cristo che recocuer repiase yuvireco. <sup>21</sup> Esepia, Cristo che recovesa ité seci; amanose rumo, aviyeño itera cheu. <sup>22</sup> Aicove vitesse co ivi pipe, aicatura aporaviqui tupri yande Yar recocuer rese. Evocoyase ndaicuai uma revo aviyeṛa cheu. <sup>23</sup> Ndaicatui co ñuvirio che pihañemoñetasa rereco: amove amano pota che so āgua ivave Cristo piri. Ahe aviye catura cheu viña. <sup>24</sup> Pēu nara rumo aviye catu aicove vitesse co ivi pipe. <sup>25</sup> Sese che aicua aicove vite vaheṛā pe pītivii vite āgua, pe guata tupri vite catu āgua iyavei pe viharete catu āgua pe Jesús reroyasa pipe. <sup>26</sup> Evocoyase che rereco vitera peye pe piri. Aheṣe pe viharetesa pipe, “Imboeteipri Jesucristo tasecoi” aipo peyera che repiase.

<sup>27</sup> Co catu toyoya tupri pe recocuer co ñehesa aviye vahe Jesucristo resendar rese. Evocoyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pīratasa resendar pe poreroyasave co ñehesa poropisirosa resendar rese. <sup>28</sup> Iyavei ndapeyembosiquiyei chira pe amotarēhimbar sui. Evocoyase ahe oicuaṛa yuvireco chupe ité Tūpa omondora imocañi āgua; pe rumo Tūpa pe pīsiora curi. <sup>29</sup> Supi eté ndahei Jesucristo recocuer reroya āgua güeraño Tūpa oipota pēu, sese pe yemombaraisu āgua avei oipota. <sup>30</sup> Esepia, pe, che avei oyoya tupri yaporaviqui pīrata yande amotarēhimbar pāhuve yaico. Iyavei acoi pesepia yipindar che aporaviqui pīrata che amotarēhimbar pāhuve vichico, iyavei cūritei peyandu mara ahe aporaviqui pīrata vite ipāhuve yuvireco.

## 2

### *Cristo yemominisa, seco ivatesa resendar avei*

<sup>1</sup> Iyavei Cristo pe monguerēhi, pe mboviha oporoaisusa pipe oico, Espiritu avei seci pe rese. Peyeaisu tupri iyavei pe yeaisusa pipe peñepitivi. <sup>2</sup> Sese che mboviha catu peye: perecora pihañemoñetasa ñepeṛi reseve, oyoya guasu avei peyeaisura, oyoya aveira pe pihañemoñetasa, ñepeṛi reseve mbahe pe remimbotar rese avei. <sup>3</sup> Ndapeyapoi chira mbahe peyeupe güeraño tēi. Ndapeyapoi chiveira mbahe pe yemovivate aisave. Iyacatu rumo pe reco yemominisa pipe ambuae aviye catu perecora peyesui. <sup>4</sup> Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri āgua.

<sup>5</sup> Inungar Cristo pihañemoñeta, ēgüe peye tupri aveira.

<sup>6</sup> Yepe ahe Tūpa recocuer vireco, “Taseya eme Tūpa recocuer areco vahe ivive che so āgua” ndehi.

<sup>7</sup> Opa ité rumo oseya, oyemboava inungar mbiguai tēi ou.

<sup>8</sup> Ēgüe ehi oyemomini.

Vu porocuaita reroyasa pipe ou iyavei omano poromochisa pipe curusu rese.

<sup>9</sup> Sese Tūpa omboivate catu, omondo avei sererguā ivate catu vahe opacatu ambuae rer sui.

- <sup>10</sup> Evocoiyase ahe terer ivate catu vahe renduse ‘toñenopiha opacatu iva pendar, ivi pipendar, opacatu omano vahecuer avei yuvireco’ oya.  
<sup>11</sup> Ichui toicua opacatu, “Jesucristo ité yande Yar” tehi yande Ru Tūpa mboetei āgua yuvireco.

*Jesús reroyasar tesapesa nungar yuvirecoi co ivi pipe*

<sup>12</sup> Evocoiyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe pāhuve cuese. Che aipota peicora písirosa pipeño ité Tūpa mboeteisave ichui pe siquiyesa pipe. <sup>13</sup> Esepia, Tūpa ombou pe querēhisa semimbotar apo āgua. Güemimbotar rupi avei ombou pīratasa imboaviye āgua pēu.

<sup>14</sup> Peyapo opacatu mbahe pe ñehe-ñehe tēiēhisa pipe, pe yepoepi-epiēhisa pipe avei. <sup>15</sup> Sese tipo eme mbahe pe rembiavi que pe reco raísa pe rese. Evocoiyase peicora Tūpa rahir ndayangaipai vahe ava mbahe-mbahe tēi oyapo vahe pāhuve. Ahe ipāhuve pe recocuer osesapera, inungar tataendi osesape pītumimbisave. <sup>16</sup> Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ēgüe ndehi tēi vaheṛā. <sup>17-18</sup> Jesucristo recocuer rese pe yeroyasa, ahe inungar mbahe seropovēhepri Tūpa upe. Aviyeteramo ichui tēi che yucara yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayembovihañora opacatu pe rese. Pe avei, pevihañora che rese.

*Pablo oicuachia Timoteo, Epafrodito recocuer resendar*

<sup>19</sup> Che ayeroya yande Yar Jesús rese amondo pihaivi vaheṛā Timoteo pe repia. Ahe omboyevise ñehesa pe recocuer resendar, ahese che aviharetera. <sup>20</sup> Iyavei ndipoi eté ambuae ava Timoteo nungar che pihañemoñetasa rupi tupri imahenduha vahe pe rese pe reco tupri āgua. <sup>21</sup> Esepia, opacatu oseca güemimbotar tēi apo āgua, ndosecai eté Jesucristo remimbotar yuvireco. <sup>22</sup> Pe niha peicua Timoteo reco tuprisa opacatu upe. Iyavei che pītivii Tūpa Ñehengagüer mombehu āgua, inungar chñivahe oipītivii oyesupa, ēgüe ehi che pītivii oico. <sup>23</sup> Sese che aipota imondo āgua pe repia acoi aicuase mara ehira che rereco yuvireco. <sup>24</sup> Che rumo ayeroya yande Yar rese aso pihaivi vaheṛā che teieté pe repia.

<sup>25</sup> Iyavei revo aviye catu co yande rivri Epafrodito amboyevira pe piri ahe pembou vahe che pītivii āgua mbahe cheu ipane vahe rese. Ahe che ndugüer oporaviqui pīrata vahe Tūpa upe. <sup>26</sup> Esepia, ahe pe repia pota ité opacatu. Iyavei ahe ehiño oico pēu peicuase imbaheasi. <sup>27</sup> Supi eté imbaheasi oico, seni eté omano viña. Ipare rumo Tūpa oiparaisuereco, ndahei ahe güeraño oipītivii, che avei che paraisuereco co viharēhisa yeapi-apiñoēhi āgua cheu. <sup>28</sup> Sese che amondo pota poyava ité pe piri sese pe yemboviha iri āgua, che mboviha iri āgua avei. <sup>29</sup> Peipisi tupri pēu iyepotase pe viharetesa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi. <sup>30</sup> Yande Yar rese oporaviquise che piri seni omano. Ahe niha oyemondo ité mbahe-mbahe tēi porara āgua che pītivii pipe. Esepia, pe ité ndapeicatui che pītivii peye.

### 3

*Oicoete ai vahe ité*

<sup>1</sup> Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri água pëu. Iyavei aviye catu ité pëu nara. <sup>2</sup> Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe. <sup>3</sup> Yande rumo imbocircuncidapri nungar supi eté vahe Tūpa mboyeroyasar yaico. Esepia, yayerure Espiritu pipe Tūpa upe; yayemboviha avei Jesucristo reroyasar yande recosa rese. Ndahei yande retecuer rese tēi yayeroya, <sup>4</sup>yepe che supi eté ayeroya catura ambuae ava sui evocoi nungar mbahe rese viña. <sup>5</sup> Esepia, che imbocircuncidapri aico ocho arí pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoyase ayembohe tupri fariseo aracuasa judío porocuita resendar rese vichico. <sup>6</sup> Ipipe sui tēi eté aseca-seca catu ayapo vaherã mbahe opacatu ava Jesucristo reroyasar upe vichico. Co porocuita reroyasa rese rumo ndipoi eté ava “mara” ehi vahe yuvireco cheu. <sup>7</sup> Opacatu co mbahe aviye ité cheu aracaco viña. Cūrítei rumo Jesucristo rese aicose, ãgüe ehi tēi vahe nungar areco. <sup>8</sup> Iyavei opacatu que ambuae mbahe aviye cheu viña, areco rumo inungar ití che Yar Jesucristo recocuer cuasa pipe. Opacatu ahe mbahe aseya Cristo rese che reco água. Supi eté Cristo rereco água areco opacatu ambuae mbahe ití nungar tēi <sup>9</sup> ‘taico sese’ che yapave. Ndahei porocuita mboaviyesa rese tēi aseca che reco catupri água, che rumo aseca Jesucristo rese che yeroyasa pipe sui ãgüe ahe vaherã. ãgüe ehi eté Tūpa che pisi seco catupri vahe nungar Cristo rese che yeroyasa pipe. <sup>10</sup> Che aipota ité Cristo cua tupri catu água. Iyavei areco pota pīratasa icuerayevi agüer resendar cheyese. Iyavei aipisi pota iparaisu agüer. Iyavei inungar ahe omano, ãgüe ahe pota avei. <sup>11</sup> ãgüe tahe avei che cuerayevi água omano vahe pāhu sui, ahe co che asãro vichico.

*Pablo osupiti pota ité güeco maranehi água*

<sup>12</sup> “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chietera. Che rumo aseca vite ahe tecocuer che recorã. Esepia, Jesucristo che pisi ité oyeupe nara. <sup>13</sup> Che rivireta, “Che ae tēi co tecocuer ihivi vahe opa ité ayapo vichico” ndahei chira pëu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité. <sup>14</sup> Esepia, Tūpa che renoi ivave che so água aipisi vaherã iporerecosa iva pendar Jesucristo rese che recose. Ahe niha aipota catu ité cheyeupe nara.

<sup>15</sup> Aipo rupi iya yande pihañemoñetara opacatu yande yaracua tupri vahe. Que revo yande pihañemoñetase que ambuae mbahe rese tēi, ahe Tūpa oicua ucara yandeu. <sup>16</sup> Co rese rumo yaicora yande yembohesa yareco vahe rupi tupriño ité.

<sup>17</sup> Che rivireta, peico che nungar iyavei pemahecua tupri ava ore recocuer moñasar rese. <sup>18</sup> Iyavei amombehu setá yupagüer pëu, cūrítei amboyevi iri che yasehosa pipe imombehu pëu. Setá ité oime ava co ñehesa Cristo mano agüer curusu resendar amotarẽhimbar. <sup>19</sup> Ahe rumo imocañipirã yuvirecoira curi. Oyemonguerẽhi opacatu mbahe tēi apo água rese yuvireco yepi. Ahe niha otūpa nungar ité vireco. Iyavei güeco ivate aisa pipe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité ipihañemoñeta yuvireco. <sup>20</sup> Yande rumo ivave nara ité yaico. Iyavei yasãro ité yaico iva sui ou vaherã yande

Pĩsĩrosar, ahe yande Yar Jesucristo. <sup>21</sup> Ahe opĩratasa pipe virecora opacatu mbahe opovrive. Ahe opĩratasa pipe avei osecuñaropara yande retecuer ěgũe ehi tĩi vahe, ahese inungar ahe setecuer sendi yai, nimarai vahe, ěgũe vahe aveira yande yaico.

## 4

### *Yayemboviha yande Yar rese yepi*

<sup>1</sup> Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imboupri peico cheu. Esepia, che vihasa ité peico.

<sup>2</sup> Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pipe yuvireco. <sup>3</sup> Nde niha che pĩtivii tupri vahecuer che poraviquisa rese eve. Eipĩtivii evocoi cuña. Esepia, ahe niha oyembopihaviracua ité che pĩtiviiise Tũpa Ñehengagũer pĩsirosa resendar mombehu ģgua yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tũpa cuachiar tecovesa apirĩhi vahe resendar pipe.

<sup>4</sup> Peyemboviharete ari yacatu rupi yande Yar rese yepi, “¡Peyembovihaño ité!” ahe aipo pũu. <sup>5</sup> Pemboyecua catu opacatu ava upe pe reco mbegũesa. Esepia, cõimi yande Yar yevi iri ģgua yandeu.

<sup>6</sup> “¿Mara ahera pĩha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tũpa uve, peporandura evocoi mbahe rese iyavei, “Aviye ndeu” peyera chupe. <sup>7</sup> Evocoiyase Tũpa omondora gũeco tupriisa pũu, pe Jesucristo rese peico vahe. Co teco tupriisa niha aviye catu ité opacatu ava pihañemoñetasa sui. Ipipe sui Tũpa osãrora pe piha, pe pihañemoñetasa avei pũu.

### *Yandepihañemoñetara opacatu mbahe aviye vahe rese*

<sup>8</sup> Co ipa, che rivireta: yande pihañemoñetara opacatu mbahe supi tupri vahe rese, poromboetei ģgua rese, mbahe ihĩvi vahe rese, mbahe maranehi rese, mbahe yande mboviha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteipri vahe rese avei.

<sup>9</sup> Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoiyase Tũpa gũeco tupriisa reseve secoira pe rese.

### *Filipo pendar porerecosa Pablo upe*

<sup>10</sup> Aviharete yande Yar rese. Esepia, pemahenduha irimi che rese pe porerecosa mbou ģgua cheu. “Sesarai yuvireco che sui” ndahei chira pũu. Pe rumo yipindar ndapeicatui eté che pĩtivii ģgua peye. <sup>11</sup> “Ipane mbahe cheu” ndahei chira pũu. Esepia, ayembohe che viharete ģgua mbahe che rembiereco rese. <sup>12</sup> Aicua mara yahe yande paradisusa pipe yaico, aicua avei mara yahe mbahe rereco ati ģgua. Ayembohe avei che viha ģgua opacatu mbahe oimese cheu, que chehĩtarose, ndache riepoise, que oimese sumbire vahe mbahe cheu, que mbahe ipanese cheu. <sup>13</sup> Aicatu opacatu mbahe uve che yemoviracua ģgua. Esepia, Cristo ombou che pĩrata ģgua. <sup>14</sup> Pe rumo peyapo mbahe aviye vahe cheu che pĩtivii eteprisave peye mbahe-mbahe tĩi oimese cheu.

<sup>15</sup> Iyavei pe Filipino pendar peicua avei acoi yipindar peipisise pĩsĩrosa resendar Tũpa Ñehengagũer acoi che sose Macedonia sui, ndipoi eté Jesús reroyasar ambuae tecua pendar iporereco vahe yuvireco che rese. Pe gũeraño pembou pe porerereco, “Aviye” pe hesa pipe che pĩtivii āgua. <sup>16</sup> Iyavei aicose Tesalónica ve, pembou pe porerereco cheu ñuvirio yupagũer che pĩtivii āgua. <sup>17</sup> Ndachepihañemoñetai mbahe arocuaño tẽi vaheã pe sui. Che rumo aipota Tũpa omboyevira pẽu co pe porerereco pembou vahe cheu. <sup>18</sup> Che opa aipisi pe porerereco Epafrodito upe pembou vahe. Evocoyase oimeño ité iyavei sumbire vite cheu. Ahe pembou vahe cheu aviye ité, inungar itaisi siãcua vahe, iyavei inungar mbahe seropovẽhepri aviye vahe Tũpa upe. <sup>19</sup> Evocoyase yande Ru Tũpa, ombahe eta porañete vahe sui omondora opacatu mbahe ipane vahe pẽu Jesucristo rese oime vahe. <sup>20</sup> ¡Ēgũe tehi timboeteisa yande Ru Tũpa! ¡Ahe apirẽhi vahe secoi yepi!

*Ñehesa ipa vahe*

<sup>21</sup> Aviye, pemombehu che mahenduhasa opacatu Tũpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pẽu. <sup>22</sup> Iyavei opacatu ambuae yuvirecoi vahe cohave Jesús reroyasar iyavei acoi mborerecuar guasu rẽtave yuvirecoi vahe, ahe ité avei omondo omahenduhasa yuvireco pẽu.

<sup>23</sup> Yande Yar Jesucristo tape rovasa opacatu. Aipo rupive.



## PABLO REMBICUACHIA COLOSA PENDAR UPE COLOSENSES

*Pablo mahenduhasa Jesús reroyasar Colosa pendar upe*

<sup>1</sup> Che, Pablo, Jesucristo apóstol aico Tūpa remimbotar rupi yande rīvri Timoteo reseve. <sup>2</sup> Co aicuachía pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri āgua pēu.

*Pablo yeruresa Jesús reroyasar rese*

<sup>3</sup> Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese. <sup>4-5</sup> Esepia, oroyandu acoi oyepota ramosē Tūpa ñehe supi eté vahe, aviye vahe pīsirosa resendar pēu, peyapīsaca tupri sese. Ipipe sui peyeroya ivave pe reique āgua Tūpa porerecosa pisi āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi. <sup>6</sup> Co ñehesa imombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipīndar Tūpa porovasasa resendar ñehesa, ipipe sui peicua tupri catu ahe porovasasa supi eté vahe. <sup>7</sup> Co ñehesa yandē rembiaisu yandē mboetasa Epafra pe mbohe. Ahe mbia yandē Yar Jesucristo rese oporaviqui vahe ore rupi, ocuaita vīroya tupri vahe pe pāhuve. <sup>8</sup> Ahe omombehu oreu Espīritu pipe pe ore raisusa resendar.

<sup>9</sup> Sese avei ore aipo nungar rendu ramosēve ndoroyeroquipai pe rese. Oroyeroqui, oroporandu pe rese ‘toicua tupri opacatu Tūpa remimbotar ombahecuasa Espīritu suindar pipe, senducua tupri pipe avei yuvireco’ ore yapave pēu. <sup>10</sup> Ipipe sui tapeguata tupri yandē Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tūpa recocuer peico. <sup>11</sup> Iyavei tombou catu pe momirata āgua güecocuer pīratasa pipe sui. Evocoyase oimese que mbahe tēi pēu, peñemosañora pe reco mbegüesa pipe. <sup>12</sup> “Aviye ndeu” peyera pe viharetasa pipe yandē Ru Tūpa uve. Esepia, ahe omoingatu pe recocuer peipisi āgua iporerecosa oime vahe rā opacatu sembiporavo upe acoi yuvirecoi vahe Tūpa poroesapesa pipe. <sup>13</sup> Ahe niha yandē pīsiro Carugar povri sui. Ēgüe ehi yandē reraso Guahir güembiaisu povrive. <sup>14</sup> Ahe Tahir yandē pīsiro iyavei yandē angaipa rese iñero yandēu.

*Jesús omano curusu rese Tūpa upe opacatu mbahe moingatu āgua*

<sup>15</sup> Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipīsuive ivate catu vahe opacatu mbahe yapopri sui. <sup>16</sup> Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipipe sui opacatu mbahe yapopri, chupe nara avei. <sup>17</sup> Ahe oicove yipīsuive aracahe opacatu mbahe reimeēhi viteseve. Ahe avei omoime vite opacatu mbahe yandēu. <sup>18</sup> Iyavei ahe niha yandē rerecuar tenonde secoi yandēu opacatu seroyasar yaico vahe. Esepia, ahe rane yipīndar vahe iyavei ahe rane avei ocuerayevi. Evocoyase ahe ivate catu vahe opacatu sui. <sup>19</sup> Esepia, Tu

oipota opacatu güecocuer reseve secói āgua sese yepi. <sup>20</sup> Iyavei ‘che Rahir recocuer pīpe sui taroyevī iri opacatu mbahe cheyeupe ivi pīpendar, iva pendar avei’ oya. Ēgüe ehi Jesús oipiyere vuvī curusu rese Tūpa upe opacatu mbahe moingatū āgua.

<sup>21</sup> Yipīndar pe pīhañemoñeta raisa pīpe sui tēi amombri Tūpa sui peico yamotarēhisa pīpe mbahe pe rembiapo ai rese. <sup>22</sup> Cūritei rumo Tūpa iñero pēu pe reroyevī oyeupe Cristo mano pīpe. Ahe niha ēgüe ehi Vu rovai ipēhapri pe rereco oyeupe nara, pe reco maranehi āgua mbahe aviēhisa pīpe ava rovaque. <sup>23</sup> Ēgüe peye āgua rumo peyemovīracuaño itera Cristo rese pe yeroyasa pīpe yepi. Ndapeyepēpī chiaveira mbahe oime vaheṛā rese pe yeroyasa sui pesendu vahe co ñehesa ñepisirosa resendar pīpe. Ahe imombehusa opacatu ivi rupi. Che niha Pablo, icuaipri, aico co ñehesa mombehu āgua.

*Pablo icuaita Jesús reroyasar rese hañeco āgua*

<sup>24</sup> Cūritei aviha pe rese che yemomborarasa pīpe. Ēgüe ahe iporara che rete rese cohave vichico. Ēgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico. <sup>25</sup> Jesús reroyasar pītivī āgua niha Tūpa che cuai. Sese amombehu opacatu iñehengagüer pēu pe reco tupri āgua rese. <sup>26</sup> Ahe ñehesa aracahe suive ndicuasai vahe ité. Cūritei rumo Tūpa omboyecua viroyasar upe. <sup>27</sup> Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secói vahe. Co yande remiaro yareco vaheṛā teco ori porañete vahe curi. <sup>28</sup> Ore niha Cristo recocuer oromombehu opacatu ava upe. Orombohe avei ava yaracua tupri āgua ore aracuasa pīpe ‘toyuvirecoi tupri ité Cristo rese Tūpa rovai’ ore hesa pīpe. <sup>29</sup> Co rese niha che aporavīqui etēpri opacatu Cristo pīratasa pīpe.

## 2

<sup>1</sup> Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparēhi recocuer rese avei <sup>2</sup> ‘toyemonguerēhi catu, toyemboyoya guasu oyeaisusa pīpe yuvireco’ viya. Iyavei ‘senducua tupriṣa pīpe toyuvirecoi mbahe tupri pīpe’ viya opacatu pēu. Esepia, ichui avei peicua tupriṣa co mbahe imboyecuapi ramo, ahe niha Cristo. <sup>3</sup> Ahe vireco opacatu mbahe yande mboaracua āgua, mbahe renducua tupri āgua avei. <sup>4</sup> Aipo mbahe amombehu pēu ava oñehe tupri aisa pīpe tēi pe mbopaēhi āgua. <sup>5</sup> Iyavei yepe amombri aico pe sui viña, pe rese chemahenduha pīpe rumo aicoveño pe reseve yepi. Aicua peguata tupri aise pe reco iṣisa pīpe, ndapeyepēpīse co coti rupi Jesucristo reroyasa sui. Sese che mbovihareteño ité peye.

*Jesús suindar tecocuer pīasu*

<sup>6</sup> Evocoiyase inungar acói peipisi Jesucristo pe Yarā, ēgüe peye aveira peico sese ari yacatu rupi <sup>7</sup> pe yemovīracuasa pīpe. Pe yembohesa rese peyemomirata catura Cristo rese pe yeroyasa pīpe. Iyavei, “Aviye ndeu” peye itera Tūpa upe ari yacatu yepi.

<sup>8</sup> Peicua catu, peyembopa ucai rene aracahendar tēi ava aracuasa pīpe. Esepia, ahe ēgüe ehi tēi vahe, ava suindar tēi yembohesa, ivi pīpendar ava seco ivate catu vahe pīhañemoñetasa tēi. Ndahei Cristo suindar porombohesa.

<sup>9</sup> Esepia, Cristo vireco opacatu Vu Tūpa reco oyese. <sup>10</sup> Evocoiyase pe pereco Tūpa reco Cristo rese peicose. Ahe opacatu mborerecuar ivi pīpendar iyavei iva pendar rerecuar secōi. <sup>11</sup> Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe virocua pe recocuerai pe sui. <sup>12</sup> Pe āpiramosa pīpe ndoyavii pe recocuerai ñotimbri Cristo reseve. Ēgüe ehi avei ndoyavii pe recocuer ocuerayevi vahe seseve avei, peyeroyase Tūpa pīratasa rese. Ahe niha ombogüerayevi vahe Guahir omano vahe pāhu sui. <sup>13</sup> Pe niha acōi cuese omano vahe nungar peico Tūpa upe pe angaipa pīpe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei iñero pe angaipa rese pēu. <sup>14</sup> Ahe yande cañi rāgüer rumo opa ombōepi. Esepia, yande iporocuaita pīpe yaico imboaviye āgua viña, evocoiyase imocañipri tēi yaico ipovrive viña; ombou rumo Guahir curusu rese yatica āgua yande cañi rāgüer sui yande renose āgua. <sup>15</sup> Ēgüe ehi ahe omano pīpe curusu rese carugar, ipovri pendar mborerecuareta reseve secōpi. Ēgüe ehi seco reroyi, inungar vavasa pendar ipisipri serasosa opacatu ava rembiepiave.

*Peseca iva pendar mbahe pe recocuer upe nara*

<sup>16</sup> Evocoiyase toñehe-ñehe tēi eme que ava pe rembihu rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbituhusa avei no. <sup>17</sup> Esepia, opacatu co mbahe, ahe yipendar vahe, “Ēgüe ehira Cristo ou” hesa tēi yandeu. Co rumo Cristo ité cute. <sup>18</sup> Peyapisacai rene acōi ava “ndapeipisi chira porerecosa iva pendar ndaperoyaise ore ñehe” ehi tēi vahe rese pēu. Acōi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepia che quer nungar pīpe iva pendar mbahe” ehi tēi. Esepia, ahe oyemboivate ai oaracua rai tēisa pīpe yuvireco. <sup>19</sup> Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoiyase ahe omboyemboya tupri oyese, ñepe vahe nungar vireco oyeupe Vu Tūpa remimbotar rupi.

<sup>20</sup> Pe omano vahe nungar peico Cristo rese. Evocoiyase ndahe iri co ivi pīpendar pihañemoñetasavrive peico. ¿Mahera evocoiyase peroya vite co ivi pīpendar porocuaita ēgüe ehi tēi vahe, <sup>21</sup> inungar “pepocoi rene co mbahe rese, pehui rene evocoi nungar mbahe” ehi tēi vahe? <sup>22</sup> Opacatu co nungar porocuaita ocañi tēi vaherā. Esepia, ahe ava remimbotar tēi yembohesa, iporocuaita tēi avei. <sup>23</sup> Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyecomomini tēi iyavei omombaraisu güetecuer yuvireco viña. Ahe aracuasa rumo ēgüe ehi tēi vahe. Esepia, ndayande pītivii eté yande yepepi āgua yande remimbotarai sui.

### 3

<sup>1</sup> Cūritei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oñ güeco mborerecuasa pīpe Vu acato coti. <sup>2</sup> Pepihañemoñeta mbahe iva pendar rese, ndahei chira ivi pīpendar mbahe rese tēi. <sup>3</sup> Esepia, cūritei omano vahe nungar peico pe recocuerai upe. Iyavei Cristo reseve peico Tūpa

p̄iri, inungar-ra ivave viña. <sup>4</sup> Cristo niha yande recovesa ité secoi. Sese ahe oyeví irise curi, ěgüe peye aveira perecora ip̄iri seco ori porañetesa.

*Yande recocuer yip̄indar iyavei yande recocuer p̄iasu*

<sup>5</sup> Evocoiyase pepoi opacatu co mbahe naporai vahe co ivi p̄ipendar t̄ei pe rese oime vahe sui: ndapeyemboaguasai chira, ndapeyapoi chira mbahe t̄ei pe recocuer pipe, ndapeipota rai chira p̄ihañemoñeta raisa, ndapeipota rai chiveira ambuae ava mbahe (esepia, ahe niha oyoya mbahe rahanga t̄ei mboeteisa rese). <sup>6</sup> Acoi oyapo vahe co nungar mbahe, ahe T̄upa ñemoirosa oip̄isira seroyaẽhisa pipe yuvireco. <sup>7</sup> ěgüe peye avei yip̄indar pe recocuerai pipe peico. <sup>8</sup> C̄uritei rumo peseya opacatu co mbahe-mbahe t̄ei: pe ñemoirosa, pe poroyucai aisa, pe reco raisa, pe ñehe mara-mara t̄eisa iyavei pe ñehesa ndayamombehui vahe. <sup>9</sup> Ndaperemirai chira peyese. Esepia, pepoi yip̄indar pe reco ai sui iyavei pe rembiapo ai sui. <sup>10</sup> Iyavei peip̄isi tecocuer p̄iasu, aviye vahe. Ipipe peyembohe ari yacatu yande Aposar T̄upa recocuer rese peico, icua tupri catu ãgua. <sup>11</sup> Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidaprii aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai t̄ei secoi” ehi vahe. Aníse que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande p̄iha pipe yareco.

<sup>12</sup> Esepia, T̄upa pe raisu etepri iyavei pe poravo ‘toyuvirecoi cheu nara’ oya. Evocoiyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. <sup>13</sup> ěgüe peyera peñemosa oyeupe, peñero aveira opacatu oyeupe acoi pe p̄ahu pendar oñemoirose p̄eu. Inungar Cristo ñerosa ombou yandeu, pe avei ěgüe peyera ambuae ava upe. <sup>14</sup> Iyavei peyeaisu catura. Esepia, ahe yande mboyemboya tupri oyese yepi. <sup>15</sup> Acoi teco tuprisa Cristo ombou vahe p̄eu, tape mbohe pe p̄ihañemoñeta tupri ãgua. Esepia, co rese T̄upa pe renoi ñepeí ava nungar pe reco ãgua. Iyavei, “Aviye ndeu” peyera chupe.

<sup>16</sup> Top̄ita tupri Cristo ñehengagüer pe p̄iha pipe. Pe aracuasa tuprisave peyembohe tupri, peyemonguer̄ehi catu sapucaisa T̄upa resendar rese. Pesapucaí opacatu sapucaisa T̄upa upendar pe p̄ihá pipe, “Aviye ndeu” pe hesave yepi. <sup>17</sup> Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera T̄upa upe yepi.

*Jesús reroyasar cuaita resendar*

<sup>18</sup> Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. <sup>19</sup> Pe avei no imer: pesaisu pe rebireco. Perecoi rene p̄ihaviracuasa pipe.

<sup>20</sup> Pe avei no ch̄ihivahe: peroya aveira pe yesupa. Esepia, ahe yande Yar oipota. <sup>21</sup> Pe avei no tu: pemoñemoiro ucai rene pe rahir peyeupe. Esepia, aviyeteramo niquer̄ehi iri chira ocuaise p̄eu.

<sup>22</sup> Pe avei no mbiguai: peroya tupri avei pe rerecuar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe p̄ihañemoñeta tuprisa pipe, T̄upa sui pe siquiyesa pipe avei. <sup>23</sup> Opacatu mbahe peyapo vahe, peyapo pe quer̄ehisave yande Yar mboviha ãgua. Ndahei chira ava mboviha ãgua t̄ei. <sup>24</sup> Esepia, peicua tupri co: yande Yar omboura oporerecosa yandeundar. Esepia niha, Cristo upe nara

ité mbahe peyapo. Ahe niha pe Yar supi tupri vahe. <sup>25</sup> Acoi ava oyapo vahe mbahe naporai vahe, oipisi aveira güembiapo ai repri. Tüpa niha nomboaviratii yande raisu.

#### 4

<sup>1</sup> Pe avei serecuar: peyapo mbahe ihivi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rerecuar ivave.

<sup>2</sup> Iyavei no opacatu peyeroqui catu ari rupi pe mahemohasa pipe. “Aviye ndeu” peye Tüpa upe. <sup>3</sup> Peyeroqui avei ore rese. Tore pñivii Tüpa oñehengagüer mombehu vite água. Toroñehe vite avei co ñehesa Cristo resendar Tüpa omboyecua ramo vahe rese yandeu. Sese tñi niha co che roquendasa. <sup>4</sup> Evocoyase peyeroqui che rese, tamombehu tupri catu co ñehesa opacatu upe senducua tupri catu água. Ëgüe tahe che cuaita mboaviye.

<sup>5</sup> Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve. <sup>6</sup> Pe reco aviye tuprisa pipe peñehera yepi. Iyavei peicua tupriña ñehesa mboyevi água ñepepei ava uve.

#### *Ñehesa ipa vahe*

<sup>7</sup> Co yande rivri, yande rembiaisu, Tíquico, che pñivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pñu. <sup>8</sup> Sese co amondo pñu ore recocuer cua tupri água, pe monguerñhi catu água avei. <sup>9</sup> Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pñu opacatu mbahe oime vahe cohave.

<sup>10</sup> Aristarco, che ndugüer che roquendasave, omondo omahenduhasa pñu iyavei Marcos, Bernabé rihir. Pe revo peicuaño Marcos so água eipeve; orose pe piri, peipisi tupriñora. <sup>11</sup> Iyavei omahenduhasa omondo Jesús, ahe serer acoi Justo, pñu. Co güerañomi Jesús reroyasar pñahuve judío oporaviqui vahe che rupi yuvireco Tüpa mborerecuasave nara. Ahe niha che mboviha yuvireco yepi. <sup>12</sup> Epafras avei omondo omahenduhasa pñu. Ahe pe recua pendar ité, Jesucristo rembiguai. Ahe oyeroyqui vahe pe rese yepi ‘toyemoviracua tupri iyavei toyuvirecoi Tüpa remimbotar rupi yuvireco’ oyapave. <sup>13</sup> Che aicua ité secocuer. Ahe oyemboaquei oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. <sup>14</sup> Iyavei yande rembiaisu Lucas, oporoposano vahe, Demas reseve omondo omahenduhasa yuvireco pñu.

<sup>15</sup> Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tüpa reroyasar yuvireco. <sup>16</sup> Peyeroquire, pemondo co cuachiar Laodicea pendar Jesús reroyasar upe iyeroqui água. Iyavei Laodicea pendar cuachiar rese peyeroqui avei. <sup>17</sup> Iyavei emombehu Arquipo upe aipo ere: “Emboaviye tupri Tüpa nde cuaisa” ere.

<sup>18</sup> Che Pablo aico. Che ité aicuachía co che mahenduhasa pñu. Tapemahenduha vite che roquendasave che rese. Aviye pñu. Yande Aposar tape pñivii. Aipo rupive.

## PABLO REMBICUACHIA YIPINDAR VAHE TESALONICA PENDAR UPE TESALONICENSES

*Pablo mahenduhasa Jesús reroyasar Tesalónica pendar upe*

<sup>1</sup> Che, Pablo, Silvano reseve iyavei Timoteo, aicuachía co che ñehe pëu, ore rivireta, peñemonuha vahe Tüpa upe tecua Tesalónica ve, yande Ru Tüpa, yande Yar Jesucristo rese peico vahe. Tape rovasa pe reco tupri água yande Ru Tüpa, yande Yar Jesucristo avei.

*Tesalónica pendar yeroyasa resendar ñehesa*

<sup>2</sup> Ore, “Aviye ndeu” orohé ari rupi Tüpa upe opacatu pe rese yepi. Iyavei oremahenduha pe rese ore yeruresa pipe. <sup>3</sup> Pe niha yande Yar rese pe yeroya tupri sa pipe peporaviquiño yepi, iyavei pe poroaisusa pipe peyapo mbahe Tüpa upe, iyavei peñemosañó mbahe tēi upe Jesucristo rārosa pereco vahe rese. Sese oremahenduha pe rese ari yacatu rupi yande Ru Tüpa rovai. <sup>4</sup> Ore rivireta, Tüpa niha pe raisu, oroicua avei ahe ité pe poravo. <sup>5</sup> Esepia, acoi oromombehuse ñehesa písirosa resendar, ndahei ñehesa oreyesuindar tēi oromombehu pëu; Espíritu Santo reco pĩratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pãhuve oroicose, oroico tupriño ité, orosecaño avei pe reco tupri água.

<sup>6</sup> Ipape pemboyeapi ore recocuer peico iyavei yande Yar recocuer avei no. Iyavei yepe peparaisu mbahe-mbahe tēi pãhuve peico viña, peipisiño ité rumo co ñehesa pe vihasa pipe Espíritu Santo ombou vahe pëu. <sup>7</sup> Evocoya pe reco pipe pemboyecua catu pe reco catupri sa Tüpa reroyasar Macedonia pendar upe, Acaya pendar upe avei. <sup>8</sup> Esepia, pe Tüpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tüpa reroyasa pereco vahe peyese. Sese ore ndoromombehu iri chira pe recocuer. <sup>9</sup> Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tüpa oicove vahe rupi pe guatasa yuvireco, pe chupe nara mbahe apo água avei no. <sup>10</sup> Omombehu avei pesãro vahe Tüpa Rahir Jesús iyevi água iva sui yuvireco oreu, acoi Tüpa ombogüerayevi vahe omano vahe pãhu sui. Ahe niha yande písirora Tüpa ñemoirosa ipĩrata vahe ou vaherã sui.

## 2

*Tesalónica pendar yeroyasa mboyecua sa*

<sup>1</sup> Ore rivireta, pe niha peicua ore so agüer pe piri ndahei ãgüe ehi tēi vahe. <sup>2</sup> Peicua tupri avei niha acoi cuese yipindar mara-mara tēi ava ore rereco yuvireco tecua Filipo ve. Tüpa rumo ore pítivii oñehengagüer písirosa resendar mombehu água opacatu ore siquiyeñhisa pipe ore amotarēhimbar pãhuve. <sup>3</sup> Esepia, ndoroyavii eté ore ñehe iyavei ndoroñehei ore pihañemoñeta raisa tēi pipe pëu, ndahei avei ore porombopa água oroñehe. <sup>4</sup> Tüpa rumo ore recoãha, ichui ore cuai oñehengagüer písirosa resendar mombehu água; ãgüe ehi ore ñehe, ndahei ava tēi mboviha água. Tüpa yande pihañemoñetasa oicua vahe rumo oromboviha. <sup>5</sup> Peicua niha

ore ndoroñehēi ñehesa icatupri catu vahe tēi rese pe mbopa āgua, iyavei ndahei guarepochi potasave tēi oroñehē tupri. Tūpa niha oicua. <sup>6</sup> Ore ndorosecai eté ava ore mboetei catu āgua pe, que ambuae ava eta avei no. <sup>7</sup> Ehi oroyandu ucara ore mborerecuasa Jesucristo ore cuaisa pēu viña; oroyemominiño rumo oroico pe pāhuve inungar acoi cuña osāro tupri vahe omembri imboacua. <sup>8</sup> Ēgüe orohe avei ore pe raisu. Sese ndahei Tūpa Ñehengagüer año oromondo pota pēu, ore recocuer avei no. Esepia, opoaisú ité. <sup>9</sup> Ore rivireta, peyemomahenduha acoi ore paraisu agüer rese, ore poraviqui agüer rese avei ari, pītu reseve. Ndahei que ñepeī mañeco tēi āgua mbahe rese oromombehu Tūpa Ñehengagüer oroico pēu.

<sup>10</sup> Pe niha ore repia peye Tūpa avei oicua, ore reco tuprisa, ore rembiapo supi eté vahe, ihivi vahe pe Jesús reroyasar pāhuve. <sup>11-12</sup> Peicua niha, inungar mbia guahir upe, ēgüe orohe pe monguerēhi, pe mbovihasa avei ñepeī-peī opacatu. Iyavei oromondo pe cuaitarā pe reco tupri āgua Tūpa remimbotar rupi. Ahe niha oñehē pēu peico vaheṛā sese imborerecuasa porañetesave.

<sup>13</sup> Co rese, “Aviye ndeu” orohe Tūpa upe ari yacatu rupi. Esepia, Tūpa Ñehengagüer, oromombehu vahe pēu, peipiṣi ité, “Co Tūpa ñehē, ndahei ava tēi ñehē” aipo peye ité pe chupe. Supi eté Tūpa ñehē. Ahe niha osecuñaro ité pe recocuer peroyare. <sup>14</sup> Ore rivireta, acoi cuese peiporara mbahe-mbahe tēi pe mu eta pāhuve peicose; ēgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarēhisave yuvireco. <sup>15</sup> Ahe niha oyuca yande Yar Jesús yuvireco. Ahe avei oyucapa Tūpa ñehē mombehusar yuvireco aracahe. Ore avei opa ore mombo yuvireco. Ndoviroyai Tūpa yuvireco iyavei opacatu ava amotarēhimbar tēi yuvirecoi. <sup>16</sup> Esepia, acoi oroñehē potase ava ndahei vahe judío upe iñepiṣiro āgua rese, ahe rumo ndoipotai yuvireco oreu. Ipīpe sui oyemboangaipa catu yuvireco. Cūrītei rumo Tūpa ñemoirosa ipīrata vahe ou iharīve yuvireco cute.

### *Pablo oso pota iri Tesalónica pendar repia*

<sup>17</sup> Ore rivireta, yepe ndayayoepia iri yayepēpi raimise yandeyesui, ore piha piṣe rumo, “Ahé” oroheño ité pēu. Iyavei orequerēhiño ité yepi oroso iri vaheṛā pe repia. <sup>18</sup> Orosāha tēi ore so āgua pe repia yepi; che Pablo teieté setá yupagüer tēi aso pota. Carugar rumo ndoipotai. <sup>19</sup> ¿Ava sui piha orosāro mbahe aviye vahe? ¿Uma ore vihasa? ¿Uma ore mboviharete catura? ¿Peño itera acoi yande Yar Jesucristo yeṛise curi! <sup>20</sup> Pe ité niha ore mbovihara peye, iyavei oroviha catura pe rese no.

## 3

<sup>1-2</sup> Evocoyase che nañemosa irise pe repiaēhi rese, chepihañemoñeta yande rivri Timoteo mondo āgua pe repia; “Che güeraño tapita Atenas ve” ahe. Esepia niha, ahe oporaviqui vahe Tūpa upe ore rupi, omombehu vahe co ñehesa piṣirosa resendar Cristo suindar ou vahe. Ahe amondo pēu pe moviracua catu āgua, pe monguerēhi catu āgua avei peyeroya catu vaheṛā Cristo rese. <sup>3</sup> Evocoyase tipo eme oyembosiquiye vahe co mbahe tēi pe mombaraisuse. Peicua niha yaiporara rane itera co nungar mbahe. <sup>4</sup> Iyavei niha acoi oroico vitesē pe piri, “Yande paraisu rane itera mbahe yavai vahe” orohe voi eté acoi pēu. Ahe niha cūrītei peicua. <sup>5</sup> Evocoyase che nañemosa irise, amondo Timoteo ‘¿yuvirecoiño

ité p̄lha Tūpa rese?’ che yapave. Che asiquiye, “Aviyeteramo Carugar omondora mbahe tēi pipe yuvireco” ahe ‘ore poraviqui agüer evocoyase ocañi tēira’ che hesave.

<sup>6</sup> Cūritei rumo Timoteo oyevi Tesalónica sui, güeru ñehesa aviye vahe pe resendar oreu pe Tūpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tēi peye no; inungar ore pe repiasa pota tēi avei. <sup>7</sup> Sese, ore rivireta, ore paraisusa p̄lhuve ore mboviharete peye, co oroicuase pe reco tupri Tūpa reroyasa pipe. <sup>8</sup> Cūritei ore mopoase catu iri oroyanduse pe yemoviracua tuprisa yande Yar rese. <sup>9</sup> “¿Mara yahera p̄lha, ‘Aviye ndeu’ yande he tupri catu āgua Tūpa upe?” orohe pe reco tuprisa rese, iyavei ore yemboviha catusa rese avei no <sup>10</sup> p̄itu, ari rupi oroporandu Tūpa upe ore so āgua pe repia eipeve iyavei Tūpa reroyasa ipane vite vahe mboaviye tupri āgua p̄eu.

<sup>11</sup> Iyavei ore oroipota ore p̄tiviira yande Ru Tūpa, yande Yar Jesucristo avei ore so āgua pe piri. <sup>12</sup> Evocoyase yande Yar tape moviracua catu, tombou catu avei pe yeaisu āgua, iyavei opacatu raisu catu āgua, inungar ore orovireco pe raisusa. <sup>13</sup> Ipipe sui tape moviracua pe reco maranehi pipe pe mbahe aviēhisave yande Ru Tūpa rovai acoi oyevise yande Yar Jesús opacatu ovoya reseve. Ēgüe tehi p̄eu.

## 4

### *Teco tupri Tūpa oipota*

<sup>1</sup> Ore rivireta, cūritei oroñehe pota p̄eu pe cuaitarã rese yande Yar Jesús rer pipe: inungar cūritei pe recocuer pereco, ēgüe peyeño ité catu peico ore pe mbohe agüer rupi Tūpa mboetei āgua.

<sup>2</sup> Pe niha, peicua acoi ore pe mbohe agüer yande Yar Jesús rer pipe. <sup>3</sup> Esepia, Tūpa oipota pe reco maranehi āgua oyeupe. “Tipo eme que ñepeí oyemboaguasa tēi vahe” ehi. <sup>4</sup> Iyavei peico tupri pe rembireco rese pe reco ñvisa pipe Tūpa remimbotar rupi, iyavei pemboetei tupriira sereco yepi. <sup>5</sup> Peicoi rene ava Tūpa ndoicuai vahe reco pipe pe remimbotar tēi apo āgua. <sup>6</sup> Tipo eme avei oyapo vahe co nungar angaipa yande rivri reco momara āgua tēi. Esepia, Tūpa omondora oñemoirosa ipirata vahe evocoi nungar ava upe. Evocoi niha yipisuive oromombehu vahe p̄eu. <sup>7</sup> Esepia, Tūpa niha yande poravo yande reco maranehi āgua, ndahei angaipa pipe yande reco āgua tēi. <sup>8</sup> Sese acoi ndosendu potai vahe co yembohesa, ndahei eté ava tēi viroiro, ahe rumo Tūpa ité viroiro yuvireco acoi ombou vahe oEspíritu Santo p̄eu.

<sup>9</sup> Iyavei co peyep̄ahuve pe yeaisusa rese, ndaicuachía iri chira p̄eu. Esepia, Tūpa ité niha pe mbohe pe yeaisu āgua opacatu. <sup>10</sup> Ēgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha vite catu pe poroaisusa. <sup>11</sup> “Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité” aipo orohe acoi p̄eu cuese. <sup>12</sup> Evocoyase pe mboyeroyara ava ndahei vahe Jesús reroyasar yuvireco; iyavei ēgüe peyera mbahe p̄eu ipaneñi āgua avei no.

### *Oyevira yande Yar co ivi pipe*

<sup>13</sup> Ore rivireta, ore oroipota peicua aveira manosa recocuer; sese ndapeicoi chira pe viharēhisa pipe inungar co ava ndoyeroyai vahe



Tūpa rese. <sup>14</sup> Esepia, yande yaroya: Jesús omano, ichui ocuerayevi. Evocoyase yande avei yaroya Tūpa Guahir Jesucristo reseve ombogūerayevira opacatu acoi seroyasa pipe omano vahe yuvireco.

<sup>15</sup> Sese co oromombehu pēu, ahe niha yande Yar porombohesa: yande yaicove vite vahe co ivi pipe, acoi oyeveise yande Yar, ndahei chira yande rane omano vahecuer sui yayemboya yande Yar rese. <sup>16</sup> Esepia, yande Yar ité ogüeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tūpa remimbi moñehe pīratasa. Ahese seroyasar omano vahecuer rane opūhara yuvireco. <sup>17</sup> Ipare voi yande yaicove vite vahe, serasopri yaicora opacatu iva quīha rese co yande Yar rovañichi āgua ivitu rupi. Ēgüe yahera yande Yar piri yaico vaherā apirēhi. <sup>18</sup> Sese peyemonguerēhi catu co ñehesa pesendu vahe rese.

## 5

<sup>1</sup> Iyavei no, acoi ari yande Yar yusa resendar ore ndoroicuachiai chira pēu. <sup>2</sup> Esepia, pe peicua tupri co yande Yar ari oyepotara imohaēhisa pipe, inungar acoi imonda rai vahe oyepota pītu pipe. <sup>3</sup> Acoi ava aipo ehise yuvireco: “Opacatu aviye ité yaico, ndipo iri mbahe-mbahe tēi yandeu” ehise, ahese inungar acoi cuña imembirasi aviyeteramo tēi, ēgüe ehi aveira, aviyeteramo tēi icañi oura iharive, ahese ndoicatu chira ichui oñemi yuvireco. <sup>4</sup> Pe rumo, ore rivireta, ndahei pītumimbisa pendar nungar peico. Evocoyase oyepotase yande Yar ari, ndahei chira imonda rai vahe nungar pe resapiha tēi ou. <sup>5</sup> Esepia, pe opacatu peico vahe Tūpa poroesapesa pipe, ndahe iri yande pītumimbi pipendar yaico. <sup>6</sup> Evocoyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe. <sup>7</sup> Acoi yuviroque vahe, yuviroque pītu pipe; iyavei acoi osavaipo vahe, osavaipo avei pītu pipe yuvireco. <sup>8</sup> Yande rumo yaico vahe Tūpa poroesapesa pipe. Evocoyase yareco tuprira yande pihañemoñetasa yande reco tupri āgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oāca ndiru guarepochi apopri yuvireco oāca repi āgua, yande avei tayareco yande remiario yande ñepisiro āgua. <sup>9</sup> Esepia niha, Tūpa yande poravo ndahei yaico vaherā iñemoirosa pipe nara; ahe rumo yande poravo yasupiti vaherā ñepisirosa yande Yar Jesucristo rembiapo sui. <sup>10</sup> Esepia, ahe omano yande recocuer rese oyese yande rereco āgua opacatu yande recove vitesse, yamanose avei. <sup>11</sup> Sese peyemonguerēhi catu, iyavei peyemoviracua catu vite peyeupe inungar co peyapo peico.

### *Pablo omboaracua Jesús reroyasar oico*

<sup>12</sup> Iyavei no, ore rivireta, pemboyeroa acoi oporaviqui vahe yuvireco pe pāhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco. <sup>13</sup> Pemboyeroa iyavei pesaisu tuprira iporaviquisa rese. Peico tupri avei peyepāhuve.

<sup>14</sup> Iyavei ore rivireta, pe cuaiza: pemboaracua acoi ndoporaviqui potai vahe imbohe catu āgua. Iyavei pemonguerēhi acoi niquerēhi iri vahe. Peipitivi avei acoi ndoyemoviracuai vahe Tūpa rese güeco āgua. Iyavei peñemosañō opacatu ava uve yepi.

<sup>15</sup> Peicua catu pe rereco megua potasar sui. Ndapemboyevii chira mbahe-mbahe tēi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

<sup>16</sup> Peyembovihanora ari yacatu peico. <sup>17</sup> Iyavei peyeroquira ari yacatu rupi no. <sup>18</sup> “Aviye ndeu” peyera Tūpa upe opacatu mbahe rese. Esepia, ahe niha Tūpa oipota yandeu Cristo rese yaico vahe.

<sup>19</sup> Iyavei ndapemombituhui chira mbahe Espiritu Santo oyapo pota vahe pe rese. <sup>20</sup> Ndapeyamotarēhii chira Tūpa ñehe imombehupri.

<sup>21</sup> Pesāhapa rane opacatu mbahe. Ichui peipisira mbahe aviye vahe peyeupe. <sup>22</sup> Peyepēpi opacatu mbahe naporai vahe sui.

<sup>23</sup> Tūpa acoi ombou vahe teco tuprisa yandeu tape pehapa tupri oyeupe nara. Iyavei tosāro tupri opacatu pe espíritu, pe hã, pe rete avei pe reco maranehi āgua co yande Yar Jesucristo yevi irise. <sup>24</sup> Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

*Pablo imahenduha Jesús reroyasar rese*

<sup>25</sup> Ore rivireta, peyeroqui ore rese.

<sup>26</sup> Pemboavirave opacatu yande rivri eipe pendar pe yeovaupitesa pipe.

<sup>27</sup> Che opocuai yande Yar rer pipe: peyeroqui co cuachiar opacatu yande rivireta upe.

<sup>28</sup> Yande Yar Jesucristo tape rovasa tupriño pe rereco. Aipo rupive.

## PABLO REMBICUACHIA IMOÑUVIRIOSA TESALONICA PENDAR UPE TESALONICENSES

*Pablo mahenduhasa Jesús reroyasar Tesalónica pendar upe*

<sup>1</sup> Che, Pablo, Silvano, Timoteo reseve, aicuachía co ore ñehe pëu, ore rivireta, peñemonuha vahe Tüpa uve tecua Tesalónica ve, yande Ru Tüpa, yande Yar Jesucristo rese peico vahe. <sup>2</sup> Tombou pëu oporovasasa pe reco tupri água yande Ru Tüpa, yande Yar Jesucristo avei.

*Tüpa omombaraisura viroyasarëhi Jesucristo yeveise curi*

<sup>3</sup> Ore rivireta, “Aviye ndeu” orohe itera Tüpa upe pe recocuer rese yepi. Esepia, Tüpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. <sup>4</sup> Evocoyase, ore oroñehe pe rese ore vihasa pipe Tüpa reroyasar ñemonuhasa rupi. Esepia, acoi ava mbahe-mbahe tēise pëu, peñemosañu chupe pe Cristo rese pe yeroyasa pipe. <sup>5</sup> Co niha omboyecua Tüpa reco ívisa ava upe. Esepia, ipipe pe rereco omborerecuasave pe reique água. Sese niha, peparaisu vite tēi peico.

<sup>6</sup> Tüpa omombaraisura acoi pe mombaraisusarer. Iya ité ēgüe ehi vahe rā chupe. <sup>7</sup> Pe rumo imombaraisupri peico vahe, Tüpa omondora pe pituhu água, ore pituhu água avei, acoi yande Yar Jesús oyeveise tata rendigüer pāhuve íva sui opacatu güembiguaí seco pīrata catu vahe reseve. <sup>8</sup> Ahe oura opacatu Vu Tüpa reroyasarëhi mombaraisu água iyavei oyesuindar ñehesa poropīsirosa resendar rendu tēisar mombaraisu avei. <sup>9</sup> Evocoi iparaisura yuvireco, imocañipri yuvirecoira apirëhi. Iyavei imboyepepisara amombri yande Yar reco pīratasa porañetesa sui. <sup>10</sup> Acoi ouse ahe ari pipe, yande Yar imboeteipriira opacatu seroyasar pāhuve; ipāhuve pe peicora. Esepia, peroya ité oromombehu vahe pëu.

<sup>11</sup> Co rese oroyeroqui pe rese yepi: oroporandu yande Ru Tüpa upe tape rereco tupri güemienoi pe recosa pipe. Iyavei oroyeroqui chupe, tomboaviye güeco pīratasa pipe opacatu ñepeí-peí mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. <sup>12</sup> Evocoyase yande Yar Jesucristo rer imboeteipriira pe recocuer pipe sui; iyavei pe imboeteipriira peico yande Yar rese peico vahe yande Ru Tüpa, yande Yar Jesucristo pe raisusave.

## 2

*Yande Yar Jesús yevisa resendar mombehu tuprisa*

<sup>1</sup> Iyavei, ore rivireta, ore oromombehu potami pëu opacatu acoi yande Yar Jesucristo yevisa resendar yande monuha vahe rā oyese. <sup>2</sup> Peicua catu, tapepihañemoñeta rerova eme iyavei peyembosiquiyei rene que ava “che añehe Espíritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pëu. <sup>3</sup> Peicua catu peyembopa ucai rene ñepeí yepe ava upe. Esepia, yipindar ari Jesucristo yu água renonde, yugüerura mbahe-mbahe tēi aposar. Ahe Tüpa amotarëhisar yuvirecoi vahe. Ahese oyemboyecuaru ava yangaipa guasu vahe. Ahe ocañi tēi

vaherã. <sup>4</sup> Oyemboivate aira opacatu Tüpa rer rerecosar amotarêhisave iyavei ndoipotai chira ambuae mboetei. Oique aveira, oguapi Tüpa rêta pipe inungar-ra Tüpa ité viña. “Supi eté che Tüpa aico” ehi tupri tẽira oĩ.

<sup>5</sup> ¿Ndapemahenduhai vo acoi che ñehengagüer rese pe pâhuve aico vitese cuese? <sup>6</sup> Co imombitasar peicua cüritei. Ihari oyepotase voi, oyemboyecuara. <sup>7</sup> Co porocuita amotarêhisar ndoyemboyecua vitei vahe rembiapo oime cüritei. Co güeraño ipane imombitasar renose âgua ipãhu sui, <sup>8</sup> ahese voi oyemboyecuara acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pĩratasa pipe oyevise curi. <sup>9</sup> Yucasa renonde rumo, acoi ava yangaipa guasu vahe oura Caruguar pĩratasa pipe; güerura güeco pĩratasa tuvicha vahe; omboyecua angahura poromondiisa. <sup>10</sup> Oyapo angahura opacatu mbahe tẽi oporombopa âgua oico ava ocañi tẽi vaherã upe. Esepia, evocoi ava ndosendu potai porombohesa supi eté vahe oñepisiro âgua yuvireco. <sup>11</sup> Sese Tüpa oseyara co porombopasa reroya âgua yuvireco <sup>12</sup> ‘ipipe tocañi tẽi co ava, opacatu mbahe supi eté vahe reroyaêhisar, acoi oyembovaha catu vahe mbahe-mbahe tẽi rese yuvireco’ oya.

#### *Iporavopri ipĩsiropirã*

<sup>13</sup> Ore rumo, “Aviye ndeu” orohera Tüpa upe pe recocuer rese yepi, ore rivireta, yande Yar rembiaisu peico vahe. Esepia, Tüpa niha pe poravo yipisuive pe pĩsiro âgua pe reco maranehi âgua rese Espiritu pipe iyavei porombohesa supi eté vahe reroya âgua. <sup>14</sup> Sese niha, Tüpa oñehe yandeu yande piha pipe co ñehesa pĩsirosa resendar pipe, ore oromombehu vahe pẽu ‘tovireco che Rahir Jesucristo reco porañetesa’ oya.

<sup>15</sup> Sese ore rivireta, peyemoviracua iyavei peresarai eme acoi oromombehu vahecuer iyavei oroicuachia vahe acoi pẽu. <sup>16</sup> Yande Yar Jesucristo teieté, yande Ru Tüpa avei, yande raisusa yande rovasasa pipe ombou vahe vihasa apirêhi vahe yandeu iyavei yande reco tupri rãro âgua, <sup>17</sup> ahe tape monguerêhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherã rese avei.

## 3

#### *Pablo oporandu Jesucristo reroyasar yeroquisa rese oyeupenara*

<sup>1</sup> Ore rivireta, co mbahe ipa vahe amombehu pota pẽu: peyeroqui ore rese. Evocoiyase toyepota pihaivi yande Yar ñehengagüer opacatu rupi; tipisisa tupri imboeteisa pipe inungar oyepota pe pâhuve. <sup>2</sup> Peyerure avei ore repi âgua rese ava ndaseco pôrai vahe, ipihañemoñeta rai vahe sui. Esepia niha, ndaopacatui Tüpa rese ipihañemoñeta yuvireco. <sup>3</sup> Yande Yar rumo seco ñivi vahe. Ahe pe recocuer moviracuara iyavei pe rãrora mbahe tẽi sui. <sup>4</sup> Ore oroyeroya yande Yar rovai peyapo vahe rese iyavei peyapo viteño vaherã rese acoi ore pe cuai agüer. <sup>5</sup> Yande Yar tape pitivii pe poroaisu âgua inungar Tüpa oporoaisu iyavei Cristo ñemosasa rereco âgua.

#### *Yande cuaita yande poraviqui âgua*

<sup>6</sup> Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri pe pâhuve, peyepipiño ichui, acoi ndoviroya potai vahe avei ore porombohesa oromombehu vahe pẽu. <sup>7</sup> Pe peicua mara peyera ore recocuer moña âgua peico. Ore orocose pe pâhuve, ndoroico tẽi, <sup>8</sup> ndorohu tẽi avei ambuae tembihu imboepipirêhi. Ore rumo que

ñepi mañeco tēiēhi āgua rese oroporaviqui ore cuerai rane ité ari, p̄itu reseve. <sup>9</sup> Iya ité niha mbahe rese ore porandu āgua p̄eu ore p̄itivii āgua rese viña; ore rumo oroporaviqui pe ore recocuer rupi pe guata āgua rese. <sup>10</sup> Acoi oroico vitesse pe p̄āhuve, oromondo pe cuaitarā: acoi ndoporaviqui potai vahe, ahe tocaru eme. <sup>11</sup> Oroyandu amove aipo pe p̄āhu pendar yuvirecoiño tēi ndoporaviqui vahe. Evocoi omañeco tēi ambuae ava recocuer. <sup>12</sup> Ore oromondo acoi ava upe mborocuita yande Yar Jesucristo rer p̄ipe: toporaviqui güeco quiririsa p̄ipe; ipipe sui yuvirecovera.

<sup>13</sup> Ore rivireta, pecuerai eme mbahe aviye vahe apo. <sup>14</sup> Oimese ndoviroyai vahe ore remimombehu co cuachiar p̄ipe, peicua tupri evocoi nungar. Peyemboya eme sese. Evocoiyase toch̄i ahe. <sup>15</sup> Pereco eme catu yamotarēhisa chupe; iyacatu rumo pemboaracua catuñora inungar yande rivri.

*Ñehesa ipa vahe*

<sup>16</sup> Aviye, yande Yar ae tombou güeco tuprisa pe reco tupri āgua p̄eu ari yacatu rupi opacatu pe reco p̄ipe. Tasecoi pe rese ari yacatu.

<sup>17</sup> Che, Pablo, aicuachía co mahenduhasa che po p̄ipe ité p̄eu. Che rembicuachía icuapri opacatu che cuachiar p̄ipe. <sup>18</sup> Yande Yar Jesucristo tape rovasa opacatu yepi. Aipo rupive.

## PABLO REMBICUACHIA YIPINDAR VAHE TIMOTEO UPE TIMOTEO

*Pablo mahenduhasa Timoteo upe*

<sup>1-2</sup> Che, Pablo, aicuachía che ñehe ndeu, Timoteo. Nde niha che rahir Tūpa reroyasa pipe ereico. Che niha Jesucristo apóstol aico, yande Pĩsirosar Tūpa porocuita rupi iyavei yande Yar Jesucristo porocuita rupi. Ahe niha yande remiaro. Tombou yande Ru Tūpa, yande Yar Jesucristo oporovasasa, oporoparaisuerecosa ndeu nde reco tupri āgua.

*Pablo, “Eicua catu porombohesa co coti tēi vahe sui” ehi Timoteo upe*

<sup>3</sup> Iyavei acoi aipo ahe ndeu cuese che so āgua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pihañemoñetasa co coti-coti tēi vahe rese yuvireco. <sup>4</sup> Toyapisaca eme avei tecocuer ipapapri tēi vahe rese, tecocuer aracahendar ēgüe ehi tēi vahe rese avei. Ahe ichui osē yeacasa naporai vahe yepi; ndayande pĩtĩvi rumo Tūpa remimbotar reroya tupri āgua rese.

<sup>5</sup> Sese co amondo porocuita ndeu yande yeaisu āgua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe. <sup>6</sup> Esepia, amove ava oime ichui oyearacua mocañi oñehe-ñehe tēisa pipe yuvireco. <sup>7</sup> Oporombohe pota tēi Tūpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

<sup>8</sup> Yaicua niha co porocuita aviye ai eté yaiporuse Tūpa remimbotar rupi eté. <sup>9</sup> Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua āgua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nombotei vahe Tūpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar. <sup>10</sup> Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara. <sup>11</sup> Co porombohesa nimarai vahe oyoya tupri ñehesa porañete vahe poropĩsirosa resendar rese. Tūpa sovasapri secoi, ahe che cuai vahe sese.

*Pablo oparaisuerecosa rese, “Aviye ndeu” ehi Tūpa upe*

<sup>12</sup> “Aviye ndeu” ahe yande Yar Jesucristo upe. Ahe niha ombou pĩratasa co che ñehe āgua. Esepia, ahe oyeroya che rese. Sese che mondo oñehengagüer mombehu āgua. <sup>13</sup> Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarēhimbave che yemboivate aisa pipe, Tūpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe. <sup>14</sup> Ēgüe ehi yande Yar ombou catu oporovasasa che rese iyavei ombou

che oyese yeroya āgua iyavei che poroaisu āgua Jesucristo rese che recosa pipe.

<sup>15</sup> Iya peroya co supi eté vahe, che aipota avei opacatu oyapísacara yuvireco sese: Jesucristo ou co ivi pipe ava yangaipa vahe písiro āgua. Che rumo acoi ivate catu vahe yipíndar aico ipāhuve. <sup>16</sup> Sese Tūpa che paraisuereco che rese rane Jesucristo reco mbegüe tuprisa mboyecua āgua. Ēgüe ehi che recocuer upe ambuae ava seroya āgua. Ipípe sui osupitira tecovesa apirēhi vahe yuvireco. <sup>17</sup> ¡Sese yamondo imboeteisa apirēhi yande Rerecuar ndopai vahe upe! ¡Ahe nomanoi vahe, ndayasepiai vahe, ahe ñepeí vahe Tūpa!

<sup>18-19</sup> Che rahir Timoteo, co amondo nde cuaitarã ndeu nde reco moviracua āgua mbahe tēi recopi āgua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tūpa reroyasar oñehe yuvireco nde rese serer pipe. Amove ava opihañemoñeta tupri reroyaēhisave, omocañi uca Tūpa rese oyeroyasa <sup>20</sup> inungar vahe Hime-neo rese, Alejandro yuvirecoi. Ahe che amondo Carugar povrive ‘evocoyase toicua tiñehe-ñehe tēi eme Tūpa upe yamotarēhisave yuvireco’ che yapave.

## 2

### *Ñehesa yeruresa resendar*

<sup>1</sup> Iyavei no, co che opomonguerēhi pe yerure āgua, peporandu, pe-mondo avei “aviye” pe hesa Tūpa upe opacatu ava recocuer rese. <sup>2</sup> Iyavei peyerure opacatú mborerecuar rese. Evocoyase tayareco yande reco tupri Tūpa mboetei tuprisa pipe, yande poromboeteisa pipe avei. <sup>3</sup> Co aviye ité; ahe niha yande Písirosar Tūpa remimbotar. <sup>4</sup> Supi eté ahe oipota opacatu ava ñepísiro iyavei co porombohesa supi eté vahe cua tupri āgua. <sup>5</sup> Esepia, ñepeño ité Tūpa, iyavei ñepeño ité ava oicatu vahe yande reraso Tūpa upe: ahe Jesucristo. <sup>6</sup> Esepia, Jesucristo omano opacatu ava yangaipa vahe repirã ipísiro āgua. Ahe imombehusa chupendar arí iporavopri rupi. <sup>7</sup> Sese che supi eté apóstol, icuaipri aico Tūpa Ñhengagüer mombehu āgua, ava ndahei vahe judío mbohe āgua, co yeroyasa rese iyavei supi eté vahe rese. Supi eté ndopombopai.

<sup>8</sup> Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiēhisa pipe, oyeacaēhisa pipe avei. <sup>9</sup> Iyavei cuña toyemonde tupriño turucuarño tēi pipe yuvireco. Aní chira rumo oāca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco. <sup>10</sup> Iyacatu rumo yuvirecoi tuprira güembiapo aviye vahe pipe, inungar cuña oyemondo tupri vahe Tūpa upe yuvireco yepi. <sup>11</sup> Iyavei cuña tosendu porombohesa oquiririsa pipe imboyeroyasave. <sup>12</sup> Ndaipotai cuña oporombohe ava rehí pāhuve iyavei toyocuai eme cuimbahe. Iyacatu rumo iquiririñora yuvireco. <sup>13</sup> Esepia, Tūpa oyapo yipíndar Adán; ipare Eva oyapo. <sup>14</sup> Adán ndahei imbopapri; cuña rumo oyembopa uca. Ichui oviapi angaipa pipe. <sup>15</sup> Oñepísirora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisa pipe avei.

## 3

*Tūpa reroyasar rārosar cuaita*

<sup>1</sup> Iyavei co supi eté: acoi amove oico pota vahe Tūpa reroyasar rāro āgua, ahe oipota mboraviqui avīye catu vahe. <sup>2</sup> Sese acoi vireco vahe ocuaita Tūpa reroyasar rāro āgua, ahe secoi tuprira mbahe avīye vahe pipe yepi. Ipipe ava noñehi chira yamotarēhisave. Iyavei omendara ñepeñi cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güetave. Oicua aveira ava mbohe tupri āgua. <sup>3</sup> Iyavei ndahei chira caguar tēi. Ndosecai chiaveira ovava āgua. Iyacatu rumo seco mbegüera opacatu ava upe. Ndoipota rai chiaveira guarepochi. <sup>4</sup> Iyavei oicua tuprira güeta pipendar rāro āgua. Ombohe aveira guahir iporeroya āgua, iporomboetei āgua avei. <sup>5</sup> Esepia, acoi ndoicuai vahe güeta pipendar rāro, ¿mara ehira evocoiyase Tūpa reroyasar rāro? <sup>6</sup> Tūpa reroyasar rārosar rumo ndahei chira oipisi ramo vahe Tūpa opiha pipe. Esepia, aviyeteramo oyemboivate ai tiētera. Ipipe sui imocañipri avei secoira Caruguar nungar. <sup>7</sup> Iyavei oyecua uca tupri ranera Tūpa reroyasarēhi pāhuve. Ahese ndipoi chira imboeteiēhisa iyavei ndoviapi chira Caruguar povrive.

*Tūpa reroyasar rese ihañeco vahe cuaita*

<sup>8</sup> Iyavei Tūpa reroyasar rese ihañeco vahe yuvirecoira oporomboeteisa pipe. Tomboavīye oñehi. Ndahei chira caguar tēi; ndahei chiaveira guarepochi pota raisar tēi. <sup>9</sup> Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco. <sup>10</sup> Iyavei secoāhasa ranera. Acoi osē tuprise, ahese toyuvirecoi Tūpa reroyasar rese ihañeco vahe. <sup>11</sup> Iyavei sembireco yuvirecoi aveira oporomboeteisa pipe, nimahechiroi chira, osāro tuprira güecocuer yuvireco, iyavei imboyeroyapri aveira opacatu mbahe rese yuvireco. <sup>12</sup> Iyavei Tūpa reroyasar rese hañecosar ñepeñi itera sembireco, oicua aveira guahir rāro tupri āgua, güeta pipendar rāro āgua avei. <sup>13</sup> Esepia, Tūpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyēhisave avei secoira Jesucristo reroyasa pipe.

*Tūpa reco oyecua ramo vahe reroya tuprisa*

<sup>14</sup> Che aso pihaiivi pota nde repia. Aicuachía rumo co che ñehi ndeu <sup>15</sup> acoi che aracahese, ereicuañora rumo pe reco tupri āgua ava Tūpa rese yuvirecoi vahe pāhuve; ahe acoi Tūpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua āgua. <sup>16</sup> Supi eté tuvichá etepri Tūpa reco oyecua ramo vahe reroya tuprisa:

Cristo oyemoporēhi yande reco nungar pipe yandeu.

Ipare Espiritu pipe imboyecuasa secocuer supi tupri vahe.

Iyavei Tūpa rembiguai rembiepiave secoi.

Ichui imombehusa opacatu ivi rupi; opacatu rupi avei seroyasa.

Iyavei ipisipri secoi ivave nara.

## 4

*Oimera ava oyepipi vahe Tūpa rese oyeroyasa sui yuvireco coiye*

<sup>1</sup> Iyavei Espiritu aipo ehi tupri yandeu: coiye, ari cañi renonde, amove ava oyepipira Tūpa rese oyeroyasa sui yuvireco. Omboyeroyara



espíritu oporombopa tēi vahe, porombohesa Caruguar suindar avei. <sup>2</sup> Oyapısacara ava aipo ehi tēi vahe rese, semirañete ai vahe ñehe rese avei yuvireco. Ēgüe ehira opihañemoñetasa mocañi tēi yuvireco. <sup>3</sup> Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco. <sup>4</sup> Esepia, opacatu mbahe Tūpa rembiapo, aviye ité. Ahe ndiyai chira yaroïro yaipisise, “Aviye ndeu” yande hesa pipe chupe. <sup>5</sup> Esepia, Tūpa oñehe pipe yande yeroquise co tembihu rese, osovasa yandeu.

*Cristo rembiguai aviye vahe resendar*

<sup>6</sup> Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

<sup>7</sup> Ndereyapısacai chira rumo acoi mbahe aracahendar co ivi pendar yapısaca tēisa rese. Eyembohe catu yande Yar uveño ité nde reco āgua. <sup>8</sup> Esepia, yepe aviyeño chīhi yande retecuer yamoviracua viña, yande Yar upe yande reco āgua aviye catu opacatu yande reco uve nara. Esepia, ahe yande pītiviira yande recove āgua cūritei iyavei curi yande recove āgua. <sup>9</sup> Co supi eté vahe, evocoyase yande yaroyara opacatu yepi. <sup>10</sup> Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Pīsirosar, iyavei viroyasar Pīsirosar catu ité secoi.

<sup>11</sup> Co porombohesa eremombehura ava pāhuve, erembohe aveira sese. <sup>12</sup> Tipo eme ava nde roeroïro vahe chīhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde reroyasave nde recocuer maranehi pipe. <sup>13</sup> Che yepota nondeve, eyeroqui catu Tūpa Ñhengagüer rese opacatu ava rovaque. Emonguerēhi catu yande rivireta iyavei erembohe tuprira. <sup>14</sup> Nderepoi chira Tūpa ndeu mbahecuasa ombou vahe sui. Esepia, ava Jesús reroyasar rārosar upe Tūpa omombehuse nde cuaitarā, omondo opo nde harive yuvireco.

<sup>15</sup> Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. <sup>16</sup> Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ēgüe erese, ipīsipropi ereicora; nde ñehe rese oyapısaca vahe avei ipīsipropi yuvirecoira.

## 5

*Mara ehira Jesús reroyasar oyepāhuve yuvireco*

<sup>1</sup> Eremboaracua pīrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chīhivahe upe ereñehe tuprira secocuerā rese inungar nde rivri upe. <sup>2</sup> Cuña otiaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecota opacatu nde reco catuprisa pipe.

<sup>3</sup> Acoi imer mano vahecuer ité ereipītiviira que mbahe ipane vahe rese. <sup>4</sup> Que oimese imembri, anise que semiariro, toyembohe rane ocuaita mboaviye āgua yuvireco chupe. Ēgüe tehi guaisu mboyeve chupe, ahe

niha Tūpa remimbotar. <sup>5</sup> Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tūpa rese, iyavei oyerocuñño ité ari, pītu yacatu yepi. <sup>6</sup> Osecase rumo mbahe güemimbotar yuvireco, ahese omano vahe tēi secocuer yuvirecoi. <sup>7</sup> Eyocuai tupri ava co ñehesa rese; ichu ndahei chira ava ñehepora tēi yuvireco. <sup>8</sup> Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tūpa rese oyeroyasa rupi iyavei mbahe tēi catu Jesús reroyasarēhi sui.

<sup>9</sup> Icuachiasara rumo ambuae cuña imer mano vahecuer pāhuve ivate catu sesenta sui iharaviter vahe, iyavei ñepeño ité omer vireco vahecuer. <sup>10</sup> Icuapri secocuer icatupri rese, omboacua tuprise chihivahe oyesuindar, omoinguese ava güeta pipe, ihañecose ava Tūpa reroyasar rese ipi sei āgua, oipitiviise ava iparaisu vahe, oyapo tuprise opacatu mbahe aviye vahe.

<sup>11</sup> Ereicuachia eme iharaviter ndosupiti vahe sesenta cuachiar pipe. Esepia, amove güemimbotar pipe tēi oyepepi Cristo sui, omenda yupagüe pota iri vahe. <sup>12</sup> Ipipe oimera Tūpa poronupasa chupe. Esepia, yipindar oyemondo Tūpa upeño ité oyecuachiasa. Ipare rumo nomboaviyei eté oñehe. <sup>13</sup> Iyavei oi yacatu rupi tēi oguatase oico, ahese virecora oatēhisa, iyavei imahechiroi tēira, oñangareco tēira opacatu rese, omombehu mbehu tēi aveira mbahe naporai vahe. <sup>14</sup> Sese co aipota acoi imer mano vahecuer cuñatai vite vahe: tomenda iri, timembiri iri avei yuvireco, iyavei tosāro tupri güeta pipendar. Sese yamotarēhimbar secocuer ndahei chira oñehepora tēi vireco yuvireco. <sup>15</sup> Esepia, oime ité amove oyepepi vahe güemimbotar pipe Carugar rupi güeco āgua.

<sup>16</sup> Acoi oimese que cuña Tūpa reroyasar vireco vahe que cuña imer mano vahecuer oyepiri, ahe toipitivi yuvireco. Ahe sese evocoiyase tūparo pendar nihañecoi chira. Ahese oicatura supi eté imu ndipoi vahe rese hañeco āgua yuvireco.

<sup>17</sup> Iyavei acoi Tūpa reroyasar rārosar osāro tupri vahe, ahe toipisi catu ava poropitiviisa imboyeroyasave. Acoi oyemondo vahe Tūpa Ñhengagüer mombehu āgua, ava mbohe āgua avei, ahe co poropitiviisa oipisi catura. <sup>18</sup> Esepia, aracahendar icuachiapri pipe aipo ehi: “Ereyuru āpichi rene tivi oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisira oporaviqui repri” ehi.

<sup>19</sup> Iyavei nde, ndereroyai chira mbahe omombehu vahe Tūpa reroyasar osāro vahe yamotarēhisave yuvireco. Oimese que ñuvirio sepiasar, que mbosapi, ahese ramo ereroyara.

<sup>20</sup> Acoi oimese rumo angaipa aposar ipāhuve, ahese eremboaracuara opacatu ava rovaque. Evocoiyase ambuae osiquiyera angaipa apoēhi āgua yuvireco.

<sup>21</sup> Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tupri co mborocuaita, nderemomahuatii chira ava imboaracua nde remimbotar rupi tēi. <sup>22</sup> Ndahei chira pihavi ereseno mbia mborocuaita rese ihañeco vaherā. Aviyeteramo nde rese pāve mbahe oimera. Eñearo tupri nde reco maranehisa pipe.

<sup>23</sup> Nde rie mbaherasisa upe ndereihui chira i güeraño tēi, chihimi rumo uva ricuer ereihuñomira chupe.

<sup>24</sup> Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa.

<sup>25</sup> Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

## 6

<sup>1</sup> Iyavei co ava mbiguai Jesús reroyasar, ahe oyeroya tupri ra güerecuar yuvireco ava oñehe-ñehe tēiēhi āgua Tūpa rer rese, yande porombohesa rese avei no. <sup>2</sup> Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

### *Tūpa rese yande pihañemoñetasa sepirusu vahe nungar*

Eporombohe, emombehu co mbahe: <sup>3</sup> oimese oporombohe vahe oye-suindar pihañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tupri sa rese, <sup>4</sup> ēgüe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa <sup>5</sup> iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihñemoñeta Tūpa rese omahenduhasa pipe mbahe rereco ati āgua yuvireco viña. <sup>6</sup> Yayembovihanose mbahe yande rembiereco rese, ahese Tūpa rese yande pihañemoñetasa inungar mbahe sepirusu vahe yandeu. <sup>7</sup> Esepia, ndayarui eté niha mbahe yahase co ivi pipe iyavei ndayarasoi chiaveira mbahe yamanose yande yeupi. <sup>8</sup> Iyacatu rumo yarecose yande remihura, yande yemonde āgua avei, sese yayembovihanora yaico. <sup>9</sup> Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoāhasa upe. Ipare oviapi mbahe tēi pipe, setá mbahe pota raisave, ipipe oyeecomomara. Ipare oyemocañi tēi. <sup>10</sup> Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

### *Tūpa rese yande reco vīracuasa*

<sup>11</sup> Nde rumo, Tūpa rese ereico vahe, eyepepi opacatu co nungar mbahe naporai vahe sui. Eico nde reco ñvisa pipe, ndemahenduhāno ité Tūpa rese. Eroya, esaisu, eñemosa avei eico nde reco mbegüesave. <sup>12</sup> Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco āgua ava eta rovai. <sup>13</sup> Cūritei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai <sup>14</sup> ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tupri sa sui acoi ouse yande Yar Jesucristo. <sup>15</sup> Acoi oyepotase ari imombehupri curi, ahese Tūpa omboyevira Guahir. Ahe niha ñepe vaheño ité imboeteipri, seco pīrata catu vahe. Aheño ité niha mborerecuar ivate catu vahe rerecuar. <sup>16</sup> Aheño ité teco apirēhi vahe, tesapesa secui; ndipoi oyemboya vahe sese, ndipoi eté que ava osepia vahe. ¡ēgüe tehi, imboeteipri tasecoi opacatu opīratasa apirēhi vahe rese!

<sup>17</sup> Acoi imbahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe ēgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporuguã. <sup>18</sup> Eyocuai avei evocoi ava: toyuvirecoi mbahe yar nungar mbahe aviye vahe aposa pipe. Iyavei toyemoingatuño acoi mbahe vireco vahe mboyaho āgua ambuae ava upe yuvireco. <sup>19</sup> Evocoiyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco āgua.

*Timoteo cuaitarã ipa vahe*

<sup>20</sup> Timoteo, esãro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pihañemoñetasa ēgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe. <sup>21</sup> Ipipe sui niha amove ava oyavi Tūpa reroyasa yuvireco.

Aviye, yande Aposar tande rovasa. Aipo rupive.

## PABLO REMBICUACHIA IMOÑUVIRIOSA TIMOTEO UPE TIMOTEO

### *Pablo mahenduhasa Timoteo upe*

<sup>1-2</sup> Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tūpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cūritei oime yandeu Jesucristo rese yande recose. Yande Ru Tūpa iyavei yande Yar Jesucristo tombou oporovasasa, oporoparaisuerecosa nde reco tupri āgua ndeu.

### *Pablo oyocuai Timoteo Cristo recocuer mombehu āgua*

<sup>3</sup> Che yeroqui pāhuve, chemahenduha nde rese pītu, ari yacatu rupi. “Aviye ndeu” ahe Tūpa upe nde recocuer rese. Che aporaviqui tupri ité Tūpa rese che pihañemoñeta tuprisa pipe yepi inungar che ramoi eta oyapo yuvireco aracahe. <sup>4</sup> Ndacheresarai eté acoi nde yaseho agüer sui. Iyavei oroepia pota tēi che yemboviharere āgua. <sup>5</sup> Supi eté chemahenduhāño ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipīndar ēgüe ehi yuvireco. Evocoiyase ayeroyaño ité nde rese, nde avei ēgüe erese.

<sup>6</sup> Sese che oromonguerēhi embouvicha catu co Tūpa ombou vahe ndeu acoi amondose che po nde harive; ahe ereco catu ndeyeupe. <sup>7</sup> Esepia, Tūpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri āgua. <sup>8</sup> Evocoiyase eresiquiye eme catu yande Yar recocuer mombehu. Nderechī chiaveira che roquendasa sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosañora co mbahe-mbahe tēi Tūpa pīratasa pipe. Ahe oura ndeu ñehesa pīsirosa resendar mombehusa sui. <sup>9</sup> Tūpa niha yande pīsiro iyavei yande renoi yande reco tupri āgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yipisuive ivi apo viteēhiseve. <sup>10</sup> Cūritei rumo ahe omboyecua oporoaisusa yande Pīsirosar Jesucristo ouse, acoi ou vahe co ivi pipe manosa pīratasa recopi āgua. Iyavei ñehesa pīsirosa pipe avei oicua uca tecovesa ndopai vahe.

<sup>11</sup> Tūpa niha che cuai co ñehesa mombehu āgua. Che cuai avei apóstol che reco āgua iyavei che porombohe āgua. <sup>12</sup> Sese niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pipe. Esepia, aicua ahe vireco pīratasa acoi ñehesa ombou vahe cheu imocañiēhi āgua acoi Jesús yevi āgua rupi eté.

<sup>13</sup> Erecoveño ité porombohesa aviye vahe che suindar, iyavei eicoño ité Tūpa rese nde yeroyasa pipe iyavei poroaisusa yareco vahe pipe Cristo rese yaicose. <sup>14</sup> Esāro avei co ñehesa aviye vahe Tūpa ombou vahe ndeu Espiritu Santo reco pīratasa pipe yareco vahe yandeyese.

<sup>15</sup> Ereicua niha co ava opacatu Asia pipandar oyepepiño che sui yuvireco. Ipāhuve yuvirecoi mbia ñuvirío, ahe serer: Figelo, Hermógenes. <sup>16</sup> Yande Yar tomondo paraisuerecosa Onesíforo mu upe. Esepia,

Onesíforo setá yupagüer che mboviha. Iyavei nochi eté ava rovaque che roquendasa sui. <sup>17</sup> Ouse rumo Roma ve, ndopituhui eté che reca. <sup>18</sup> Yande Yar tomondo oporoparisuerecosa chupe ahe arí pipe curi. Iyavei nde ereicua tupri ité ahe mbia yande pítivii vahe Efeso ve.

## 2

### *Jesucristo sundao oyemoviracua vahe*

<sup>1</sup> Iyavei nde no, che rahir, eyemoviracua mbahecuasa Jesucristo ombou vahe pipe ndeu. <sup>2</sup> Acoi che porombohesa eresendu vahe ava rehii rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe água.

<sup>3</sup> Nde eyemoviracuaño teco asi upe Jesucristo uve nara inungar sundao oyemoviracua vahe ité. <sup>4</sup> Ñepeí yepe sundao ndosirii eté ocuaita sui. Esepia, ahe oyemoingatu voi eté ocuai água güerecuar upe. <sup>5</sup> Iyavei iguayí rai vahe, ndoipisii chira porerecosa oguayí tupriêhi pipe. <sup>6</sup> Iyavei yande inungar que ava ofoti vahe mbahe, ahe rane omonuha güemiti yaviyese oyeupe yepi. <sup>7</sup> Eyapisaca tupri co che ñehe rese. Yande Yar niha osenducua uca tuprira opacatu co mbahe ndeu.

<sup>8</sup> Iyavei no ndemahenduha Jesucristo rese. Ahe niha ocuerayevi vahe. Iyavei aracahendar mborerecuar David suindar secói. Co niha ñehesa ñepisirosa resendar amombehu vahe vichico. <sup>9</sup> Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñehengagüer mombita rumo ndoicatu eté yuvireco. <sup>10</sup> Sese che añemosañu opacatu mbahe-mbahe tēi upe opacatu Tūpa rembiporavo recocuer aviye água rese ‘tovireco catu pisirosa porañete, apirēhi vahe Jesucristo rese yuvireco’ che yapave.

<sup>11</sup> Co niha supi tupri vahe:

Yamanose Cristo rese, ahese yaicove aveira sese.

<sup>12</sup> Yañemosase mbahe tēi upe, ahese yande yaicora mborerecuar imborerecuasave ipiri.

“Ndaicuai Jesucristo” yahese, ahese ahe avei,

“Ndopocuai vahe” ehiñora yandeu.

<sup>13</sup> Yepe co coti tēi yarovara yande recocuer seroyaēhisave, ahe rumo ndovirovai chietera güeco ñvisa.

Esepia, ndoicatu, “Ndahei che ahe aico” ehi vaherã.

### *Ava osē tupri vahe güecoñhasa Tūpa upe nara*

<sup>14</sup> Emomahenduha yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ēgüe ehi tēi vahe. Esepia, omomara ambuae ava osenduse ñehe rai yuvireco.

<sup>15</sup> Eyapo tupri mbahe opacatu nde catugüer rupi nde recocuer mboyecua água Tūpa rovai inungar oporaviqui tupri vahe, nochi vahe. Ēgüe ere, eporombohe tupri ñehesa supi eté vahe rese. <sup>16</sup> Eyepepi ñehe tēisa, ēgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe. <sup>17</sup> Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. Ēgüe ehi Himeneo, Fileto <sup>18</sup> oyaví porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipipe Jesús reroayasar oipihañemofeta rerova yuvireco. <sup>19</sup> Tūpa rumo omondo mbahe moviracua tupri água, sese icuachiasa aipo ehi vahe: “Yande Yar oicua

ité oyeupendar ava” ehi, iyavei, “Opacatu yande Yar rer vireco vahe, toyepepi mbahe naporai vahe sui yuvireco yepi” ehi.

<sup>20</sup> Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepe iporupirã ari imboeteisa pipe nara, ambuae rumo ari rupi iporupirã. <sup>21</sup> Acoi ava oñemoatiro vahe co tecocuerai sui Tüpa upe nara, ahe ipehasa inungar vaso oro apopri poromboeteisa pipe iporupirã; ahe ava oyemoingatu voi eté oico mbahe icatupri vahe apo ñgua Tüpa upe.

<sup>22</sup> Eyepipi mbia chñihavahe pihañemoñeta rai tēisa sui. Emohivi tupriño ité nde recocuer sereco. Eyeroyaño ité Tüpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo opihañemoñeta tuprisa pipe yuvireco. <sup>23</sup> Eremboyeroyai rene ñehesa porandu-randu tēisa, ñgüe ehi tēi vahe. Ereicua niha ichui tēi oime yeamotarēhisa yepi. <sup>24</sup> Iyavei yande Yar rese oporaviqui vahe, ndiyai oyecopi oñehe pipe yuvireco. Iyacatu rumo, aviyera secocuer opacatu upe, oporombohe tupri, oñemosañora ombahe mboasiēhisa pipe oico. <sup>25</sup> Iyavei omboaracuara güeco asiēhisa pipe acoi ava ndiporeroyai vahe. Esepia, aviyeteramo Tüpa osecuñarora ipihañemoñeta raisa oyeupe yevi iri ñgua: ipipe sui porombohesa supi eté vahe oicua yuvireco. <sup>26</sup> Ipipe sui avei toyemopoase, toyuvinose Carugar povri sui semimbotar apo iriēhi ñgua.

### 3

#### *Mara ehira ava ari ipa vahe pipe curi*

<sup>1</sup> Iyavei tereicua ari ipa vahe yepotasa, ahese oimera tecocuer yavai catu vahe. <sup>2</sup> Ahese ava ahe ae tēi oyeaisura yuvireco, guarepochi tēi oipota raira, oyemboivate aira, oyemboetei ai tēi aveira. Oñehe raira Tüpa rese yamotarēhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tüpa rese pihañemoñetasa yuvireco. <sup>3</sup> Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tēi apo ñgua yuvireco. Güeco asi pipe avei yuvirecoira. Iyavei opacatu mbahe aviye vahe oyamotarēhira yuvireco. <sup>4</sup> Iyavei omondora ava yamotarēhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tēi oyemboiha ñgua yuvireco. Ipipe rumo Tüpa ndosaisui chira yuvireco. <sup>5</sup> Ahe inungar-ra Tüpa rese ité yuvirecoi vahe viña. Tüpa pĩratasa rumo nomboyecuai chietera güembiapo pipe yuvireco oyese.

Sese nde, eyepipiño evocoi nungar ava sui. <sup>6</sup> Esepia, evocoi nungar ava pãhuve oime yuviroiqueño tēi vahe oi rupi cuña ndoicatu vahe angaipa rerecosar mbopa ñgua. Esepia, ahe cuña opihañemoñeta raisa pipe yuvirecoi vahe. <sup>7</sup> Yepe oyapisaca tupri tēira ñehesa rese yuvireco viña, ndosupitii eté rumo co porombohesa supi eté vahe renducua ñgua yuvireco. <sup>8</sup> Inungar co ava ipaye vahe Janes, Jambres serer vahe oyemboyere Moisés amotarēhi yuvireco, ñgüe ehi avei evocoi ava porombohesa supi eté vahe amotarēhisar yuvireco. Ahe oyemomara vahe opihañemoñeta rai pipe yuvireco. Ndoviroyai eté Jesús porombohesa yuvireco. <sup>9</sup> Ndoporombopa iri chira rumo yuvireco. Esepia, opacatu ava oicua yuvireco imbahecuaēhi rese, inungar co ñuvirio mbia Moisés amotarēhimbar yuvirecoi aracahe.

*Timoteo cuaitarã ipa vahe*

<sup>10</sup> Nde rumo che reco rupi tupri ité ereico. Esepia, ereroya tupriño ité che porombohesa, che pihañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa <sup>11</sup> opacatu mbahe tēi porarasa rese. Nde niha ereicua opacatu mbahe tēi oime vahe cheu co tecua guasu, Antioquía ve, Iconio ve, Listra ve avei no, iyavei che paraisusa mara-mara tēi che rerecose yuvireco. Yande Yar rumo che pĩsiro opacatu evocoi mbahe-mbahe tēi sui. <sup>12</sup> Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco. <sup>13</sup> Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tēira yuvireco. Iporombopasa pipe rumo ambuae omboyevira chupe.

<sup>14</sup> Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua. <sup>15</sup> Iyavei eyemomahenduha co rese: nde chĩhivahe suive ité niha ereicua Tũpa ñehe icuachiapri eico. Ahe niha nde mombahecua vahe nde pĩsiro ãgua Jesucristo reroyasa pipe. <sup>16</sup> Opacatu co ñehesa icuachiapri ou vahe Tũpa sui, aviye ai eté porombohe ãgua, iyavei poromboyapisaca ãgua, poromboaracua tupri ãgua iyavei ava upe ñehe tupri ãgua secocuer mohĩvi ãgua yepi. <sup>17</sup> Ichui, ava Tũpa rese yuvirecoi vahe oyemoingatu voira opacatu tecocuer tupri apo ãgua yuvireco.

## 4

<sup>1</sup> Iyavei no, co rese che orocuai pota Tũpa rovaque, Jesucristo rovaque avei acoi ou vaherã omborerecuasa reseve oicove vahe, omano vahe recocuer rese porandu ãgua. <sup>2</sup> Emombehu Tũpa Ñehengagüer ari rupi. Erova ité ava reco. Eporomboaracua, eporomonguerēhi tupri avei opacatu nde reco asiēhisa pipe. <sup>3</sup> Esepia, coiyavei ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe ãgua, güemimbotar tēi avei omombehu ucara oyeupe yuvireco. <sup>4</sup> Iyavei oyepēpira co mbahe supi eté vahe sui. Viroyara rumo opacatu ava remimombehu tēi yuvireco. <sup>5</sup> Nde rumo, ererecoveñora nde aracua tuprisa. Eñemosañe mbahe naporai vahe upe. Ndehañeco catu ñehesa pĩsirosa resendar mombehu ãgua. Emboaviye tupri avei opacatu nde poraviquisa.

<sup>6</sup> Virovi ari che retecuer mondo ãgua manosave inungar mbahe seropovēhepri yande Yar upe. <sup>7</sup> Ayapopa che recoeté pipe che poraviquisa aviye vahe che amotarēhimbar pãhuve. Amboaviye che cuaita. Ndayepēpii eté che yeroyasa sui. <sup>8</sup> Cũritei che rãro ivave co porerecosa che poraviqui aviye vahe resendar. Yande Yar mborerecuar seco ĩvi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osãro vahe upe yuvireco.

*Pablo, “Eyu rane che repia” ehi Timoteo upe*

<sup>9</sup> Ndepoyava catu eyu che repia. <sup>10</sup> Esepia, Demas che reya co mbahe ĩvi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. <sup>11</sup> Lucas güeraño oicove che piri. Eseca Marcos, tou nde rupi che pĩtivii ãgua mboraviqui rese. <sup>12</sup> Tíquico amondo tecua Efeso ve. <sup>13</sup> Acoi ereyuse, eru avirave che



yemboyohasa aseya vahe Troas ve Carpo rēta ve. Iyavei cuachiar guasu, ambuae cuachiar reseve, ahe aipota catu vahe; erupa eyu.

<sup>14</sup> Alejandro, guarepochi mombesar, oyapo mbahe tēi cheu. Yande Yar rumo oicua sembiapogüer rese chupe. <sup>15</sup> Iyavei nde eicua catu ichui. Esepia, ahe yande amotarēhi mbahe yande remimombehu rese oico.

<sup>16</sup> Yipindar añehese che yoepi ãgua mborerecuareta rovai, ndipoi eté que che pītiviisar; opacatuño ité che reya yuvireco. Tūpa tiñero sese yuvireco chupe. <sup>17</sup> Yande Yar Jesucristo rumo che pītivi. Che momirata co ñehesa pīsirosa resendar mombehu tupri ãgua opacatu ava ndahei vahe judío upe. Ëgüe ehi avei che renose mbahe tēi sui. <sup>18</sup> Ahe che pehara opacatu mbahe-mbahe tēi sui iyavei che pīsirora oyepiri ivave che so ãgua. ¡Ëgüe tehi timboeteisa catu yande Yar apirēhi vahe yepi!

*Mahenduhasa opacatu upe*

<sup>19</sup> Emombehu che mahenduha Prisca upe, Aquila upe iyavei opacatu Onesiforo rēta pendar upe avei. <sup>20</sup> Erasto opita Corinto ve, Trófimo rumo imbaheasi, evocoyase aseya Mileto ve. <sup>21</sup> Ndepoyava catu eyu irohí yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

<sup>22</sup> Yande Yar Jesucristo toico nde rese. Iyavei Tūpa tape rovasa opacatu pe rereco. Aviye. Aipo rupive.

## PABLO REMBICUACHIA TITO UPE TITO

### *Pablo mahenduhasa Tito upe*

<sup>1</sup> Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upe iyavei Tūpa rese pihañemoñetasa supi tupri vahe cua uca tupri āgua. <sup>2</sup>Esepia, tecovesa apirēhi vahe rārosa pipe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo viteēhiseve oico. <sup>3</sup> Ichui cūrítei ari oyepota yandeu iñehengagüer cua āgua. Sese Tūpa, yande Pīsīrosar, che cuai oñehengagüer mombehu. <sup>4</sup> Tito, co che ñehe aicuachía ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tūpa, yande Pīsīrosar Jesucristo tombou oporovasasa nde reco tupri āgua ndeu.

### *Tito poraviquisa caha pāhu Creta ve*

<sup>5</sup> Che oroeya vitu co caha pāhu Creta ve mbahe opita vite vahe moingatu tupri āgua. Iyavei, “Eiporavo ava, Jesucristo viroya vahe rāro āgua ñepeipei tecua rupindar” ahe acoi ndeu cuese. <sup>6</sup> Evocoi Jesucristo viroya vahe rārosar toyuvirecoi güeco tupri āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeño güembireco virecora yuvireco; tahir evocoiyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar oporeroyaēhisa pipe ambuae ava ñeheēhi āgua sese yuvireco. <sup>7</sup> Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ivi tupri yuvireco. Iyavei toico eme oporeroyaēhisa pipe, toñemoiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco. <sup>8</sup> Iyacatu rumo omoinguera ava oyepota vahe güētave oyepiri. Iyavei aviye aira yepi. Osāro tuprira güecocuer. Iyavei taseco ivi güeco catupri pipe Tūpa upe. Tosāro tupri avei opihañemoñetasa yuvireco. <sup>9</sup> Iya oyemboya catu oyembohesa supi tupri vahe rese yuvireco. Ipipe sui tomonguerēhi catu ambuae yuvireco co ñehesa maranehi pipe iyavei ambuae seroīrosar pihañemoñeta mohivi āgua.

<sup>10</sup> Esepia, oime setá nimbahe reroyai vahe; judío “peyembocircuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco. <sup>11</sup> Ēgüe ehi vahe iyacatu pemonguiriri. Esepia, ahe niha setá ava oñemu vahe omboyepipi uca porombohesa supi tupri vahe sui yuvireco. Oporombohe mbahe co coti tēi vahe rese guarepochi rereco āgua tēi yuvireco.

<sup>12</sup> Ñepe mbia, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mamba nungar tēi, icaru ai, yangaipa vai yuvireco yepi” ehi oñehe. <sup>13</sup> Supi eté aipo ehi; sese emboaracua pīrata ité. Evocoiyase toviroya tupri Tūpa yuvireco. <sup>14</sup> Iyavei toviroya eme co judío oyesui tēi mbahe omombehu vahe iyavei ava porocuaita tēi yuvireco. Esepia, ahe oyemboyere mbahe supi vahe sui yuvireco.

<sup>15</sup> Acoi ava ndaseco marai vahe upe opacatu mbahe nimarai. Ndi-poreroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esepia, ipihañemoñeta, yaracuasa avei naporai eté. <sup>16</sup> Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaēhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatu mbahe aviye vahe apo yuvireco yepi.

## 2

### *Porombohesa nimarai vahe*

<sup>1</sup> Nde ñehe toyoya tupri co porombohesa nimarai vahe rese yepi. <sup>2</sup> Evocoiyase mbia oñaro catu vahe Tūpa reroyasar toñearo tupri, imboyeroyapri toyuvirecoi, tosāro tupri güecocuer, toviroco tupri avei Tūpa reroyasa, oporoaisusa. Iyavei güeco mbegüesa pipe toñemos mbahe-mbahe tēi upe. <sup>3</sup> Ëgüe tehi avei cuña oñaro vahe Tūpa reroyasar yuvireco: güeco tupri toviroco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecua güecocuer aviye vahe, <sup>4</sup> ombohera cuñatai imer raisu āgua, imembri raisu āgua avei. <sup>5</sup> Tombohe avei seco tupri āgua, iñearo tupri āgua angaipa sui iyavei sēta pipendar rese hañeco tupri āgua yuvireco. Tomboaracua avei seco aviye āgua, imer mboyeroya āgua avei. Evocoiyase noñehe-ñehe tēi chira ava Tūpa Ñehengagüer rese yuvireco.

<sup>6</sup> Ëgüe ere avei emonguerēhi mbia chihivahe secocuer rese iñearo tupri āgua. <sup>7</sup> Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei. <sup>8</sup> Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoiyase yande amotarēhimbar yuvinochira ndoicatuise, “Mbahe” ohe āgua yuvireco yandeu.

<sup>9</sup> Emboaracua avei mbiguai yuvirecoi vahe: toviroya opacatu mbahe rese güerecuar, tomboyeroya imboeteisave, toñehepoepi eme avei yuvireco. <sup>10</sup> Iyavei toñomi eme mbahe. Iyacatu rumo seroyapri tupri yuvirecoira. Evocoiyase opacatu osepiase seco tuprisa, omboeteira yande Pīsiosar Tūpa recocuer resendar yembohesa yuvireco.

<sup>11</sup> Tūpa niha omboyecua oporoaisusa yandeu. Ahe güeru pīsiosa opacatu ava upe. <sup>12</sup> Co poroaisusa Tūpa suindar yande mbohe mbahe-mbahe tēi iyavei yande remimbotar tēi reya āgua. Iyavei yande mbohe co ivi pipe yande ñearo tupri āgua, yande reco ivi āgua iyavei Tūpa mboetei āgua. <sup>13</sup> Iyavei yasāro yande viharetesa pipe Tūpa omboaviye vahe rā güemimombehu, ahe Jesucristo yande Tūpa seco ivaté vahe, yande Pīsiosar yevi irisa oporañetesa pipe. <sup>14</sup> Ahe oyemondo oyeyuca uca yande rese yande pīsio āgua opacatu mbahe-mbahe tēi sui yande reco moatiro tupri āgua. Evocoiyase yande yaico chupe nara güeraño ité yande querēhisave opacatu mbahe aviye vahe apo āgua.

<sup>15</sup> Evocoi rese erembohera, eremonguerēhira, eremboaracua aveira opacatu nde porocuita pipe. Sese tipo eme que nde roeroirosar.

## 3

### *Jesús reroyasar cuaita*

<sup>1</sup> Co rese emomahenduha: toyapo ava mborerecuar guasu porocuita yuvireco iyavei opacatu ambuae mborerecua-recuarmi porocuita avei. Iyavei toyemoingatu tupri opacatu mbahe aviye vahe apo água yuvireco. <sup>2</sup> Toñehe-ñehe tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

<sup>3</sup> Esepia, yipindar yande avei ndayande mbahecuai yaico iyavei ndayaroyai Tüpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yemboviha água. Iyavei yaicoño mbahe tēi pipe, yaipotaño tēi ambuae ava mbahe, yamotarēhimbrī yaico iyavei yandeyeupe ae-ae yayeamotarēhi. <sup>4</sup> Ipare rumo Tüpa, yande Pīsīrosar, omboyecua güeco tuprisa, oporoaisusa opacatu ava upe. <sup>5</sup> Yande pīsīro, ndahei rumo yande rembiapo aviyesa sui, ahe rumo vireco oporoparaisuerecosa yandeu nara. Ichui omoatiro yande recocuer yande reco mopiasu. Iyavei Espiritu Santo pipe yande recocuer recuñaro tecove piasu rereco água. <sup>6</sup> Iyavei yande Pīsīrosar Jesucristo rembiapo sui Tüpa ombou catu oEspiritu Santo yandeu, <sup>7</sup> ipipe yande reco ai sui yande renose yande reco ñvi tupri água oporoaisusa pipe ‘toipisi co tecovesa apirēhi güemiaro yuvireco’ oya.

<sup>8</sup> Aipo ñehesa supi eté vahe. Che aipota sese ereporombohera. Ipipe Tüpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vahe rā yuvireco. <sup>9</sup> Ereyepēpīra rumo opacatu co nungar mbahe sui: yipindar ñehesa yepoepi tēisa sui, ipare arachendar ava recocuer rese ñehesa sui. Ereyepēpī aveira iporomoñemoiro serai vahe sui, Moisés porocuita resendar sui tēi ñehepoepi-epīsa sui avei. Esepia, evocoi nungar mbahe ēgüe ehi tēi vahe.

<sup>10</sup> Acoi ava omoimese yemboyahosa Tüpa reroyasar pāhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui. <sup>11</sup> Tereicua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

#### *Tito upendar ñehesa*

<sup>12</sup> Acoi amondose Artemas, anise Tíquico ndeu, eyu pīhaivi che repia tecua Nicópolis ve. Esepia, aheve apita pota sōhisa vahe pītuho rāro. <sup>13</sup> Eipītīvīi opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoiyase toyuvirasu tupri oguatasu rupi; tipane eme que mbahe chupe yuvireco. <sup>14</sup> Iyavei ambuae Jesús reroyasar eipe pendar toyembohe avei yuvireco mbahe tupri apo água iyavei ava mbahe chupe ipane vahe pītīvīi água. Evocoiyase secocuer aviye itera yuvirecoi.

#### *Mahenduhasa iyavei porovasasa ipa vahe*

<sup>15</sup> Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tüpa tape rovasa eipeve opacatu. Aipo rupive.

## PABLO REMBICUACHIA FILEMÓN UPE FILEMON

### *Pablo mahenduhasa Filemón upe*

<sup>1</sup> Che, Pablo, che roquendasa Jesucristo recocuer sui tēi. Aicuachía co che ñehe yande rívrí Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboraviqui apo āgua ereico. <sup>2</sup> Iyavei amondo co cuachiar yande reindrí Apia upe, Arquipo upe avei. Ahe avei yande ndugüer mboraviqui apo āgua Tūpa upe nara yuvirecoi, iyavei opacatu Jesús reroyasar nde rētave oñemonuha vahe upe nara. <sup>3</sup> Yande Ru Tūpa, yande Yar Jesucristo tombou oporovasasa, güeco tuprira avei pēu.

### *Filemón poroaisusa iyavei Cristo rese iyeroyasa*

<sup>4</sup> Che niha, “Aviye ndeu” ahe yande Ru Tūpa upe che yeruresa pipe nde rese yepi. <sup>5</sup> Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. <sup>6</sup> Aporandu Tūpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. <sup>7</sup> Cherorivete, ayemonguerēhi catu opacatu nde poroaisusa rese. Che rívrí, nde niha eremonguerēhi catu opacatu yande Yar reroyasar yuvireco.

### *Pablo oporandu mbahe aviye vahe rese Onésimo upe nara*

<sup>8</sup> Sese yepe che aico Cristo apóstol nde cuai āgua viña. <sup>9-10</sup> Che rumo aporandu ndeu nde poroaisusa rese mbahe aviye vahe apo āgua co nde rembiguaigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohaver che roquendasave.

<sup>11</sup> Aracaco co nde rembiguai secoise nde piri, ēgüe ehi tēi vahe secocuer ndeu viña. Cūrítei rumo ēgüe ndehi iri chira oico ndeu, iyavei cheu no. <sup>12</sup> Amboyevi co imondo ndeu eipeve. Eipisi inungar-ra che itera viña. <sup>13</sup> Che aipota opita vaherā nde nungar tupri che pítiví āgua viña, co soquendapri vite che recose Jesucristo ñehengagüer sui. <sup>14</sup> Che rumo ndaipotai mbahe apo nde pihañemoñetasa cuaēhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. <sup>15</sup> Aviyeteramo Onésimo oyepepi pucu raimi nde sui oyevi iri vaherā nde piri nara. <sup>16</sup> Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rívrí niha yande rembiaisu secoi cūrítei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rívrí nungar tupri ité yande Yar upe nara.

<sup>17</sup> Inungar nde rívrí che rereco eve. Ēgüe ere tupri aveira co mbia pisi. <sup>18</sup> Acoi oyapose mbahe ndeu, anise vīrocuase que mbahe nde sui, cheu emombehu. Che evocoiyase amboepira ndeu. <sup>19</sup> Che Pablo, aicuachía che po pipe ité seroya tupri āgua, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ēgüe ere cheu. Che rumo, “Ndereve cheu” ndahei eté ndeu. <sup>20</sup> Supi eté, che rívrí,

eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mbovha catumi eve.

<sup>21</sup> Che aicuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui. <sup>22</sup> Iyavei amoha Tũpa che renose vaheřã che roquendasa sui pe yeruresa pipe che so ãgua eipeve pe repia. Sese emoingatumi avei che pituhu ãgua.

*Mahenduhasa, porovasasa ipa vahe*

<sup>23</sup> Che ndugüer, Epafra, omondo omahenduhasa ndeu. Ahe avei soquendapri cohava yande Yar Jesucristo recocuer rese. <sup>24</sup> Iyavei Marcos, Aristarco, Demas, Lucas che ndugüer oporaviqui vahe Tũpa uve, ahe avei omondo omahenduhasa yuvireco ndeu.

<sup>25</sup> Yande Yar Jesucristo tape rovasa opacatu eipeve. Aipo rupive.

## ICUACHIAPRI HEBREO YUVIRECOI VAHE UPE HEBREOS

*Guahir Jesucristo pipe Tūpa oyemboyecua yandeu*

<sup>1</sup> Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri ãgua yuvireco chupe. <sup>2</sup> Cūritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. <sup>3</sup> Ahe niha Vu Tūpa recocuer porañetesa secoi. Ëgüe ehi eté, ahe Vu recocuer tupri ité. Ahe opacatu mbahe omoviracua oñehe pīratasa pipe. Yande angaipagüer sui yande moatiro pare oso, oguapi Vu acato coti oī ivave cute.

*Tūpa Rahir seco ivate catu Vu rembiguai iva pendar sui*

<sup>4</sup> Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui. <sup>5</sup> Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove ãgua” ndehi eté.

Iyavei:

“Che Tu aicora, ahe evocoyase che rahir secoira” ndehi avei chupe.

<sup>6</sup> Ichui rumo ombouse Guahir ñepei vahe co ivi pipe aipo ehi:

“Tomboetei opacatu che rembiguai yuvireco”

ehi. <sup>7</sup> Evocoyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviqui vaherã” ehi.

<sup>8</sup> Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirēhi vaherã ité.

Ereporocuai nde reco ivi tupriisa pipe yepi.

<sup>9</sup> Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

<sup>10</sup> Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

<sup>11</sup> Opacatu co nde rembiapo opa vaherã tēi,

inungar turucuar cuacua oyearo vahe opa.

Nde rumo apirēhi vaherã ité ereico.

<sup>12</sup> Ipare ereyapara inungar turucuar yapapri iyavei ereseçuñarora inungar oturucuar oseçuñarovahe.

¡Nde rumo ndereñecuñaroi chietera!

Iyavei nde recocuer ndopai vaherã ité” ehi.

<sup>13</sup> Ndahei que ñepei iva pendar güembiguai upe Tūpa aipo ehi:

“Eguapi che acato coti, ahese che amondora nde amotarēhimbar nde povrive” ehi.

<sup>14</sup> Esepia, opacatu Tūpa rembiguai espíritu yuvirecoi chupe oporaviqui ãgua, icuaiipri avei ava ipisiropirã pītivii ãgua.

## 2

*Yandemahemoha tuprira yande p̄sirosa rese*

<sup>1</sup> Sese iyacatu co ñehesa yasendu vahe rese yayapisaca tupri catu co tecocuer piasu sui yande yepēpiēhi āgua. <sup>2</sup> Esepia, co Tūpa rembiguai remimombhugüer seroyapri ité secōi, iyavei oyemboangaipa vahe, ndoviroyai vahe avei imombaraisupri ité sembiapo rupi yuvirecoi aracahe. <sup>3</sup> ¿Mara yahera p̄iha evocoyase yande yañemi Tūpa ñemoirosa sui viña acoi ndayandemahemoha tupriise co yande p̄sirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu. <sup>4</sup> Iyavei Tūpa oyapo setá mbahe yavai rai vahe poromondiisa ndayasepiai vahe. Iyavei oEspiritu Santo pipe, omboyoavirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

*Jesucristo ava nungar tupri secōi*

<sup>5</sup> Ndahei güembiguai povrive omondo Tūpa ivi oime vaherā, acoi oromombehu vahe p̄eu. <sup>6</sup> Oime rumo icuachiapri aracahendar pipe omombehu tupri vahe:

“Che Yar, ¿uma vo evocoyase ava?

¿Mahera ndemahenduha ava tēi rese, iyavei eresāro no?

<sup>7</sup> Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesa imboetisave chupe.

<sup>8</sup> Iyavei opacatu erereco uca mbahe nde rembiapo ipovrive” ehi imombehu.

Ēgüe ehise Tūpa, ndoseyai eté que ñepe yepe mbahe ipo pendarēhi. Cūritei rumo ndaopacatu tupri vitei mbahe ipovrive. <sup>9</sup> Yaicua niha Jesús, ahe Tūpa güembiguai sui ndaseta araviter ivi coti catu vireco. Oporoaisusa pipe oipota imano āgua opacatu ava repirā. Cūritei rumo iyemombaraisu pare, omondo oporañetesa imboetisave chupe.

<sup>10</sup> Iyavei opacatu mbahe oime Tūpa upe, ichuindar avei ‘toyuviroique opacatu che rahir che reco porañetesave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Poropisirosar güeco āgua’ oya. <sup>11</sup> Esepia, opacatu vireco ñepe Vu yuvireco co seco catupri vahe, seco mbocatuprisar avei. Sese Tahir nochi eté, “Che rivireta peico” ohe āgua viroyasar upe. <sup>12</sup> Ahe aipo ehi icuachiapri aracahendar pipe:

“Añehera nde rese che rivireta upe.

Asapuca aveira sapucaisa ndeu opacatu ava ndeu oñemonuha vahe p̄ahuve” ehi.

<sup>13</sup> Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tūpa rahir cheu ombou vahe rese” ehi icuachiapri pipe aracahe.

<sup>14</sup> Inungar ava vireco vahe guahir, oyoya soho, suvi; ēgüe ehi avei Jesús vireco voho, vuvi yande nungar; omano pipe sui omocañi vaherā iporoyuca ai vahe p̄irata; ahe Carugar. <sup>15</sup> Opacatu ava manosa sui osiquiyesa pipe mbiguai tēi nungar yuvirecoi vahe güecove viteseve, evocoi nungar sui senose āgua, ēgüe ehi Jesús. <sup>16</sup> Esepia, ahe ndoui Tūpa



rembiguai p̄it̄ivii āgua, ahe rumo ou Abraham suindareta p̄it̄ivii āgua. <sup>17</sup> Sese niha tivireta nungar tupri ité oyapo Tūpa, “Toime che rovaque pahi rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirā ñeroisa reime āgua” ehi. <sup>18</sup> Esepia, ahe avei oiporara Carugar poroātoisa. Sese cūritei ahe oicatu ité ava Carugar remiatoi p̄it̄ivii āgua.

### 3

#### *Jesús ivate catu vahe Moisés sui*

<sup>1</sup> Evocoiyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahi ivate catu vahe yande yeroyasa. <sup>2</sup> Ahe ité niha omboaviye tupri Vu remimbotar, osenoise imbou co tecocuer apo āgua inungar Moisés omboaviye tupri ocuaita Tūpa mbahe rāro aracahe. <sup>3</sup> Jesús rumo imboeteipri catu Moisés sui. Inungar acoi oi aposar imboeteipri catu oi sui secoi. <sup>4</sup> Esepia, ñepeipei oi vireco oaposar viña. Tūpa rumo opacatu mbahe aposar secoi. <sup>5</sup> Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omombehu Tūpa omboyecua pota vahe ava upe yepi. <sup>6</sup> Cristo rumo tahir güeco pipe omboaviye ocuaita Vu itūparo rese. Ahe tūparo yande yaico yayeroyaño itese Cristo rese iyavei yasāroño itese yande yembovihasa pipe co mbahe aviye vahe oime vaherā yandeu curi.

#### *Mbituhusa Tūpa upendar yuvirecoi vahe upe*

<sup>7</sup> Sese inungar aipo ehi Espiritu Santo icuachiapri aracahendar pipe: “Co pipeve voi, pesenduse Tūpa ñehe,  
<sup>8</sup> peyepihamoatai rene catu chupe, ndapeicoi chira ava ndiava reroyai vahe nungar acoi ivi iporupirēhisa rupi Tūpa recoāhasar yuvirecoi vahe aracahe.  
<sup>9</sup> Aheve avei acoi che recoāha tēi pe ramoi mbahe güembiapo pipe, yepi cuarenta araviter rupi osepia tēi mbahe che rembiapo yuvireco viña.  
<sup>10</sup> Sese añemoiro ahe ava upe, aipo ahe: ‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.  
<sup>11</sup> Sese che añemoiro ahe ava upe, ‘Ñepeipei reseve ndapepituhui chietera che pituhusa pipe’ ahe yuvireco chupe” ehi aracahe.  
<sup>12</sup> Che rivireta, peñearo catu; tipo eme que ñepeipei ipihañemoñeta naporai vahe Tūpa reroyaēhisa pipe oyepēpi vaherā ichui. <sup>13</sup> Iya rumo peyemonguerēhi catu ñepeipei ari yacatu rupi cūritei pe recove pipe angaipa upe pe yembopa uca iriēhi āgua, pe mbahe reroya iriēhi āgua rese avei.  
<sup>14</sup> Esepia, yayemoviracua tuprise Cristo rese yande yeroyasa yipisuive yareco vahe pipe yande mano āgua rupi eté, ahese yaico itera sese.  
<sup>15</sup> Supi niha acoi aipo ehi ñehesa: “Co pipe voi pesenduse Tūpa ñehe, peyepihamoatai rene catu chupe; ndapeicoi chira ava ndiava reroyai vahe nungar” ehi vahe.  
<sup>16</sup> ¿Ava pīha acoi ava iñehe mara vahe yuvireco Tūpa ñehe rendu pare chupe? Moisés remienose Egipto ivi sui ēgüe ehi yuvireco. <sup>17</sup> ¿Ava upe pīha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirēhisa rupi. <sup>18</sup> ¿Uma upe pīha acoi

ñepeí reseve, “Ndapeiquei chietera che pituhusa pipe pe pituhu água” ehi Tūpa? Acoi viroyaēhisar upe aipo ehi. <sup>19</sup> Sese yaicua seroyaēhi pipe ndoicatui yuviroique ipipe.

#### 4

<sup>1</sup> Oime vite Tūpa remimombehu yande yaique vaheṛā ipiri yande pituhu água. Sese iya ité yañearo tupri. Aní chira que ñepeí pe pāhu pendar ndoiquei chira. <sup>2</sup> Esepia, yandeu avei imombehusa ñehesa poropisirosa resendar inungar yande ramoí upe ivi iporupirēhi rupi yuvireco aracahe. Co ñehesa rumo ndoipitivi eté ahe ava yuvireco. Esepia, ahe osendu yuvireco seroyaēhisave tēi. <sup>3</sup> Yande rumo yaroya vahe, yaiquera yande pituhu água, ahe chupe Tūpa aipo ehi:

“Sese añemoiro ahe ava upe; ñepeí reseve,

‘Ndoyuviroiquei chietera che pituhusa pipe opituhu água yuvireco’ ahe” ehi.

Tūpa rumo yipive ité opa omboaviye oporaviquisa iva, ivi. <sup>4</sup> Esepia, co imbosietesa ari resendar ñehesa oime icuachiapri aracahendar pipe:

“Tūpa opituhu opacatu oporaviquisa sui imbosietesa ari pipe” ehi.

<sup>5</sup> Iyavei aipo ehi iri icuachiapri pipe:

“Ndoyuviroiquei chietera che pituhusa pipe opituhu água yuvireco” ehi.

<sup>6</sup> Ipane vite rumo amove ava yuviroique vaheṛā ahe pituhusave. Acoi yipindar osendu tēi vahe rumo ñehesa poropisirosa resendar, ndoyuviroiquei eté seroyaēhisa pipe yuvireco. <sup>7</sup> Sese Tūpa omombehu tupri iri ambuae ari, chupe ité, “Co pipe” ehi. Ahe acoi coiyé mborerecuar guasu David upe omombehu ucase aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehe,

peyepihamoatai rene catu chupe” ehi vahe.

<sup>8</sup> Ehi revo Josué omondose co pituhusa israelita upe aracahe viña, Tūpa evocoyase noñehe iri chira co ambuae ari rese viña. <sup>9</sup> Evocoyase oimeño itera mbituhusa iporavopri ava Tūpa upendar upe nara: <sup>10</sup> Acoi oique vahe evocoyase pituhusa pipe, opituhu oporaviquisa sui inungar Tūpa opituhu ombahe mboaviye pare aracahe. <sup>11</sup> Sese yayemoviracua catura yande reique água evocoi mbituhusa pipe. Aní chira ava aracahendar seroyaēhisar recocuer rupi tupri avei yaicora.

<sup>12</sup> Esepia, Tūpa Ñehengagüer oicove vahe, ipirata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; egüe ehi avei ñehengagüer oñatoi eté yande hã, yande espíritu avei. Iyavei omboyecua tupri ité yande pihañemoñeta. <sup>13</sup> Ndipoi eté niha mbahe Tūpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

*Jesús niha pahi ivate catu vahe secoi*

<sup>14</sup> Jesús, Tūpa Rahir, pahi ivate catu vahe secoi yandeu oique vahe ivave Tūpa piri. Sese yayemoviracuaño itera sese yande yeroyasa pipe. <sup>15</sup> Esepia, yande pahi ivate catu vahe oicuaño ité yande recocuer pĩrataēhisa. Ahe avei niha yande nungar aracaco viroparaisu opacatu mbahe-mbahe tēi güecoāhasa. Ahe rumo ndoyemboangaipai eté ipipe. <sup>16</sup> Sese yayemboya catura yande yeroyasa pipe yande Ru Tūpa rese.

Esepia, ahe yande raisu ité. Ipipe sui tayande paraisuereco güeco aviyesa pipe yande pítivii água mbahe tēi oimese yandeu.

## 5

<sup>1</sup> Opacatu pahi ivate catu vahe iporavopri secoi ava pãhu sui ava recocuer reropovêhe água Tûpa upe iyavei porerecosa mondo água chupe, mbahe mimba yucapri reropovêhe água avei ava angaipa repirã. <sup>2</sup> Ahe pahi niha oiporara avei teco asisa ambuae ava nungar. Sese güeco asiêhisa pipe oipítivii ava ndayaracuai vahe, oyavi vahe avei. <sup>3</sup> Ahe rumo güeco pĩrataêhisa pipe viropovêhe mbahe mimba yucapri Tûpa upe oangaipa repirã, opacatu ambuae ava angaipa repirã avei. <sup>4</sup> Ndiyai chira que ava oyesui tēi pahi oyeapo. Tûpa ité rumo osenoira imboetei uca água inungar acoi Aarón upe aracahe. <sup>5</sup> Êgüe ehi avei Cristo, ahe noñeenoi pahi ivate catu vahe güeco água oyesui tēi. Tûpa ité osenoi imboetei uca água acoi aipo ehise:

“Nde che rahir ereico, co pipe amondo nde recove água” ehi.

<sup>6</sup> Aipo ehi avei ambuae icuachiapri pipe:

“Nde ereico pahi ivate catu vahe apirêhi vaherã, inungar tupri mbia Melquisedec serer vahe” ehi.

<sup>7</sup> Co ivi pipe Cristo oicove vitesse, oyeroqui pĩrata oyasehosa pipe Vu Tûpa upe yepi. Esepia, ahe oicatu ipĩsĩro água manosa sui. Êgüe ehi iporeroya tuprisa pipe, Tu osendu iyeroqui yepi. <sup>8</sup> Yepe Tahir ité viña, güeco paraisu pipe rumo oyembohe imboyeroya água; <sup>9</sup> evocoiya güeco pipe omboaviye güeco catuprisa. Ipipe sui güeru poropĩsirosa ndopai vahe opacatu viroyasar upe nara. <sup>10</sup> Esepia, Tûpa niha osenoi pahi ivate catu vahe seco água inungar Melquisedec aracahe.

*Peicua catu, “Ndaroyai eté co tecocuer piasu” pe hesa sui*

<sup>11</sup> Orovireco vite mo setá mbahe ore ñehe água pëu co mbahe tecocuer resendar rese. Yavai etepri rumo imombehu tupri água. Esepia, pe ndapesenducua tupri vitei eté. <sup>12</sup> Aracacove peporombohera viña; peipota vite rumo pëu mbahe ndayavaimi vahe imombehu iri água yembohesa Tûpa suindar. Ndapeyemoviracuai rumo; peihu iri pota cambi mbahe sãta vahe hu rãgüer sui. <sup>13</sup> Esepia, acoi êgüe ehi vahe pĩtani osi rese ocambu vite vahe nungar tēi pe recocuer. Ipipe sui ndapeyembohei eté Tûpa Ñhengagüer rese mbahe tupri pe reco água. <sup>14</sup> Co tembihu sãta vahe rumo ahe ava ocuacua vahe upe nara. Esepia, ahe oyembohe tupri catu iñhengagüer rese güeco tupri água yepi. Ipipe sui oicua ité mbahe aviye vahe poravo mbahe naporai vahe sui.

## 6

<sup>1</sup> Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tûpa suindar co mbahe rese yembohe iri rãgüer sui. Ahe yipindar vahe co: yande ñecuñarosa, yande reco ai sui yande poisa, manosa apirêhi vahesave yande rerasoêhi água, iyavei Tûpa rese yande yeroyasa, <sup>2</sup> yembohesa poroãpiramosa resendar, po mondosa Tûpa reroyasar harive, omano vahe cuerayevisa iyavei ava recocuer rese porandusa resendar avei. <sup>3</sup> Tûpa oipotase yayembohera ambuae mbahe yavai catu vahe rese.

<sup>4</sup> Acoi ava yipindar osenducua vahe Tūpa remimbotar, osāha vahe avei Tūpa suindar porerecosa iyavei oyandu ité Espiritu Santo güecocuer pipe, <sup>5</sup> osāha vahe avei Tūpa Ñhengagüer aviye vahe iyavei osāha chīhi ipiratasa curi oime vaherā viña, <sup>6</sup> oyepepise rumo ichui, ndayaicatu iri seco roroyevi iri āgua Tūpa upe. Esepia, yaticapri nungar iri eté vireco Tūpa Rahir iyavei ambuae ava omoñehe-ñehe tēi iri sese. <sup>7</sup> Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoyase evocoi nungar ava oipisira porovasasa Tūpa suindar. <sup>8</sup> Ahe ivi rese yu pāve tēi oyesuse, ahe naporai eté. Evocoi nungar ava Tūpa poromocañisavrive tēi, sapipirā tēi avei yuvirecoira curi.

*Yande remiario aviye vahe yande moviracua tupri vahe*

<sup>9</sup> Che mboripar saisupri, yepe aipo orohe pēu viña, oromoha ité rumo mbahe aviye catu vahe pēu co ñepisirosa pare. <sup>10</sup> Esepia niha, Tūpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico. <sup>11</sup> Ore rumo oroipotaño ité ñepeipei pe pemboyecuaño itera ari cañi rupi eté co pereco vahe pe querēhisa pe remiario aviye vahe rupiti āgua. <sup>12</sup> Ndroipotai pe atēhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tūpa sui.

<sup>13</sup> Peyemomahenduha acoi Tūpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ēgüe ehi vaherā. Sese ahe güerer ité osenoi <sup>14</sup> aipo ehi chupe: “Supi eté oroovasa itera, iyavei setara ava nde suindar” ehi. <sup>15</sup> Evocoyase Abraham osāro güeco mbegüesa pipe, ēgüe ehi ipisi oyeupendar Tūpa remimombehu. <sup>16</sup> Ava omoingatu potase oñehe, ivate catu vahe rer pipe omoingatu yuvireco yepi. ēgüe ehise yuvireco, ndiya iri eté ipare oñehe vitera sese. <sup>17</sup> Tūpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi āgua che ñehe ñepeipei reseve vahe yuvireco, iyavei amboaviye itera che remimombehu chupe’ oyapave aipo ehi aracahe. <sup>18</sup> ēgüe ehi oime ñuvirío mbahe imboyepoepipirēhi: Tūpa niha ndoporombopai vahe ité, ipipe avei yande monguerēhi catu yande yaseca vahe iporopitiviisa iyavei yayeroya vahe ñearosa yandeu ombou vahe rese. <sup>19</sup> Co mbahe yasāro vahe omoviracua tupri yande hā, inungar mbahe carite guasu mombitasa omoviracua tupri carite ivitu sui. ēgüe ehi yande remiario oique turucuar guasu tūparo asiasa cupeve oi imaranehi catu vahesave ivave. <sup>20</sup> Aheve Jesús oique yande raperā mboi āgua. ēgüe ehi ahe apirēhi vahe ité pahi ivate catu vahe güeco āgua, inungar tupri Melquisedec aracahe.

## 7

*Jesús pahi Melquisedec nungar tupri ité*

<sup>1</sup> Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar secoi aracahe. Abraham oyevisse perī rupi ovavasa sui ou mborerecuar guasu eta momba pare, ahese aipo osē voi eté oso Abraham rovañichi Tūpa porovasasa mondo āgua chupe. <sup>2</sup> Iyavei

aipo Abraham omondo oporerecosa vavasa sui mbahe güeru vahe diez vahe sui ñepei-peí chupe. ‘Mborerecuar guasu seco ñvi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe secoi. <sup>3</sup> Ahe iyepupa rumo ndicuasai eté iyavei ichi, tamoí, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tüpa Rahír recocuer; ahe pahi apirêhi vahe ité.

<sup>4</sup> Peyapisaca tupri co mbia recocuer rese: ivate ité secoi aracahe. Yande ramoí Abraham teieté avei omondo diez sui ñepei-peí mbahe porerecosa mborerecuar guasu eta sui güembierocua chupe. <sup>5</sup> Moisés porocuaíta pipe rumo opacatu Leví suindar pahi eta yuvirecoi vahe vireco ité ocuaíta opacatu ava sui diez sui ñepei-peí iporaviquimi rerocua água yuvireco. Abraham suindar ité niha égüe ehi yuvireco. <sup>6</sup> Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vaherã mbahe Tüpa remimombehu. Égüe ehi Melquisedec Abraham rovasa. <sup>7</sup> Supi eté sovasapri sui oporovasa vahe ivate catu secoi yepi. <sup>8</sup> Evocoi levita suindar oipisi ava poraviqui repri diez sui ñepei-peí. Ahe ava rumo omano vaherã tēi yuvirecoi. Icuachiapri arachendar pipe rumo Melquisedec serer vahe oicoveño vahe ité. <sup>9</sup> Ndoiyaví evocoyase opacatu pahi eta Leví suindar omondo vahe porerecosa Abraham rupivé chupe yuvireco viña. <sup>10</sup> Esepia, Abraham oyeseve vite Levi oyesuindar vireco, evocoyase ihaēhi viteseve oyeepia Melquisedec rese yuvireco aracahe.

<sup>11</sup> Ava israelita yuvirecoi vahe oipisi mborocuaíta pahi levita sui yuvireco; ahe Aarón suindar yuvirecoi. Supi etese rumo ava virecose Tüpa suindar güeco catupriša evocoi mborocuaíta reroya pipe viña, evocoyase ndoyemboyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera. <sup>12</sup> Esepia, Tüpa osecuñarose evocoi pahi cuaita, osecuñaro aveira supive mborocuaíta; <sup>13</sup> iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoí suindar. Ahe ichui acoi ndipoi eté osē vahe ambuae pahi. <sup>14</sup> Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahi cuaita rese.

<sup>15</sup> Iyavei co oyecua tupri catu itera, oyecuaše pahi ipiasu vahe Melquisedec nungar. <sup>16</sup> Ahe rumo ndahei porocuaíta “uma sui osēra pahiguã” ehi vahe sui oique pahi güeco água; güecocuer pírata ndopai vahe reseve oique. <sup>17</sup> Esepia, Tüpa ité aipo ehi oñehi sese:

“Nde pahi apirêhi vaherã ité ereico inungar Melquisedec” ehi.

<sup>18</sup> Sese mborocuaíta arachendar opa ité. Esepia, ahe nipiratai, ndayande pītivii eté. <sup>19</sup> Esepia, Moisés porocuaíta ndosecocuer mbo-catuprii eté ava. Yande rumo yasāro mbahe aviye catu vahe yande recocuer uve nara. Supi niha yayemboya Tüpa rese.

<sup>20</sup> Tüpa rumo oñehi omoingatu ñepei reseve güerer pipe. Ambuae pahi rumo ndahei ñepei reseve senoipri yuvirecoi Tüpa rer pipe. <sup>21</sup> Yande Yar rumo Tüpa osenoi ñepei reseve güerer pipe pahi seco água icuachiapri pipe aipo ehise chupe:

“Yar Tüpa osenoi ñepei reseve, sese nosecuñaroi chietera:

‘Nde pahi apirêhi vaherã ité ereico’ ehi”

ehi icuachiapri pipe. <sup>22</sup> Sese Jesús rese yaicua Tūpa omboaviyera güemimbotar ipiasu vahe yandeu aviye catu vahe yipindar vahe sui. <sup>23</sup> Yipindar setá pahi yuvirecoi. Opa-opaño rumo omano. <sup>24</sup> Jesús rumo nomanoi vahe ité, sese nomonoi chietera pahi güecosa ambuae upe. <sup>25</sup> Sese ahe oicatu ité ñepei reseve viroyasar Tūpa rese oyemboya vahe pĩsiro ãgua apirēhi. Esepia, ahe oicove vaherã ité apirēhi oyeruqui vaherã Vu Tūpa upe sese.

<sup>26</sup> Supi eté Jesús pahi ivate catu vahe secoi. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. <sup>27</sup> Ndahei eté ambuae pahi eta nungar secoi, ndoyuca ranei ari yacatu rupi mbahe mimba Tūpa upe seropovēhe ãgua yipindar oangaipa rese, ipare opacatu ambuae angaipa rese. Ñepei reseve ité rumo güete viropovēhe opacatu ava angaipa repirã. <sup>28</sup> Moisés porocuita rupi iporavopri pahi ivate catu vaherã ava ndahei seco tupri vahe; Tūpa rumo Moisés porocuita pare osenoi ñepei reseve Guahir seco catupri vahe ‘tasecoi pahi ivate catu vahe apirēhi vaherã ité’ oya.

## 8

### *Jesús Tūpa remimbotar ipiasu vahe omoime yandeu*

<sup>1</sup> Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe uguapi Vu acato coti omborerecuasa pipe ivave oĩ. <sup>2</sup> Aheve pahi secoi oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

<sup>3</sup> Opacatu pahi ivate catu yuvirecoi vahe senois mbahe oporerecosa iyavei mbahe mimba yucapri viropovēhe vaherã Tūpa upe yuvireco. Sese Jesucristo avei vireco mbahe viropovēhe vaherã Vu Tūpa upe. <sup>4</sup> Ahe secoise co ivi pipe viña, ndahei chietera pahi secoi viña. Esepia, cohava oime vite ité pahi mbahe viropovēhe vahe Moisés porocuita rupi yuvireco. <sup>5</sup> Co ivi pipendar pahi rumo ihañeco iva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acoi ivitrive amboyecua vahe rese ndeu. Ahe inungar tupri eyapo” ehi chupe. <sup>6</sup> Yande pahi ivate catu vahe rumo, Jesús, vireco ocuaita aviye catu vahe ambuae pahi sui. Esepia, Tūpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sesendar Tūpa remimombehu aviye catu vahe avei.

<sup>7</sup> Esepia, yipindar Tūpa remimbotar oicatus yande recocuer recuñaro ãgua viña, ndipoi chira ambuae semimbotar ipiasu vahe yandeu viña. <sup>8</sup> Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri ãgua che remimbotar ipiasu vahe ahe Israel pendar upe, Judá pendar upe avei.

<sup>9</sup> Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui,  
nomboaviyei eté rumo che porocuita yuvireco.  
Sese apoi ichui’ ehi yande Yar Tūpa.

<sup>10</sup> ‘Co ari pare rumo na ahera che remimbotar apo Israel pendareta upe’ ehi yande Yar Tūpa,

‘Amondora che porocuita iyapisacasa pipe, aicuachía aveira ipihañemoñetasa pipe.

Evocoyase che iTūpa acora; ahe evocoyase cheundar yuvirecoira.

<sup>11</sup> Nombohe iri chira ondugüer, omu avei che cua uca ãgua yuvireco.

Esepia niha, opacatu chñhivahe catu vahe sui, ava ocuacua catu vahe avei che cuara yuvireco.

<sup>12</sup> Iyavei cheñero aveira mbahe tēi sembiapogüer rese yuvireco chupe; ndayemomahenduha iri chiaveira yangaipagüer rese’ ehi yande Yar”

ehi icuachiapri pipe aracahe. <sup>13</sup> Oñehese Tūpa güemimbotar piasu rese, omombehu yipindar vahe cañi ãgua; chñhimi tēi ipane icañipa ãgua.

## 9

### *Tūparo ivi pipendar iyavei tūparo iva pendar*

<sup>1</sup> Evocoyase yipindar Tūpa remimbotar vireco ava cuaitarã iñemonuha ãgua Tūpa mboeteisa pipe iyavei vireco tūparo co ivi pipendar. <sup>2</sup> Ahe tūparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tūpa upendar reseve. <sup>3</sup> Imoñuviriosa turucuar tūparo asiasa cupeve oime ambuae oi, ahe serer Nimarai Catu Vahe. <sup>4</sup> Aheve oime itaisi rapisa renda oro apopri, aheve avei oime Tūpa porocuita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorí vahe, iyavei mborocuita cuachiapri ita ipe vahe rese oime ipipe. <sup>5</sup> Ahe mborocuita riru harive oime Tūpa rembiguai rahanga oyovai yuvinochai, “Tūpa oime ité cohave” he ãgua. Ahe ipepo oyopi tupri Tūpa porocuita riru rovapisa yuvireco. Co rupive revo amombehura co mbahe pēu.

<sup>6</sup> Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuita apo ãgua. <sup>7</sup> Imoñuviriosa oi pipe rumo pahi ivate catu vaheño oique ñepeí reseve ñepeí-peí araviter pipe, iyavei güeique yacatu viroique mbahe mimba ruvi viropovēhe vaheerã Tūpa upe oangaipa rese, ava icuaēhi pipe angaipa oyapo vahe repirã avei. <sup>8</sup> Co rese Espiritu Santo oicua uca yandeu avaño tēi ndiya viteí eté oique ipa vahe oi imaranehi catu vahe pipe Tūpa rovai oime vitesé yipindar oi yasiapri. <sup>9</sup> Co opacatu mbahe yande mbohe mbahe cūríteindar rese. Esepia, co porerecosa iyavei mbahe seropovēhepri aheve Tūpa upe, nomoatiroi eté imboeteisar pihañemoñetasa. <sup>10</sup> Ahe rumo carusa, ihusa, ñemoatirosa nungar mbahe resendar tēi; yande retecuer resendar tēi porocuita. Ahe rumo egüe ehiñomi tēi yuvireco Tūpa remimbotar ipiasu vahe yu ãgua renonde.

<sup>11</sup> Poropisirosar rumo ou cute. Iyavei ahe ité cūrítei yande pahi ivate catu vahe secoi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopri. <sup>12</sup> Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovēhe ãgua, ahe rumo viropovēhe vuvi ité opacatu rese; egüe ehi ahe ñepeí reseve oique apirēhi vahe ñepisirosa reime ãgua yandeu. <sup>13</sup> Supi eté guaca cuimbahe ruvi iyavei ovesa ruvi, guaca cuña tanimbu acói imondopri

vahe ava seco mara vahe rese, ahe avei vireco raimi tēi pīratasa ava rete moatiro āgua. <sup>14</sup> Cristo ruvi rumo vireco catu ité pīratasa. Esepia, Cristo, Espiritu apirēhi vahe pipe, oyemondo ahe ae Tūpa upe inungar mbahe seropovēhepri nimarai vahe, iyavei suvi yande pīhañemoñetas moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca āgua yandeu.

<sup>15</sup> Sese Jesucristo secoi Vu remimbotar ipiasu vahe moingatusar ava reru āgua Tūpa upe omano pipe. Ipipe sui oime ñeroisa oyemboangaipa vahe yipindar mborocuitavrive yuvirecoi vahe upe ‘toipisi che rembiporavo yuvireco oyeupendar mbahe apirēhi vahe che remimombe-hugüer rupi’ oya. <sup>16</sup> Que ava oicua ucase güemimbotar ombahe mondo āgua omano renondeve, icuasa tupri ranera rumo imanosa semimbotar apo āgua renonde. <sup>17</sup> Esepia, ndiya vitei eté omano vaherã recove viteseve mbahe imondosa iyarã upe. Imanore voi rumo aviye imondosa. <sup>18</sup> Sese yipindar vahe Tūpa remimbotar yaposa mbahe mimba ruvi piyere pipe. <sup>19</sup> Esepia, Moisés omombehupase mborocuita opacatu ava upe, oipisi ovesa ragüer pīra vahe iyavei ivira hisopo serer vahe rāca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipii cuachiar mborocuita resendar, opacatu ava avei. <sup>20</sup> Evocoiyase aipo ehi icuachiapri pipe: “Co mbahe ruvi oicua tupri uca co porocuita Tūpa ombou vahe omboyeroa āgua pēu” ehi. <sup>21</sup> Mbahe mimba ruvi pipe avei opa Moisés osipii tūparo iyavei opacatu mbahe ipipendar iporupri. <sup>22</sup> Porocuita rupi eté tuvi pipe seni opacatu mbahe oñemoatiropa Tūpa rovaque; ndipoi eté ñeroisa angaipa upe mbahe ruvi piyerepri porēhise.

*Tūpa upe güete reropovēhe pipe Cristo omocañi angaipa*

<sup>23</sup> Iyacatu ité imoatirosa evocoi nungar mbahe mbahe mimba seropovēhepri ruvi pipe. Esepia, co mbahe iba pendar nungar tēi sahangaposa; iva pendar ité rumo ipotasa seropovēhepirã mbahe aviye catu vahe evocoi sui. <sup>24</sup> Esepia, Cristo ndoiqueei tūparo oi imaranehi catu vahe ava rembiapo pipe tēi. Esepia, ahe iva pendar rahanga tēi. Ēgüe ehi rumo ahe oique ité ivave. Aheve cūrítei secoi Tūpa rovai yande pītivii āgua oyeroqui pipe. <sup>25</sup> Judío pahi ivate catu vahe niha ñepeí reseve oique araviter yacatu oi imaranehi catu vahe pipe mbahe ruvi tēi reropovēhe āgua; ndahei rumo vuvi ité viropovēhe. Cristo rumo ndoyeeropovēhe pihi Tūpa upe. <sup>26</sup> Ēgüe ehise rumo, yipisuive omano pihira viña. Cūrítei rumo oyemboyecua co ipa ari rupi ñepeí reseve, apirēhi vaherã viropovēhe āgua güete Tūpa upe ‘tocañipa angaipa’ oya. <sup>27</sup> Supi eté opa rane itera ava omano yuvireco, ipare voi ñepeí reseve oimera porandusa. <sup>28</sup> Indó, Cristo oyeeropovēhe ñepeí reseve opacatu angaipa mocañi āgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guãrosar pīsiro āgua.

## 10

<sup>1</sup> Esepia, Moisés porocuita mbahe aviye vahe ou vaherã rahanga tēi, ndahei ahe eté vahe ité. Sese ahe porocuita ndoicatui eté ava Tūpa rese oyemboya vahe reco mohivi tupri āgua mbahe seropovēhepri araviter yacatundar pipe tēi. <sup>2</sup> Porocuita oicatuse pe angaipa sui pe moatiro tupri āgua, ndapeyandu iri chira pe angaipa viña iyavei pahi ndovirovovēhe



iri chiaveira mbahe ruvi Tūpa upe yuvireco viña no. <sup>3</sup> Co seropovēhepri rumo yande momahenduha uca āgua tēi yande angaipagüer rese araviter yacatu. <sup>4</sup> Esepia, mbahe mimba ruvi tēi nomocañi eté yande angaipa yande sui.

<sup>5</sup> Sese Cristo co ivi pipe ouse, aipo ehi Tūpa upe:

“Ndereipota iri niha mbahe mimba tēi porerecosa seropovēhepirā ndeyeupe, nde rumo ereyapo che retecuer evocoi nungarā.

<sup>6</sup> Ndahei niha nde piha rupi mbahe rapipri mbahe mimba yucapri ndeu seropovēhepri ñepei reseve angaipa mocañi āgua.

<sup>7</sup> Evocoyase che aipo ahe:

‘Che ayu nde remibotar apo āgua, che Ru Tūpa, che resendar icuachiapri remimombehu rupi tupri mboaviye āgua’ ahe” ehi.

<sup>8</sup> Yipindar aipo ehi, Tūpa ndoipotai eté, iyavei ndahei ipiha rupi mbahe mimba reropovēhepri, porerecosa mbahe sapipri avei angaipa mboyeho āgua, yepe ahe mborocuita rupi seropovēhesa viña. <sup>9</sup> Ipare aipo ehi:

“Che ayu nde remibotar apo āgua” ehi. Ahe ipipe omombopa yipindar vahe mbahe seropovēhepri co ambuae mbahe ipiasu vahe apo āgua.

<sup>10</sup> Tūpa evocoyase yande peha angaipa sui oyeupe nara. Esepia, Jesucristo oyapo ité semibotar mbahe ñepei reseve apirēhi vaheerā güete mondo pipe.

<sup>11</sup> Opacatu judío pahi eta ari yacatu oyapo ocuaita iyavei mbahe mimba avei-vei viropovēhe Tūpa upe yuvireco. Yepe ahe viropovēhe tēi yuvireco viña, nomocañi catui eté rumo angaipa. <sup>12</sup> Jesucristo rumo oyeeropovēhe ñepei reseve angaipa repirā apirēhi vaheerā. Ipare oso ivave, oguapi oñ Vu acato coti. <sup>13</sup> Aheve osāro oñ Vu Tūpa opase voi omondo yamotarēhimbar ipovrive. <sup>14</sup> Esepia, ñepei reseve oyeeropovēhe pipe osecomohivi tupri Vu Tūpa rembipeha apirēhi vaheerā. <sup>15</sup> Iyavei Espirito Santo aipo ehi tupri avei icuachiapri aracahendar pipe yandeu:

<sup>16</sup> “ ‘Co ari pare rumo na ahera che remibotar apo chupe’ ehi yande Yar Tūpa, ‘Co iye amondora che porocuita ipihañemoñetasa pipe, amondo aveira iyapisacasa pipe’ ehi.

<sup>17</sup> Ndayemomahenduha iri chietera yangaipagüer rese iyavei mbahe tēi sembiapogüer rese yuvireco” ehi aracahe.

<sup>18</sup> Ëgüe ehi angaipa rese oimese ñeroisa, ahese ndiya iri seropovēhesa mbahe angaipa repirā.

### *Yayemboya catura Tūpa rese*

<sup>19</sup> Sese che rivireta, iya ité cūritei yande reique āgua Tūpa rovai yande siquiyeēhisa pipe Jesucristo ruvi pipe sui. <sup>20</sup> Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tūparo pipe asiassa turucuar yande reique āgua Tūpa rovai. Ahe turucuar inungar Jesús rete. <sup>21</sup> Iyavei ahe yande pahi ivate catu vahe ité secoi Vu Tūpa rēta rārosar; <sup>22</sup> sese yayemboya catura Tūpa rese yande pihañemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete i maranehi pipe. <sup>23</sup> Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rerovaēhisa pipe. Esepia, Tūpa omboaviye itera mbahe güemimombehugüer yandeu. <sup>24</sup> Iyavei yasecañora ñepei-pe i yañepitivi

vaherã yande yeaisu catu ãgua iyavei mbahe tupri apo ãgua yandeyeupe. <sup>25</sup> Ndayamopanei chira yande ñemonuhasa Tũpa upe. Ndayaicoi chira omopane vahe nungar, iya rumo yayemonguerẽhi catura ñepeipei yandeyeupe. Esepia, virovi ari yande Yar yevi iri ãgua.

<sup>26</sup> Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovẽhepirã evocoi yande angaipa repirã yandeu; <sup>27</sup> Tũpa ñemoirosa ipĩrata vahe güeraño oimera yandeu iyavei tata guasu apirẽhi vahe opara omocañi Tũpa amotarẽhimbar yuvirecoi vahe. <sup>28</sup> Ava Moisés porocuita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuẽhisa pipe yuvirecoi. <sup>29</sup> Peyapisaca tupri co rese: ipĩrata catu oimera Tũpa ñemoirosa tahir roeroirosar upe curi iyavei acoi ava vireco vahe suvi inungar mbahe egũe ehi tẽi vahe iyavei viroiro tẽi vahe guaisusar Espiritu, chupe avei oimera Tũpa ñemoirosa ipĩrata catu vahe. Esepia, co tuvĩ rese niha seroyapri ité Tũpa remimbotar. Ipipe avei niha ahe ava Tũpa rembipeha yuvirecoi. <sup>30</sup> Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogũer rese ava oyeupendar upe” ehi. <sup>31</sup> ¡Mbahe tẽi eté yaiquese Tũpa oicove vahe ñemoirosa pipe!

<sup>32</sup> Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoãhasa upe pe yemombaraisusa pipe. <sup>33</sup> Esepia, acoi amove pe pãhu pendar rese iñehe-ñehe tẽi yuvireco, mara-mara tẽi avei pe rereco opacatu ava rovaque. Ambuae pe pãhu pendar evocoyase peipitĩvii pe yemombaraisusa rese. <sup>34</sup> Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosañi avei pe viharetesa pipe peico. Esepia, peicua ivave perecora mbahe aviye catu vahe iyavei apirẽhi vahe. <sup>35</sup> Sese pemocañi tẽi eme Tũpa rese pe yeroyasa. Esepia, evocoyase pe recosa pipe omoime ucara mbahe tupri pẽu curi. <sup>36</sup> Pe rumo peyemoviracuaño itera mbahe-mbahe tẽi upe Tũpa remimbotar apo ãgua semimombehugũer oime vaherã pisi ãgua curi. <sup>37</sup> Supi eté icuachiapri pipe Tũpa aipo ehi: “Pihaiivi eté oura acoi ou vahevi. Ndiaracahei chietera.

<sup>38</sup> Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoyase ndavihai chira sese” ehi aracahe.

<sup>39</sup> Yande ndahei oyepepi vahe nungar yaico. Evocoi nungar niha ocañi tẽi vaherã yuvireco. Yande rumo yayeroya sese; ipipe yañepisiro.

## 11

### *Tũpa rese yeroyasa*

<sup>1</sup> Supi eté yarecose yande yeroyasa Tũpa rese, ahese yaicua ahe ombou itera mbahe yasãro vahe yandeu, iyavei yaicua ité oime mbahe ndayasepiai vahe. <sup>2</sup> Supi eté amove yande ramoi aracahendar upe, “Aviye ité” ehi Tũpa oyese yeroyasa pipe sui.

<sup>3</sup> Tũpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cũriteindar mbahe yasepia vahe mbahe ndayasepiai vahe apopri.

<sup>4</sup> Sese oyeroya pipe Abel viropovêhe oporerrecosa aviye catu vahe Caïn porerrecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerrecosa. Yepe Abel omano viña, oimeño vite rumo Tūpa rese yeroya agüer resendar ñehesa.

<sup>5</sup> Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoêhi viteseve, “Enoc recocuer aviye ai rane ité chupe” ehi icuachiapri aracahendar. <sup>6</sup> Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

<sup>7</sup> Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoiyase seroyasave oyapo arca oyesuindar pīsīro āgua. Iyavei sese oyeroya pipe omombehu ava co ivi pipendar cañi āgua. Ahe rumo Tūpa rese oyeroya pipe oñepisiro.

<sup>8</sup> Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vaherā vahesave, ahe amondora ndeu” ehise, omboyeroyaño ité. Yepe ahe ivi ndoicuai viña, osēño ité rumo oivi sui oso. <sup>9</sup> Ipare Tūpa rese oyeroya pipe avei secoiño ité ahe ivi pipe. Ndoyavi ambuae ivi pendar secoi vahe; oi mbahe pirer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vaherā Tūpa remimombehu ivi yuvireco. <sup>10</sup> Esepia, aipo Abraham osāroño ité tecua ivave ovīracua vahe. Tūpa niha ahe tecua rāhasar, yaposar avei.

<sup>11</sup> Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pīratasa Tūpa sui guahi āgua. Esepia, viroyaño ité Tūpa oñehe omboaviye āgua chupe. <sup>12</sup> Evocoiyase yepe Abraham ocuacuami viña, vireco rumo guahir. Ahe ichuindar sehi eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

<sup>13</sup> Ahe ava rumo opacatu omanopa tēi; ndoipisii eté mbahe semi-mombehugüer oyeupendar. Ahe mbahe amombri rupi osepiñomi tēi yuvireco oyeroyasa pipe, soriveteño avei sese. Ēgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe. <sup>14</sup> Aipo ehi vahe oicua uca tupri yandeu osea vite oyeupendar ivi yuvireco. <sup>15</sup> Ipihañemofñetase rumo ivi güeco agüer rese yuvireco viña, oyevi iriño itera aheve avei yuvireco viña. <sup>16</sup> Ahe rumo oipota ambuae ivi aviye catu vahe yuvireco, ahe iva pendar. Sese Tūpa nochi eté, “Che Ru Tūpa” oyeupe hese. Esepia, vireco ité tecua imoingatupri chupe.

<sup>17</sup> Tūpa rese yeroyasa pipe avei Abraham oyemoingatu voi guahir ñepeí vahe Isaac reropovêhe āgua Tūpa upe güecoāhasa pipe. Yepe Tūpa aipo ehi chupe aracahe viña: <sup>18</sup> “Nde rahir Isaac sui setá oimera nde suindar” ehi. <sup>19</sup> Esepia, oicua ité Tūpa vireco pīratasa ava omano vahe mbogüerayevi iri āgua. Evocoiyase imano rāgüer sui eté oipisi iri guahir aracahe. Ahe evocoiyase omboyecua mbahe yandeu.

<sup>20</sup> Tūpa rese oyeroya pipe avei Isaac osovasa Jacob, Esaú avei mbahe oime vaherā piši āgua.

<sup>21</sup> Iyavei Tūpa rese oyeroya pipe avei Jacob omano pota āgua, osovasa ñepeí-peí José rahir. Ahese opococa rese tēi eté oyemovīracua oyerocuí āgua Tūpa upe imboeteisa pipe.

<sup>22</sup> Tūpa rese oyeroya pipe avei José, omano āgua renonde, aipo ehi: “Yande mu israelita opara yuvĩnose ivi Egipto sui curi” ehi. Ipare oyocuai omu oitacuer rerova āgua aracahe.

<sup>23</sup> Tūpa rese oyeroya pipe avei, ohase Moisés, iyepupa oñomi mbosapi yasi rupi yuvireco. Esepia, ahe pĩtani icatupri ai, iyavei ndoyembosiquiyei eté mborerecuar guasu porocuita yuca āgua sui.

<sup>24</sup> Tūpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he āgua.

<sup>25</sup> Ahe rumo oipota catu mara-mara tēi güereco āgua Tūpa reroyasar reseve chĩhi rupive mbahe tēi rese yemboviha rāgüer sui. <sup>26</sup> Aviye catu ité chupe Tūpa rembiporavo upe nara mbahe tēi porara āgua Egipto pendar mbahe eta sepĩrusu vahe rereco rāgüer sui. Esepia, ahe oicuaño ité oyeupe nara porerecosa Tūpa ombou vaheerã.

<sup>27</sup> Tūpa rese oyeroya pipe avei osē ivi Egipto sui osiquiyeeñhisa pipe mborerecuar guasu roriēhise. Oyemoviracuaño ité oyese mbahe apo āgua; aviye osepia vahe ité Tūpa acoi ndoyecuai vahe. <sup>28</sup> Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mamba ruyi Tūpa rembiguai oporoyuca vahe ava israelita rahir ipi yucaēhi āgua.

<sup>29</sup> Tūpa rese oyeroya pipe avei ava israelita osasa para guasu Pĩra Vahe ivi ipiru vahe hari rupi yuvirasu. Ipare yamotarēhimbar Egipto pendar, “Ēgüe vahe avei” ehi yuvireco viña, i rumo opaño oyopi.

<sup>30</sup> Tūpa rese oyeroya pipe avei israelita oyerese siete ari rupi tecua Jericó rese, opa ñachisa onduru. <sup>31</sup> Tūpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güetave israelita Jericó ivi repiasar.

<sup>32</sup> ¡Setá vite ambuae ava recocuer oime amombehu vaheerã pēu! Ipane ité rumo ari imombehupa āgua: Gedeón, Barac, Sansón, Jefe, David, Samuel iyavei opacatu Tūpa ñehe mombehusar recocuer. <sup>33</sup> Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ivisa pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar, <sup>34</sup> ombogüe avei tata ipĩrata vahe, oyeepi avei quise pucu pipe oyuca rāgüer sui; ava nipiratai vahecuer rumo oymotarmirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco. <sup>35</sup> Oime amove cuña ipāhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa aviye catu vahe pipe güeco āgua. <sup>36</sup> Ambuae iparaisu catu ava upe oñeeroirosa pipe, onupasa pipe, oapichi-pichisa pipe, voquendasa pipe avei yuvireco. <sup>37</sup> Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipāhu pendar oguata tēi, ovesa, cavara pĩrer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no. <sup>38</sup> Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaheerã oyepāhuve, ahe oguata tēi ivi iporupirēhisa rupi, ivitri rupi, mbahecuar rupi avei yuvireco.

<sup>39</sup> Yepe ahe opacatu aviye ité Tūpa upe oyeroyasa rese yuvireco viña, ndoipisi eté rumo oyeupe Tūpa remimombehugüer yuvireco.

<sup>40</sup> Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihivi tupri āgua che remimombehugüer rupi yuvireco’ ohesa pipe chupe, yandeu opacatu avei.

## 12

### *Yamahecuatupri yande yeroyasa pipe Jesús rese*

<sup>1</sup> Sese yande, yaicuase setá ité evocoi ava oime omboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe. <sup>2</sup> Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochihisa pipe. Esepia, ahe oicua ité oparaisu pare virecora oviharetasa, oguapise omborerecuasave Vu acato coti oĩ.

<sup>3</sup> Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico āgua iyavei, “Ndorequerēhi iri” ndapeyei chira. <sup>4</sup> Esepia, pe ndapemano vitei eté angaipa upe pe yembopihaviracuasa pipe. <sup>5</sup> Peresarai eté Tūpa pe mboaracuasa sui tahir ité pe recosa pipe; icuachiapri aracahendar pipe aipo ehi:

“Che rahir, eyemoingatu voiño Yar nde mombaraisusa upe nde reco mohivi tupri āgua, iyavei, ‘Ndachequerēhi iri’ nderei chiaveira chupe ndeu oñehe pīratase.

<sup>6</sup> Esepia, Tūpa osecomohivi tupri ava güembiaisu iyavei omombaraisu rane guahir sereco āgua” ehi.

<sup>7</sup> Peñemosañño catu pe mombaraisusa upe pe reco mohivi āgua. Esepia, Tūpa ēgüe ehise pēu guahir ité pe rereco. ¿Oime pīha que ñepeí ava guahir upe noñehe pīratái vahe secocuer mohivi āgua? <sup>8</sup> Tūpa ndape recocuer mohivise inungar oyapo ambuae guahireta upe yepi, pe evocoiyase inungar-ra chihivahe ndiyesupai vahe, ēgüe peye tēi peico chupe. <sup>9</sup> Iyavei, chihivahe tēi vite yaicose, yande yesupa co ivi pipendar yande nupa yande recocuer mohivi āgua, ahese yamboetei. Sese yamboetei catura yande Ru Tūpa íva pendar tecovesa rereco āgua. <sup>10</sup> Yande yesupa co ivi pipendar opihañemoñetägüer rupi tēi yande nupa yaicove raimi tēise co ivi pipe; Tūpa rumo yande mombaraisu yandeu mbahe tupri āgua rese yande reco maranehi āgua inungar ahe ndaseco marai vahe. <sup>11</sup> Supi eté yipindar, poronupasa yaipisi ramosa, tasi yandeu. Coiye rumo yande imboyeroyasa pipe yayapo catura mbahe ihivi vahe. Ahe evocoiyase yande recocuer rereco mbahe tupri pipe.

### *Peicua catu Tūpa ñehe rendu potaēhi sui*

<sup>12</sup> Sese pemopoase iri pe reco pīratasa iyavei peyemonguerēhi iri pe guata āgua yande Yar rupi. <sup>13</sup> Ipare peseca peri ihivi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

<sup>14</sup> Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiaí chietera yande Yar. <sup>15</sup> Peñearo tupri catu, tipo eme ava ndoipisi vahe Tūpa porovasasa pe pāhuve, iyavei tipo eme mbahe tēi que ava piha

pipe; aviyeteramo opacatu rese ova tiêtera. <sup>16</sup> Tipo eme catu pe pâhu pendar oyemboaguasa têi vahe. Tipo eme avei ava Tûpa upendar mbahe viroïro vahe pe pâhuve inungar Esaú aracahe. Ahe omondo Tûpa porovasasa oyeupendar tahir ipi güecosa resendar mimoi repirã têi vivri upe. <sup>17</sup> Iyavei peicua, ipare acoi Esaú oipisi pota Tûpa porovasasa vu sui viña. Ahe rumo ndiya iri eté sovasapirã secoi. Yepe oyasehó iteanga viña, ndiya iri eté rumo mbahe sembierecovi rãgüer mboyevi ãgua chupe.

<sup>18</sup> Peyemboyase Tûpa rese, ndahei inungar pe ramoi israelita arachendar. Esepia, ahe ivitri Sinaí sese yapoco vahe rese têi oyemboya vahe yuvireco; ahe ivitri rese sendí ité inungar tata rendigüer; oime pîtu, pîtumimbi vahe, ivitu ai avei sese. <sup>19</sup> Iyavei ndapesendui mimbi imoñhepři, Tûpa ñehe avei. Arachendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco. <sup>20</sup> Esepia, ahe oyembosiquiye ité evocoi porocuita aipo ehi vahe sui: “Acoi opïro vahe ivitri rese, yepe que mbahe mimba têi viña, ahe peyapi-yapi yuca ita pipe, anise lanza pipe avei” ehi. <sup>21</sup> Ahe mbahe oyecua vahe aipo oporombosiquiye vahe ité. Evocoyase Moisés teieté aipo ehi: “Che siquiyepave aririñ eté” ehi.

<sup>22</sup> Pe rumo peyemboya iva pendar ivitri Sión ve, Tûpa oicove vahe recuave. Ahe tecua Jerusalén iva pendar. Aheve Tûpa rembiguai setá iteanga vahe oñemonuha imboetei ãgua yuvireco yepi. <sup>23</sup> Iyavei peyemboya opacatu ava Tûpa rahir ipi Cristo reroyasar rese, ahe serer icuachiapři ivave. Peyemboya avei Tûpa rese, ahe niha yande recocuer rese oporandu vahe secoi; iyavei peyemboya ava seco aviyé vahe espíritu yuvirecoi vahe rese. Ahe niha Tûpa osecomohivi tupři sereco. <sup>24</sup> Peyemboya avei Jesús rese, ahe omoime yandeu Tûpa remimbotar ipiasu vahe, ahe suvi yande moatiro vahe. Ahe aviyé catu yandeu Abel ruvi sui.

<sup>25</sup> Sese peicua catu, “Ndoroviroyai” peye vaherã acoi pëu oñehe vahe upe. Esepia, Moisés reroyaêhisa pipe pe ramoi noñemi eté Tûpa ñemoïrosa sui yuvireco, oyeupe, “¡Peicua catu!” ehise co ivi pipe aracahe. Êgüe ehise chupe yuvireco aracahe, êgüe ehi catu iri tiêtera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. <sup>26</sup> Tûpa oñehe pipe omboririñ eté ivi aracahe; cûritei rumo yandeu aipo ehi: “Che amboririñ irira ivi, ndahei chira rumo ivi güeraño, iva avei amboririñira” ehi. <sup>27</sup> ‘Amboririñ irira’ aipo oyapave aipo ehi: “Opara mbahe omii vahe omocañi güembiapo Tûpa ‘topita apirêhi mbahe nomii vahe’ oyapave” ehi. <sup>28</sup> Tûpa mborerecuasa ombou vahe yandeu ahe nomii chietera. “Aviyé ndeu” yahera evocoyase sese chupe; ipipe sui yayerure catu yande piha pipe chupe imboeteisave semimbotar rupi. <sup>29</sup> Esepia niha, ahe inungar tata ñepeï reseve mbahe omocañipa vahe.

## 13

### *Mara yahera Tûpa mboviha*

<sup>1</sup> Ndapepoi chietera pe yeaisusa sui ñepeï-peï oyeivri nungar pe recosa pipe. <sup>2</sup> Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tûpa rembiguai güetave icuaêhi pipe.

<sup>3</sup> Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tēi serecopri rese. Esepia, aviyeteramo ēgüe ehi aveira pēu.

<sup>4</sup> Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tūpa oicuaa oyemboaguasa tēi vahe upe.

<sup>5</sup> Ndahehi guarepochi tēi peipota raira. Iya rumo peyembovihaño mbahe pereco vahe rese. Esepia, Tūpa aipo ehi: “Ndoroeiyai chietera, ndapoi chietera nde sui” ehi aracahe. <sup>6</sup> Evocoiyase aipo yahera Yar rese yande yeroyasa pipe:

“Che Yar che pītivii, ndasiquiyei chietera ava tēi sui oyapo potase mbahe cheu” yahera.

<sup>7</sup> Peyemomahenduha pe reroguatasa rese, pēu Tūpa Ñhengagüer mombehusa rese avei. Pepihañemoñeta tupri secocuer rese, seco apri rese avei; iTūpa reroya agüer rupi tupri avei peico.

<sup>8</sup> Jesucristo recocuer noñecuñaroi vahe ité, yipisuive secoi apirēhi vahe. <sup>9</sup> Peyembopa ucai rene yembohesa co coti tēi vahe upe. Aviye catu yayemomirata Tūpa poroaisusa rese que mborocuaita tembihu resendar sui. Esepia, co nungar mbahe ndovireco ucai mbahe aviye vahe ohusa upe.

<sup>10</sup> Yande rumo yareco ambuae ité Tūpa upe seropovēhepri. Ahe niha ndiyai eté pahī tūparo yipindar yuvirecoi vahe pendar yuvirohu. <sup>11</sup> Supi eté judío pahī ivate catu vahe viroique mbahe ruvi tēi Tūpa rēta oi imaranehi catu vahe pipe seropovēhe ava angaipa rerocua āgua; ahe mbahe mimba rete rumo osapi tecua ivi yuvireco yepi. <sup>12</sup> Ēgüe ehi avei niha Jesús iparaisu, omano tecua ivi ava reco mbocatupri āgua vuvi pipe. <sup>13</sup> Ēgüe yahe aveira yasora Jesús upe yande paraisu āgua supi ava yande reroirosa pipe yaico. <sup>14</sup> Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vaherā yandeu curi. <sup>15</sup> Sese Jesús rembiapo rese iyacatu yamboeteira apirēhi vaherā yande Yar Tūpa. Co imboeteisa inungar mbahe seropovēhepri arī rupi chupe. ¡Ēgüe yahera imboetei yande ñehe pipe! <sup>16</sup> Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

<sup>17</sup> Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicuaa mbahe sembiapo rese chupe curi. Sese pemboyeroya catu ‘tayavai eme iporaviquisa chupe; tasorivete oporaviquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nara.

<sup>18</sup> Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave. <sup>19</sup> Che yevi pihai vi āgua rese ité aporandu pe yeruresa rese pēu Tūpa remimbotar rupi.

### *Mahenduhasa ipa vahe*

<sup>20</sup> Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piasu ndopai vahe imbou yandeu, <sup>21</sup> tombou pe reco

mohivisa iyavei pe reco aviyesa opacatu pe semimbotar apo ãgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ëgüe tehi imboeteipri apirêhi tasecoi Cristo yepi!

<sup>22</sup> Che rivireta, peñemosañõ co che opomboaracua vahe rese, moviro tõi niha co ñehesa aicuachía pẽu. <sup>23</sup> Aipota pe peicua yande rivri Timoteo imosesa soquendasa sui. Oyepota pihavise, arasora cheyeupi che sose pe repia.

<sup>24</sup> Pemombehu che mahenduha opacatu ava pe cuaisar upe, opacatu ambuae Tũpa upendar ava upe avei. Ivi Italia rupindar avei ombou omahenduhasa yuvireco pẽu.

<sup>25</sup> Aipo rupive, yande Ru Tũpa tape rovasa opacatu.



## SANTIAGO REMBICUACHIA SANTIAGO

### *Mahenduhasa*

<sup>1</sup> Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

### *Mbahecuasa ou vahe Tūpa sui*

<sup>2</sup> Che rivireta, pevihareteñora peico acoi oimese tecoãhasa pëu yepi. <sup>3</sup> Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosasa ãgua rese peico. <sup>4</sup> Peicoño ité pe reco ñemosasa pipe pe reco mohivi tupri catu ãgua. Evocoiyase nipane iri chira mbahe Tūpa suindar pëu.

<sup>5</sup> Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoiyase ahe omboura chupe. Esepia, ahe opacatu upe mbahe ombou güecatëhiëhisa pipe iyavei ombahe mboasiëhisa pipe avei. <sup>6</sup> Iyacatu rumo evocoi ava oporandura Tūpa upe sese oyeroyá pipe, ndahei chira opihañemoñeta rerova-rova tëisa pipe inungar acoi ivitu i ombohitu-hitu tëi vahe. <sup>7</sup> Acoi ëgüe ehi-ehi tëi vahe ava ndoipisii chira mbahe yande Yar sui yuvireco. <sup>8</sup> Esepia, ñepe ari ipihañemoñeta ñepe mbahe rese, ambuae ari ambuae rese. Ndoymoviracuai güeco tupri ãgua rese yuvireco.

<sup>9</sup> Iyavei que Jesús reroyasar seco mbegüe vahe toyemboviharateño yepi Tūpa omboeco ivate ãgua rese. <sup>10</sup> Iyavei mbahe yar seci vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri ëqüe ehi raimi tëi vahe yuvireco. <sup>11</sup> Evocoiyase acoi ari osëse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Ëgüe ehi aveira ava mbahe yar; omanora oporaviquisa sui.

### *Tecoãhasa, poroãtoisa resendar*

<sup>12</sup> Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirëhi vahe Tūpa ombou vahe guaisupar upe. <sup>13</sup> Acoi ava oyanduse poroãtoisa oyeupe mbahe tëi apo ãgua, “Tūpa revo ëgüe ehi cheu” ndehi chira. Esepia niha, Tūpa ãtoisar ndipoi eté mbahe tëi oyapo uca va-herã chupe. Iyavei ahe noñatoi avei mbahe tëi apo ãgua ava. <sup>14</sup> Co rumo ava opihañemoñeta rai upe oñeato uca mbahe tëi apo ãgua yepi. <sup>15</sup> Güemimbotarai pipe evocoiyase oyapo angaipa. Ipare angaipa apo pipe sui ou manosa chupe.

<sup>16</sup> Che rivireta, che rembiaisu, peyembopai rene. <sup>17</sup> Esepia, opacatu mbahe aviye vahe ahe Tūpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar seci. Esepia, sembiapo oñecuñaro vahe. <sup>18</sup> Ahe rumo ombou ité tecovesa yandeu co ñehesa supi eté vahe pipe ‘toyuvirecoi inungar yipindar mbahe miti ha seropovëhepri cheu opacatu che rembiapo sui’ ohesave yandeu.

*Tūpa rese yande pihañemoñetasa supi tupri vahe*

19 Iyavei che riviřeta, che rembiaisu, peyemomahenduha co che ñehe rese: peyapısaca tuprı vaira ambuae ava ñehe rese, mbegüe rupi rumo peñehera chupe iyavei ndapembahemboası voi tēi chiaveira. 20 Esepia, yambahemboası voi tēise, ndayayapoi Tūpa remimbotar. 21 Evocoiyase peseya teco raisa, opacatu ambuae oime vahe mbahe naporai vahe pe pāhuve. Co catu pe yemominisave peroya catu vite Tūpa ñehe omoingue vahe pe piha pipe. Ahe niha viřeco pīratasa pe pīsiro āgua.

22 Pe rumo pemboaviyera co pe mbohe vahe ñehesa; ndahei acoi pesenduño tēira. Esepia, pesenduño tēise, pe ae peyembopara. 23 Supi eté acoi ava osenduño tēise Tūpa Ñehengagüer, ipare rumo ndoviroyai, ahe inungar acoi ava osepiaño tēi vahe vova yepiasa pipe. 24 Ipare rumo oyepepise ichui, cūriteimi sesaraiño ichui. 25 Acoi ndasesarai vahe ité rumo güemiendu sui iyavei oyapısaca tuprı vahe co mborocuaita maranehi mbahe-mbahe tēi sui yande rerocua vahe rese iyavei oye-moviracuaño ité vahe oyapo vahe rā iporocuaita, ahe oviharetera opacatu güemiapio tuprı rese.

26 Amove ava, “Che aguata tuprı Tūpa rupi” ehi tēi. Ndoicuai rumo oñehe monguiriri āgua. Evocoiyase ahe ae oyembopa oico. Sembieroya evocoiyase ēgüe ehi tēi vahe. 27 Yarecose rumo yande rembieroya icatuprı, nimarai vahe yande Ru Tūpa rovai, ahese yaipīti viira co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

## 2

### *Ndayamboyoavirati chira ava mboeteisa sereco*

1 Iyavei no, che riviřeta, pe peroya vahe yande Yar Jesucristo seco porañete vahe peico, ndapeyeaisu yoavii chira. 2-3 Inungar-ra que ava mbahe yar oiquese pe ñemonuhasave viña, ahe icuā penda oro vahe, iturucuar catuprı ai vahe. Sese pehañeco tuprı, “Eguapi co tenda aviye catu vahesave” peyera chupe. Ahe pipeve avei co oiquese pe pāhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña. 4 Evocoiyase ēgüe peyese, peyapo mbahe ndoyoyai vahe, naporai vahe pe pāhuve ae iyavei peyeapo ava poravosar nungar peico pe pihañemoñeta raisa pipe.

5 Che riviřeta, che rembiaisu, pesendu aipo ñehesa: Tūpa oiporavo ava iparaisu vahe co ivi pipe ‘toyuviřeco mbahe yar nungar che reroyasa rereco’ oya, iyavei ‘toipisi che remimombehugüer rupi che mborerecuasa oyeupe nara’ oyapave guaisupar upe. 6 Pe rumo seroĩrosa pipe pemochi ava iparaisu vahe. ¿Ndahei vo mbahe yar mara-mara tēi pe rereco yuviřeco yepi? Ahe niha pe mbotiriri mborerecuar rovai pe reraso yuviřeco yepi. 7 Ahe avei niha oñehe-ñehe tēi seroĩrosa pipe yande Yar yaroya vahe rer imboyeroyaprı rese yuviřeco.

8 Supi eté yayapo mbahe aviye vahe yamboaviyese mborocuaita ivate catu vahe icuachiaprı aipo ehi vahe: “Pesaisu ava pe yeaisu nungar” ehi vahe. 9 Acoi yayeaisu yoavirati tēise rumo, ahese yayapo angaipa, yayavi mborocuaita Tūpa rovai. 10 Esepia, acoi ava viroya vahe opacatu mborocuaita, ipare rumo oime que ñepi nomboviye tuprı vahe, ahe oyavi opacatu mborocuaita. 11 Esepia, Tūpa ité niha

aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucaí chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuita. <sup>12</sup> Evocoiyase peñeire tupri iyavei peico tupri aveira. Esepia, oporandura yande recocer rese yande Yar oporocuita pipe güeru vahe yande reco tupri ñgua. <sup>13</sup> Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

*Yamboaviye itera mbahe; ndahei chira yande ñehe tēi*

<sup>14</sup> Che rivireta, ¿aviyera pīha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuvireco? ¿Oicatura pīha ahe oñepisiro aipo ohe pipe tēi yuvireco? <sup>15</sup> Inungar-ra oimese que yande rivri, anise yande reindri upe ipanera iturucuarã, semihura ari yacatu rupindar viña. <sup>16</sup> Evocoiyase que pe aipo peyeñora chupe viña: “Aviye, eso tupri eico. Eyeao eso sōhisagüer sui, ecaru tupri” peyera. Ipare rumo ndapemondose mbahe ipane vahe chupe, ¿aviyera pīha ava upe aipo yande he tēi viña? <sup>17</sup> Ëgüe ehi avei, “Ayeroya yande Yar rese” yande hesa; ndayapoise rumo mbahe aviye vahe aipo yande hesa pipe, aipo yahe tēi yaico.

<sup>18</sup> Aviyeteramo ava pe pāhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoiyase aipo ahera chupe: “Emboyecua ru nde yeroyasa mbahe nde rembiapoēhi pipe. Evocoiyase che amboyecua che yeroyasa oime vahe che rembiapo pipe ndeu” ahera. <sup>19</sup> Nde niha aipo, “Che aicua oime ñepeí Tūpa” ere. Supi eté aipo ere. Co rumo carugar avei oicua. Ichui osiquiyepave rumo ahe orirí eté yuvireco. <sup>20</sup> ¡Mbia, tapeico eme ndayaracuai vahe! ¿Ereicua vo co nde mbahe apoēhisa nde yeroyasa ñgua ehi tēi vahe? <sup>21</sup> Esepia, Tūpa oipisi yande ramoí Abraham seco tupri pipe oicuvēhese porerecosa nungar guahir Isaac chupe aracahe. <sup>22</sup> Indó, Abraham yeroyasa omboyecua ité güembiapo catupri reseve. Evocoiyase ñgua ehi ahe güembiapo tupri pipe omboaviye tupri oyeroyasa oico aracahe. <sup>23</sup> Ëgüe ehi yaviye icuachiapri aipo ehi vahe: “Abraham viroya ité Tūpa, evocoiyase, ‘Co seco catupri vahe’ ehi Tūpa ipisi” ehi. Ahese ava, “Abraham Tūpa mboripar ité” ehi yuvireco chupe.

<sup>24</sup> Indó, Tūpa, “Co seco catupri vahe” ehi ava upe semiapo tupri repiase yepi, ndahei iyeroyasa rese güeraño. <sup>25</sup> Ëgüe ehi tupri avei cuña ndipihai vahe Rahab upe. Esepia, ahe omoingue ñuvirío ava ivi repiasar imondopri güeta pipe, ipare oñomi imondo ambuae peri rupi yamotarēhisar sui. Ipipe sui Tūpa oipisi inungar-ra seco ivi tupri vahe viña. <sup>26</sup> Ëgüe ehi yande rembiapo catupri ndayamboyecuaise yande yeroyasa pipe, ahe inungar avei Espíritu ndasecoise yande rese, yande yeroyasa evocoiyase omano tēi eté oico.

### 3

*Yande ñehe resendar*

<sup>1</sup> Che rivireta, yipindar ndapeyeapoi chira setá etepri oporombohe vahe peyepāhuve. Esepia, peicua niha yande oporombohe vahe yaicose, Tūpa oporandu catu itera ambuae ava sui yande porombohe agüer rese yandeu curi. <sup>2</sup> Opacatu yande yayavi setá mbahe rese yepi. Oimese

que ava ndoyavii vahe oñehe, ahe ava seco ñvi tupri vahe. Iyavei oicua tupri opacatu güeco rereco tupri água. <sup>3</sup> Inungar acoi yamondose cavayu yuru penda sese seroguata água. Ahesa opacatu cavayu retecuer yaicatu imboyhava água. <sup>4</sup> Inungar tupri avei carite guasu, yepe tuvicha iyavei yepe ivitu omoañi opiratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi. <sup>5</sup> Ëgüe ehi avei yande ãpecu, yepe chñhimi tñi viña, ipipe rumo yayapo tñi mbahe tuvicha vahe ava upe. Inungar avei que tata chñhimi vahe sui tñi yuvi guasu opa ocai. <sup>6</sup> Ëgüe ehi yande ñehesa tata nungar. Iyavei yande ãpecu pipe opacatu mbahe-mbahe tñi yamombehu. ¡Evocoi mbahe-mbahe tñi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tñisa carugar suindar. <sup>7</sup> Ava oicatu opacatu mbahe mimba nimasoi vahe mboaracua água, vírai, mboi iyavei mbahe ipi para guasu pipendar avei no. <sup>8</sup> Ndipoi eté rumo que ava oipoepe vaheerã oñehe. Yandeu ndiyai eté ipoepi água. Yande ñehesa oporoyuca vahe nungar ité yepi, mbahe tñi eté. <sup>9</sup> Co yande ãpecu pipe yamboetei yande Yar Tũpa, ipipe avei rumo yamomara ava, ahe ava rumo Tũpa oyapo onungar. <sup>10</sup> Ëgüe ehi eté, yande ñehe pipe yamboetei Tũpa, ipipe avei yaroïro ava. Che rivireta, ndiyai evocoi nungar mbahe yayapo yepi. <sup>11</sup> ¿Oicatura pñha osẽ ñepe i ohẽ vahe sui sñhe vahe, iro vahe avei viña? <sup>12</sup> ¿Ihara pñha higuera ivira rese aceituna viña? ¿Iyavei oicatura pñha uva hi rese oha higo viña no? ¡Aní, ndoicatu eté! Iyavei ndoicatu ñepe i ohẽ vahe sui osẽ i, sñhe vahe sñhe asi vahe reseve.

#### *Mbahecuasa supi eté vahe*

<sup>13</sup> Acoi oimese pe pãhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecu tuprisa pipe. <sup>14</sup> Oimese rumo pe pñave pe poroamotarñhisa mbahe pota raisa pipe, iyavei peyeupe nara tñi mbahe peseca, ahesa ndiyai peyembovicha tupri tñi ‘che yaracua vahe aico’ pe yapave. Esepia, peremira tñira supi eté vahe mbahe rese. <sup>15</sup> Ëgüe ehi eté evocoi nungar aracuasa ndahei Tũpa suindar. Ahe rumo co ivi pipendar tñi vahe, ava pñañemoñeta sui tñi osẽ vahe iyavei carugar suindar tñi avei. <sup>16</sup> Esepia, poroamotarñhisa yande mbahe pota raisa pipe yarecose iyavei yaipotase mbahe yandeyeupe nara tñi, ichui osẽ ñehespoepisa iyavei opacatu mbahe tñi. <sup>17</sup> Acoi vireco vahe rumo Tũpa suindar aracuasa, ahe vireco itera opacatu ava rovaque güeco marañhisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparaisuereco vahe, nomboyoavirati vahe güecocuer. Ahe ipñañemoñetasa ñepe reseve vahe iyavei oyapo tupri vahe mbahe. <sup>18</sup> Iyavei acoi oseca vahe mbahe tupri yepi, oipisi itera opñha pipe teco ñvisa.

## 4

#### *Co ivi pipendar mbahe raisusa*

<sup>1</sup> ¿Que sui pñha ou vavasa iyavei ñehespoepi-episa pe pãhuve? Ahe ou pe mbahe pota raisa sui pereco vahe pe pñañemoñetasa pipe. <sup>2</sup> Pe peipotat rai mbahe. Ipare rumo ndapeicatu sereco água. Evocoiyase peporoyuca pe mbahe pota raisa pipe. Ndiyai eté rumo pñu sereco água. Ipipe sui peyeecoãha, pevava avei no. Ndapeyosui eté rumo

mbahe pe remimbotar. Esepia, ndapeporandui Tūpa upe. <sup>3</sup> Acoi peporanduse rumo sese, ndapeipisii. Esepia, peporandu rai tēi, peipota pe yembovīha āgua rese nara tēi. <sup>4</sup> ¡Pe mbīa, peyavī vahe pe recocuer! ¿Ndapeicuai vo acoi ava Tūpa cuaparēhi mboripar tēi yuvirecoi vahe, ahe Tūpa amotarēhimbar yuvirecoi? Ēgüe ehi eté acoi oipota vahe co ivi pipendar mbahe-mbahe tēi pipe güeco āgua, ahe oyeapo Tūpa amotarēhimbar. <sup>5</sup> Supi eté Tūpa Ñehengagüer aipo ehi: “Tūpa osaisu güecatēhisa pipe o Espiritu omondo vahe yande piha pipe” ehi. <sup>6</sup> Ahe rumo yande pītivii catu oporoaisusa pipe. Esepia, icuachiapri arachendar pipe aipo ehi: “Tūpa oyamotarēhi ava oyeecomboivate ai vahe. Oipītivii rumo seco mbegüe vahe saisusave” ehi. <sup>7</sup> Sese pemboyeroya catu Tūpa. Peyemoviracua caruguar remimbotar apoēhi āgua. Ahese ahe oyepepira pe sui. <sup>8</sup> Peyemboya Tūpa rese, ahe evocoyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pihañemoñetasa ñuvirio pereco vahe sui! <sup>9</sup> ¡Tatasi pēu, tapeyaseho, perorivete iri eme, pemboasi pe angaipa pe yemboviharēhisave! <sup>10</sup> Peñenopiha Yar rovai imboyeroyasa pipe. Ahe evocoyase pe reco mboivatera.

#### *Peroiro eme pe mboetasa*

<sup>11</sup> Che rivireta, aní chira peñehe mara peyeupe. Acoi oñehe rai vahe iyavei viroiro vahe ambuae Jesús reroyasar, ahe oñehe rai tēi aveira mborocuaita rese seroīrosave. Ēgüe peyese, evocoyase seroyaēhisa pipe peyemboivate catura mborocuaita sui viña. <sup>12</sup> Oime rumo ñepeñño ité ombou vahe mborocuaita yandeu iyavei oporandu vahe yande recocuer rese. Ahe güeraño avei oicatu oporopisiro iyavei oporomocañi āgua no. Evocoyase pe, ¡ndiyai pe cotindar reroiro āgua pēu!

#### *Ndayaicuai mbahe oime vaherã yandeu ayihive*

<sup>13</sup> Pesendu pe aipo peye vahe: “Cūritei, anise ayihive yasora que tecuave, anise que tecua guasuve revo. Aheve yaicora ñepeí araviter yande poraviqui āgua. Ahese yamogana catura guarepochi” aipo peye vahe. <sup>14</sup> ¡Ndapeicuai rumo mbahe oime vaherã pēu ayihive! ¿Mara ehi piha yande recocuer? Ahe inungar ñivichi oyecua raimi tēi vahe, ipare opaño ocañi. <sup>15</sup> Iyacatu aipo peyera viña: “Oipotase yande Yar yande reco āgua, yayapora co nungar mbahe, que ambuae mbahe” peyera yepi. <sup>16</sup> Pe rumo peñeñño pe yemboivate aisa pipe mbahe pe rembiaporã rese. Opatu evocoi nungar mbahe rumo naporai. <sup>17</sup> Esepia, acoi oicua vahe mbahe tupri apo āgua, ipare rumo ndoyapoi eté, ahe oyapo angaipa.

## 5

#### *Imbahe eta vahe paraisusa resendar*

<sup>1</sup> ¡Pe mbahe yar, pesendu co: peyaseho iyavei perãse! Esepia, peiporarara mbahe tēi peico. <sup>2</sup> Opatu pe mbahe eta ocañi tēi vaherã. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi. <sup>3</sup> Pe oro, pe guarepochi opa opochi ati-ati no. Ahe niha pe recoña āgua, omboyecua vahe mbahe tēi pēu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pipe. <sup>4</sup> Peyapisaca, acoi oipoho vahe mbahe pēu nara yuvireco, chupe ndapemboepii eté. Sese

sāsé tēi yuvireco. Ahe rumo yande Yar ipĩratá vahe, ivate catu vahe oicua. <sup>5</sup> Co ivi pĩpe tēi pe peyecomendiyaí peico iyavei peyembovĩha co ivi pĩpendar mbahe rese inungar guaca imonguirapri yuca āgua. Ipĩpe peyemoingatu pe cañi āgua. <sup>6</sup> Pe ñehe pĩpe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

*Ñemosasa iyavei yeroquisa resendar*

<sup>7</sup> Che rivireta, peñemosañō yande Yar yevi iri āgua rese. Inungar ava omaheti vahe osāro rane güemiti poho āgua. Esepia, ahe osāro yipĩndar oqui vahe iyavei ipa oqui vahe mbahe miti aviye āgua. <sup>8</sup> Pe avei peñemosañō, peyemonguerēhi catu. Esepia, cōimi eté yande Yar yevi āgua cute.

<sup>9</sup> Iyavei che rivireta, peñemoiroi rene peyeupe. Evocoiyase Tūpa ndoporandui chira co mbahe rese pēu. Esepia, mborerrecuar guasu iva pendar oyemoingatu voi ohā yandeu porandu āgua. <sup>10</sup> Che rivireta, peico catu inungar Tūpa ñehe mombehusar aracahendar yuvirecoi vahe. Ahe oñemosañō mbahe rasicuer upe yande Yar rer pĩpe oñehe āgua yuvireco. <sup>11</sup> Yande rumo yaicua sovasapri ava oñemosā vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparaisuereco vahe.

<sup>12</sup> Che rivireta, peyapisaca tupri catu co che ñehe rese. Pe ñehe āgua ndapeiporui chietera que iva rer iyavei que ambuae mbahe pe ñehe reroya uca āgua. Iyacatu rumo, “Supi eté” peyese, supiño itera; “Aní” peyese, aní chiño itera Tūpa poronupasa pisiēhi āgua.

<sup>13</sup> Aviyeteramo que pe pāhu pendar iparaisura oico; toyeruqui. Aviyeteramo oimera que sorivete vahe oico; ahe tosapucaí Tūpa upe. <sup>14</sup> Aviyeteramo que ava imbaheasira oico, toñehe evocoiyase Jesús reroyasar rārosar upe. Ahe tomondo aceite yande Yar rer pĩpe yuvireco sese. Ipare toviroyeroqui yuvireco. <sup>15</sup> Acoi oyeruquise oyeroyasa pĩpe sese yuvireco, imbaheasi vahe evocoiyase ocuerara; yande Yar avei omopuhara. Acoi angaipa virecose, oime aveira ñerosa chupe. <sup>16</sup> Sese pemombehu pe angaipa peyeupe, peyeroqui avei peyese pe yembogüera tupri uca āgua. Ava aviye vahe oyeruquise oquerēhisave opacatu güecocuer pĩpe, ahe iyeroquisa ipĩratá ité. <sup>17</sup> Acoi Tūpa ñehe mombehusar Elías yande nungar avei. Ahe oporandu oyeruquisa pĩpe Tūpa upe, “Toqui eme” ehi. Aipo ehise, ndoquii eté ivi harive mbosapri araviter imombitesa rupi. <sup>18</sup> Ipare oyeruqui iri, ahese oqui iyavei mbahe miti iha iri.

<sup>19</sup> Che rivireta, acoi oimese oyahuva vahe supi eté vahe sui pe pāhuve, ipare ambuae viroyevise Jesús upe, <sup>20</sup> tapeicua pe acoi viroyevi vahe angaipa viyar secocuerai sui, oipĩsiro ihā imano rāgüer sui. Iyavei omoime ñerosa tuvichá vahe yangaipa upe. Aipo rupive.

## PEDRO REMBICUACHIA YIPINDAR VAHE SAN PEDRO

*Pedro mahenduhasa Jesús reroyasar opacatu rupi oñemosai vahe upe*

<sup>1</sup> Che, Pedro, Jesucristo apóstol aicuachía co che ñehe pëu, pe Tüpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. <sup>2</sup> Supi eté pe yande Ru Tüpa rembiporavo yipisuive peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco água ‘imoatiroprí toyuvirecoi che Rahir ruvi pipe oangaipagüer sui’ oya. Peipisi catu Tüpa porovasasa pe reco tupri água.

*Tüpa suindar mbahe aviye vahe rãrosa*

<sup>3</sup> ¡Imboeteipri tasecoi Tüpa, yande Yar Jesucristo Ru! Ahe niha oporoparisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tüpa suindar yandeu. <sup>4</sup> Ipipe sui avei Tüpa oipisi ucara pëu pe mombahesa ivave yapocatupri nocañii vaherã, ndituyui vaherã iyavei ndopai vaherã ité. <sup>5</sup> Pe peyeroya ité Tüpa rese. Sese niha ahe opĩratasa pipe pe repi mbahe tēi sui poropĩsirosa pe reco água. Ahe vireco vahe imoingatupri ari ipa vahe mboyecua água pëu.

<sup>6</sup> Co rese peyembovihareteño peico, yepe cūritei pe reco pipe peparaisu pucu raimi tēi setã pe recoãhasa pipe peico viña. <sup>7</sup> Esepia, pe yeroyasa Tüpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pĩha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

<sup>8</sup> Pe niha pesaisu yande Yar Jesucristo, yepe ndapesepiai viña; cūritei rumo sepiaēhi pipe peyeroya sese. Sese pereco ité pe viharetesa tuvichã, aviye catu vahe, ndapeicatui vahe ahe imombehu. <sup>9</sup> Esepia niha, pesupiti pe remiaro poropĩsirosa apirēhi vahe peico pe yeroyasa pipe.

<sup>10</sup> Aracahe suive ava Tüpa ñehe mombehusar oicua tupri pota ité co poropĩsirosa resendar yuvireco ‘¿mara ehi eté pĩha co tecocuer?’ oyapave yuvireco. Iyavei oñemoñeta yuvireco Tüpa oporoaisusa pipe pëu mbahe ombou vaherã rese. <sup>11</sup> Cristo Espiritu senondeve oicua uca mbahe Tüpa ñehe mombehusar upe aipo ehi: “Poropĩsirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pĩha evocoi mbia?” ehi; “¿Mbahesera vo oimera co Espiritu remimombehu yandeu?” ehi yuvireco. <sup>12</sup> Tüpa rumo omboyecua chupe, ndahei chupe nara ité imombehupri yuvireco, pëu nara ité rumo. Ahe avei niha poropĩsirosa resendar ñehesa mombehusar omombehu pëu cūritei, Espiritu Santo pĩratasa pipe imbouprí iva pendar yandeu. ¡Tüpa rembiguai avei oicua tupri pota tēi cūritei yuvireco viña!

*Tüpa yande poravo yande reco maranehi água*

<sup>13</sup> Sese pe pihañemoñeta tuprisa pipe pemahemoha tuprira peyese Tüpa porovasasa pëu ombou vaherã rese pe yeroya catu água acoi Jesucristo

oyevise curi. <sup>14</sup> Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tūpa recocuer cuaēhi viteseve. <sup>15</sup> Peicora rumo pe reco maranehisa pipe ité. Esepia, Tūpa pe poravo oyeupe nara; ahe ndaseco marai vahe ité. <sup>16</sup> Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

<sup>17</sup> Tūpa niha opacatu ava upe secocuer rese nomboyoaviratii chira oporandu curi, sese pe, “Che Ru” peye vahe chupe peyembosiquiyera mbahe tēi apoēhi āgua imboeteisave co ivi pipe peico vitesve. <sup>18</sup> Esepia, Tūpa pe pīsiro aracahendar pe ramoī suindar aracuasa ēgüe ehi tēi vahe sui. Peicua tupri ité niha co poropīsīrosa repri nimboepisai eté que mbahe ocañi tēi vaherā pipe inungar oro, anise guarepochira viña. <sup>19</sup> Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe. <sup>20</sup> Ahe Tūpa oiporavo aracahe ivi, iva apoēhi vitesve ēgüe ehi vaherā. Cūrītei rumo oyemboyecua pēu mbahe tupri āgua. <sup>21</sup> Secocuer sui niha peroya Tūpa peico, ahe ombogūerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipipe sui peyeroya Tūpa rese iyavei pesāro co mbahe aviye vahe pisi āgua ichui.

<sup>22</sup> Cūrītei Tūpa Ñehengagüer supi tupri vahe mboyeroyasa pipe imoatīrosa pe recocuer pesaisu vaherā ambuae Jesús reroyasareta. Evocoiyase ēgüe peyera peyeaisu catu opacatu pe pihañemoñeta tuprisa pipe, iyavei opacatu pe pīratasa pipe. <sup>23</sup> Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe. <sup>24</sup> Esepia, icuachiapri aracahendar pipe aipo ehi:

“Opacatu ava inungar caha, iyemboeteisa evocoiyase inungar ipotri. Ipare ahe caha opa omano, ipotri avei opa ovīapi;

<sup>25</sup> Tūpa Ñehengagüer rumo apirēhi vaherā ité yepi” ehi.

Ahe co ñehesa imombehupri poropīsīrosa resendar pēu nara.

## 2

<sup>1</sup> Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. <sup>2</sup> Inungar pītanīmi ocuacua āgua oipota cambi; ēgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropīsīrosa pipe, <sup>3</sup> que peicua itese yande Yar reco avīyesa.

*Cristo inungar ita ndopai vahe*

<sup>4</sup> Peyemboya catu yande Yar rese. Ahe inungar ita ndopai vahe. Ava rumo ovīroñroño yuvireco. Tūpa rumo ahe ita oiporavo aviye catu vahe. <sup>5</sup> Ēgüe ehira pe rereco oyeupe inungar ita ndopai vahe; ipipe sui omopuhara otūparoguā pe rese. Iyavei pahī ndaseco marai vahe nungar peicora semimbotar rupi chupe. Pe evocoiyase Jesucristo rembiapo pipe sui peyapora Espīritu upendar mbahe aviye vahe. Ahe inungar mbahe seropovēhepri aviye vahe Tūpa upe. <sup>6</sup> Esepia, icuachiapri aracahendar pipe aipo ehi:

“Che amondo ñepeī ita nungar ava aviye vahe tecua Sión ve imovīracua āgua.



Ahe che rembiporavo iporañete vahe, imboeteipri.

Acoi oyeroyá vahe sese, ahe nochĩ chietera ichui” ehi.

<sup>7</sup> Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oĩ aposar rumo viroĩroño co ita yuvireco.

Ahe ita rumo coiye víracuasa aviye catu vahe”

ehi. <sup>8</sup> Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyāēhi pipe sui oyemondo uca mbahe tēi pipe yuvireco. Ēgüe ehi vaherā ité rumo ahe secocuer yuvireco.

<sup>9</sup> Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. Ēgüe peye Tūpa reco pĩratasa mombehu āgua peico. Esepia, ahe pe renose pĩtumimbisa nungar pe recocuerai sui tesapesa aviye vahe pipe pe reique āgua. <sup>10</sup> Yipindar ndahe vitei eté Tūpa upendar ava peico, cūritei rumo ahe ité peico; yipindar ndaperecoi Tūpa poroparaisuerecosa, cūritei rumo pereco ité cute.

*Peico catu Tūpa mboetei āgua*

<sup>11</sup> Che rivireta, che rembiaisu, peico raimi tēi vahe co ivi pipe, pepoi opacatu co ivi pipendar pe pihañemoñeta raisa sui. Esepia, pemomara uca tēi pe recocuer ipipe. <sup>12</sup> Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroĩro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

<sup>13</sup> Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, <sup>14</sup> anise yivirindar. Ahe pe recua pipendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua. <sup>15</sup> Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi āgua.

<sup>16</sup> Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. <sup>17</sup> Pemboeteira opacatu ava. Pesaisu catu pe rivireta Jesús reroyasar; pemboetei Tūpa; pemboyeroya avei mborerecuar guasu.

*Yembohesa yande Yar Jesucristo mombaraisu agüer resendar*

<sup>18</sup> Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei. <sup>19</sup> Esepia, aviye catu yañemosase mbahe-mbahe tēi ava rembiapo upe Tūpa mboyeroya tupri pipe. <sup>20</sup> Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe. <sup>21</sup> Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua. <sup>22</sup> Ahe ndoyapoi vahe ité angaipa iyavei ndoporombopai vahe ité. <sup>23</sup> Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che

Ru Tūpa seco ĩvi vahe oicuaru chupe yuvireco” ehiño oyeupe mbahe-mbahe tēi aposar upe. <sup>24</sup> Cristo teieté viraso yande angaipagüer güete pipe curusu rese ‘toyepepi angaipa sui yuvireco. Ipípe sui toyuvirecoi teco ĩvisave’ oyapave yandeu. Ahe niha yapichapri secói pe recocuer moingatu āgua. <sup>25</sup> Esepia, pe niha yipindar inungar ovesa ocañi tēi vahe peico viña. Cūritei rumo peyevi Cristo upe. Ahe pe recocuer osāro cūritei inungar ovesa rārosar.

### 3

*¿Mara ehira ava omenda vahe recocuer yuvireco?*

<sup>1-2</sup> Ĕgüe peye aveira cuña, pemboyeroya itera pe mer. Esepia, amove ndoviroya vitei Tūpa Ñehengagüer yuvireco; pemboyecua rumo pe reco tuprisa imboeteisa avei chupe, aviyeteramo ahe avei viroyara, yependapeñehi chira chupe viña. <sup>3</sup> Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. <sup>4</sup> Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiēhisa pipe. Evocoi nungar aviye catu ité Tūpa rovaque. <sup>5</sup> Ĕgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroya yuvireco. <sup>6</sup> Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeēhisa pipe.

<sup>7</sup> Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tuprisa pipe tecovesa apirēhi vahe oyoya voi pēu. Ĕgüe peyese, Tūpa osendu itera pé yeruresa.

*Paraisusa mbahe tupri aposa rese*

<sup>8</sup> Iyavei na peyera pe opacatu peyese inungar ñepeí oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. <sup>9</sup> Oyapose ava que mbahe tēi pēu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira chupe. Evocoi nungar mbahe apo āgua niha Tūpa pe poravo ‘toipisi che porovasasa’ oyapave. <sup>10</sup> Esepia, “Peipotase pe recocuer aviye tupri āgua pe yemboviharetisa pipe, pemombituhu pe ñehe raisa iyavei ndapeporombopai chira.

<sup>11</sup> Pepoi aveira mbahe tēi sui, pesecara mbahe aviye vahe.

Peseca teco tuprisa peyeupe nara, peguata supi.

<sup>12</sup> Esepia, supi eté, yande Yar osāro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisii eté” ehi.

<sup>13</sup> Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo. <sup>14</sup> Peparaisuse rumo mbahe pe rembiapo aviye vahesa rese, ¡sovasapri peico! Peyembosiquiyei rene que ava sui. <sup>15</sup> Pemboeteñora rumo Cristo pe Yar secosa rese pe piha pipe. Peyemoingatu voira ava pe remiario rese oporanduse pēu pe querēhisa pipe imombehu tupri āgua. <sup>16</sup> Ĕgüe peyera rumo pe reco mbegüesa pipe imboeteisave. Peico tuprira pe pihañemoñeta tupri

rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

<sup>17</sup> Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui. <sup>18</sup> Esepia niha, Cristo teieté omano yande angaipa repirā ñepei reseve. Güeco maranehi pipe ěgüe ehi ava recocuerai rese opacatu pe reraso āgua Vu Tūpa upe. Ahe omano güete rese. Ipare rumo ocuerayevi güeco espíritu pipe. <sup>19</sup> Güeco espíritu pipe avei oso, omombehu Vu Tūpa remimbotar ava hã soquendapri yuvirecoi vahe upe. <sup>20</sup> Ahe ava Noé recosendar ndiporeroyai vahe yuvireco aracahe. Tūpa osāro güeco mbegüesa pipe secocuer moingatu āgua viña Noé oyapo viteseve arca oico. Ahe ipipe oñepisiro ochomi tēi yuvireco amarusu sui. <sup>21</sup> Ahe i osāhangapo i poroāpiramosa, ahe omboyecua yande ipisiroproi yande recosa. Poroāpiramosa rumo i pipe ndahei yande rete moatiro āgua. Co rumo yaporandura Tūpa upe, yande pihañemoñetasa moatiro āgua. Ipipe sui evocoyase yañepisiora yande Yar Jesucristo cuerayevisa pipe. <sup>22</sup> Ahe oso ivave oguapī oī Vu acato coti. Opacatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

## 4

### *Yandehañeco yandeyese mbahecuasa Tūpa suindar yaipisi vahe pipe*

<sup>1</sup> Cristo oiporara mbahe rasicuer güete rese. Pe avei evocoyase peyemoingatu voi ěgüe peye vahe rā peico chupe nara. Esepia, acoi ava oyemomborara vahe güete pipe oseya angaipa yuvireco. <sup>2</sup> Ipipe sui ndoyuvireco iri chira ari rupi ava tēi pihañemoñetasa pipe. Tūpa remimbotar rupi eté rumo oyapo pota mbahe co ivi pipe yuvirecoi vitese. <sup>3</sup> ěgüe peye pucu rane niha pe rembiapo ai pipe peico ava Tūpa reroyasarēhi recocuer nungar rupi tupri. Ahese mbahe-mbahe tēi peyapo pe pihañemoñeta raisa pipe, savaiposa, pietasave pe rāse tēi pipe pe aracusa pemocañi pe ihu tēisa pipe, pemboetei avei mbahe rahanga tēi peico. <sup>4</sup> Cūritei rumo pe mboriparer, ndoyembovihal tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese. <sup>5</sup> Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu āgua omano vahe upe, oicove vite vahe upe avei curi. <sup>6</sup> Sese niha co ñehesa pīsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirēhi inungar Tūpa.

<sup>7</sup> Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe. <sup>8</sup> Co catu opacatu tupri ité peyeaisura pe piha pipe. Esepia, ěgüe yahera poroaisusa pipe yande ñero voira seta ava yangaipa vahe upe. <sup>9</sup> Peipisi tupri ava yuviraso vahe pe rētave; “¿Mbahe rese piha co ou?” peyei rene pe pihañemoñeta pipe pe piri ou vahe upe. <sup>10</sup> Ñepeipei yande yaiporura Tūpa suindar mbahecuasa yareco vahe ambuae Jesús reroyasar rese hañeco tupri āgua. Yaiporu tuprira co Tūpa porovasasa setā vahe yande cuaita mboaviye tupri āgua. <sup>11</sup> Acoi pemombehuse Tūpa suindar mbahe, pemombehura inungar iñehe ité; acoi peporopitivii potase, peyapoño opīratasa pēu Tūpa ombou vahe pipe. Opacatu mbahe

peyapo vahe peyapo ‘tomboetei ava yuvireco Tūpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Ēgüe tehi apirēhi vaherā ité.

### *Yemombaraisusa Cristo reroyasar yande recosa pipe*

<sup>12</sup> Che rivireta, che rembiaisu, ndapeyesapiha ucai chira, acoi oimese mbahe-mbahe tēi yande recoãhasa pēu ‘ndoyavii, ndipoi chietera evocoi nungar mbahe cheu viña’ pe hesa pipe. <sup>13</sup> Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoyase yayemboviharete itera acoi yande Yar oyevise güeco pīratasa pipe. <sup>14</sup> Iñehe marase yuvireco pēu Cristo reroyasar pe recosa rese, sovasapri peico. Esepia, Tūpa Espiritu güeco porañetesa pipe seci eté pe rese. <sup>15</sup> Acoi pe pāhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tēi aposa rese. Ndahei chiaveira que ambuae ava mbahe rese iñemañeco tēisa sui ēgüe ehira serecosa. <sup>16</sup> Co rumo acoi peparaisuse Cristo reroyasar pe recosa pipe, ndapechī chietera. Pesapucaira rumo Tūpa upe imboeteisa pipe serer pereco vahe rese.

<sup>17</sup> Esepia, oyepota ité ari Jesús reroyasar upe rane ité tecocuer rese porandu āgua. Ēgüe ehise yandeu, mbahe tēi catu itera Jesús reroyasarēhi upe. <sup>18</sup> Yavaise seco catupri vahe upe iñepisiro āgua, ¿mara ehira pīha ava ndaseco pōrai vahe ava angaiapa viyar yuvirecoi vahe upe? <sup>19</sup> Sese peyemomborarase Tūpa reminbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hã rāro āgua. Esepia, ahe niha yeroyasa ité seci.

## 5

### *Aracuasa Jesús reroyasar upe*

<sup>1</sup> Che amboaracua pota pe pāhu pendar Jesús reroyasar rārosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ēgüe ahe aveira acoi yande Yar oyevise curi. <sup>2</sup> Pesāro tupri catu Tūpa upendar ava eta pe remiaro co omondo vahe pēu inungar ovesa rese yangarecuar osāro tupri vahe ovesa; peyapora pe querēhisa pipe ité. Ahe niha Tūpa oipota, ndahei ambuae yande cuaisa pipe tēi, ndahei avei guarepochi pota raisave yayapo. Yayapora rumo mboraviqui yande querēhisa pipe ité. <sup>3</sup> Ndapeicoi chira pe remiaro upe inungar que mborerecuar güeco ivatesa pipe oporocuai pīrata vahe. Pemboyecuaru rumo pe recocuer aviye vahe chupe imbohesa tupri pipe. <sup>4</sup> Evocoyase acoi oyevise yande Yar, yande rārosar ivate catu vahe, ahese peipisira mbahe porerecosa, teco ori porañete apirēhi vahe.

<sup>5</sup> Iyavei no pe mbia chīhivahe, pemboyeroyara ava pe rārosar peico. Iyavei opacatu peyemboyeroyara pe reco mbegüesa pipe peyeupe peico. Esepia,

“Tūpa ava oyeecomboivate ai vahe amotarēhimbar seci; ava seco mbegüemi vahe upe rumo ombou oporovasasa” ehi.

<sup>6</sup> Peyecomombegüe catu peico Tūpa pīratasa povrive. Evocoyase pe reco mboivatera curi. <sup>7</sup> Opacatu mbahe rese pe pihañemoñeta atisa pemombehura Tūpa upe. Esepia, ahe pe rārosar ité seci.

<sup>8</sup> Pearacua cañi rene peyesui, pemahemoha ari rupi peyese. Es-epia, pe amotarēhimbar Carugar pe reco momara pota yepi inungar yaguar oñaro vahe oguata tēi oporoeca ‘tamomara ava’ oyapave. <sup>9</sup> Sese peyemoviracuara Tūpa rese pe yeroyasa pipe Carugar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe. <sup>10</sup> Peparaisumi pare rumo, Tūpa teieté pe reco mohivi tupri, iyavei pe reco moviracuara, pe momirata aveira pe yepipi iriēhi āgua ichui. Ahe niha oporovasasa pipe yande poravo oyeupe nara, yande yaso vahe rā supi teco ori ndopai vahesave yande Yar rese yande recosa pipe. <sup>11</sup> Ēgüe tehi tasecoi güeco pīratasa apirēhi vahe pipe.

*Mahenduhasa ipa vahe*

<sup>12</sup> Yande rivri Silvano omboaviye tupri vahe ité ocuaita yepi, ahe che pīti viisa pipe co ayapo imondo che rembicuachía ndipucuimi vahe pe mboaracua catu āgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tūpa poroaisusa’ che hesave. ¡Peyemoviracuara tupri ité sese!

<sup>13</sup> Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pēu. Marcos, che rahir nungar avei imahenduha pe rese. <sup>14</sup> Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

## IMONUVIRIOSA PEDRO REMBICUACHIA SAN PEDRO

### *Pedro mahenduhasa Jesús reroyasar upe*

<sup>1</sup> Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ivi vahe yuvirecoi. <sup>2</sup> Tapeipisi catu porovasasa iyavei teco tupriisa Tüpa, yande Yar Jesús cua tupri pipe.

### *Jesús reroyasar recocuer*

<sup>3</sup> Tüpa ombou güeco pírata pipe opacatu mbahe ipane vahe yande recove água, sese yande pihanemoñeta catu água avei yande secocuer cua tupri pipe. Ahe yande poravo güeco porañetesa pipe, güembiapo porañete vahe pipe avei. <sup>4</sup> Ipipe avei oseyá oñehe imboaviyepirã yandeu; ahe ñehe ñgüe ndehi tēi vahe, aviye catu vahe ité. Co yandeu ñehesa pipe sui perecora Tüpa reco aviye vahe peyese pe yepēpi água mbahe tēi sui. Ahe acoi oime vahe co ivi pipe ava remimbotar tēi sui. <sup>5</sup> Sese pe peyeroya vahe Jesús rese, peyemomirata catu aveira pepapo vaheerā mbahe aviye vahe. Peseca aveira Tüpa remimbotar cua tupri catu água. <sup>6</sup> Iyavei peñearo tuprira. Ipare peñemosañe aveira mbahe tēi upe. Ipipe sui peyemondo tupri catura Tüpa upe. <sup>7</sup> Ipare peyeaisura peyeivri nungar pe recosa pipe. Ipipe sui peseca catu vitera ava raisu tupri água.

<sup>8</sup> Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ñgüe ndehi tēi chira, peicua tupri catu aveira yande Yar Jesucristo. <sup>9</sup> Acoi ndovirecoi vahe rumo evocoi nungar mbahe oyese, ahe oyeapo inungar ndasesapisoi vahe, anise mbahe ndosepia tupri vahe, sesaraiño oangaipa rese ñero agüer sui. <sup>10</sup> Sese che rivireta, peyemoviracua catu Tüpa pe renoisa mboyecua água iporavopri pe recosave. Ñgüe peyese, ndapeviapi chietera mbahe tēi pipe. <sup>11</sup> Evocoi nungar pipe sui pe pisi tuprira omborerecuasa ndopai vahe pipe yande Yar, yande Písirosar Jesucristo.

<sup>12</sup> Sese niha opomomahenduhaña itera evocoi nungar mbahe rese, yepē peicua, peicoveño avei mbahe supi tupri vahe rese. <sup>13</sup> Aviyeño itera revo che recove vitesese opomomahenduha vite co aracuasa rese. <sup>14</sup> Esepia, yande Yar Jesucristo oicua uca cōimi che mano água cheu. <sup>15</sup> Opombohera rumo opacatu che catugüer rupi co tecocuer rese che manore pe mahenduha água.

### *Co osepia vahe ité Jesús mborerecuasa yuvireco*

<sup>16</sup> Co porombohesa oromombehu vahe pëu yande Yar pírataa resendar, iyevi iri água resendar avei, ndahei oreyesui tēi. Ore rumo orosepia vahe ité ore resa pipe yande Yar mborerecuasa. <sup>17</sup> Orosepia niha yande Ru Tüpa omboeteise Guahir iyavei omondose chupe seco porañete iri água aipo ehise oñehe güeco porañetesa pipe: “Co che Rahir, che rembiaisu ité, sese niha che ayemboviharete vichico” ehise. <sup>18</sup> Ore ité niha aipo ñehesa orosendu iva suindar orocose yande Yar rupi ivitri imboeteipri vahesave.

<sup>19</sup> Ahe ñehesa omboyecua catu ñehesa aracahendar Tūpa ñehe mombehusar remimombehugüer supi tupri vahe Cristo resendar. Iya ité pëu pe yapisaca tupri ãgua sese; inungar que tataendi pītusave osesape vahe oico acoi osése voi cōhe rerusar yasitata guasu ou, ãgüe ehi co ñehesa pe piha pipe sesape. <sup>20</sup> Peicua catu co mbahe, co ñehesa aracahendar icuachiapri Tūpa suindar ité, ndahei yandeyesui tēi yaicua imombehu ãgua. <sup>21</sup> Esepia, ndahei iñehe mombehusar oyesui tēi omombehu yuvireco. Ahe rumo ava seco catupri vahe ité. Tūpa ité omombehu uca oñehe chupe Espiritu Santo pīratasa pipe aracahe.

## 2

### *Oporombopa vahe porombohesa*

<sup>1</sup> Yuvirecove rumo aracahe porombohesar oporombopa tēi vahe Israel ivi rupi. Oime aveira niha pe pãhuve co nungar oporombopa tēi vahe yuvireco. Ahe ñemisa pipe oporombohera co coti tēi vahe ava reco momara tēi ãgua; evocoiya güeco pipe oicuacuñora oyar opīsiosar. Co rumo güecocuer momba pihaivi ãgua tēi ãgüe ehira yuvireco. <sup>2</sup> Setá ava oguatara secocuerai rupi. Ipipe sui ambuae ava oñehe rai tēira porombohesa supi tupri vahe rese yuvireco. <sup>3</sup> Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuive ité niha ahe imocañipirã yuvirecoi.

<sup>4</sup> Esepia, aracahe Tūpa niñeroi eté güembiguai oyemboangaipa vahe upe. Ahe opa ité omondo mbahe tēisave. ãgüe ehi seyapa pītumimisave, inungar ñapichimbrī carena pipe yapocatupri yuvireco cañisave nara. <sup>5</sup> Iyavei acoi Tūpa niñeroi avei ava aracahendar ndaseco pōrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihīvi vahe resendar iyavei ava siete yuvirecoi vahe supindar, ahe güeraño ité oipīsiro. <sup>6</sup> Iyavei opa omocañi tata pipe tecua Sódoma, Gomorra avei; ãgüe ehi imbotanimbu tupri ‘na ahe aveira niha ambuae ava che reroyaēhisar upe curi’ ohesave. <sup>7</sup> Lot güeraño rumo ahese oipīsiro. Ahe mbia aviye vahe secocuer; ndoyemboviha tēi ambuae ava recocuer mbahe-mbahe tēi yuvirecoi vahe repiase.

<sup>8</sup> Co mbia aviye vahe secoise ahe ava pãhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo. <sup>9</sup> Indó, yande Yar oicua viroyasar renose ãgua mbahe tēi sui; oicua avei mbahe tēi pipe yuvirecoi vahe rereco imombaraisu ãgua ari cañise curi. <sup>10</sup> Tūpa omombaraisu catu itera acoi ndopoi vahe güemimbotarai sui, viroiro vahe yande Yar mborerecuasa, oyecomboivate ai vahe güemimbotar aposa pipe, acoi osiquiyeēhisa pipe oñehe rai vahe seco ivate, ipirata vahe rese. <sup>11</sup> Tūpa rembiguai eta iba pendar rumo yepe ipirata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

<sup>12</sup> Co ava mbahe mimba nungar tēi ndovirecoimi eté opihañemoñetasa yuvireco. Opoco voiño tēi mbahe rese; evocoi nungar yuviroha yucapirã tēi eté. Ahe oñehe rai tēi vahe mbahe güemienducuaēhi rese. Mbahe mimba nungar tupri avei rumo omanora yuvireco güecocuerai pipe. <sup>13</sup> Oyemombaraisu uca ambuae ava mombaraisusa pipe sui tēi, “Yayemboviha mbahe yande rembiapo ai rese” ehi tēi eté yuvireco viña.

¡Oporomochi pipe tēi rumo yuvirecoi, yuvirasose pe pietasave pe piri, güeco rai reseve oyemboviha oporombopasa tēi pipe yuvireco!

<sup>14</sup>Osepia se cuña, oipota voiño tēi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca ägua oyeupe yuvireco. Ava ocañi tēi vaherã yuvirecoi. <sup>15</sup>Ocañi tēi secocuer yuvireco Tüpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo ägua guarepochi pota raisa pipe yuvireco. <sup>16</sup>Tüpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuaëhisa sui.

<sup>17</sup>Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirēhi vahe ité imombopirã yuvireco pītumimbi catu vahesave nara. <sup>18</sup>Esepia, oñehe tupri ai angahu tēi ava monguerēhi ägua ava pihañemoñeta raisa rupi seroyevi ägua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri ägua. <sup>19</sup>“Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinose catui eté ichui. Supi eté, yayapoño itese que mbahe tēi, ahe evocoiyase mbiguai nungar ité yande rereco uca. <sup>20</sup>Esepia, acoi oicua vahe yande Yar, yande Pisirosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yipindar secocuer sui yuvireco chupe. <sup>21</sup>Oyeupe Tüpa porocuaita imondopri aviye vahe cua pare oyepepise ichui, aviye catura revo ndoicuaise co tecocuer ihivi vahe yuvireco viña. <sup>22</sup>Supi tupri ité yaviye ñehesa sesendar: “Cave rumo ohu iri ogüëhe. Iyavei cuchi oyasu pare, oyevi iri tuyuve oyemboavaete ägua” ehi vahe.

### 3

#### *Yande Yar yevisa*

<sup>1</sup>Che rivireta, che rembiaisu, co aicuachía iri che ñehe pëu. Ipipe opomopihañemoñeta tupri uca pota che pe mboaracuasa pipe. <sup>2</sup>Peyemomahenduha aracadendar Tüpa ñehe mombehusar seco catupri vahe ñehengagüer rese, yande Yar Poropisirosar porocuaita rese avei acoi apóstol pe mbohe vahecuer yuvireco.

<sup>3</sup>Peicua ranera co ari imombehupri ipa vahe virovise, oimera ava ahe oviroñrora co tecocuer aviye vahe Tüpa suindar güemimbotarai pipe yuvireco <sup>4</sup>aipo ehira, “¿Marase tēi vo aipo oura Tüpa Rembiporavo imombehupri ou vaherã curi? Esepia, yande ramoi opa tēi omano yuvireco. Cūrtei opacatu ahe tupriño tēi tecocuer aracahe ivi apo suive” ehi tēira yuvireco. <sup>5</sup>Ahe nimahenduha potai yuvireco co aracadendar rese. Esepia, Tüpa oyapo oñehe pipe iva, ivi avei, ahe ivi osë vahe i sui, i pãhuve avei secoi. <sup>6</sup>Coïye i pipe avei opa omocañi ivi, ombouse amarusu aracahe. <sup>7</sup>Cūrteindar rumo iva, ivi imoingatupri tata uve nara Tüpa porocuaita rupi. Evocoi tata pipe avei ocañi tēira ava mbahe tēi aposar yuvirecoi vahe curi.

<sup>8</sup>Che rivireta, che rembiaisu, peresarai rene co mbahe sui: yande Yar upe ñepei ari inungar mil araviter; mil araviter evocoiyase inungar ñepei arimi tēi chupe. <sup>9</sup>Esepia, yande Yar ndiaracahei eté oñehe mboaviye ägua; inungar amove ava, “Iharacahe tēi” ehi yuvireco viña. Ahe rumo



aviye etepri güeco mbegüesa pipe yandeu. Esepia, ndoipotai que ñepi yepe yande cañi tēi āgua; ahe rumo oipota opacatú tupri ité yande recocuer ñecuñaro āgua.

<sup>10</sup> Yande Yar ari yande resapiha tēira inungar imonda rai vahe ou p̄itu pipe yepi. Ahesē iva ocañi tupri tēira viapugüer ip̄irata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

<sup>11</sup> Opacatu ité niha co mbahe yapopri ocañi tēi vaherā. Sese, jpeyemoviracuaño itera pe reco maranehisa rese Tūpa rese pe pihañemoñetasa pipe! <sup>12</sup> Pesāroño Tūpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pipe iva opara ocañi tēi eté tata pipe. Ipipe sui opacatu mbahe yapopri ticupa tuprira curi. <sup>13</sup> Yande rumo yasāro ité iva, ivi ip̄iasu vahe Tūpa remimombehu. Aheve opacatu ava yuvirecoira güeco aviyesa pipe.

<sup>14</sup> Sese che rembiaisu, pesāro viteseve co tecocuer, ēgüe peyera opacatu peicatugüer rupi pe reco tupri āgua pe angaipāēhi pipe, p̄eu Tūpa, “Peyavi mbahe” ehiēhi āgua. <sup>15</sup> Tapeicua co: yande Yar seco mbegüe yandeu yande p̄isiro āgua. Ēgüe ehi avei yande rembiaisu Pablo icuachía oyeupe Tūpa ombou vahe mbahecuasa pipe p̄eu. <sup>16</sup> Opacatu ocuachiar pipe omombehu evocoi nungar mbahe p̄eu, yepe amove yavai senducua āgua yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tēi virova ñehesa, inungar oyapo ambuae ñehesa icuachiapri Tūpa suindar rese. Ipipe güecocuer omocañi tēi ahe.

<sup>17</sup> Che rivri, che rembiaisu, peicua ité niha evocoi mbahe; sese peñearo tuprira pe yembopa ucaēhi āgua ava ndiporeroyai vahe upe Tūpa rese pe recocuer yemoviracuasa sui pe yepepiēhi āgua. <sup>18</sup> Peicua tupri catura rumo yande Yar Porop̄isirosar Jesucristo iyavei peicoveño itera iporovasasa pipe. ¡Ēgüe tehi imboeteipri tasecoi cūrtei apirēhi vaherā! Aipo rupive che ñehē p̄eu.

## JUAN REMBICUACHIA YIPINDAR VAHE SAN JUAN

### *Ñehesa tecovesa resendar*

<sup>1</sup> Co cuachiar pipe oromombehu pëu co yipisuive secoi vahe. Ahe orosendu, orosepia avei ore resa pipe ité iyavei oropoco ité sese. Ahe niha Tüpa Ñehesa tecovesa resendar. <sup>2</sup> Co tecovesa oyemboyecua, orosepia iyavei ahe secocuer oromombehu. Ahe tecovesa apirëhi oromombehu vahe pëu. Ahe Vu rese secoi vahe oyemboyecua vahe oreu. <sup>3</sup> Oromombehu co orosepia vahe, orosendu vahe ñepeí vahe nungar pe reco ãgua ore rese inungar ore oroico yande Ru Tüpa rese, Tahir Jesucristo rese avei. <sup>4</sup> Evocoyase cüritei oroicuachía evocoi mbahe pëu yande yembovharete catu ãgua.

### *Tüpa tesapesa secoi*

<sup>5</sup> Iyavei Jesucristo ore mbohe co ñehesa rese, ahe oromombehu pëu: yande Ru Tüpa niha tesapesa secoi; ndipoi eté pítumimbisa sese. <sup>6</sup> “Che aico tupri Tüpa rese” yahese, yaicoño rumo angaipa pipe, ahe inungar pítumimbi vahe, ahese yande remira tēi iyavei ndayayapoi mbahe supi tupri vahe. <sup>7</sup> Yaicose rumo tesapesa pipe inungar yande Ru Tüpa secoi tesapesa, evocoyase yaico tupri yandeyeupe. Iyavei suvi yande moatiro opacatu angaipa sui.

<sup>8</sup> Iyavei, “Ndarecoi angaipa che piha pipe” vahe tēise, yande ae yayembopa ipipe. Evocoyase mbahe supi eté vahe ndayarecoi yandeyese. <sup>9</sup> Acoi yamombehuse yande angaipagüer Tüpa upe, ahese ahe omboura oñeroisa yande angaipa rese yandeu iyavei omoatirora opacatu mbahe mbahe tēi yande sui. Esepia, ahe seco ívi vahe. <sup>10</sup> Iyavei, “Che ndache angaipai eté” vahe tupri tēise yaico, evocoyase Tüpa semirañete ai vahe nungar yareco. Ipipe ndayaroyai ñehengagüer.

## 2

### *Jesucristo yande reco moingatusar*

<sup>1</sup> Che rahireta, co aicuachía pëu pe angaipaēhi ãgua. Que revo ava oime oyemboangaipa vahe pe pãhuve, yareco rumo yande Pítivisar yande Ru rovai. Ahe Jesucristo, seco ívi vahe. <sup>2</sup> Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi ãgua yande sui.

<sup>3</sup> Acoi yayapo tuprise Tüpa porocuaíta, ahese supi eté yaicua Tüpa. <sup>4</sup> Oime amove ava “che aicua Tüpa” ehi vahe; nomboaviyei rumo iporocuaíta. Ahe semirañete ai vahe, ndovirecoi mbahe supi tupri vahe oyese. <sup>5</sup> Acoi yamboaviyese ñehengagüer, ahese supi eté yasaisu Tüpa. Ipipe sui yaicua yande reco tupri Jesucristo rese. <sup>6</sup> Acoi “aico tupri Tüpa rese” ehi vahe, ahe secoira Jesucristo nungar.

### *Mborocuaíta ipiasu vahe resendar*

<sup>7</sup> Iyavei, che rivireta, ndaicuachiai mborocuaíta ambuae ipiasu vahe pëu. Aheño ité mborocuaíta pereco vahe yipisuive. Ahe acoi yipindar pesendu vahe. <sup>8</sup> Co aicuachía vahe rumo ogüeru mborocuaíta ipiasu

vahe. Ahe supi eté tesapesa Jesucristo vireco vahe iyavei pereco vahe avei. Esepia, pĩtumimbi opara. Tesapesa evocoiyase osesape.

<sup>9</sup> Oime amove ava “che aico tesapesave” ehi angahu tẽi vahe; oyamotarẽhiño rumo ambuae omboetasa Tũpa reroyasar. Evocoi nungar recocer pĩtumimbisave tẽi vite. <sup>10</sup> Acoi osaisu vahe ambuae omboetasa Tũpa reroyasar, ahe secõi tesapesave. Sese nomboangaipa ucai omboetasa. <sup>11</sup> Acoi ndoyambotai vahe omboetasa, pĩtumimbisa pipe tẽi secõi, ndoicuai avei que rupi güecocuer virecora. Esepia, pĩtumimbi vahe nomboesapisoi.

<sup>12</sup> Che rahireta, co aicuachía pẽu nara. Esepia, Tũpa iñero pe angaipa rese pẽu Jesucristo recocuer pipe. <sup>13</sup> Pe, yesupa peico vahe upe co aicuachía. Esepia, peicua yipisuive oicove vahe. Aicuachía avei pẽu, mbia chĩhivahe. Esepia, pesecopi Carugar. <sup>14</sup> Iyavei pe tahireta aicuachía opacatu pẽu. Esepia, peicua vahe niha yande Ru Tũpa. Aicuachía avei pẽu, pe iyepupa. Esepia, peicua yipisuive oicove vahe. Aicuachía avei pẽu, mbia chĩhivahe. Esepia, peyemoviracua etepri, peipisi avei Tũpa Ñehengagüer pe piha pipe. Ipipe pesecopi Carugar.

<sup>15</sup> Evocoiyase pesaisu eme co mbahe tẽi ivi pipendar. Acoi ava co mbahe tẽi osaisu vahe, ahe ndosaisui yande Ru Tũpa yuvireco. <sup>16</sup> Esepia, opacatu co mbahe tẽi ndahei yande Ru Tũpa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tẽisa. <sup>17</sup> Co ivi pipendar mbahe tẽi iyavei ava mbahe pota raisa opa pota ité ocañi. Acoi ava oyapo vahe rumo Tũpa remimbotar, yuvirecoira apirẽhi vaherã ité.

*Mbahe supi eté vahe iyavei mbahe ndahei vahe supi*

<sup>18</sup> Che rahireta, co ari ipa vahe ité yandeu. Iyavei acoi pesendu “oura Jesucristo amotarẽhimbar” ehi vahe, ahe cũritei setá oyemboyecua yamotarẽhimbar yuvireco. Sese yaicua ari ipa vahe yepota ägua. <sup>19</sup> Ahe oyepepi yande pãhu sui; ndahei eté rumo yande rivri yuvireco Tũpa rese. Esepia, acoi yande rivri itese, ahese opitara yande piri yuvireco viña. Ëgüe ehi oyecua ndahei opacatu yande rivri yuvirecoi.

<sup>20</sup> Cristo omondo Espiritu Santo pẽu. Sese opacatu pe peicua mbahe supi tupri vahe. <sup>21</sup> Pe niha peicua co mbahe supi eté vahe. Sese aicuachía co pẽu. Esepia, mbahe supi eté vahe sui ndoui temira. <sup>22</sup> Acoi “Jesús ndahei Poropisirosar imboupri” ehi vahe, ahe semira tẽi vahe, yamotarẽhimbar yuvirecoi. Ahe niha ndoviroyai Tu, Tahir avei yuvireco. <sup>23</sup> Acoi ava “evocoi ndahei Tũpa Rahir” ehi vahe, ndovirecoi Tu oyese yuvireco. Acoi “evocoi niha Tũpa rahir” ehi vahe rumo, ahe vireco yande Ru Tũpa oyese yuvireco.

<sup>24</sup> Sese yipisuive pesendu vahe ñehesa peyapocatu pe piha pipe. Ëgüe peyese, ahese peico tuprira Jesucristo rese, Tu rese avei. <sup>25</sup> Esepia, Jesucristo aipo ehi: “Pe perecora co tecovesa apirẽhi vahe peyese” ehi yandeu.

<sup>26</sup> Sese co ava pembopa pota vahe resendar aicuachía pẽu. <sup>27</sup> Pe pereco Espiritu Santo Jesucristo ombou vahe pẽu. Sese ndiyai eté ambuae pe mbohera. Espiritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espiritu Santo pe mbohesa rupi.

<sup>28</sup> Iyavei che rahireta, peicoño ité Cristo rese yareco vaherã sese yande yeroyasa. Acoi ogüeyise iva sui curi, ahese nayachĩ chietera sovai ichui. <sup>29</sup> Pe niha peicua Jesucristo seco ñvi vahe. Iya peicua avei opacatu oyapo vahe mbahe ihĩvi vahe, ahe Tũpa rahir ité yuvirecoi.

### 3

#### *Tũpa rahir yuvirecoi vahe*

<sup>1</sup> Mara ehi rutei Tũpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tũpa, ndoicatu ité yande recocuer cua ãgua. Esepia, ndoicuai Tũpa recocuer yuvireco. <sup>2</sup> Che rivireta, yaico ité Tũpa rahir. Yande rumo ndayaicua tupri vitei yande reco ãgua ipare. Cũritei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve. <sup>3</sup> Iyavei opacatu osãro vahe Jesucristo yuvireco, oyepepiño ité opacatu angaipa sui güeco catupri ãgua, inungar ahe secui.

<sup>4</sup> Opacatu ava oyemboangaipa vahe, ahe oyavi Tũpa porocuaita. Esepia, angaipa Tũpa porocuaita mboaviyeẽhisa yepi. <sup>5</sup> Pe rumo peicua Jesucristo ou co ivi pipe yande angaipagüer mocañi ãgua. Ahe niha ndovirecoi eté angaipa oyese. <sup>6</sup> Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiai, ndoicuai avei secocuer yuvireco. <sup>7</sup> Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. <sup>8</sup> Acoi oyapo vahe angaipa, ahe Carugar suindar. Esepia, Carugar yipisuive ité oyapo angaipa. Sese ou Tũpa Rahir Carugar rembiapo mocañipa ãgua.

<sup>9</sup> Opacatu yuvirecoi vahe Tũpa rese ndoyapoi angaipa. Esepia, ahe vireco ité Tũpa recocuer oyese yuvireco. Sese ndoicatu iri angaipa apo ãgua yuvireco. Esepia, ahe Tũpa rahir ité yuvirecoi. <sup>10</sup> Icuapri ité Tũpa rahir yuvireco, icuapri avei Carugar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tũpa reroyasar, ahe ndahei eté Tũpa rahir yuvirecoi.

#### *Yayeaısura ñepeipei yande yacatu*

<sup>11</sup> Co niha ñehesa, acoi pesendu vahe yipisuive, ahe co yayeaısura ñepeipei. <sup>12</sup> Ndayaicoi chira inungar Caın, ahe Carugar remimbohe oyuca vivri. ¿Mahera pĩha oyuca? Esepia, tivri oyapo mbahe aviye vahe; Caın rumo oyapo mbahe naporai vahe.

<sup>13</sup> Che rivireta, pepihañemoñetai rene Tũpa ndoicuai vahe pe reroĩrose yuvireco. <sup>14</sup> Yande rumo yaicua aracacondar yande hã cañi tẽi agüer. Cũritei rumo yasẽ evocoi nungar sui tecovesa apirẽhi vahe pipe yande reco ãgua. Esepia, yande niha yasaisu yande rivireta Tũpa rese yuvirecoi vahe. Acoi ndosaisui vahe rumo ahe ihã ocañi tẽi vite ité yuvireco. <sup>15</sup> Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirẽhi vahe oyese. <sup>16</sup> Jesucristo niha omondo güecocuer manosave yande recocuer repirã. Ichui yande yaicua poroaisusa. Sese yande avei egüe tayahe yande rivireta rese. <sup>17</sup> Acoi ava vireco tẽi vahe mbahe eta oyeupe nara, osepiaño tẽi rumo vivri upe mbahe ipane vahe, iyavei ndoipitivi, ahe ndovirecoi Tũpa poroaisusa oyese yuvireco. <sup>18</sup> Che

rahireta, yande poroaisusa rumo ndahei chira yande ñehe pipe tēi, iyacatu rumo yamboyecua mbahe yande rembiapo pipe.

*Yande yeroyasa yareco vahe Tūpa rovai*

<sup>19-20</sup> Ēgüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pihañemoñetasa sui. Ahe opacatu mbahe oicua.” Sese yayeroyara. <sup>21</sup> Supi eté che rivireta, yaicua itese yande pihá pipe yande reco tupri Tūpa rese, ahese yayeroyaña itera sovai. <sup>22</sup> Ahe avei niha ombou opacatu mbahe yandeu yaporanduse chupe. Esepia, yamboyeroya iporocuaíta iyavei yayapo semimbotar yaico. <sup>23</sup> Co ité iporocuaíta: yaroyara Tahir Jesucristo iyavei yayeaisura ñepeí-peí Tūpa yande cuaisa rupi tupri. <sup>24</sup> Acoi yaroyase iporocuaíta, ahese yaicora Tūpa rese; ahe avei secoira yande rese. Iyavei ahe ombou Espiritu yandeu. Ichui yaicua Tūpa secoi yande rese.

## 4

*Espiritu Tūpa suindar iyavei espíritu Cristo amotarēhimbar*

<sup>1</sup> Che rahireta, aní chira peroya opacatu “Espiritu pipe añehe” ehi vahe. Iyacatu rumo pesãha rane ‘¿Tūpa suindar ité pihá?’ pe hesa pipe. Esepia, setá vai oporombohe angahu tēi vahe oguata opacatu ivi rupi yuvireco. <sup>2</sup> Co rese peicuara ava Espiritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espiritu Tūpa suindar ité. <sup>3</sup> Acoi aipo ndehi vahe rumo, ndovirecoi eté Espiritu Tūpa suindar oyese. Ahe rumo vireco espíritu Cristo amotarēhimbar tēi. Aracaco niha pesendu ñehesa acoi yamotarēhisar espíritu ou vaherã resendar. Ahe cūrítei secoi co ivi pipe.

<sup>4</sup> Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espiritu secoi vahe pe rese, ahe ipĩrata catu Carugar sui. <sup>5</sup> Evocoi co ivi pipendar tēi yuvirecoi vahe. Esepia, oñehe mbahe ivi pipendar rese tēi yuvireco. Iyavei ava supindar ae ité oyapisaca ñehe rese yuvireco. <sup>6</sup> Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicuara vireco vahe Espiritu supi eté vahe, yaicua aveira vireco vahe espíritu oporombopa tēi vahe.

*Tūpa oporoaisu vahe*

<sup>7</sup> Che rivireta, che rembiaisu, yayeaisu ñepeí-peí. Esepia, yeaisusa Tūpa suindar. Opacatu osaisu vahe ava, ahe Tūpa rahir, oicua ité avei Tūpa yuvireco. <sup>8</sup> Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa secoi. <sup>9</sup> Ēgüe ehi omboyecua oporoaisusa yandeu. Ahe niha, ombou Guahir ñepeí vahe co ivi pipe ichui yande recove água. <sup>10</sup> Ndahei yande rane yasaisu Tūpa. Ahe rane rumo yande raisu iyavei ombou Guahir imano água yande angaipa repirã. Ahe niha poroaisusa supi eté vahe.

<sup>11</sup> Che rivireta, che rembiaisu, ěgüe ehi Tūpa yande raisu. Evocoiyase ěgüe yahe aveira yande yayeaisu ñepeí-peí yepi. <sup>12</sup> Ndipoi eté ava osepia vahe Tūpa. Yayeaisuse rumo, Tūpa secoi yande rese. Iporoaisusa evocoiyase oime ité yande rese. <sup>13</sup> Ahe ombou oEspiritu yandeu; ipipe

sui yaicua sese yande reco iyavei yaicua ahe secoise yande rese. <sup>14</sup>Iyavei orosepia vahe, oromombehu: yande Ru ombou Guahir ava ivi pipendar pĩsĩro āgua. <sup>15</sup>Acoi ava “Jesús niha Tūpa Rahir” ehi vahe, ahe secói eté Tūpa rese; Tūpa evocoiyase secói sese.

<sup>16</sup>Ēgüe yahe icua, seroya tupri āgua co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secói sese. <sup>17</sup>Ēgüe yahe Tūpa poroaisusa mboaviye tupri ichui yande siquiyeēhi āgua acoi oyepotase ari cañi yandeu. Esepia, yande yaico co ivi pipe inungar Jesucristo. <sup>18</sup>Yasaisu tupri itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tuprii eté.

<sup>19</sup>Yipindar Tūpa yande raisu. Sese cūrítei yande avei yasaisu Tūpa. <sup>20</sup>Amove ava aipo ehi tēi: “Che asaisu Tūpa” ehi. Ahe ramoseve rumo viroĩro omboetasa Tūpa reroyasar. Evocoiyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatui Tūpa ndayasepiái vahe raisu āgua. <sup>21</sup>Jesucristo ombou co porocuita yandeu: acoi osaisu vahe Tūpa, tosaisu avei omboetasa seroyasar yuvireco.

## 5

### *Yande mbahe-mbahe tēi co ivi pipendar recopisa*

<sup>1</sup>Opacatu viroya vahe Jesús Tūpa Rembiporavo Poropĩsĩrosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco. <sup>2</sup>Yande yasaisuse Tūpa, yayapose avei iporocuita, ahese yaicua yasaisu avei ava Tūpa rahir yuvirecoi vahe. <sup>3</sup>Yamboaviyese Tūpa porocuita, ahese yamboyecua Tūpa raisusa yaico. Iyavei iporocuita ndahei yavai etepri yapo āgua. <sup>4</sup>Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese yeroyasa pipe yuvireco. <sup>5</sup>Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi āgua yuvireco.

### *Tūpa rahir recouer resendar ñehesa*

<sup>6</sup>Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espiritu avei osecó mombehu. Esepia, ahe omombehu mbahe supi eté vahe yepi. <sup>7</sup>Evocoiyase oime mbosapĩ imboyecusar: <sup>8</sup>Espiritu, i, iyavei suvi. Ahe mbosapĩ oyoya tupri. <sup>9</sup>Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu. <sup>10</sup>Acoi viroya vahe Tūpa Rahir vireco ité ahe semimombehu opiha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehé Tahir resendar. <sup>11</sup>Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese secói. <sup>12</sup>Acoi oipisi vahe Tūpa Rahir opiha pipe, ahe vireco avei co tecovesa. Acoi ndoipisii vahe rumo, ndovirecoi eté tecovesa oyese.

### *Poromboaracuasa ipa vahe*

<sup>13</sup>Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēhi.

<sup>14</sup>Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehé osendu. <sup>15</sup>Evocoiyase

yaicuase ahe osendu yande yeruresa, yaicua avei mbahe yande porandusa ombou vaheřã yandeu.

<sup>16</sup> Acoi osepia vahe yande mboetasa Tũpa reroyasar oyemboangaipa vahe, ahe rumo ndahei manosave nara, oyerquirã sese. Evocoyase Tũpa omondora secove ãgua chupe. Oime rumo angaipa ahe gũeru manosa. Che, “Peyeroqui evocoi nungar angaipa rese” ndahei pũ. <sup>17</sup> Opacatu mbahe-mbahe tẽi ahe angaipa. Oime rumo angaipa ndayande rerasoi vahe manosave.

<sup>18</sup> Yaicua Tũpa rahir ndoyapoi angaipa yuvireco. Esepia, Tahir osãro evocoi nungar. Ichui Carugar ndopocoi sese. <sup>19</sup> Sese yaicua yande Tũpa rahir yaico. Iyavei opacatu ava ndoviroyai vahe Tũpa, ahe Carugar povri pendar tẽi yuvirecoi. <sup>20</sup> Iyavei yaicua Tũpa Rahir ogũeru oaracuasa yandeu Tũpa supi eté vahe cua ãgua iyavei yaico co supi eté vahe rese. Ahe niha Tahir Jesucristo, ahe avei Tũpa supi eté vahe iyavei tecovesa apirẽhi vahe. <sup>21</sup> Che rahireta, peñearo tupri tũpa angahu tẽi sui. Aipo rupive co che ñehesa amombehu pũ.

## IMON̄UV̄RIOSA JUAN REMBICUACHIA SAN JUAN

*Mbahe sup̄i eté vahe iyavei yeaisusa*

<sup>1</sup> Che, icuai pri, aicuachía co che ñehe p̄u pe T̄upa rembiporavo pe-ico vahe opacatu eipeve peico vahe upe. Che niha sup̄i eté opoaisu. Ndahei rumo che güeraño opoaisu, opacatu oicua vahe porombohesa sup̄i eté vahe avei pe raisu yuvireco. <sup>2</sup> Opoaisu ité mbahe sup̄i eté vahe yande piha pipe yareco vahe rese. Ahe ndopai chivaherã ité. <sup>3</sup> Yande Ru T̄upa, yande Yar Jesucristo, T̄upa Rahir, tombou oporovasasa, oporoparaisuerecosa p̄u nara. Tombou avei güeco tuprisa, güeco sup̄i eté vahe pipe oporoaisusa pipe avei p̄u.

<sup>4</sup> Che mboviharete aicuase pe p̄ahu pendar yuvirecoi vahe güecocuer aviyesa pipe. Esepia, ahe viroya porombohesa sup̄i eté vahe yuvireco. Ahe niha yande Ru T̄upa porocuita yandeu. <sup>5</sup> Iyavei, che rivireta, che rembiaisu, tayayeaisu catu ñepeipei. Co aicuachía vahe ndahei porocuita ipiasu vahe. Ahe niha acoi yipindar icuachiapri p̄u. <sup>6</sup> Co yande yeaisusa, yande guata tupri ñgua T̄upa porocuita rupi. Co T̄upa porocuita yipisuive pesendu vahe, ahe omombehu yande yeaisu tupri ñgua yandeu.

*Iporombopa serai vahe resendar*

<sup>7</sup> Setá vai uguata ivi yacatu rupi oporombopa t̄ei vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa t̄ei vahe Jesucristo amotar̄himbar yuvirecoi. <sup>8</sup> Peñearo catu pe poraviqui repri mocañi t̄eiñhi ñgua. Tapeipisi catu opacatu T̄upa porerecosa peyeupe nara.

<sup>9</sup> Oime ava oyepepiño vahe Cristo porombohesa sui. Ahe T̄upa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco T̄upa, Tahir avei oyese. <sup>10</sup> Acoi oyepotase ava oporombopa t̄ei vahe p̄u, ndovirecoi vahe co porombohesa, ndapeipisii chira pe r̄etave. Iyavei ndapemboaviravei chiaveira. <sup>11</sup> Acoi pemboaviravese, pe avei pehara sembiapo pipe.

*Ñehesa ipa vahe*

<sup>12</sup> Che niha amombehu pota setá mbahe p̄u. Namombehu potai rumo cuachiar pipe. Che teieté aso pota p̄u che ñehe ñgua. Ahese yayemboviharetera oyese.

<sup>13</sup> Iyavei T̄upa rembiporavo oñemonuha vahe cohava opacatu omondo omahenduhasa yuvireco p̄u. Aipo rupive co che ñehesa amondo p̄u.



## IMOMBOSAPI SA JUAN REMBICUACHIA SAN JUAN

### *Gayo recocuer aviye vahe resendar*

<sup>1</sup> Che, icuaipri, aicuachía co che ñehe ndeu, che mboripar, che rembiaisu, Gayo. Che supi eté oroaisu yepi.

<sup>2</sup> Che rembiaisu, che rivri, cūrítei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo eme mbaherasisa ndeu. <sup>3</sup> Che aviharete asenduse yande rivri ñehe nde recocuer resendar yugūeruse cohava. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu. <sup>4</sup> Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

<sup>5</sup> Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei. <sup>6</sup> Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipitívii catu chupe mbahe ipane vahe rese iguataño āgua Tūpa remimbotar rupi yuvireco. <sup>7</sup> Esepia, ahe uguata yuvireco Jesucristo rer pipe. Ndoipisii eté rumo mbahe ipane vahe opitívii āgua yuvireco ava Tūpa reroyasarēhi sui. <sup>8</sup> Sese yande ēgüe yahera yaico evocoi nungar upe ñehesa supi eté vahe rese ipitívii āgua.

### *Diótrfes recocuerai iyavei Demetrio recocuer aviyesa*

<sup>9</sup> Che aicuachía che ñehe eipeve Tūpa upe oñemonuha vahe upe cuese. Diótrfes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve. <sup>10</sup> Evocoiyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güetave yande rivireta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui. <sup>11</sup> Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

<sup>12</sup> Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

### *Ñehesa ipa vahe*

<sup>13</sup> Che niha amombehu pota setá mbahe ndeu. Namombehu potai rumo cuachiar pipe tēi ndeu. <sup>14</sup> Esepia, aso pota ité nde repia. Ahese voi yañemofñetara oyeovai eté.

<sup>15</sup> Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepeipei yande mboripareta upe eipeve. Aipo rupive.

## JUDAS REMBICUACHIA SAN JUDAS

*Judas mahenduhasa Jesús reroyasar upe*

<sup>1</sup> Che, Judas, aico Jesucristo rembiguai, Santiago rivi. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui. <sup>2</sup> Tüpa tombou catu pëu pe paraisuerecosa pe reco tupri ägua pe raisusa pipe.

*Oporombohe vahe ava mbopa tēi ägua resendar*

<sup>3</sup> Che rivieta, che rembiaisu, yipindar chepihañemoñeta ité yande pĩsirosa resendar cuachía ägua pëu viña. Ipore rumo chepihañemoñeta iri: iyaño revo che aicuachía pe yemoviracua tupri catu ägua yembohesa yaroya vahe rese. Ahe yembohesa yaroya vahe ñepeí reseve imondopri opacatu yandeu Jesucristo rese yaico vahe. <sup>4</sup> Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepeí vahe upe yuvireco.

<sup>5</sup> Che opomomahenduha pota iri acoi peicua tupri vahe rese. Yipindar yande Yar Tüpa vinose yande ramoi eta Egipto sui. Ipore rumo opa omocañi viroyasarēhi. <sup>6</sup> Inungar avei Tüpa rembiguai yipindar vahe yuvirecoi, nomboaviyei vahe ocuaita. Ipipe sui Tüpa osoquenda pĩtumimbi ndopai vahesave ari cañise nara.

<sup>7</sup> Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasa-guasa tēi ägua yuvireco. Iyavei cuimbahe, cuimbahe rese; cuña, cuña rese no. Ipipe sui oiporara tata guasu apirēhi vahe yuvireco. Ahe opita opacatu yande yembosiquiye ägua.

<sup>8</sup> Eñgüe ehi avei niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe iva pendar rese yuvireco. <sup>9</sup> Aracahe Tüpa rembiguai ivate vahe Miguel oyepoepi-epi Carugar rese yuvireco Moisés retecuer rese. Yepe ahe Tüpa rembiguai rerecuar viña, ndiyai rumo chupe iñehe mara ägua Carugar upe. Evocoyase aipo ehi chupe: “¡Tüpa oicuara co rese ndeul!” ehiño. <sup>10</sup> Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ägua tēi.

<sup>11</sup> ¡iparaisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano opereroyañehisa pipe.

<sup>12</sup> Pe peñemonuhase pe yeaisusa pipe pe caru ägua, ahese ahe avei yuviroique pe pãhuve; noyuvinochi eté ocaru ägua pe piri. Ndapeicuai

rumo ahe pe recocuer monguiha ãgua tẽi yuviroique vahe pe pãhuve. Evocoi inungar ovesa rãrosar oyese tẽi ihañeco vahe yuvireco. Iyavei ahe inungar iva quiha ndovirecoi vahe i, ivitu remimombo tẽi. Ahe avei inungar ivira ndihai vahe ohasa rupi, ipiru vahe, evocoyase ahe sapohopri. <sup>13</sup> Inungar avei acoi iai pipe itu omombo tiyui vahe oyesui yepi. Ëgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tẽi oso pĩtumimbisave, ãgüe ehi aveira ava Tũpa sui oyepepi vahe pĩtumimbisa apirẽhive secocuer yuvirecoi.

<sup>14</sup> Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehii reseve <sup>15</sup> opacatu ava recoãha ãgua iyavei icañi mombehu ãgua opacatu mbahe-mbahe tẽi aposar upe, opacatu oñehe-ñehe tẽi yamotarẽhisave yuvirecoi vahe upe avei” ehi. <sup>16</sup> Ahe mbia niha oporoviroĩro yuvireco. Iyavei oseca oyeupe nara mbahe güemimbotar tẽi apo ãgua. Ahe oyemboivate ai vahe oñehe pipe tẽi yuvireco. Iyavei oñehe tupri ai angahu tẽi ambuae ava upe imbahe rerocua ãgua ichui.

#### *Jesús reroyasar upendar poromboaracuasa*

<sup>17</sup> Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese <sup>18</sup> aipo ehi vahe: “Co ari cañi renonde oimera ava viroĩro ai vahe Tũpa rembiapo yuvireco. Iyavei oyapoño itera güemimbotarai yuvireco” ehi vahe. <sup>19</sup> Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar tẽi vireco vahe. Ahe niha ndovirecoi Tũpa Espiritu yuvireco.

<sup>20</sup> Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espiritu Santo pe rãrosa pipe. <sup>21</sup> Peñearo tupri Tũpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

<sup>22</sup> Pesaisu ava ndoviroya tupri vahe Jesús. <sup>23</sup> Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepe i yangaipa pipe pe viapiẽhi ãgua.

#### *Tũpa mboetei tuprisa*

<sup>24-25</sup> Tũpa yande Pĩsirosar ñepe vahe vireco pĩratasa pe rãro angaipa pipe pe viapiẽhi ãgua. Ahe avei pe rerecora güecocuer porañetesave pe reco angaipaẽhisa pipe. Ichui peicora pe viharetesa pipe. Ahe imboeteipri tasecoi. Ëgüe tehi timboyeroyasa seco pĩratasa iyavei imborerecuasa yande Yar Jesucristo sui, yipisui, cūrítei apirẽhi vaherã.

## TŪPA REMIMBOYECUA JUAN UPE APOCALIPSIS

*Jesucristo yemoporēhisa*

<sup>1</sup> Che, Juan, aicuachía mbahe imboaviye pihaiVIPirā pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca āgua güembigui che recose cheu. <sup>2</sup> Che supi eté amombehu opacatu mbahe asepiā vahecuer iyavei amombehu evocoi Tūpa Ñehengagüer acoi Jesucristo oicua uca tupri vahe mbahe supi eté vahe.

<sup>3</sup> Sorivete catura acoi ava oyerōqui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovī ité yandeu.

*Juan oicuachía siete tecua pendar Jesús reroyasar ñemonuhasa upe*

<sup>4</sup> Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūrteindar apirēhi vahe avei; siete espíritu suindar avei no, ahe senda rovai yuvinohai vahe, <sup>5</sup> iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevī vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande pīsīro yande angaipa sui vuvī pipe, <sup>6</sup> iyavei yande rereco mborerecuarā, pahiguā avei no Vu Tūpa upe yande poraviqui āgua. ¡Ēgüe tehi imboeteipri tasecoi opīratasa pipe apirēhi vaheerā!

<sup>7</sup> ¡Esepia, Cristo iva quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pipendar ahese oyaseho tēira yuvireco sepiase.

Ēgüe ehi etera curi.

<sup>8</sup> “Che aico yipindar iyavei ipandar” aipo ehi yande Yar Tūpa opacatu mbahe mboavaisarēhi evocoi yipivé vahe ité, cūrteindar apirēhi vahe avei.

*Juan osepiā oquer nungar pipe Jesucristo porañetesa*

<sup>9</sup> Che, Juan, pe riquehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pipe. Chē roquendasa vichico caha pāhumi para guasu aviterve Patmos serer vahesave Tūpa Ñehengagüer mombehusa pipe sui tēi, Jesucristo recocuer mombehusa pipe sui tēi avei no. <sup>10</sup> Acoi yande Yar ari pipe Espíritu povrive aicose, asendu che raquicuei oñehe pīrata vahe aviye acoi mimbī ñehe <sup>11</sup> aipo ehi: “Eicuachía mbahe eresepia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

<sup>12</sup> Che evocoiyase ayemboyere sese ‘¿ava pīha oñehe cheu?’ che yapave. Ahese asepiā siete tupri vera hi oro apopri, <sup>13</sup> iyavei asepiā ipāhuve mbia aviye tupri ava ité viña, iturucuar pucucuer ipi rupi tupri ité sese,

sumbicusasa evocoyase oro apopri ipochiha rupi tupri ité oyepota. <sup>14</sup> Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoyase aviye tupri ité tata rendigüer. <sup>15</sup> Ipi evocoyase sendi yai eté, aviye acoi bronco ocai vahe horno pipe, iyavei ñehe ipiratá iteanga inungar itu riapugüer. <sup>16</sup> Oacato coti vireco siete tupri yasitata, iyavei iyuru sui osẽ quise pucu saimbe yoya vahe. Sovo evocoyase aviye ari rendigüer ipiratá vahe.

<sup>17</sup> Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar ité aico, ipandar avei. <sup>18</sup> Aicove vahe ité; yepe amano viña, cūrítei rumo aicove iri ndopai chivaherã ité aico. Che areco che mborerecuasa ava recocuer mocañi ãgua. <sup>19</sup> Sese eicuachía co mbahe eresepia vahe: cūríteindar oime vahe mbahe iyavei mbahe oime vaherã curi. <sup>20</sup> Co acoi ndereicuai vahe eresepia vahe siete yasitata che acato coti, ahe yuvirecoi Tũpa rembiguai siete tecua rupindar che reroyasar rãrosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

## 2

*Ñehesa siete tupri tecua-tecua pendar Jesús reroyasar upe. Ñehesa Efeso pendar upe*

<sup>1</sup> “Eicuachía Tũpa rembiguai Efeso pendar che reroyasar rãrosar upe: ‘Acoi vireco vahe oacato coti siete yasitata, ahe acoi uguata vahe siete vera hi yacatu rupi, aipo ehi imombehu: <sup>2</sup> Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vaherã. Pesecoãha avei ava, ore apóstol oroico, ehi tẽi vahe; ipare peicua iporombopa tẽisa yuvireco. <sup>3</sup> Che aicua peñemosañõ peyemombaraisu peico che raĩsupave; ndapecuerai eté ipipe. <sup>4</sup> Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar. <sup>5</sup> Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tũpa upe; peyeaisu iri catu inungar yipindar. Anise ayevira pẽu, arocuapara pe vera hi senda sui acoi ndapeyeviise Tũpa upe. <sup>6</sup> Co rumo mbahe pe rembiapo aviye cheu: ndapeipotaise nicolaitas rembiapo mbahe. Che avei niha ndaipotai eté. <sup>7</sup> ¡Acoi osendu pota vahe, toyapisacañõ Espĩritu omombehu vahe rese opacatu che reroyasar upe! Acoi oyemoviracua vahe mbahe-mbahe tẽi apoẽhi ãgua, itohu amõndora ivira ha tecoveasa resendar oime vahe teco orisave che Ru pĩri, ehi’ erera icuachía chupe.

*Ñehesa Esmirna pendar upe*

<sup>8</sup> “Eicuachía avei Tũpa rembiguai Esmirna pendar che reroyasareta rãrosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pẽu aipo ehi: <sup>9</sup> Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tẽi vahe, ore Tũpa rembiporavo judío oroico, ehi tẽi vahe. Ndahei rumo ahe yuvirecoi. Esepia, Carugar reroyasar tẽi evocoi yuvirecoi. <sup>10</sup> Ndapesiquiyei chira pe paraisu ãgua sui. Esepia, Carugar osoquenda ucara amove pe pãhu pendar secoãha ãgua; pe paraisu rane itera niha diez ari rupi peico. Acoi

peyemoviracua tuprise ité chupe, Cristo rese ité amanora, pe hesave, ahese amondora porerecosa tecovesa pëu. <sup>11</sup> ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tēi apoēhi āgua, ahe imanore ihā ndoiporarai chira imoñuviriosa manosa pipe, ehi' erera icuachía chupe.

*Ñehesa Pérgamo pendar upe*

<sup>12</sup> “Eicuachía avei Tūpa rembiguai Pérgamo pendar che reroyasareta rārosar upe: ‘Aipo ehi acoi vireco vahe quise pucu saimbe yoya vahe: <sup>13</sup> Che aicua pe recosa. Aheve acoi Carugar oguapí oī; mborerecuar guasu nungar imboyeroyapri secói. Pe rumo peyemoviracuaño ité chupe che recocer rese peico. Ndapeseyai eté che rese pe yeroyasa yepe oyuca tēi che recocer mombehu tuprisar Antipas evocói tecua Carugar recosave. <sup>14</sup> Che rumo aicua mbahe pe resendar: eipeve amove ava ndoyepépi potai eté Balaam porombohesa sui yuvireco. Ahe omboaracua Balac israelita mboangaipa uca āgua, toyuvirohuño mbahe roho seropovēhepri mbahe rahanga upendar tēi, oya, iyavei, toyemboaguasaño yuvireco, oyapave avei. <sup>15</sup> Iyavei amove ava pe pāhuve ndoyepépi potai eté nicolaíta porombohesa sui yuvireco. <sup>16</sup> Sese pemboasí pe recocerai, peyevi Tūpa upe, anise che aso poyava voira pëu, ahese avavara chupe yuvireco che yuru pipe sui osē vahe quise pucu pipe, ehi. <sup>17</sup> ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoēhi āgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oī, evocói ava oipisí vahe güeraño oicuará, ehi' erera icuachía.

*Ñehesa Tiatira pendar upe*

<sup>18</sup> “Eicuachía avei Tūpa rembiguai Tiatira pendar che reroyasareta rārosar upe: ‘Tūpa Rahír acoi vireco vahe güesa inungar tata rendigüer, ipí avei inungar acoi bronce rapípri aipo ehi imombehu: <sup>19</sup> Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracua. Aicua avei yipindar sui mbahe peyapo catú aviye vahe. <sup>20</sup> Oime rumo mbahe pe rembiavi: peñemosañó evocói cuña Jezabel pe pāhu pendar upe, ahe acoi oñehe tēi angahu vahe Tūpa rese viña. Ahe rumo ombopa tēi oporombohesa pipe che rembiguai iyemboaguasa-guasa tēi uca āgua sereco iyavei ohu uca mbahe roho mbahe rahanga tēi upe seropovēhepri yuvireco chupe. <sup>21</sup> Che amondo vite tēi arí chupe, tomboasí oangaipa Tūpa upe oyeví āgua, che yapave viña. Ahe rumo ndopoi potai eté oyemboaguasa tēisa sui. <sup>22</sup> Evocoiyase cūrítei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. <sup>23</sup> Ipare ayucapara imembri ichui. Ēgüe ehi opacatu che reroyasar oicuará yuvireco che aicua tupri ité opacatu ava pihañemoñetasa iyavei ñepeí-peí pe yacatu amondora pe rembiapogüer repri pëu. <sup>24</sup> Pe rumo opacatu Tiatira pendar ndaperoyai vahe co porombohe raisa iyavei ndapeyemboheí vahe Carugar suindar aracuasí, ndicuasí yavai vahe, ehi vahe rese, pëu ndarecoi que ambuae che porocuaíta. <sup>25</sup> Peyemoviracuañora rumo evocói mbahe pereco vahe

rese, acoi che ayevíse voi vitu curi. <sup>26</sup> Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecuar seco āgua opacatu ivi rupi <sup>27</sup> inungar che Ru ombou che mborerecuarā cheu; ēgüe ehi aveira oporocuai opacatu tecua rupi inungar acoi vara guarepochi, mbahe riapiipa uca āgua, aviyera acoi mahemoinda ñaihu apopri viña. <sup>28</sup> Iyavei amondora yasitata cōhe rerusar chupe. <sup>29</sup> ¡Acoi ava osendu pota vahe, toyapisacaño Espíritu omombehu vahe rese opacatu che reroyasar yuvirecoi vahe upe! ehi' erera icuachía.

### 3

#### *Ñehesa Sardis pendar upe*

<sup>1</sup> “Eicuachía avei Tūpa rembiguai Sardis pendar che reroyasareta rārosar upe: ‘Acoi ava vireco vahe siete tupri Tūpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tūpa upe nara, ehi pēu viña; omano vahe nungar tēi rumo peico. <sup>2</sup> Peyemopoase catu peico iyavei pemonguerēhi catu acoi viroya vite vahe. Esepia, oyepepipa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. <sup>3</sup> Peyemomahenduha acoi porombohesa peipisi vahe rese; pepoi rene ichui. Peyevi catu Tūpa upe. Ndapeyemopoaseise rumo, asora pēu inungar imonda rai vahe, ēgüe ahera vicho pe resapiha. <sup>4</sup> Oime rumo amove ava pe pāhu pendar ndoyapoi eté angaipa yuvireco, evocoyase inungar ava oguata vahe oturucuar morochi vahe rese, ēgüe ehi aveira ahe güeco maranehi pipe oguata che rupi yuvireco. Esepia, ahe chupe iya ité. <sup>5</sup> Acoi ava oyemoviracua vahe mbahe-mbahe tēi apoēhi āgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi. <sup>6</sup> ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! ehi' erera icuachía.

#### *Ñehesa Filadelfia pendar upe*

<sup>7</sup> “Eicuachía avei Tūpa rembiguai Filadelfia pendar che reroyasareta rārosar upe: ‘Co seco maranehi vahe, supi tupri vahe ité, vireco vahe mborerecuasa aracahendar mborerecuar guasu David nungar, acoi omboise que oquenda, ñepeí yepe que ava nomboyai chietera; iyavei acoi omboyase, ñepeí yepe que ava nomboi chiete aveira, ahe aipo ehi: <sup>8</sup> Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pēu pemombehu vahe rā che recouer. Ahe que ñepeí yepe ava nomboyai chietera yuvireco. Esepia, yepe pe nipirata tupri vahe, peroya ité rumo che ñehe iyavei ndacheñomi eté ava sui peye. <sup>9</sup> Co Caruguar reroyasar semira tēi vahe, ore Tūpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave. <sup>10</sup> Esepia, peroya ité che porocuaíta, peyemoviracua ité evocoi mbahe tēi upe peico. Evocoyase che opoepira acoi ari tecoñhasa ouse opacatu ivi rupindar upe curi. <sup>11</sup> Ayeví poyavara. Peyemoviracua catu Tūpa reroyasa pereco vahe rese. Evocoyase ñepeí yepe que ava ndovirocuai chietera Tūpa suindar porerecosa pe sui.

<sup>12</sup> Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara ité yuvirecoira. Ahe evocoyase inungar-ra che Ru Tūpa rēta vīracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piasu, evocoi ou vahe rā iva pendar che Ru Tūpa sui, iyavei che rer ipiasu vahe ité arovara sese no. <sup>13</sup> ¡Acoi ava osendu pota vahe, toyapisacaño Espiritu remimombehugüer rese che reroyasareta upe! ehi' erera icuachía.

*Ñehesa Laodicea pendar upe*

<sup>14</sup> “Eicuachía avei Tūpa rembiguai Laodicea pendar che reroyasareta rārosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tūpa rembiapo, ahe aipo ehi: <sup>15-16</sup> Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raími tēi vahe nungar peico pe rembiapo pipe. ¡Ñepeí reseve vahe rumo aipota, ndahei iguayi tēi vahe! Pe recocuer rumo iguayi tēi vahe nungar, sese opomboyevñora cheyesui. <sup>17</sup> Esepia, pepihañemoñeta: Che mbahe yar ité, opacatu mbahe arco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoi vahe peico. Iyavei ndapeyavii nditurucuai vahe peico. <sup>18</sup> Sese opomboaracua; peseca iva pendar oro tatave imoatiropri nungar che sui pe paraisuēhi iri āgua che Ru rovaque; peseca avei turucuar morochi vahe teco tuprisa peyeupe che suindar nani tupri vahe nungar pipe pe recoēhi āgua, pe chñēhi āgua avei iyavei inungar ava oseca mosa güesa upe nara osareco iri āgua, ēgüe peye aveira. <sup>19</sup> Che añehe pīrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tūpa upe pe yevi āgua. <sup>20</sup> Esepia, inungar que ava oquenda omotara oquendipive ohā viña, ēgüe ahe pe pihave vichico; pesenduse che ñehe, pemboira cheu. Che evocoyase aiquera pe piri, yacarura oyepiri. <sup>21</sup> Acoi ava oyemoviracua vahe mbahe-mbahe tēi apoēhi āgua yuvireco, ahe amboguapi ucara che ipive imoi che porocuaisave, inungar che mbahe tēi reco reroyi pare, aguapi che Ru ipive vīte. <sup>22</sup> ¡Acoi ava osendu pota vahe, toyapisacaño Espiritu remimombehugüer rese che reroyasareta upe! ehi imombehu pēu' erera icuachía” ehi Jesús cheu.

## 4

*Tūpa mboeteisa ivave*

<sup>1</sup> Ipare asepia mbahe inungar oquenda oyemboi vahe ivave. Ahese evocoi ñehesa ipirata vahe mimbí nungar yipindar oñehe vahe cheu, ahe asendu iri: “Eyeupi ave. Che evocoyase mbahe amboyecuara ndeu mbahe imboaviyepirā curi” ehi.

<sup>2</sup> Ahe pipeve voi, Espiritu pīratasa pipe aico iyavei asepia tenda ivave, ahe iharive ñepeí oguapi oī. <sup>3</sup> Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda. <sup>4</sup> Iyavei asepia evocoi rese oyere tupri ambuae veinticuatro tenda, ahe iharive oguapi yuvinoi veinticuatro avei icuapri yuvirecoi vahe; iturucuar morochí vahe yuvireco iyavei oāca rese omboyere tupri oro apopri yuvireco. <sup>5</sup> Evocoyase Tūpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa



yuvireco evocoi tenda rovai, ahe co siete tupri Tūpa espíritu. <sup>6</sup> Evocoi tenda rovai oime avei ndoyavii tupri para guasu tīpiu vahe oyecua tupri vahe mbahe ipipe.

Ambuae tenda pāhu rupi oyere tupri Tūpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no. <sup>7</sup> Yipindar yuvirecove vahe pāhu pendar ahe ndoyavii tupri yagua pīta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe. <sup>8</sup> Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pītu rupi aipo ehi yuvireco: “¡Santo, santo, santo ité secoi, yande Yar Tūpa ité, ahe mbahe mboavais-arēhi, yipivé vahe ité, cūrteindar, apirēhi vahe!” ehi yuvireco.

<sup>9</sup> Evocoi yuvirecove vahe ombotei yuvireco, “Aviye ndeu” ehi co oguapi vahe oī tenda harive ndopai vahe upe. <sup>10</sup> Ēgüe ehise evocoiyase veinticuatro tupri icuai pri yuvirecoi vahe, ahe oñenopiha imboeteisa pipe sovai yuvireco. Ipare osequi oāca resendar oyere tupri vahe omborecua resendar sovai aipo ehi:

<sup>11</sup> “Ore Yar Tūpa, iya ité nde mboeteisa, ndeu sapucaisa nde pīratasa rese. Esepia, nde ereyapo vahe mbahe opacatu; nde remimbotar rupi niha oime opacatu mbahe” ehi yuvireco chupe.

## 5

### *Ovesami upe güeraño iyacatu cuachiar imboyapri mboi āgua*

<sup>1</sup> Che asepiā cuachiar Tūpa vireco vahe oacato coti, icuachiapri ipipe coti, ocar coti avei no, imboyapri siete sello pipe. <sup>2</sup> Ipare asepiā Tūpa rembiguai seco ivate vahe, ahe oporandu pīrata oico aipo ehi: “¿Ava upe vo iya cuachiar mboi āgua iyavei sello imboyeroyapri mondoro āgua no?” ehi. <sup>3</sup> Ndipoi eté rumo que iva pendar, ivi pipendar, ivivri pendar oicatu vaherā cuachiar pipira sepia āgua viña. <sup>4</sup> Evocoiyase che ayasehó iteanga. Esepia, ndipoi eté que ñepei yepe oime angara aviye vahe cuachiar pipira sepia āgua viña. <sup>5</sup> Ahese icuai pri pāhu pendar ñepei aipo ehi cheu: “Ereyaseho iri eme. Esepia niha, evocoi ava yagua pīta vahe vahe chupe, Judá suindar, acoi mborerecuar guasu David suindar avei, ahe niha Carugar osecoreroi. Sese iya ité chupe siete sello mondoro cuachiar pipira āgua” ehi.

<sup>6</sup> Evocoiyase, asepiā Tūpa rovai iva pendar irungatu yuvirecove vahe pāhuve, icuai pri yuvirecoi vahe mbiterve, ñepei ava Ovesami nungar ihāi, aviye seropovēhepri. Ahe niha vireco siete tupri sāchi, siete tupri avei sesa; sesa evocoiyase siete tupri Tūpa espíritu yuvirecoi opacatu ivi rupi imboguatapri. <sup>7</sup> Ipare evocoi Ovesami oso, oipisi cuachiar evocoi tenda harive oguapi vahe yacato coti sui; <sup>8</sup> ipisi pare, evocoi irungatu yuvirecove vahe, iyavei veinticuatro tupri icuai pri, ahe oñenopiha Ovesami rovai yuvireco. Oyacatu ñepei-pe vireco arpa yuvireco, itaisi riru oro apopri, ahe avei vireco yuvireco, ahe itaisi niha Tūpa reroyasar yeruresa. <sup>9</sup> Osapucai ipiasu vahe sapucaisa pipe aipo ehi yuvireco: “Ndeu iyacatu ité cuachiar pisi āgua, imboyapri mondoro āgua avei no.

Esepia niha, nde yucapri seropovêhepri ereico.

Evocoyase nde ruvi pipe eremboepipa Tûpa upe nara opacatu ava ambuae-ae têi vahe, iñhe ambuae-ae têi vahe avei, ñepei-pei tecua yacatu rupindar, ivi rupindar avei yuvireco.

<sup>10</sup> Iyavei eremborerecu uca Tûpa upe nara, erembopahi uca avei no, ipare ahe oporocuirairã opacatu ivi rupi yuvireco” ehi osapucaí yuvireco.

<sup>11</sup> Ipare asepia, asendu avei Tûpa rembiguai rehii ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setá iteanga yuvirecoi. <sup>12</sup> Ahe aipo ehi pĩrata yuvireco no:

“¡Co Ovesami yucapirer, ahe chupe iyacatu ité mborerecuasa pisi água, opacatu Tûpa suindar porerecosa pisi água, mbahecuasa, pĩratasa, mboyeroyasa, poromboeteisa, iyavei sapucaisa pisi água avei no!” ehi.

<sup>13</sup> Ahese asendu avei opacatu Tûpa rembiapo ivave yuvirecoi vahe, ivi pipendar, ivivri rupindar iyavei para guasu pipendar, aipo ehi yuvireco: “¡Toime sapucaisa, Tûpa upendar mboyeroyasa, imboeteisa, iyavei pĩratasa, ahe timondosa apirêhi vaherã Tûpa acoi güendave oguapi vahe upe, Tahir Ovesami nungar upe avei no!” ehi.

<sup>14</sup> Evocoi irungatu ava yuvirecove vahe, “¡Ëgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

## 6

### *Siete sello*

<sup>1</sup> Ipare asepia acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pãhu pendar oñhe pĩrata. Iñhe ndoyavi osunu vahe, “¡Eriol!” ehi cheu.

<sup>2</sup> Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ëgüe ehi ahe osê seco pĩrata catu vahe ava reco roroyi água.

<sup>3</sup> Omondorose acoi Ovesami imoñuviriosa sello, ahese asendu imoñuviriosa yuvirecove vahe pãhu pendar ñehe, “¡Eriol!” ehi vahe cheu.

<sup>4</sup> Ipare osê cavayu pĩra vahe, ahe ava ihari pendar oipisi pĩratasa mbahe tuprisa rerocua água ivi pipendar ava sui ‘toyeyuca-yuca têi yuvireco’ oyapave. Ipare imondosa quise pucu chupe.

<sup>5</sup> Omondorose acoi Ovesami imombosapisa sello, ahese asendu imombosapisa yuvirecove vahe pãhu pendar ñehe, “¡Eriol!” ehi vahe cheu. Amahe sese, ipare asepia cavayu sũ vahe, ahe ava ihari pendar vireco opo pipe mbahe rãhasa. <sup>6</sup> Ipare asendu yuvirecove vahe cotindar ñehe, ahe aipo ehi: ‘Nêpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no’ ehi.

<sup>7</sup> Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Eriol!” ehi cheu. <sup>8</sup> Amahe, ipare asepia cavayu iyu rasi vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe

yuvireco imondosa teco pīratasa ivi imoirungatusa yahocuer rupi iguata āgua ava yuca āgua vavasa pipe, tieporēhi pipe, mbaherasi pipe, mbahe ipi pipe avei no.

<sup>9</sup> Evocoi Ovesami omondorose imbopoyandeposa sello, ahese asepia mbahe seropovēhepri rendavrive ava hā, ahe yucasa vahe yuvireco Tūpa Ñehengagüer mombehusa sui tēi iyavei Jesús reroyasa sui tēi avei no. <sup>10</sup> Ahe aipo ehi pīrata yuvireco: “Ore Yar Tūpa seco maranehi, supi tupri vahe, ħmbahese vo eremombaraisura ore yucasarer yuvirecoi vahe ivi pipendar ore repisave?” ehi yuvireco. <sup>11</sup> Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

<sup>12</sup> Ipare Ovesami omondorose imoñepei ovasa sello, ahese oime ivi riri ipīratá vahe. Ari evocoiyase sū, aviye acoi turucuar sū vahe mano sendar yemondesa iyavei yasi pīrá inungar tuvi, <sup>13</sup> yasitata evocoiyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi. <sup>14</sup> Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco. <sup>15</sup> Mborerecuareta avei co ivi pipendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco pīratá vahe, iyavei opacatú tupri mbiguai eta, ava ndahei vahe mbiguai avei; <sup>16</sup> iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tūpa sui iyavei Ovesami sui acoi ombou vahe co pronupasa ipīrata vahe oreu! <sup>17</sup> Esepia, oyepota ité Tūpa ñemoirosa oreu. Ndipoi chiera ava oyemoviracua tupri vahe oyese chupe” ehi yuvireco.

## 7

### *Israel suindar iporavopri yuvirecoi vahe*

<sup>1</sup> Ipare asepia irungatu tupri Tūpa rembiguai iva pendar yuvinohai vahe irohi coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi āgua, que para guasu pipe angara viña, que ñepei yepe ivira ro angara viña no. <sup>2</sup> Ipare asepia avei ambuae Tūpa rembiguai iva pendar ou vahe ari sēsa coti sui, ahe vireco oyese Tūpa oicove vahe rer mondosa. Ahe niha osapucái pīratá evocoi irungatu tupri Tūpa rembiguai iva pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi: <sup>3</sup> “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

<sup>4</sup> Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco. <sup>5</sup> Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, <sup>6</sup> doce mil tupri Aser suindar, doce mil tupri Neftalí suindar, doce mil tupri Manasés suindar, <sup>7</sup> doce mil tupri Simeón suindar, doce mil tupri Leví suindar, doce mil tupri Isacar suindar, <sup>8</sup> doce mil tupri Zabulón suindar, doce mil tupri José suindar, ipa evocoiyase doce mil tupri Benjamín suindar.

*Ava rehii iturucuar morochi vahe*

<sup>9</sup> Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñhe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochí vahe pāve; pindo-pindomi vireco opove yuvireco no.

<sup>10</sup> Ipare opacatu guasu oñhe pīrata yuvireco aipo ehi:

“¡Poropīsirosa yande Ru Tūpa suindar, ahe oguapi vahe oĩ güendave, iyavei Ovesami suindar avei no!” ehi.

<sup>11</sup> Iyavei opacatu Tūpa rembiguai íva pendar yuvirecoi vahe oyere tupri Tūpa renda rese, icuapri rese avei yuvinoha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco, <sup>12</sup> aipo ehi:

“¡Ēgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, porom-boyeroyasa, mborerecuasa,

teco pīratasa avei tasecoi yande Ru Tūpa upe!

¡Ēgüe tehi apirēhi vaherā ité yepi!” ehi.

<sup>13</sup> Ahese icuapri ipāhu pendar aipo ehi cheu cute: “¿Ereicua vo co ava rehi iturucuar morochi vahe pāve yuvirecoi, ereicua que sui pīha yugüeru?” ehi. <sup>14</sup> Che evocoyase, “Nde rumo ereicua” ahe chupe. Ipare ahe aipo ehi cheu: “Co acoi yuvinohe tupri vahe ité teco asisa sui yuvireco, inungar oyosei, omomorochi vahe oturucuar, ēgüe ehi avei güecocuer imomorochi Ovesami ruvi pipe yuvireco.

<sup>15</sup> “Sese Tūpa renda rovai yuvirecoi, chupe mbahe apo āgua ari, pītu rupi avei sēta pipe.

Güendave oguapi vahe oĩ, güecocuer pipe osepira.

<sup>16</sup> Evocoi ndiyumbiasi iri chira yuvireco,

ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

<sup>17</sup> Esepia, evocoi Ovesa secoi Vu renda rovai,

ahe osārora ava rehi sereco inungar ovesa rārosar.

Ipare opara viraso tecovesa resendar i ndopai vahesave imboihu āgua.

Tūpa evocoyase omombituhupara imboyasehosa sui yuvireco” ehi.

## 8

*Imoñuvirío ovasa sello iyavei itaisi rapisa oro apopri*

<sup>1</sup> Ipare coiye cute co Ovesami omondorose imoñuvirío ovasa sello cuachiar mboyasa ichui, ahese sīu tupri ivave ñepe hora yemombitesa rupive. <sup>2</sup> Ichui asepia siete tupri Tūpa rembiguai íva pendar yuvinohai vahe Tūpa rovai, chupe opa imondosa siete tupri mimbí. <sup>3</sup> Ipare ou ambuae Tūpa rembiguai íva pendar oro itaisi rapisa reseve, iyavei ou ohā itaisi rapisa renda rovai; ipare imondosa tuvichá itaisi chupe oicuvēhe vaherā oyoya tupri opacatu ava Tūpa upendar yeruresa rese oro mbahe reropovēhepri renda harive; ahe Tūpa renda rovai chini vahe.

<sup>4</sup> Itaisi rātachi evocoyase oso Tūpa rembiguai íva pendar po sui. Ēgüe ehi oyepota oso Tūpa recosave, oyoya tupri chupendar yeruresa rese.

<sup>5</sup> Ipare evocoyase Tūpa rembiguai íva pendar opoco itaisi rapisa rese, omboapipo mbahe reropovēhepri renda pendar tātapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oriríi.

*Siete vahe mimbí*

<sup>6</sup> Evocoyase siete tupri Tūpa rembiguai iva pendar oyemoingatu voi güemimbi moñehe āgua yuvireco.

<sup>7</sup> Yipindar vahe Tūpa rembiguai omoñehe güemimbi, ahese imombosa ivi hari rupi amanda iyavei tata oyeseha vahe tuvi rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihi reseve avei opa yuvirocai.

<sup>8</sup> Imoñuviriosa Tūpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuvi. <sup>9</sup> Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

<sup>10</sup> Ipare imombosapisa Tūpa rembiguai iva pendar omoñehe güemimbi, ahese yasitata tuvichá vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui i ohē vahe mombosapisa yahocuer pipe avei no.

<sup>11</sup> Yasitata rer evocoyase Iro-vahe. Ipare i mombosapisa yahocuer iró iteanga. Evocoi i pipe setá va omano yuvireco.

<sup>12</sup> Imoirungatasa Tūpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pītu mombosapisa yahocuer pipe avei no.

<sup>13</sup> Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tūpa rembiguai güemimbi yuvireco!” ehi.

**9**

<sup>1</sup> Tūpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pītumimbi vahe mboisa. <sup>2</sup> Ipare omboise ivicuar rovapisa, ichui opūha tātachi, inungar acoi horno guasu pipe sui osē vahe. Evocoyase evocoi tātachi ndosesape uca iri ari upe, niporēhi iri eté mbahe.

<sup>3</sup> Iyavei evocoi tātachi sui opa yuvinose tucru guasu rehii oñemosai opacatu ivi rupi; chupe avei imondosa seco pīrata āgua inungar acoi mbaherumbiquiāpe. <sup>4</sup> Icuaisa rumo opacatu capihi mbahe rocra iyavei ivira momaraēhi āgua, ēgüe ehi rumo acoi ava nomboyecuai vahe osiva rese Tūpa rer, chupe nara ité. <sup>5</sup> Nimondosai rumo mborocuita chupe ava yuca āgua. Ēgüe ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mbaherumbiquiāpe rasicuer.

<sup>6</sup> Evocoi ari rupi ava oipota tēira omano āgua yuvireco viña. Imanosa rumo que vitera yuvireco ichui.

<sup>7</sup> Tucru guasu rehii inungar cavayu imoingatupri vavasave nara yepi; oāca rese evocoyase vireco ndoyavii yeguaca oro apopri, iyavei sova aviye tupri ité ava repiaca. <sup>8</sup> Iha ndoyavii cuña ha, sāi evocoyase ndoyavii tupri yagua pīta rāi. <sup>9</sup> Setecuer evocoyase oyopia tupri guarepochi apopri, iyavei ipepo riapugüer aviye tupri ité acoi cāreto riapugüer cavayu vinoña vahe vavasave. <sup>10</sup> Vireco vuguai rese opopiar aviye mbaherumbiquiāpe popiar. Ahe niha vireco opīratasa poyandepo yasi

rupi ava momara āgua tēi. <sup>11</sup> Evocoi tucru guasu rerecuar, ahe icuai pri ivicuar ipicucu vahe mboi āgua. Ahe serer hebreo ñehe pipe Abadón; griego ñehe pipe evocoiyase Apolión ehi.

<sup>12</sup> Opa yipindar vahe mbahe-mbahe tēi; oime vite rumo co pare ñuvirío mbahe tasi vahe.

<sup>13</sup> Imoñepei ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaindar irungatu sāchi vahe pāhu sui. <sup>14</sup> Ahe aipo ehi evocoi imoñepei ovasa Tūpa rembiguai upe: “Eyorapa evocoi irungatu Tūpa rembiguai ñapichimbri iai guasu Eufrates ivirindar” ehi. <sup>15</sup> Evocoiyase opa yorasa ava mombosapisa yahocuer yuca āgua yuvireco. Esepia, evocoi imoingatupri co ari rupi tuprise nara yuvireco. <sup>16</sup> Ipare asendu sundao rehii cavayu harive yuvirecoi vahe, ahe setacuer doscientos millones tupri.

<sup>17-18</sup> Ēgüe ehi asepia cavayu rehii che quer nungar pipe, ihari pendar evocoiyase vireco opochiha rupi tupri oyoepisa guarepochi apopri yuvireco, ahe iparagüer pīra vahe tata nungar, sovi vahe, iyu vahe avei no. Cavayu rehii āca evocoiyase aviye tupri yagua pīta āca, iyuru sui evocoiyase yuvinose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco. <sup>19</sup> Esepia niha, cavayu pīratasa iyuru rese chini, suguai rese avei no; ahe suguai ndoyavii tupri ité mboi āca, ipipe avei ava omomara.

<sup>20</sup> Ava rumbirer rumo nomanopa vitei vahe co mbahe tēi sui yuvireco, nosecuñaroi eté güecocuerai yuvireco. Ndopoi potai eté carugar mboetei aisa sui, iyavei opacatu mbahe rahanga tēi oro apopri, guarepochi, bronze, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei. <sup>21</sup> Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

## 10

*Tūpa rembiguai iva pendar vireco vahe icuachiapri cuachiarmi*

<sup>1</sup> Ipare asepia ambuae Tūpa rembiguai iva pendar ipiratá vahe ogüeyise iva sui ou mbahe pītu pāhuve; ahe ñaca rese arco iris oyere tupri. Sova sendí aviye ari, setima evocoiyase ndoyavii tata rendigüer opūha tupri vahe. <sup>2</sup> Cuachiarmi oyemboi vahe vireco opove. Opi oacato cotindar pipe opiro para guasu rese, ambuae opive evocoiyase opiro ivi rese. <sup>3</sup> Evocoiyase sãse pīratá, inungar yagua pīta rãse; sãsese, evocoiyase siete tupri osunu vahe ñehe oyendu yuvireco. <sup>4</sup> Oñehepase, ahese ñehe che aicuachiara viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiai chietera” ehi cheu.

<sup>5</sup> Evocoiyase Tūpa rembiguai asepia vahecuer, ahe acoi opiro vahe para guasu rese, ivi rese avei opo oacato cotindar omopuha iva coti. <sup>6</sup> Ichui Tūpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera; <sup>7</sup> oyepotase rumo imoñuvirío ovasa Tūpa rembiguai upe güemimbi moñehe āgua, ahese imboaviesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

<sup>8</sup> Ñehesa asendu vahe iva sui oñehe iri cheu aipo ehi: “Eso, tereipisi cuachiarmpi imboipri Tüpa rembiguai vireco vahe evocoi opiro vahe para guasu rese ohã, ivi rese avei no” ehi. <sup>9</sup> Evocoiyase aso Tüpa rembiguai upe, aporandu cuachiarmpi rese, ahese ahe aipo ehi cheu: “Ndo co, eipisi, ehu. Nde yuru pipe evocoiyase sêhera eiri nungar, nde aviterve rumo irora” ehi cheu.

<sup>10</sup> Ahese aipisi cuachiarmpi cute Tüpa rembiguai sui, ipare ahu; yipindar sêhé che yuru pipe inungar eiri, amocopase rumo, che aviterve iró cheu. <sup>11</sup> Evocoiyase aipo ehi yuvireco cheu: “Nde ereñehe irira Tüpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

## 11

### *Ñuvirío ava Tüpa reco cuer mombehusar*

<sup>1</sup> Ipare ombou vara mbahe rãhasa yuvireco cheu, ichui aipo ehi yuvireco cheu no: “Erio, teresãhapa tüparo, mbahe reropovêhepri renda avei, ipare opara ereipapa ipipendar Tüpa mboeteisar retacuer” ehi. <sup>2</sup> “Nderesãhai chira rumo ñachimbrí pipe tüparo rocar rupi. Esepia, evocoi opa imondosa ava Tüpa ndoicuai vahe upe, ahe opirora tecua nimarai vahe rese yuvireco cuarenta y dos yasi rupi” ehi. <sup>3</sup> “Ipare ñuvirío ava amondora che reco cuer mombehu água opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

<sup>4</sup> Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai. <sup>5</sup> Acoi que oimese ovireco mara pota vahe, ahese che reco mombehusar yuru sui osêra tata sapipa água; êgüe ehira ava omano que che reco mombehusar reco momara potasar. <sup>6</sup> Co ñuvirío vireco opiratasa oqui vahe mombita água, acoi ari rupi che reco mombehu viteseve yuvireco; iyavei vireco piratasa i recuñaro água tuvi pipe yuvireco, imombaraisu uca água avei ivi opacatu-catu tēi mbaherasi pipe güemimbotar rupi.

<sup>7</sup> Omboaviyepase rumo Tüpa reco mombehusa yuvireco, ahese osêra ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara. <sup>8</sup> Sehögüer evocoiyase yangarecuavêhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no. <sup>9</sup> Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiãño tēira sehögüer yuvireco iyavei ahe noñoti ucai chietera ava upe yuvireco. <sup>10</sup> Ava yuvirecove vahe ivi pipe, ahe oviharetera yuvireco imano rese. Êgüe ehira sorivete, iporerecua oyese yuvireco. Esepia, evocoi ñuvirío ava Tüpa ñehe mombehusar imombaraisupirer yuvirecoi.

<sup>11</sup> Mbosapi ari yemombite pare rumo, Tüpa opa ombögüerayevi, ahese opũhapa yuvireco. Evocoiyase ava opacatu osepiã vahe osiquiyé iteanga yuvireco ichui. <sup>12</sup> Ipare ahe ñuvirío osendu yuvireco ñehesa ipĩrata vahe iva suindar aipo ehi vahe: “¡Peyeuipia ave ivate!” ehi. Evocoiyase opa oyeupi ivave yuviraso iva quiha pãhu rupi oamotarêhisareta rembiepiave. <sup>13</sup> Aheseve voi oime ivi riri tuvichã vahe, ichui tecua guasu imbodiesa yahocuer opa onduru; ahese siete mil tupri ava opa omano

yuvireco. Evocoyase ava rumbirer, osiquiyepave tēi osapucai Tūpa iva pendar upe imboeteisa pipe yuvireco.

<sup>14</sup> Opa mbahe-mbahe tēi moñuviriosa cute; ou poyava irira rumo imombosapisa.

*Imoñuvirío ovasa Tūpa rembiguai omoñehe güemimbi*

<sup>15</sup> Imoñuvirío ovasa Tūpa rembiguai omoñehese güemimbi, ahese oy-eendu ñehesa ipĩrata vahe iva suindar aipo ehi vahe:

“Yande Yar Tūpa, Sembiporavo Poropĩsĩrosar avei vireco co ivi pendar mborerecuasa opovrive yuvireco cute.

Ahe evocoyase mborerecuar apirēhi vaheṛã itera secoi” ehi.

<sup>16</sup> Evocoyase veinticuatro tupri icuapri, evocoi oguapi vahe yuvinoi Tūpa renda rovai, ahe oyeaivi omboya ité osiva ivi rese imboeteisa pipe yuvireco, <sup>17</sup> aipo ehi:

“Aviye ndeu ore Yar, Tūpa mbahe mboavaisarēhi, nde acoi yipĩsuive vahe ité,

ereicoveño avei cūritei.

Esepia, nde pĩratasa tuvichá vahe pipe ereporocuai eico.

<sup>18</sup> Ambuae tecua rehii pendar nde amotarēhi ité yuvireco.

Nde ñemoirosa rumo cūritei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe,

ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

<sup>19</sup> Ahese oyemboi tūparo iva pendar, iyavei oyecua tupri cuachiar porocuita resendar riru. Ipare overa-vera, siapu guasu, osunu, ivi oririi, amanda osururú avei no.

## 12

*Cuña iyavei mbahe ipi oporomocañi vahe*

<sup>1</sup> Evocoyase iva rese oyecua mbahe poromondiisa tuvichá vahe ambuae mbahe mboyecua água: oime cuña iturucuar inungar ari rendigüer, aviye opiro vahe yasi rese ohã, oãca yeguaca rese doce tupri yasitata vireco. <sup>2</sup> Co cuña ipuruha oico, sãsé tēi omembrĩ iha pota água oyesui.

Esepia niha, oiporará ité tasiçuer. <sup>3</sup> Ipare coiye oyecua iva rese ambuae mbahe mboyecua tupri: mbahe ipi pĩra vahe, ahe ñaca siete tupri, sãchi evocoyase diez iyavei vireco yeguaca oãca yacatu. <sup>4</sup> Suguai evocoyase ombotiriri yasitata iva pendar imombosapisa sui ñepeĩ yahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembrĩ oha ramoseve” ehi viña. <sup>5</sup> Ipare co cuña membrĩ oha cuimbahemi, ahe mborerecuar virecora mbococa guarepochi apopri, ipĩrata catu vahe secoira opacatu ava ivi rupindar upe. Ichui serocuasa voi serasosa Tūpa rovai. <sup>6</sup> Cuña evocoyase oñemi ivi iporupirēhisave oso. Aheve omoingatu Tūpa iyemboerecuá água, eipeve icaru água mil doscientos sesenta ari rupi.

<sup>7</sup> Oime avei vavasa ivave; ahese Tūpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco. <sup>8</sup> Ndoicatu eté rumo Miguel recopi água yuvireco. Sese ndipoi eté ivave seco água yuvireco chupe. <sup>9</sup> Ēgüe ehi



imboyepepisa mbahe ipi oporomocañi vahe reco pĩratasa sembuguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tēi vahe opacatu ivi pipe yuvireco.

<sup>10</sup> Evocoiyase asendu ñehesa ipĩrata vahe ivave, aipo ehi vahe:

“Cũritei oime poropĩsirosa, pĩratasa iyavei yande Tũpa mborerecuasa, Poropĩsirosar mborerecuasa avei no.

Esepia niha, imboyepepisa iva sui acoi oseca-seca vahe yande rivri Tũpa reroyasareta recocuer momara ãgua pĩtu, ari yacatu rupi yande Ru Tũpa rovai.

<sup>11</sup> Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tuprisa pipe sui avei no.

Esepia niha, ndosiquiyei eté güetecuer mocañi ãgua yuvireco.

Ahe rumo oyemoingatu voi eté omano ãgua.

<sup>12</sup> ¡Peyemboviha catu pe iva iguar peico vahe!

Pe rumo, ¡peparaisu catura ivi pipe, para guasu pipe avei peico vahe!

Esepia niha, Carugar ogüeyi pēu oñemoirosa pipe, oicuae güeco pucuehi ãgua” ehi.

<sup>13</sup> Ipare mbahe ipi oporomocañi vahe oicuae imombopri güecose ivi rese, ahese omoña cuña imembri cuimbahemi reseve yamotarēhisa pipe.

<sup>14</sup> Evocoi cuña upe rumo imondosaño ñuvirío vira guasu pepo iveve ãgua chupendar ivi imoingatupri ava porēhisave seco ãgua, amombri mbahe ipi oporomocañi vahe sui. Aheve oyopoi mbosapi araviter yemombitesa rupive. <sup>15</sup> Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tēi’ oyapave viña. <sup>16</sup> Ivi rumo oime co cuña pĩtiviisa, ahe oyeca. Ipare opa omoco iai evocoi mbahe ipi oporomocañi vahe rembiapo. <sup>17</sup> Evocoiyase, oñemoiró iteanga cuña rese, ipare oso ovava ambuae ichuindar rehi rese, ahe omboyeroya vahe ité Tũpa porocuita yuvireco iyavei yuvirecoi tupri vahe Jesucristo remimombehu rupi. <sup>18</sup> Ipare mbahe ipi oporomocañi vahe opita para guasu popive ohã.

## 13

### *Ñuvirío mbahe ipi vai*

<sup>1</sup> Ipare asepia para guasu pipe sui osēse mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoiyase vireco ñepepei oyeguaca, iyavei oãca yacatu rese vireco terer Tũpa upe mbahe tēi vahe. <sup>2</sup> Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoiyase aviye yagua pĩta yuru. Mbahe ipi oporomocañi vahe evocoiyase omondo opĩratasa iyavei omborerecuasa chupe. <sup>3</sup> Nepei mbahe ipi vai ãca oyeapicha guasu vahe ndoyavii omano vaheã ité viña; ahe rumo ocuera tupri iriño evocoiyase opacatu guasu ava sepiase, ndoyembovihai. Ichui viroya catu yuvireco. <sup>4</sup> Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaheã sese” ehi yuvireco.

<sup>5</sup> Iyavei mbahe ipi vai upe ipotasa iyemboivate ai ãgua oñehe pipe ava rovaque iyavei Tũpa roreño ãgua avei no, iyavei mborerecuar guasu seco

ãgua cuarenta y dos yasi rupi. <sup>6</sup> Ëgüe ehi ñehe mara-mara tēi Tūpa rese, ñehe-ñehe tēi avei serer maranehi rese, sēta rese, iva pendar rese avei no. <sup>7</sup> Imondosa avei chupe vavasa apo uca ãgua Tūpa upendar ava eta upe secopi ãgua. Ipare imondosa avei mborerecuar seco ãgua chupe ava ambuae-ae tēi vahe upe, secua ambuae vahe upe, ambuae-ae tēi ñehe vahe upe, iyavei ambuae ivi rupindar upe avei no. <sup>8</sup> Ipare omboetei ai sereco yuvireco opacatu ava ivi pipendar acoi ivi apoēhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

<sup>9</sup> Que amove osendu pota vahe, toyapisacaño co rese:

<sup>10</sup> “Acoi ava oyeoquenda uca vaherã, oyeoquenda ucaño itera; iyavei acoi ava omano vaherã quise pucu pipe, ipipeño ité omanora.”

Co pipe oyecua Tūpa rese yeroyasa iyavei ipĩratasa ava chupendar rese.

<sup>11</sup> Ipare asepia ambuae mbahe ipi vai osē vahe ivivri sui. Co vireco ñuvirío guachi ndoyavii tupri Ovesa rāchi, mbahe ipi oporomocañi vahe ñehe pipe rumo oñehe oico. <sup>12</sup> Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rāgüer sui. <sup>13</sup> Iyavei oyapo setá mbahe poromondiisa mbahe mboyecua ãgua. Iva sui eté niha oiti uca tata ivive imbou opacatu ava rembiepiave. <sup>14</sup> Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboeteisave. <sup>15</sup> Ipare imondosa pĩratasa chupe tecovesa mondo ãgua evocoi sahanga upe ‘toñehe, toyuca uca avei ava opacatu omboeteiēhisar’ oyapave. <sup>16</sup> Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tēi upe, ahe chupe, “Toyecuachía opo ocatato cotindarve yuvireco, anise osivave” ehi. <sup>17</sup> Ahese ava ndipoi eté oicatu vahe mbahe rerocua, anise que mbahe mondo ãgua acoi ndovirecoise mbahe ipi vai rer, anise serer retacuer ndovirecoise oyese no.

<sup>18</sup> Iya pereco mbahecuasa co renducua tupri ãgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

## 14

### *144,000 ava iporavopri sapucaisa*

<sup>1</sup> Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco. <sup>2</sup> Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, Ëgüe ehi siapugüer. <sup>3</sup> Ipare osapucaí sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuaipri eta rovai avei no. Ñepeí yepe que iva pendar ndoicatuí eté evocoi sapucaisa rese oyembohe vaherã. Ëgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pāhu sui, ahe güeraño tupri ité oicatu osapucaí yuvireco. <sup>4</sup> Co ava ndoyapoi vahe ité mbahe co coti tēi cuña rese. Esepia, oñearo tupri

güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pãhu sui iyavei inungar yipindar mbahe seropovêhepri Tũpa upe, Ovesami upe avei. <sup>5</sup> Ndipoi eté que temira sese. Esepia niha, ndipoi eté mbahe oyavi vahe yuvireco.

*Mbosapi Tũpa rembiguai omombehu ñehe ava upe yuvireco*

<sup>6</sup> Evocoyase asepia ambuae Tũpa rembiguai iva pendar oveve vahe iva mbitèr rupi iyavei vireco Tũpa Ñehengagüer pĩsirosa resendar ndopai vahe imombehu ñgua opacatu ava co ivi pipendar upe: opacatu ivi rupindar upe, ava ambuae-ae vahe upe, ñehe ambuae-ae vahe upe, opacatu tecua rupindar upe avei no. <sup>7</sup> Ipare oñehe pĩrata aipo ehi: “Pesiquire Tũpa sui iyavei pesapucaí seco ivatesa rese chupe no. Esepia niha, cũritei oyepota ari chupe ava recocer rese iporandu ñgua. Pemboetei catu oyapo vahecuer iva, ivi, para guasu, i ohẽ vahe avei no” ehi.

<sup>8</sup> Ambuae Tũpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tẽisa resendar pipe!” ehi.

<sup>9</sup> Ipare ambuae Tũpa rembiguai iva pendar imombosapisa, saquicue moña aipo ehi pĩratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oye-cuachía ñgua osiva rese, que opo rese no, <sup>10</sup> oipisi itera Tũpa ñemoirosa ipĩrata vahe ité; ipare omombaraisura setecuer azufre ocai vahe pipe güembiguaí iva pendareta reco maranehi rovaque, Ovesami rovaque avei no. <sup>11</sup> Tãtachi icaigüer pendar evocoyase oyeupira ndopai vaheã, ahese ndipoi chietera pituhusa pĩtu, ari pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

<sup>12</sup> ¡Egüe ehira Tũpa rese ité yuvirecoi vahe yeroyasa oyecua ahe acoi iporocuaíta mboaviye tuprisar, Jesús reroya tuprisar avei yuvireco!

<sup>13</sup> Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Egüe ehi eté —ehi Espĩritu imombehu—, opituhura oporaviquisa sui yuvireco. Esepia, mbahe sembiapo rerãcua osora ivave supi” ehi.

*Ivi pipendar recoãhasa*

<sup>14</sup> Ahese asepia iva quiha morochí vahe; iharive ndoyavii ava oguapi vahe oĩ. Vireco niha oyeguaca oro apopri oãca rese iyavei mbahe miti asiasa saimbé vahe vireco opove. <sup>15</sup> Ipare osẽ ambuae Tũpa rembiguai tũparo sui. Ahe osapucaí pĩrata evocoi iva quiha harive chini vahe upe: “¡Eyasia nde remiti iyavei emonuha nde rembiasia! ¡Esepia, nde remiti ivi pendar yaviye ité!” ehi ava recocer uve chupe. <sup>16</sup> Evocoyase evocoi chini vahe oyasia güemiti ivive oico, ahese opa omonuha güembiasia.

<sup>17</sup> Ipare osẽ ambuae Tũpa rembiguai tũparo sui, ahe avei vireco mbahe miti asiasa saimbé vahe. <sup>18</sup> Ipare ambuae Tũpa rembiguai osẽ mbahe reropovêhepri renda sui, ahe tata rese hañecosar secoi. Iyavei oñehe pĩrata evocoi vireco vahe mbahe miti asiasa upe aipo ehi: “¡Eyasia uva ha apacuar, evocoi oime vahe ivi pipe! ¡Esepia niha, opa yaviye!” ehi. <sup>19</sup> Evocoyase co Tũpa rembiguai inungar oyasia vahe uva ha egüe ehi opa ava ipeha ivi pipendar. Ipare opa oyapocatu Tũpa ñemoirosa rãro

ãgua. <sup>20</sup> Ipare inungar uva ha icambepri tecua cupeve, ãgüe ehi co ava imombaraisu; ichui osẽ tuvĩ evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

## 15

*Ipa siete tupri Tũpa rembiguai güeru mbaherasi yuvireco*

<sup>1</sup> Ipare asepia ivave ambuae mbahe mboyecuasa tuvichá vahe poromondiisa: siete Tũpa rembiguai, siete tupri mbaherasi ipa vahe vireco vahe, ahe ipá vahe ité Tũpa ñemoirosa.

<sup>2</sup> Iyavei asepia para guasu ndoyavĩ yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía ãgua yuvireco oyese. Ahe vireco Tũpa upendar arpa yuvireco. <sup>3</sup> Ipare osapucái Tũpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tũpa opacatu mbahe mboavaisarẽhi; nde recocuer supi tupri vahe ité; seco ñvi vahe.

¡Too, nde mborerecuar guasu opacatu ivi rupindar ereico!” ehi.

<sup>4</sup> “Yar, nde sui opacatu ité osiquiyera yuvireco nde mboetei ãgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

<sup>5</sup> Ipare asepia ivave oyemboise Tũpa rëta imaranehi vahe. Aheve acoi yapocatusa mborocuita resendar. <sup>6</sup> Evocoyase ichui yuvinosepia evocoi siete Tũpa rembiguai vireco vahe siete tupri mbaherasi vai yuvireco.

Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoyase oyeumbicua opochiha rupi tupri yuvireco. <sup>7</sup> Ipare ñepeï evocoi irungatu iva pendar yuvirecove vahe pãhu pendar omondo siete tupri Tũpa rembiguai upe siete Tũpa ñemoirosa riru oro apopri, ahe oicove vahe ité, ndopai vahe. <sup>8</sup> Ipare Tũpa rëta omboapipo tãtachi, evocoi ou vahe Tũpa reco porañetesa iyavei ipĩratasa sui. Aheve ndiyai eté que ava upe seique ãgua acoi opase voi eté omomba siete tupri mbaherasi vai vireco vahecuer siete Tũpa rembiguai.

## 16

*Siete Tũpa ñemoirosa riru*

<sup>1</sup> Evocoyase asendu ñehesa ipĩrata vahe osẽ vahe Tũpa rëta pipe sui. Ahe aipo ehi siete Tũpa rembiguai yuvirecoi vahe upe: “Peso, tapeipiyerepa ivi hari rupi evocoi siete tupri mbahe riru pipendar Tũpa ñemoirosa” ehi.

<sup>2</sup> Yipindar vahe Tũpa rembiguai opa oipiyere igua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tẽi avei, ahe chupe oime setá caracha vai tasi vahe.

<sup>3</sup> Tũpa rembiguai imoñuvirosa opa oipiyere igua riru pipendar para guasu pipe. Ahe evocoyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

<sup>4</sup> Tũpa rembiguai imombosapisa opa oipiyere igua riru pipendar ñai pipe, ñ ohẽ vahe pipe avei no. Ipare opa ahe oyeapo tuvĩ yuvireco. <sup>5</sup> Co pare asendu Tũpa rembiguai ñ rese ihañeco vahe ñehesa aipo ehi:

“Nde seco tupri vahe ité ereico evocoi ava upe erembose nde ñemoirosa, che Yar Tũpa,

seco maranehi vahe.  
Nde yipisuiendar ité ereico.

<sup>6</sup> Esepia, ahe opa oyuca ndeundar ava iyavei nde ñehe mombehugar yuvireco.

Cūrítei rumo eremboihu uca tuvi pipe.

¡Evocoi nungar upe aviyesa rupi eté!” ehi.

<sup>7</sup> Asendu avei ambuae ñehesa mbahe reropovēhesa renda sui aipo ehi vahe: “Supi eté, che Yar Tūpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco ivi vahe ité no” ehi.

<sup>8</sup> Tūpa rembiguai imoirungatusa, opa oipiyere mbahe riru pipendar ari rese, ipare ari upe imondosa piratasa ava rapipa āgua. <sup>9</sup> Ipare opacatu ité ava yuvirocaipa tupri; ndoyevii eté rumo Tūpa upe iyavei nomboteiño ité yuvireco. Ēgüe ehi rumo ñehe mara-mara tēiño mbaherasi rerecose Tūpa upe yuvireco.

<sup>10</sup> Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi sereciar ipovri pendar avei pitumimisave yuvirecoi. Ava evocoiyase oñeapecusuhu-suhu tēi yuvireco mbahe rasiouer pāhuve; <sup>11</sup> ndopoiño ité rumo mbahe-mbahe tēi aposa sui yuvireco, ahe rumo ñehe mara-mara tēiño Tūpa ivate vahe rese oyeupe mbahe tasi vahe pāhuve yuvireco.

<sup>12</sup> Tūpa rembiguai imoñepeí ovasa oipiyere mbahe riru pipendar iai guasu Eufates pipe. Ahe evocoiyase opa ipiru peri apo āgua añihivei coti sui mborerecuareta yu āgua.

<sup>13</sup> Ipare asepia mbahe ipi oporomocañi vahe, mbahe ipi vai, ndaheí vahe Tūpa ñehe mombehugar supi vahe avei, ahe yuvirecoi vahe yuru rupi yuvínose mbosapi caruguar vireque nungar. <sup>14</sup> Co Caruguar suindar yuvirecoi, ahe oyapo poromondisa mbahe mboyecuasa yuvireco. Ipare opa yuvínose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarēhi amotarēhisave.

<sup>15</sup> “Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviyé vahe pipe. Ahese nochi chietera oico che sui” ehi.

<sup>16</sup> Ipare opa omonuha mborerecuareta hebreo ñehe pipe serer Armagedón ve.

<sup>17</sup> Evocoiyase imbosietesa Tūpa rembiguai oipiyere ñemoirosa mbahe riru sui ivitu rupi. Ipare íva pendar Tūpa rēta pipe sui osē ñehesa ipirata vahe evocoi ou vahe senda sui: “¡Opa ité yaposá cute!” ehi. <sup>18</sup> Ahese oime overa vahe, mbahe siapu guasu vahe iyavei osunu vahe. Ipare ivi oririi ipirata catu vahe opacatu ivi ririi sui ava yuvirecove viteseve ivi pipe. <sup>19</sup> Tecua guasu oyeca-yeca mbosapi rupi, opacatu tecua evocoiyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoiyase omondo oñemoirosa ipirata catu vahe chupe. <sup>20</sup> Opacatu caha pāhu, ivitri avei ocañipa ité yuvireco. <sup>21</sup> Iyavei yuviroviapipa íva sui ava harive amanda guasu, ahe iposigüer cuarenta kilos rutei. Ava rumo ñehe mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa pronupasa ívaté catu vahe.

## 17

*Cuña oyemondo-mondo tēi vahe mocañisa*

<sup>1</sup> Siete Tūpa rembiguai vireco vahecuer mbahe riru yuvireco, ipāhu pendar ñepeí ou aipo ehi cheu: “Erio, amboyecua co cuña yaguasa serai vahe upe ñemoirosa ndeu, ahe evocoi uguapi i harive oí” ehi. <sup>2</sup> “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

<sup>3</sup> Ipare che quer nungar pipe Espiritu omboyecua vahe cheu, Tūpa rembiguai íva pendar che reraso ava porēhisave. Aheve asepia cuña mbahe ipi vai pīra vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi. <sup>4</sup> Co cuña turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa tēisa; <sup>5</sup> iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi. <sup>6</sup> Ipare aicua evocoi cuña osavaipo vahe oí Tūpa reroyasar ruvi pipe iyavei acoi Jesús recocuer mombehusa sui tēi yucapri vahe ruvi pipe avei no.

Co asepiase che quer nungar pipe, ndache mbovihai eté. <sup>7</sup> Ahese ahe Tūpa rembiguai íva pendar aipo ehi cheu: “¿Mahera vo nderevihai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oāca, diez tupri avei acoi sāchi” ehi. <sup>8</sup> “Acoi mbahe ipi vai eresepia vahe ahe yipive secói vahe, cūrítei rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovihai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

<sup>9</sup> “Co rese icuasara uma vireco mbahecuaasa senducua āgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña uguapi oí iyavei ahe siete ñaca avei omoporēhi ‘siete tupri mborerecuar’ oyapave. <sup>10</sup> Cinco tupri mborerecuar evocoi ipāhu pendar ndipo iri yuvireco, ñepeíño evocoiyase oporocuai cūrítei oico, ambuae rumo ndou vitei. Ouse rumo ipandar, ou raimi tēira. <sup>11</sup> Mbahe ipi vai secói vahe yipindar, ndoicove iri cūrítei, ahe imbohochosa secoira mborerecuarā, yepe siete tupri vahe mborerecuar guasu mboetasa viña, ahe rumo ocañi tēi vahe rā secocuer” ehi.

<sup>12</sup> “Evocoi diez tupri vahe sāchi, ahe mborerecuar diez tupri ndoyuviroique vitei vahe oporocuai vahe rā yuvireco. Oyoya rumo oporocuai raimi tēira mbahe ipi vai reseve yuvireco curi. <sup>13</sup> Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vahe rā pīratasa iporocuai āgua yuvireco. <sup>14</sup> Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secói no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi uguata āgua yuvireco” ehi.

<sup>15</sup> Iyavei Tūpa rembiguai aipo ehi cheu: “Evocoi para guasu eresepia vahe, iharive cuña yaguasa-guasa tēi vahe oguapi oĩ, ahe ‘ava rehi tecua yacatu rupindar, iñehe ambuae-ae vahe iyavei opacatu ambuae tēi vahe ivi rupindar’ oyapave. <sup>16</sup> Evocoi eresepia diez tupri vahe sãchi mbahe ipi vai rese, ahe ndoyambotai chira cuña yaguasa-guasa tēi vahe; iyavei osequi tupri seya; ohupara soho, ipare opara osapi. <sup>17</sup> Tūpa niha omondo ipiha pipe mbahe güemimbotar apo ãgua ‘ahe toyemonguerēhi yuvireco omborerecuasa mondo ãgua mbahe ipi vai upe; tomboaviye rane ité che remimombehugüer yuvireco’ oyapave. <sup>18</sup> Iyavei evocoi cuña yaguasa-guasa tēi vahe eresepia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

## 18

### *Babilonia viapi agüer*

<sup>1</sup> Ipare asepia ambuae Tūpa rembiguai ipĩrata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi. <sup>2</sup> Iyavei oñehe pĩrata oico aipo ehi:

“¡oviapi tecua Babilonia cute!

Carugar yuviroique sese, opacatu carugar naporai vahe iyavei vĩrai vai nungar yuviroique sese.

<sup>3</sup> Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

<sup>4</sup> Evocoyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe peico vahe cheundar evocoi yangaipa rese imboyoyaēhi ãgua.

Iyavei ñepe yepe taperupiti eme imbaherasisa.

<sup>5</sup> Esepia niha, yangaipagüer oyepota ité ivave.

Tūpa evocoyase oyemomahenduha mbahe-mbahe tēi sembiapogüer rese chupe.

<sup>6</sup> Inungar ahe ambuae upe, ãgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

<sup>7</sup> pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapi vñte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

<sup>8</sup> Sese niha aviyeteramo tēi oura mbaherasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi secoi, ahe, ‘Tomano’ ehi chupe” ehi.

9 Evocoyase mborerecuar ivi pipendar yuvirecoi vahe co cuña re-sendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovīhai chira sese osepiase evocoi cuña rātachi yuvireco curi. 10 Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña! Esepia niha, co aviyeteramo tēi ou nde mombaraisu catusa” ehira yuvireco.

11 Evocoyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovīhai chietera evocoi tecua rese yuvireco. Esepia niha, ndipo iri chietera que vīrocua vahe rā imbahe yuvireco ichui, 12 co opacatu mbahe sepi vahe rā ahe: oro, guarepochi, ita iporañete ai vahe, mbohīr sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape śiacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; 13 mbahe serocuapri yahu vahe canela, tembihu moiacuasa; itaisi, mirra, mbahe śiacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosi vahe no, ovesa, cavayu, cāretomi iyavei mbiguai no. 14 Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

15 Evocoyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovīhai tēi chira yuvireco no, 16 iyavei aipo ehi tēira yuvireco:

“¡Too! ¡Iparaisu iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi, pīra vahe; oro pipe oyemboetei vahecuer, itami iporañete vahe pipe iyavei mbohīr sendi vahe pipe oyemboetei vahe no.

17 ¡Aviyeteramo tēi rumo opa ocañi imbahe eta ichui!” ehi.

Evocoyase opacatu ava carite guasu pipendar rerecuar, ava imbehi ivirindar carite guasu reroguatasar, i rupi oporaviqui vahe oyeupe nara mbahe rereco āgua, ahe opaño opita amombrive yuvireco ichui 18 iyavei co tecua rātachi repiase, ahese osapucaī pīrata tēi yuvireco: “¡Ndipoi eté niha yīpisui tecua na ehi vahe!” ehi yuvireco. 19 Ipare imboasipave omondo ivi cuhi oācave yuvireco, oyaseho iyavei ndoyembovīhai tēi, ipare osapucaī tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

20 Peyembovīhaño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe, opacatu Tūpa ñehe mombehusar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

21 Ahese Tūpa rembiguai iva pendar seco pīrata vahe osupi ita inungar mbahe mbocuhisa, ipare omombo para guasu pipe aipo ehi:



“Na ehi aveira tecua guasu Babilonia mocañisa.

Imombopri secoira.

Ipare ndapesepia iri chietera apirēhi vaherā” ehi.

<sup>22</sup> “Ndasendusa iri chietera ocar rupi arpa moñehesar, mimbí moñehesar, iyavei mimbí guasu moñehesar avei no; ndererecoi chietera ava oporaviqui vaherā, ndasendusa iri chiaveira ita mbahe mbocuhisa monarasa nde suindar.

<sup>23</sup> Iyavei ñepei yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pīrata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe” ehi

Tūpa rembiguai chupe.

<sup>24</sup> Esepia niha, evocoi tecua guasu pipe oyecua Tūpa ñehe mombehusar ruvi, Tūpa upendar ava ruvi, iyavei opacatu ava yucapri vahe ivi pipendar ruvi avei.

## 19

<sup>1</sup> Co pare, asendu ava rehi ñehe pīrata ivave aipo ehi vahe:

“¡Imboetepri yande Yar tasecoi!

Poropīsirosa, teco porañetesa iyavei ipīratasa ahe yande Ru Tūpa suindar.

<sup>2</sup> Esepia niha, ahe oyapo mbahe supi eté vahe,

“Tocañi’ ehise co cuña oyemboaguasa-guasa tēi vahe nungar tecua guasu upe evocoi niha oseco momara tēi vahe ava ivi pipendar güeco rai pipe; ichui Tūpa osepí oyeupendar” ehi.

<sup>3</sup> Ipare aipo ehi iri yuvireco no:

“¡Imboetepri yande Yar tasecoi!

Esepia niha, evocoi tecua rātachi ndopai chietera” ehi.

<sup>4</sup> Evocoiyase veinticuatro tupri iva pendar icuaiipri yuvirecoi vahe iyavei irungatu iva pendar yuvirecove vahe, ahe Tūpa mboeteisa pipe oyeaivi ivi rese yuvireco. Ipare aipo ehi yuvireco no: “¡Ēgüe tehi! ¡Imboetepri yande Yar tasecoi!” ehi. <sup>5</sup> Evocoiyase Tūpa renda sui tupri oyeendu ñehesa aipo ehi vahe:

“¡Pemboetei yande Ru Tūpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroya āgua!” ehi.

### *Pieta mendasa Ovesami resendar*

<sup>6</sup> Asendu avei ava rehi ñehe, inungar acoi itu guasu riapu, ndoyavii avei osunú guasu vahe aipo ehi:

“¡Imboetepri yande Yar tasecoi!

Esepia niha, yande Yar Tūpa opacatú mbahe mboavaisarēhi omboipi oporocuai.

<sup>7</sup> Tayayemboviha catu yaico iyavei tayamondo yande viharetesa, yande sapucaisa yande Ru Tūpa upe.

Esepia niha, cūrítei oyepota mendasa ari Ovesami upendar.

Sembireco evocoiyase opa oyemoingatu oico:

<sup>8</sup> chupe ipotasa iyemonde āgua turucuar secose vahe, ndiquihai, sendi vahe pipe.

Esepia niha, co turucuar secose vahe ‘Tūpa rese yuvirecoi vahe recocuer ihivi vahe’ oyapave aipo ehi” ehi.

<sup>9</sup> Evocoiyase Tūpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tūpa ñehesa supi tupri vahe ité” ehi.

<sup>10</sup> Ipare añenopiha Tūpa rembiguai rovai imboetei āgua. Ahe rumo aipo ehiño cheu: “Ēgüe erei rene. Esepia, che Tūpa rembiguai tēi aico nde nungar iyavei nde rivireta nungar uguata vahe Jesús ñehengagüer rupi. Emboetei Tūpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tūpa ñehe mombehusar upe.

### *Cavayu morochi vahe reroguatasar*

<sup>11</sup> Evocoiyase asepia íva oyemboi vahe. Aheve aviyeteramo tēi cavayu morochi vahe oyemboyecua, evocoiyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ívisa pipe oporocuai iyavei oyapo vavasa. <sup>12</sup> Sesa evocoiyase ndayaviyei eté acoi tata rendigüer; iyavei oāca rese setá vireco oyeguaca, iyavei vireco terer icuachiapri oyese; ahe güeraño ité oicua. <sup>13</sup> Iturucuar evocoiyase imopirapri tuvi pipe; serer evocoiyase, “Tūpa Ñehe” ehi. <sup>14</sup> Sundao rehii íva pendar saquícuerive yuvirecoi. Iturucuar secose vahe pāve morochí vahe, ndiquihai vahe avei. Ahe cavayu morochi vahe harive yuvirecoi. <sup>15</sup> Iyuru pipe sui osē quise pucu saimbe vahe opacatu ambuae-ae tecua rupindar momara āgua. Ahe oyocuaire oamotarēhisar guarepochi apopri opo pendar pipe. Iyavei osecoāhara inungar uva opive otiamii vahe yuvireco iyavei ombohura evocoi uva ricuer paraisu catusa resendar pipe. Ahese Tūpa mbahemboavaisarēhi oñemoiro itera chupe. <sup>16</sup> Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

<sup>17</sup> Ipare asepia Tūpa rembiguai opūha vahe arisave. Ahe osapucai pĩrata opacatu vĩrai mbahe rohoguar upe oveve vahe íva rese: “¡Perio! ¡Peñemonuha Tūpa suindar carusa guasusave; <sup>18</sup> pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!” ehi.

<sup>19</sup> Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava āgua evocoi cavayu hari pendar rese iyavei isundao rese avei no. <sup>20</sup> Co mbahe ipi vai yipindar vahe soquendasa, oyoya evocoi Tūpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tēi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoiyase co mbahe ipi vai iyavei Tūpa ñehe mombehusar angahu tēi, ahe opa imombosa secove reseve ipa azufre ocai vahe pipe yuvireco. <sup>21</sup> Ambuae evocoiyase evocoi cavayu morochi vahe hari pendar yuru pipe sui osē vahe quise pucu pipe opa omano yuvireco. Evocoiyase opacatu vĩrai mbahe rohoguar opa soho pipe oyemohitaro yuvireco.

## 20

*Mil araviter resendar ñehesa*

<sup>1</sup> Ipare asepia Tūpa rembiguai ogüeyi vahe ou iva sui ivicuar guasu ipicucu vahe mboyasar iyavei carena ipo guasu vahe opove vireco. <sup>2</sup> Ipare oipisi mbahe ipi oporomocañi vahe mboi nungar aracahendar, ahe niha Carugar secói, Satanás serer vahe; ahe oicuhacua carena pipe mil araviter rupi imoi. <sup>3</sup> Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tēi iriēhi āgua rese acói osupitise voi mil araviter. Coiye rumo mil araviter pare, imosesa raimi tēira.

<sup>4</sup> Ipare asepia tenda, iharive setá ava uguapi yuvinoi evocói oipisi vahe omborerecuasa yuvireco ava upe mbahe rese porandu āgua. Iyavei asepia ava hā evocói opa vahecuer oyasia ñaca yuvireco Jesús recocuer mombehusa sui tēi iyavei Tūpa Ñehengagüer mombehusa pipe sui tēi avei. Ahe ava nomboetei vahe mbahe ipi vai yuvireco; sahanga avei nomboetei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco. <sup>5</sup> Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter. <sup>6</sup> ¡Sorivete catu acói ava vireco vahe yipindar cuerayevisa yuvireco! ¡Esepia niha, ahe Tūpa upendar ité yuvirecoi! Imoñuviriosa manosa evocoiyase chupe ndipo iri eté. Ēgüe ehira rumo ahe Tūpa upe naraño ité pahí yuvirecoira, Cristo upe avei. Ipare mborerecuar yuvirecoira sese mil araviter rupi.

### *Carugar recopisa*

<sup>7</sup> Acoi osupitise rumo mil araviter cute, ahese Carugar yorasara soquendasa sui. <sup>8</sup> Ichui osēra opacatú ava ivi pipendar mbopa-mbopa tēi oico; osēra ivi Gog mbopa tēi āgua, ivi Magog mbopa tēi āgua avei. Ipare omonuhara vavasave nara isundao eta. Esepia niha, ahe sehí etepri yuvireco inungar ivi cuhi para guasu popi rupindar.

<sup>9</sup> Ēgüe ehi yugüeru atí amombri sui, oyerepa tupri Tūpa recua rese yuvireco no, evocói tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi. <sup>10</sup> Carugar evocoiyase, ava mbopa-mbopa tēisar, ahe opa imombosa ipa azufre ocai vahe pipe. Aheve acói opa imombosa mbahe ipi vai iyavei Tūpa ñehe mombehusar angahu tēi vahe avei no. Aheve iparaisura pītu, ari yuvireco apirēhi vaherā.

### *Tūpa uguapira güendave ava recocuer rese porandu āgua ari ipa vahe pipe*

<sup>11</sup> Evocoiyase asepia tenda imboeteipri, morochi vahe. Iharive oime ava uguapi vahe oī. Sovai ivi iyavei iva opa ocañi tupri tēi. Ndoyecua iri eté co coti rupi yuvireco. <sup>12</sup> Ipare asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoiyase porandusa evocói cuachiar pipendar mbahe sembiapogüer rese. <sup>13</sup> Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatú mbahe sembiapogüer rese porandusa yuvireco chupe no. <sup>14</sup> Ipare manosa recua opa imondosa tata nungar ipa pipe. Evocói ipa niha imoñuviriosa manosa. <sup>15</sup> Aheve opa imondosa acói ndovirecoi vahe güerer icuachiapri cuachiar tecovesa resendar pipe.

## 21

*Iva piasu iyavei ivi piasu*

<sup>1</sup> Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no. <sup>2</sup> Che asepia tecua nimarai vahe, ahe Jerusalén piasu, evocoi ogüeyi vahe Tüpa sui ou. Opacatu imoingatusa tupri vahe, inungar acoi cuña omenda água oyemboetei tupri omevi upe. <sup>3</sup> Ipare asendu ñehesa pĩrata tenda suindar aipo ehi vahe: “Tüpa cūrítei oicove ava rehi pāhu rupi oico. Ahe oicove vahe rā ité sese yuvireco yepi, ahe ava evocoyase chupe nara ité yuvirecoira. Ahe teieté niha secoira yuvireco chupe. <sup>4</sup> Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira vīharēhisa, tecoaśisa avei chupe. Esepia niha, opacatu mbahe oime vahecuer yipindar, ndipo iri eté” ehi.

<sup>5</sup> Ahese evocoi uguapi vahe tenda harive oĩ, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

<sup>6</sup> Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepii vahe pipe. <sup>7</sup> Acoi ava oyemoviracua vahe ité mbahe-mbahe tēi apoēhi água, ahe oipisira co mbahe opacatu omahera yuvireco. Evocoyase che acora chupendar ité, ahe evocoyase che rahir ité yuvirecoira. <sup>8</sup> Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pĩrata vahe pipe. Ahe niha imoñuvirío manosa” ehi.

*Tecua Jerusalén piasu*

<sup>9</sup> Evocoyase ou ñepeí siete Tüpa rembiguai pāhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, ambayecuara cuña omenda vahevi ndeu, Ovesami rembirecovi” ehi. <sup>10</sup> Evocoi che quer nungar pipe Espiritu osepia uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tüpa sui. <sup>11</sup> Ahe tecua sendí iteanga Tüpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipĩrerimi vahe rese. <sup>12</sup> Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepeí-peí Tüpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. <sup>13</sup> Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no. <sup>14</sup> Tecua guasu áchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

<sup>15</sup> Evocoi Tüpa rembiguai oñehe vahe cheu vireco vara oro apopri tecua rāha água, opacatu soquendipi rāha água, ñachisa rāha água avei no. <sup>16</sup> Tecua guasu pucucuer oyoya tupri ipigüer rese. Evocoyase Tüpa rembiguai osāha tecua guasu ruvichagüer; osāhase ipucucuer dos mil doscientos kilómetro tupri ité; ipucucuer, ihivategüer iyavei ipigüer oyoya

pāve tupri ité no. <sup>17</sup> Ipare osāha ñachisa: osāhase ipigüer sesenta y cinco metro tupri. Evocoi Tūpa rembiguai osāha ava rembiporu pipe.

<sup>18</sup> Tecua āchisa ahe ita porañete vahe Jaspe serer vahe apopri; tecua evocoyase oro pāve tupri, aviye vidrio secose catu vahe. <sup>19</sup> Ñachisa moviracuasa vireco opacatu ambuae ita-ita tēi iporañete vahe pāve: yipindar iviracuasa jaspe, imoñuviriosa zafiro, imombosapisa ágata; imoirungatasa esmeralda; <sup>20</sup> imbopoyandeposa ónice; imoñepeí ovasa, cornalina; imoñuvirío ovasa, crisólito; imombosapí ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirío yovaivesa, amatista. <sup>21</sup> Doce tupri vahe oquenda guasu ahe doce tupri mbohír; ñepeí-peí oquenda ñepeí mbohír sui yapopri. Calle guasu tecua aviter rupindar evocoyase oro pāve, inungar vidrio yande porēhi tupri vahe ipipe.

<sup>22</sup> Ndasepiai eté evocoi tecua guasu pipe ñepeí yepe tūparo. Esepia niha, yande Yar Tūpa mbahe mboavaisarēhi, Ovesami reseve yuvirecoi aheve. <sup>23</sup> Evocoi tecua guasu ndovireco iri eté ari, yasi güesape āgua. Esepia niha, Tūpa ité osesape güendigüer pipe, iyavei Ovesami tataendi nungar secó aheve yuvirecoi vahe upe. <sup>24</sup> Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvireco chupe. <sup>25</sup> Evocoyase soquendipi nimboyasai chietera ari yacatu rupi. Pītu ndipoi chiaveira aheve. <sup>26</sup> Ipare opara aheve ambuae tecua mbahe eta, porañete vahe omoingue yuvireco; <sup>27</sup> ava angaipa viyar rumo, Tūpa remimbotarēhi oyapo vahe, iporombopa serai vahe, ahe ndoyuviroiquei chietera aheve. Ēgüe ehi rumo acóí ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

## 22

<sup>1</sup> Ipare Tūpa rembiguai omboyecua íai tecovesa resendar cheu, tīpiu, oyecua tupri, osē vahe Tūpa iyavei Ovesami renda porañete vahe sui. <sup>2</sup> Calle guasu mbiter rupi oso. Iyavei íai íque yacatú oime ivira tecovesa resendar, íha vahe doce yupagüer rupi ñepeí araviter pipe. Iyavei evocoi ivira ro aviye ai ava opacatu rupindar mbogüera āgua. <sup>3</sup> Ndipoi chietera aheve que mbahe tēivri pendar. Tūpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco. <sup>4</sup> Osepiara sova iyavei virecora serer osiva rese yuvireco. <sup>5</sup> Aheve ndipoi chietera pītu, iyavei ava aheve yuvirecoi vahe ndosecai chietera tataendi. Ndosecai chiaveira que ari güesape āgua yuvireco. Esepia niha, yande Yar Tūpa teieté osesapera. Ipare ahe ava mborerecuar apirēhi vahe rā ité yuvirecoira sese.

*Cōimi eté Jesucristo yevi āgua*

<sup>6</sup> Ipare Tūpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tūpa acóí omboyecua tupri vahe mbahe oyesuindar oñehe mombehúsar upe, ahe ombou güembiguai iva pendar mbahe omboaviye poyava voi vahe rā mboyecua āgua viroyasareta upe” ehi.

<sup>7</sup> “¡Ayeví poyava voira curi! ¡Sorivete catura acóí ava viroya vahe ñehesa Tūpa suindar mbahe oime vahe rā resendar co cuachiar pipe!” ehi.

<sup>8</sup> Che, Juan, asepia iyavei asendu ité co mbahe. Sendu pare voi, añenopiha evocoi Tūpa rembiguai rovai imboetei āgua viña. <sup>9</sup> Ahe rumo aipo ehiño cheu: “Aní ereñenopiha che rovai. Esepia niha, che Tūpa rembiguai tēi aico, nde nungar, nde rivireta nungar avei evocoi oñehe vahe Tūpa Ñhengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tūpa catu pemboetei” ehi.

<sup>10</sup> Aipo ehi avei cheu no: “Ereicuacui rene co ñehesa Tūpa suindar mbahe oime vaherã resendar sereco, evocoi icuachiapri cuachiar pipe. Esepia niha, ari cōimi secoi imboaviye āgua. <sup>11</sup> Acoi ava mbahe tēi aposar, toyapoño mbahe tēi; iyavei acoi ava seco rai vahe, taseco raiño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tūpa upe oyemondo tupri vahe ité, ahe taseco tupriño avei oico chupe” ehi.

<sup>12</sup> “Supi eté ayevi poyavara, iyavei arura mbahe porerecosa ñepeipei ava rembiapogüer rupi-rupi amondo vaherã chupe. <sup>13</sup> Che aico inungar letra A iyavei Z, yipindar vahe, ipandar vahe avei no; yipive vahe ité apirēhi vaherã” ehi.

<sup>14</sup> “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirēhi vahe resendar. Ipipe sui oiquera tecua guasu pipe. <sup>15</sup> Ava rehi ndiporeroyai vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyerocu vahe, iyavei opacatu ava oipota rai vahe oporombopa-mbopa tēi āgua yepi” ehi.

<sup>16</sup> “Che, Jesús, amondo che rembiguai iva pendar mbahe mombehu āgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

<sup>17</sup> Espiritu Santo iyavei Ovesami rebireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepi vahe yuvireco.

<sup>18</sup> Opacatu acoi ava osendu vahe co ñehesa Tūpa suindar mbahe oime vaherã resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapi iri vahe, ahe chupe Tūpa omboyeapi aveira co cuachiar pipendar mbahe-mbahe tēi imombehupri. <sup>19</sup> Amove que ava virocua vahe co cuachiar pipe sui ñehesa Tūpa suindar, Tūpa avei evocoiyase ndoipotai chira chupe co cuachiar pipe imombehupri ivira ha tecovesa resendar rereco āgua iyavei co tecua maranehi pipe sei que āgua.

<sup>20</sup> Acoi co mbahe mombehusar aipo ehi: “Supi eté ayevi poyavara” ehi.

Ëgüe tehi ayase. ¡Erio, che Yar Jesús!

<sup>21</sup> Yande Yar Jesucristo tape rovasa opacatu. Aviye, aipo rupive.